

Namo tassa bhagavato arahato sammāsambuddhassa

Majjhimanikāye

Majjhimaṇṇāsa-aṭṭhakathā

1. Gahapativaggo

1. Kandarakasuttavaṇṇanā

1. Evaṃ me sutanti kandarakasuttaṃ. Tattha **campāyanti** evaṃnāmake nagare. Tassa hi nagarassa ārāmapokkharāṇīdāsu tesu tesu ṭhānesu campakarukkhāva ussannā ahesuṃ, tasmā campāti saṅkhamagamāsi. **Gaggarāya pokkharāṇiyā tīreti** tassa campānagarassa avidūre gaggarāya nāma rājamahesiyā khaṇitattā **gaggarāti** laddhavohārā pokkharāṇī atthi. Tassā tīre samantato nīlādīpañcavaṇṇakusumapaṭimaṇḍitaṃ mahantaṃ campakavanaṃ. Tasmim bhagavā kusumagandhasugandhe campakavane viharati. Taṃ sandhāya “gaggarāya pokkharāṇiyā tīre”ti vuttaṃ. **Mahatā bhikkhusaṅghena saddhinti** adassitaparicchena mahantena bhikkhusaṅghena saddhim. **Pessoti** tassa nāmaṃ. **Hatthārohaputtoti** hatthācariyassa putto. **Kandarako ca paribbājakoti** kandarakoti evaṃnāmo channaparibbājako. **Abhivādetvāti** chabbaṇṇānaṃ ghanabuddharasmīnaṃ antaraṃ pavisitvā pasannaalākhārāse nīmuḍḍamāno viya, siṅḡisuvaṇṇavaṇṇaṃ dussavaraṃ pasāretvā sasīsaṃ pārupamāno viya, vaṇṇagandhasampannacampakapupphāni sirasā sampaṭicchanto viya, sinerupādaṃ upagacchanto puṇṇacando viya bhagavato cakkalakkhaṇapaṭimaṇḍite alattakavaṇṇaphullapadumasassirike pāde vanditvāti attho. **Ekamantaṃ nisīdīti** chanisajjadosavirahite ekasmim okāse nisīdīti.

Tuṇhībhū taṃ tuṇhībhūtanti yato yato anuviloketi, tato tato tuṇhībhūtamevāti attho. Tattha hi ekabhikkhussāpi hatthakukkuccaṃ vā pādakukkuccaṃ vā natthi, sabbe bhagavato ceva gāravena attano ca sikkhitasikkhatāya aññaṃaññaṃ vigatasallāpā antamaso ukkāsitassaddampi akarontā sunikhātāindakhīlā viya nivātaṭṭhāne sannisinnaṃ mahāsamuddaudakaṃ viya kāyenāpi niccalā manasāpi avikkhittā rattavalāhakā viya sinerukūṭaṃ bhagavantaṃ parivāretvā nisīdimṃsu. Paribbājakassa evaṃ sannisinnaṃ parisam disvā mahantaṃ pītisomanassaṃ uppajji. Uppannaṃ pana antohadayasmimyeva sannidahitum asakkonto piyasamudāhāraṃ samuṭṭhāpesi. Tasmā **acchariyaṃ bhoti**ādīmāha.

Tattha andhassa pabbatārohanaṃ viya niccaṃ na hotīti **acchariyaṃ**. Ayaṃ tāva saddanayo. Ayaṃ pana aṭṭhakathānayo, accharāyogganti **acchariyaṃ**. Accharaṃ paharitaṃ yuttanti attho. Abhūtapubbaṃ bhūtanti **abbhutaṃ**. Ubhayampetaṃ vimhayassevādhivacanaṃ. Taṃ panetaṃ garahaacchariyaṃ, pasamsāacchariyanti duvidhaṃ hoti. Tattha acchariyaṃ moggallāna abbhutaṃ moggallāna, yāva bāhāgahaṇāpi nāma so moghapuriso āgamaṃsatīti (cūlava. 383; a. ni. 8.20), idaṃ garahaacchariyaṃ nāma. “Acchariyaṃ nandaṃāte abbhutaṃ nandaṃāte, yatra hi nāma cittuppādampi parisodhessaṃsīti (a. ni. 7.53) idaṃ pasamsāacchariyaṃ nāma. Idhāpi idameva adhippetam” ayañhi taṃ pasamsanto evamāha.

Yāvañcidanti ettha **idanti** nipātamattaṃ. **Yāvāti** pamāṇaparicchedo, yāva sammā paṭipādito, yattakena pamāṇena sammā paṭipādito, na sakkā tassa vaṇṇe vattum, atha kho acchariyamevetam abbhutamevetanti vuttaṃ hoti. **Etaparamamevāti** evaṃ sammā paṭipādito eso bhikkhusaṅgho tassāpi bhikkhusaṅghassa paramoti etaparamo, taṃ etaparamaṃ yathā ayaṃ paṭipādito, evaṃ paṭipāditaṃ katvā paṭipādesum, na ito bhīyyoti attho. Dutīyanaye evaṃ paṭipādessanti, na ito bhīyyoti yojetabbaṃ. Tattha **paṭipādītōti** ābhisamācārikavattaṃ ādim katvā sammā apaccanīkapaṭipattiyaṃ yojito. Atha kasmā ayaṃ

paribbājako atītānāgate buddhe dasseti, kimassa tiyaddhājānanañāṇaṃ atthīti. Natthi, nayaggāhe pana thatvā “yenākārena ayaṃ bhikkhusaṅgho sannisinno danto vinīto upasanto, atītabuddhāpi etaparamaṃyeva katvā paṭipajjāpesuṃ, anāgatabuddhāpi paṭipajjāpessanti, natthi ito uttari paṭipādanā”ti maññamāno anubuddhiyā evamāha.

2. Evametaṃ kandarakāti pāṭiekkō anusandhi. Bhagavā kira taṃ sutvā “kandaraka tvam bhikkhusaṅghaṃ upasantoti vadasi, imassa pana bhikkhusaṅghassa upasantakāraṇaṃ tuyhaṃ apākaṭaṃ, na hi tvam samatimsa pāramiyā pūretvā kusalamūlaṃ paripācetvā bodhipallaṅke sabbaññutaññāṇaṃ paṭivijjhi, mayā pana pāramiyo pūretvā ñātathacariyaṃ lokatthacariyaṃ buddhatthacariyaṃ ca koṭiṃ pāpetvā bodhipallaṅke sabbaññutaññāṇaṃ paṭividdhaṃ, mayhaṃ etesaṃ upasantakāraṇaṃ pākaṭa”nti dassetuṃ imaṃ desanaṃ ārabhi.

Santi hi kandarakāti ayampi pāṭiekkō anusandhi. Bhagavato kira etadahosi – “ayaṃ paribbājako imaṃ bhikkhusaṅghaṃ upasantoti vadati, ayaṃca bhikkhusaṅgho kappetvā pakappetvā kuhakabhāvena iriyāpathaṃ saṅghapento cittaṃ anupasanto na upasantākāraṇaṃ dasseti. Ettha pana bhikkhusaṅghe paṭipadaṃ pūrayamānāpi paṭipadaṃ pūretvā matthakaṃ patvā ṭhitabhikkhūpi atthi, tattha paṭipadaṃ pūretvā matthakaṃ pattā attanā paṭividdhaguṇeheva upantā, paṭipadaṃ pūrayamānā uparimaggassa vipassanāya upantā, ito muttā pana avasesā catūhi satipaṭṭhānehi upantā. Taṃ nesaṃ upasantakāraṇaṃ dassessāmi”ti “iminā ca iminā ca kāraṇena ayaṃ bhikkhusaṅgho upasanto”ti dassetuṃ “santi hi kandarakā”tiādīmāha.

Tattha **arahanto khīṇāsavāti**ādīsu yaṃ vattabbaṃ, taṃ mūlapariyāyasuttavaṇṇanāyameva vuttaṃ. Sekhapaṭipadampi tattheva vitthāritaṃ. **Santatasīlāti** satatasīlā nirantarasiḷā. **Santatavuttinoti** tasseva vevacanaṃ, santatajīvikā vātipi attho. Tasmim̐ santatasīle thatvāva jīvikaṃ kappenti, na dussīlyaṃ maraṇaṃ pāpuṇantīti attho.

Nipakāti nepakkena samannāgatā paññavanto. **Nipakavuttinoti** paññāya vuttino, paññāya thatvā jīvikaṃ kappenti. Yathā ekacco sāsane pabbajitvāpi jīvitakāraṇā chasu agocaresu carati, vesiyāgocaro hoti, vidhavaṭṭhullakumārikapaṇḍakapānāgārābhikkhunigocaro hoti. Saṃsaṭṭho viharati rājūhi rājamahāmattehi titthiyehi titthiyasāvakehi ananulomikena gihisaṃsaggena (vibha. 514), vejjakammaṃ karoti, dūtakammaṃ karoti, paṇḍakammaṃ karoti, gaṇḍaṃ phāleti, arumakkhanaṃ deti, uddhaṃvirecanaṃ deti, adhovirecanaṃ deti, natthutelaṃ pacati, pivanatelaṃ pacati, veḷudānaṃ, pattadānaṃ, pupphadānaṃ, phaladānaṃ, sinānadānaṃ, dantakaṭṭhadānaṃ, mukhodakadānaṃ, cuṇṇamattikadānaṃ deti, cāṭukamyāṃ karoti, muggasūpiyaṃ, pāribhaṭṭaṃ, jaṅghapesaniyaṃ karotīti ekavīsatividhāya anesanāya jīvikaṃ kappento anipakavutti nāma hoti, na paññāya thatvā jīvikaṃ kappeti, tato kālakiriyaṃ katvā **samaṇayakkho** nāma hutvā “tassa saṅghāṭipi ādittā hoti sampajjalitā”ti vuttanayena mahādukkhaṃ anubhoti. Evaṃvidhā ahutvā jīvitahetupi sikkhāpadaṃ anatikkamanto catupārisuddhisīle paṭiṭṭhāya yathābalaṃ buddhavacanaṃ uggaṇhitvā rathavinītaṭipadaṃ, mahāgosiṅgaṭipadaṃ, mahāsuññataṭipadaṃ, anaṅgaṇaṭipadaṃ, dhammadāyādaṭipadaṃ, nālakapaṭipadaṃ, tuvaṭṭakapaṭipadaṃ, candopamaṭipadanti imāni ariyaṭipadāni pūrento catupaccaya-santosa-bhāvanārāma-ariyavaṃsaṭipattiyaṃ kāyasakkhino hutvā anikā nikkhantahatthī viya yūthā viṣaṭṭhasiḷho viya nipacchābandhamahānāvā viya ca gamaṇādīsu ekavīhārino vipassanaṃ paṭṭhapetvā ajjaajjeva arahattanti pavattaussāhā viharantīti attho.

Suppatitṭhitacittāti catūsu satipaṭṭhānesu suṭṭhapitacittā hutvā. Sesā satipaṭṭhānakathā heṭṭhā vitthāritāva. Idha pana lokiyalokuttaramissakā satipaṭṭhānā kathitā, ettakena bhikkhusaṅghassa upasantakāraṇaṃ kathitaṃ hoti.

3. Yāva supaññattāti yāva suṭṭhapitā sudesitā. **Mayampi hi, bhanteti** iminā esa attano kārakabhāvaṃ dasseti, bhikkhusaṅghaṃca ukkhipati. Ayañhettha adhippāyo, mayampi hi, bhante, gihi... pe... suppatitṭhitacittā viharāma, bhikkhusaṅghassa pana ayameva kasi ca bījaṃca yuganaṅgalaṃca

phālapācanañca, tasmā bhikkhusaṅgho sabbakālaṃ satipaṭṭhānaparāyaṇo, mayama pana kālena kālaṃ okāsaṃ labhivā etaṃ manasikāraṃ karoma, mayampi kārakā, na sabbaso vissaṭṭhakammaṭṭhānāyevāti. **Manussagahaneti** manussānaṃ ajjhāsayaḡahanena gahanatā, ajjhāsayaṣāpi nesama kilesaḡahanena gahanatā veditabbā. **Kasaṭasaṭtheyyesupi** eseva nayo. Tattha aparisuddhaṭṭhena **kasaṭatā**, kerāṭiyaṭṭhena **sāṭtheyyatā** veditabbā. **Sattānaṃ hitāhitama jānātīti** evama gahanakasaṭakerāṭiyānaṃ manussānaṃ hitāhitapaṭipadaṃ yāva suṭṭhu bhagavā jānāti. **Yadidaṃ pasavoti** ettha sabbāpi catuppadajāti pasavoti adhippetā. **Pahomīti** sakkomi. **Yāvatakena antarenāti** yattakena khaṇena. **Campaṃ gatāgataṃ karissatīti** assamaṇḡalato yāva campānagaradvārā gamanañca āgamanañca karissati. **Sāṭtheyyānīti** saṭhattāni. **Kūṭtheyyānīti** kūṭattāni. **Vankeyyānīti** vanḡattāni. **Jimheyānīti** jimhattāni. **Pātukarissatīti** pakāṣessati dassessati. Na hi sakkā tena tāni ettakena antarena dassetuṃ.

Tattha yassa kismiñcideva ṭhāne ṭhātukāmassa sato yama ṭhānaṃ manussānaṃ sappaṭibhayaṃ, purato gantvā vañcetvā ṭhassāmīti na hoti, tasmim ṭhātukāmaṭṭhāneyeva nikhātattambho viya cattāro pāde niccale katvā tiṭṭhati, ayama **saṭho** nāma. Yassa pana kismiñcideva ṭhāne avacchinditvā khandhagataṃ pātetukāmassa sato yama ṭhānaṃ manussānaṃ sappaṭibhayaṃ, purato gantvā vañcetvā pātesāmīti na hoti, tattheva avacchinditvā pātetī, ayama **kūṭo** nāma. Yassa kismiñcideva ṭhāne maggā ukkamma nivattitvā paṭimaggama ārohitukāmassa sato yama ṭhānaṃ manussānaṃ sappaṭibhayaṃ, purato gantvā vañcetvā evama karissāmīti na hoti, tattheva maggā ukkamma nivattitvā paṭimaggama ārohati, ayama **vanḡo** nāma. Yassa pana kālena vāmato kālena dakkhiṇato kālena ujumaggeneva gantukāmassa sato yama ṭhānaṃ manussānaṃ sappaṭibhayaṃ, purato gantvā vañcetvā evama karissāmīti na hoti, tattheva kālena vāmato kālena dakkhiṇato kālena ujumaggama gacchati, tathā laṇḡama vā passāvaṃ vā vissajjetukāmassa sato idaṃ ṭhānaṃ susammaṭṭhaṃ ākiṇṇamanussaṃ ramaṇīyama, imasmim ṭhāne evarūpaṃ kātuṃ na yuttaṃ, purato gantvā paṭicchannaṭhāne karissāmīti na hoti, tattheva karoti, ayama **jimho** nāma. Iti imaṃ catubbidhampi kiriyaṃ sandhāyetaṃ vuttaṃ. Sabbāni tāni sāṭtheyyāni kūṭtheyyāni vankeyyāni jimheyāni pātukarissatīti evama karontāpi te saṭhādayo tāni sāṭtheyyādīni pātukaronti nāma.

Evama pasūnaṃ uttānabhāvaṃ dassetvā idāni manussānaṃ gahanabhāvaṃ dassento **amhākaṃ pana, bhanteti**ādīmāha. Tattha **dāsāti** antojātakā vā dhanakkītā vā karamarānītā vā sayama vā dāsabyama upagatā. **Pessāti** pesanakārakā. **Kammakarāti** bhattavetanabhatā. **Aññathāva kāyenāti** aññenevākārena kāyena samudācaranti, aññenevākārena vācāya, aññena ca nesama ākārena cittaṃ ṭhitaṃ hotīti dasseti. Tattha ye sammukhā sāmike disvā paccuggamanaṃ karonti, hatthato bhaṇḡakaṃ gaṇhanti, imaṃ vissajjetvā imaṃ gaṇhantā sesānīpi āsana-paññāpana-tālavaṇṭabījana-pādadhovanādīni sabbāni kiccāni karonti, parammukhakāle pana telampi uttarantaṃ na olokenti, satagghanakepi saḡassagghanakepi kamme pariḡāyante nivattitvā oloketumpi na icchanti, ime aññathā kāyena samudācaranti nāma. Ye pana sammukhā “amhākaṃ sāmī amhākaṃ ayyo”tiādīni vatvā pasamaṣanti, parammukhā avattabbaṃ nāma natthi, yama icchanti, taṃ vadanti, ime aññathā vācāya samudācaranti nāma.

4. Cattārome pessapuggalāti ayampi pāṭiekkko anusandhi. Ayañhi pesso “yāvañcidaṃ, bhante, bhagavā evama manussagahaṇe evama manussakasaṭe evama manussasāṭtheyye vattamāne sattānaṃ hitāhitama jānāti”ti āha. Purime ca tayo puggalā ahitapaṭipadaṃ paṭipannā, upari catuttho hitapaṭipadaṃ, evamaḡamaṃ sattānaṃ hitāhitama jānāmīti dassetuṃ imaṃ desanaṃ ārabhi. Heṭṭhā kandarakassa kathāya saddhim yojetumpi vaṭṭati. Tena vuttaṃ “yāvañcidaṃ bhotā gotamena sammā bhikkhusaṅgho paṭipādito”ti. Athassa bhagavā “purime tayo puggale pahāya upari catutthapuggalassa hitapaṭipattiyamaeva paṭipādemī”ti dassentopi imaṃ desanaṃ ārabhi. **Santoti** idaṃ saṃvijjamānāti padasseva vevacanaṃ. “Santā honti samitā vūpasantā”ti (vibha. 542) ettha hi niruddhā santāti vutta. “Santā ete vihārā ariyassa vinaye vuccantī”ti ettha (ma. ni. 1.82) nibbutā. “Santo have sabbhi pavedayanti”ti ettha (jā. 2.21.413) paṇḡitā. Idha pana vijjamānā upalabbhamānāti attho.

Attantapādīsu attānaṃ tapati dukkhāpetīti **attantapo**. Attano paritāpanānuyogaṃ **attaparitāpanānuyogaṃ**. Paraṃ tapati dukkhāpetīti **parantapo**. Paresama paritāpanānuyogaṃ

paraparitāpanānuyogaṃ. Diṭṭheva dhammeti imasmimyeva attabhāve. **Nicchātoti** chātaṃ vuccati taṅhā, sā assa natthīti nicchāto. Sabbakilesānaṃ nibbutattā **nibbuto**. Anto tāpanakilesānaṃ abhāvā sītalo jātoti **sītibhūto**. Jhānamaggaphalanibbānasukhāni paṭisaṃvedetīti **sukhapaṭisaṃvedī**. **Brahmabhūtena attanāti** seṭṭhabhūtena attanā. **Cittaṃ ārādhetīti** cittaṃ sampādeti, paripūreti gaṇhāti pasādetīti attho.

5. Dukkhapāṭikkūlanti dukkhassa paṭikkūlaṃ, paccanīkasaṅghitaṃ dukkhaṃ apatthayamānanti attho.

6. Paṇḍitoti idha catūhi kāraṇehi paṇḍitoti na vattabbo, satipaṭṭhānesu pana kammaṃ karotīti paṇḍitoti vattuṃ vaṭṭati. **Mahāpaññoti** idampi mahante atthe pariggaṇhātītiadinā mahāpaññalakkhaṇena na vattabbaṃ, satipaṭṭhānapariggāhikāya pana paññāya samannāgatattā mahāpaññoti vattuṃ vaṭṭati. **Mahatā atthena saṃyutto agamissāti** mahatā atthena saṃyutto hutvā gato bhaveyya, sotāpattiphalam pāpuṇeyyāti attho. Kiṃ pana yesaṃ maggaphalānaṃ upanissayo atthi, buddhānaṃ sammukhībhāve ṭhitepi tesam antarāyo hotīti. Āma hoti, na pana buddhe paṭicca, atha kho kiriyaparihāniyā vā pāpamittatāya vā hoti. Tattha kiriyaparihāniyā hoti nāma – sace hi dhammasenāpati dhanañjānissa brāhmaṇassa āsayam ñatvā dhammaṃ adesayissā, so brāhmaṇo sotāpanno abhavissā, evaṃ tāva kiriyaparihāniyā hoti. Pāpamittatāya hoti nāma – sace hi ajātasattu devadattassa vacanaṃ gahetvā pitughātakammaṃ nākarissā, sāmāññaphalasuttakathitadivaseva sotāpanno abhavissā, tassa vacanaṃ gahetvā pitughātakammassa katattā pana na hoti, evaṃ pāpamittatāya hoti. Imassāpi upāsakassa kiriyaparihāni jātā, apariniṭṭhitāya desanāya uṭṭahitvā pakkanto. **Apica, bhikkhave, ettāvā tēpi pessa hatthārohaputto mahatā atthena saṃyuttoti** katarena mahantena atthena? Dvīhi ānisaṃsehi. So kira upāsako saṅghe ca pasādaṃ paṭilabhi, satipaṭṭhānapariggahaṇatthāya cassa abhinavo nayo udapādi. Tena vuttaṃ ‘‘mahatā atthena saṃyutto’’ti. Kandarako pana saṅghe pasādameva paṭilabhi. **Etassa bhagavā kāloti** etassa dhammakkhānassa, catunnaṃ vā puggalānaṃ vibhajanassa kālo.

8. Orabbhikādīsu urabbhā vuccanti eḷakā, urabbhe hanatīti **orabbhiko**. **Sūkarikādīsopi** eseva nayo. **Luddoti** dāruṇo kakkhaḷo. **Macchaghātakoti** macchabandhakevaṭṭo. **Bandhanāgārikoti** bandhanāgāragopako. **Kururakammantāti** dāruṇakammantā.

9. Muddhāvasittoti khattiyābhisekena muddhani abhisitto. **Puratthimena nagarassāti** nagarato puratthimadisāya. **Santhāgāranti** yaññasālaṃ. **Kharājinaṃ nivāsetvāti** sakhuraṃ ajinacammaṃ nivāsetvā. **Sappitelenāti** sappinā ca telena ca. Ṭhapetvā hi sappiṃ avaseso yo koci sneho telanti vuccati. **Kaṇḍūvamānoti** nakhānaṃ chinnattā kaṇḍūvitabbakāle tena kaṇḍūvamāno. **Anantarahitāyāti** asanthatāya. **Sarūpavacchāyāti** sadisavacchāya. Sace gāvī setā hoti, vacchopi setakova. Sace gāvī kabarā vā rattā vā, vacchopi tādiso vāti evaṃ sarūpavacchāya. **So evamāhāti** so rājā evaṃ vadeti. **Vacchatarāti** taruṇavacchakabhāvaṃ atikkantā balavavacchā. **Vacchatarīsopi** eseva nayo. **Barihisatthāyāti** parikkhepakaraṇatthāya ceva yaññabhūmiyaṃ attharaṇatthāya ca. Sesam heṭṭhā tattha tattha vitthāritattā uttānamevāti.

Papañcasūdaniyā majjhimanikāyaṭṭhakathāya

Kandarakasuttavaṇṇanā niṭṭhitā.

2. Aṭṭhakanāgarasuttavaṇṇanā

17. Evaṃ me sutanti aṭṭhakanāgarasuttaṃ. Tattha **beluvagāmaketi** vesāliyā dakkhiṇapasse avidūre beluvagāmakō nāma atthi, taṃ gocaragāmaṃ katvāti attho. **Dasamoti** so hi jātigottavasena ceva sārappattakulagaṇanāya ca dasame ṭhāne gaṇiyati, tenassa dasamotveva nāmaṃ jātamaṃ. **Aṭṭhakanāgaroti** aṭṭhakanagaravāsī. **Kukkuṭārāmōti** kukkuṭasetṭhinā kārito ārāmo.

18. Tena bhagavatā...pe... akkhātoti ettha ayaṃ saṅkhepattho, yo so bhagavā samatiṃsa pāramiyo pūretvā sabbakilese bhañjitvā anuttaraṃ sammāsambodhiṃ abhisambuddho, tena bhagavatā, tesam tesam sattānaṃ āsayānusayaṃ **jānatā**, hatthatale t̥hapitaāmalakaṃ viya sabbaṃ ñeyyadhammaṃ **passatā**. Apica pubbenivāsādīhi jānatā, dibbena cakkhunā passatā, tīhi vijjāhi chahi vā pana abhiññāhi jānatā, sabbattha appaṭihatena samantacakkhunā passatā, sabbadhammajānanasamatthāya paññāya jānatā, sabbasattānaṃ cakkhuvisayātītāni tirokuṭṭādīgatānīpi rūpāni ativisuddhena maṃsacakkhunā passatā, attahitasādhikāya samādhipadaṭṭhānāya paṭivedhapaññāya jānatā, parahitasādhikāya karuṇāpadaṭṭhānāya desanāpaññāya passatā, arīnaṃ hatattā paccayādīnaṃ arahattā **arahatā**, sammā sāmañca saccānaṃ buddhattā **sammāsambuddhena**. Antarāyīkadhamme vā jānatā, niyyānikadhamme passatā, kilesārīnaṃ hatattā arahatā, sāmaṃ sabbadhammaṃ buddhattā sammāsambuddhenāti evaṃ catuvesārajivasena catūhi kāraṇehi thomitena. Atthi nu kho eko dhammo akkhātoti.

19. Abhisāṅkhatanti kataṃ uppāditaṃ. **Abhisāñceti** cetayitaṃ pakappitaṃ. **So tattha t̥hitoti** so tasmīṃ samathavipassanādhamme t̥hito. **Dhammarāgena dhammanandiyāti** padadvayehi samathavipassanāsu chandarāgo vutto. Samathavipassanāsu hi sabbena sabbaṃ chandarāgaṃ pariyādiyitum sakkonto arahā hoti, asakkonto anāgāmī hoti. So samathavipassanāsu chandarāgassa appahīnattā catutthajjhānacetanāya suddhāvāse nibbattati, ayaṃ ācariyānaṃ samānakathā.

Vitaṇḍavādī panāha “teneva dhammarāgenāti vacanato akusalena suddhāvāse nibbattati” ti so “suttaṃ āharā” ti vattabbo, addhā aññaṃ apassanto idameva āharissati, tato vattabbo “kiṃ panidaṃ suttaṃ neyyatthaṃ nītattha” nti, addhā nītatthanti vakkhati. Tato vattabbo – evaṃ sante anāgāmīphalatt̥hikena samathavipassanāsu chandarāgo kattabbo bhavissati, chandarāge uppādite anāgāmīphalaṃ paṭividdhaṃ bhavissati “mā suttaṃ me laddha” nti yaṃ vā taṃ vā dīpehi. Paññaṃ kathentena hi ācariyassa santike uggaḥetvā attharasam paṭivijjhītvā kathetum vaṭṭati, akusalena hi sagge, kusalena vā apāye paṭisandhi nāma natthi. Vuttañhetam bhagavatā –

“Na, bhikkhave, lobhajena kammena dosajena kammena mohajena kammena devā paññāyanti, manussā paññāyanti, yā vā panaññāpi kāci sugatiyo, atha kho, bhikkhave, lobhajena kammena dosajena kammena mohajena kammena nirayo paññāyati, tiracchānayoṇi paññāyati, pettivisayo paññāyati, yā vā panaññāpi kāci duggatiyo” ti –

Evaṃ paññāpetabbo. Sace sañjānāti sañjānātu, no ce sañjānāti, “gaccha pātova vihāraṃ pavisitvā yāgum pivāhī” ti uyyojetabbo.

Yathā ca pana imasmiṃ sutte, evaṃ mahāmālukyovādepi mahāsatiṭṭhānēpi kāyagatāsatisuttepi samathavipassanā kathitā. Tattha imasmiṃ sutte samathavasena gacchatopi vipassanāvasena gacchatopi samathadhurameva dhuraṃ, mahāmālukyovāde vipassanāva dhuraṃ, mahāsatiṭṭhānaṃ pana vipassanuttaraṃ nāma kathitaṃ, kāyagatāsatisuttaṃ samathuttaranti.

Ayaṃ kho gahapati...pe... ekadhammo akkhātoti ekadhammaṃ pucchitena ayampi ekadhammoti evaṃ pucchāvasena kathitattā ekādasapi dhammā ekadhammo nāma jāto. Mahāsakuludāyisuttasmiñhi ekūnavīsati pabbāni paṭipadāvasena ekadhammo nāma jātāni, idha ekādasapucchāvasena ekadhammoti āgatāni. Amatuppattiyatthena vā sabbānīpi ekadhammoti vattum vaṭṭati.

21. Nidhimukhaṃ gavesantoti nidhiṃ pariyesanto. **Sakidevāti** ekapayogena. Kathaṃ pana ekapayogeneva ekādasannaṃ nidhīnaṃ adhigamo hotīti. Idhekecco araññe nidhiṃ gavesamāno carati, tamenam aññataro atthacarako disvā “kiṃ bho carasī” ti pucchati. So “jīvitavuttiṃ pariyesāmī” ti āha. Itaro “tena hi samma āgaccha, etaṃ pāsānaṃ pavattehi” ti āha. So taṃ pavattetvā uparūpari t̥hapitā vā kucchiyā kucchiṃ āhacca t̥hitā vā ekādasa kumbhiyo passeyya, evaṃ ekapayogena ekādasannaṃ nidhīnaṃ adhigamo hoti.

Ācariyadhanam pariyesissantīti aññatitthiyā hi yassa santike sippam uggaṇhanti, tassa sippuggahaṇato pure vā pacchā vā antarantare vā gehato nīharitvā dhanam denti. Yesam gehe natthi, te ñāṭisabhāgato pariyesanti, tathā alabhamānā bhikkhampi caritvā dentiyeva. Tam sandhāyetam vuttam.

Kimaṅgam panāhanti bāhirakā tāva aniyyānikepi sāsane sippamattadāyakassa dhanam pariyesanti; aham pana evaṃvidhe niyyānikasāsane ekādasavidham amatuppattipadādam desentassa ācariyassa pūjam kiṃ na karissāmi, karissāmiyevāti vadati. **Paccekadussayugena acchādesīti** ekamekassa bhikkhuno ekekaṃ dussayugamadāsīti attho. Samudācāravacanam panettha evarūpam hoti, tasmā acchādesīti vuttam. **Pañcasatavihāranti** pañcasatagghanikam pañnasālam kāresīti attho. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Aṭṭhakanāgarasuttavaṇṇanā niṭṭhitā.

3. Sekhasuttavaṇṇanā

22. Evaṃ me sutanti sekhasuttam. Tattha **navam santhāgāranti** adhunā kāritam santhāgāram, ekā mahāsālāti attho. Uyyogakālādīsu hi rājāno tattha ṭhatvā “ettakā purato gacchantu, ettakā pacchā, ettakā ubhohi passehi, ettakā hatthīsu abhiruhantu, ettakā assesu, ettakā rathesu tiṭṭhantū”ti evaṃ santham karonti, mariyādam bandhanti, tasmā tam ṭhānam **santhāgāranti** vuccati. Uyyogaṭṭhānato ca āgantvā yāva gehesu allagomayaparibhaṇḍādīni karonti, tāva dve tīni divasāni te rājāno tattha santhambhantītipi santhāgāram. Tesam rājūnam saha atthānusāsanam agārantipi santhāgāram gaṇarājāno hi te, tasmā uppanakiccam ekassa vasena na chijjati, sabbesam chando laddhum vaṭṭati, tasmā sabbe tattha sannipatitvā anusāsanti. Tena vuttam “saha atthānusāsanam agārantipi santhāgāra”nti. Yasmā panete tattha sannipatitvā “imasmim kāle kasitum vaṭṭati, imasmim kāle vapitu”nti evamādinā nayena gharāvāsakiccāni sammantayanti, tasmā chiddāvachiddam gharāvāsam tattha santharantītipi santhāgāram. **Acirakāritam hotīti** kaṭṭhakamma-silākamma-cittakammādivasena susajjitam devavimānam viya adhunā niṭṭhāpitam. **Samaṇena vāti** ettha yasmā gharavattupariggahakāleyeva devatā attano vasanaṭṭhānam gaṇhanti, tasmā “devena vā”ti avatvā “samaṇena vā brāhmaṇena vā kenaci vā manussabhūtenā”ti vuttam.

Yena bhagavā tenupasaṅkamimsūti santhāgāram niṭṭhitanti sutvā “gacchāma, nam passissāmā”ti gantvā dvārakoṭṭhakato paṭṭhāya sabbam oloketvā “idaṃ santhāgāram devavimānasadisam ativiya manoramam sassirikam kena paṭhamam paribhuttam amhākam dīgharattam hitāya sukhāya assā”ti cintevā “amhākam ñāṭisettḥassa paṭhamam diyyamānepi sathhunova anucchavikam, dakkhiṇeyyavasena diyyamānepi sathhunova anucchavikam, tasmā paṭhamam sathhāram paribhuñjāpessāma, bhikkhusaṅghassa āgamanam karissāma, bhikkhusaṅghe āgate tepitakam buddhavacanam āgatameva bhavissati, sathhāram tiyāmarattim amhākam dhammakatham kathāpessāma, itī tīhi ratanehi paribhuttam mayam pacchā paribhuñjissāma, evam no dīgharattam hitāya sukhāya bhavissati”ti sannīṭṭhānam katvā upasaṅkamimsu.

Yena santhāgāram tenupasaṅkamimsūti tam divasam kira santhāgāram kiñcāpi rājakulānam dassanathāya devavimānam viya susajjitam hoti supaṭijaggitam, buddhāraham pana katvā appaññattam. Buddhā hi nāma araṇṇajjhāsaya araṇṇārāmā antogāme vaseyyum vā no vā, tasmā bhagavato manam jānitvāva paññāpessāmāti cintevā te bhagavantam upasaṅkamimsu. Idāni pana manam labhitvā paññāpetukāmā yena santhāgāram tenupasaṅkamimsu.

Sabbasantharim santhāgāram santharitvāti yathā sabbameva santhatam hoti, evam tam santharāpetvā. Sabbapaṭhamam tāva “gomayam nāma sabbamaṅgalesu vaṭṭati”ti sudhāparikkammakatampi bhūmim allagomayena opuñchāpetvā parisukkhabhāvam ñatvā yathā

akkantaṭṭhāne padaṃ na paññāyati, evaṃ catujjātiyagandhehi limpāpetvā upari nānāvaṇṇe kaṭasārake santharivā tesam upari mahāpiṭṭhikakojavake ādim katvā hatthattharaka-assattharaka-sīhattharaka-byagghattharaka-candattharaka-sūriyattharaka-cittattharakādīhi nānāvaṇṇehi attharaṇehi santharitabbakayuttam sabbokāsam santharāpesum. Tena vuttam “sabbasantharim santhāgāram santharivā”ti.

Āsanāni paññāpetvāti majjhaṭṭhāne tāva maṅgalatthambham nissāya mahāraham buddhāsanam paññāpetvā tattha yaṃ yaṃ mudukañca manoramañca paccattharaṇam, taṃ taṃ paccattharivā bhagavato lohitaṃ manuññadassanam upadhānam upadahivā upari suvaṇṇarajatatāarakavicittam vitānam bandhitvā gandhadāmapupphadāmapattadāmādīhi paccattharaṇehi alaṅkarivā samantā dvādasahatthaṭṭhāne pupphajālam karivā tiṃsahatthamattam ṭhānam paṭasāṇiyā parikkhipāpetvā pacchimabhittim nissāya bhikkhusaṅghassa pallaṅkapīṭha-apassayapīṭha-muṇḍapīṭhāni paññāpetvā upari setapaccattharaṇehi paccattharāpetvā pācīnabhittim nissāya attano attano mahāpiṭṭhikakojavake paññāpetvā haṃsalomādipūritāni upadhānāni ṭhapāpesum “evaṃ akilamamānā sabbarattim dhammam suṇissāmā”ti. Idam sandhāya vuttam “āsanāni paññāpetvā”ti.

Udakamaṇikanti mahākucchikaṃ udakacāṭim. **Upaṭṭhapetvā**ti evaṃ bhagavā ca bhikkhusaṅgho ca yathāruciyā hatthe vā dhovissanti pāde vā, mukham vā vikkhālessantīti tesu tesu ṭhānesu maṇivaṇṇassa udakassa pūrāpetvā vāsathāya nānāpupphāni ceva udakavāsacunṇāni ca pakkipitvā kadaliṇṇehi pidahivā patiṭṭhāpesum. Idam sandhāya vuttam “upaṭṭhapetvā”ti.

Telappadīpaṃ āropetvāti rajatasuvaṇṇādīmayadaṇḍāsu dīpikāsu yonakarūpakirātārūpakādīnam hatthe ṭhapītasuvaṇṇarajatādīmayakapallakādīsu ca telappadīpaṃ jalayitvāti attho. **Yena bhagavā tenupasaṅkamimsūti** ettha pana te sakyarājāno na kevalam santhāgārameva, atha kho yojanāvaṭṭe kapilavatthusmiṃ nagaravīthiyopi sammajjāpetvā dhaje ussāpetvā gehadvāresu puṇṇaghaṭe ca kadaliyo ca ṭhapāpetvā sakalanagaraṃ dīpamālādīhi vippakiṇṇatāraṃ viya katvā “khīrapāyake dārake khīraṃ pāyetha, dahare kumāre lahuṃ lahuṃ bhojetvā sayāpetha, uccāsaddam mā karittha, ajja ekarattim sathā antogāme vasissati, buddhā nāma appasaddakāmā hontī”ti bherim carāpetvā sayam daṇḍadīpikā ādāya yena bhagavā tenupasaṅkamimsu.

Atha kho bhagavā nivāsetvā pattacīvaramādāya saddhim bhikkhusaṅghena yena navam santhāgāram tenupasaṅkamīti. “Yassa dāni, bhante, bhagavā kālam maññati”ti evaṃ kira kāle ārocite bhagavā lākhārasena tintarattakoviḷārapupphavaṇṇam rattadupaṭṭam kattariyā padumam kantanto viya saṃvidhāya timaṇḍalam paṭicchādentō nivāsetvā suvaṇṇapāmaṅgena padumakalāpaṃ parikkhipanto viya vijjullatāsassirikaṃ kāyabandhanam bandhitvā rattakambalena gajakumbham pariyaonaddhanto viya ratanasatubbedhe suvaṇṇagghike pavāḷajālam khipamāno viya suvaṇṇacetiye rattakambalakañcukam paṭimuñcanto viya gacchantam puṇṇacandam rattavaṇṇavalāhakena paṭicchādayamāno viya kañcanapabbatamatthake supakkalākhārasam pariñcanto viya cittakūṭapabbatamatthakam vijjullatāya parikkhipanto viya ca sacakkavāḷasineruyugandharam mahāpathaviṃ cāletvā gahitam nigrodhapallavasamānavāṇṇam rattavarapaṃsukūlam pārūpitvā gandhakuṭīdvārato nikkhami kañcanaguhaṭo sīho viya udayapabbatakūṭato puṇṇacando viya ca. Nikkhamitvā pana gandhakuṭīpamukhe aṭṭhāsi.

Athassa kāyato meghamukhehi vijjukalāpā viya rasmiyo nikkhamitvā suvaṇṇarasadhārāparisekamañjaripattapupphaphalaviṭape viya ārāmarukkhe karimsu. Tāvadeva ca attano attano pattacīvaramādāya mahābhikkhusaṅgho bhagavantam parivāresi. Te pana parivāretvā ṭhitā bhikkhū evarūpā ahesum appicchā santuṭṭhā pavivittā asaṃsaṭṭhā āradhaviṭiyā vattāro vacanakkhamā codakā pāpagarahī silasampannā samādhisampannā paññāvimuttivimuttinānadassanasampannāti. Tehi parivārito bhagavā rattakambalaparikkhitto viya suvaṇṇakkhandho rattapadumasaṇḍamajjhagatā viya suvaṇṇanāvā pavāḷavedikāparikkhitto viya suvaṇṇapāsādo virocittha. Sāriputtamoggallānādayo mahātherāpi nam meghavaṇṇam paṃsukūlam pārūpitvā maṇivammavammikā viya mahānāgā

parivārayiṃsu vantarāgā bhinnakilesā vijaṭṭajajā chinnabandhanā kule vā gaṇe vā alaggā.

Iti bhagavā sayamaṃ vītarāgo vītarāgehi, vītadoso vītadosehi, vītamoho vītamohehi, nittaṇho nittaṇhehi, nikkilesa nikkilesehi, sayamaṃ buddho bahussutabuddhehi parivārito, pattaparivāritaṃ viya kesamaṃ, kesaraparivāritā viya kaṇṇikā, aṭṭhanāgasahassaparivārito viya chaddanto nāgarājā, navutihaṃsasahassaparivārito viya dhataratṭho haṃsarājā, senaṅgaparivārito viya cakkavatti, marugaṇaparivārito viya sakko devarājā, brahmagaṇaparivārito viya hāritamahābrahmā, tārāgaṇaparivārito viya puṇṇacando, asamena buddhavesena aparimāṇena buddhaviḷāsena kapilavatthugamanamaggaṃ paṭipajji.

Athassa puratthimakāyato suvaṇṇavaṇṇā rasmī uṭṭhahitvā asītihatthattṭhānaṃ aggahesi. Pacchimakāyato dakkhiṇahattṭhato, vāmahattṭhato suvaṇṇavaṇṇā rasmī uṭṭhahitvā asītihatthattṭhānaṃ aggahesi. Upari kesantato paṭṭhāya sabbakesāvattehi moragīvavaṇṇā rasmī uṭṭhahitvā gaganatale asītihatthattṭhānaṃ aggahesi. Heṭṭhā pādālehi pavāḷavaṇṇā rasmī uṭṭhahitvā ghanapathaviyaṃ asītihatthattṭhānaṃ aggahesi. Evaṃ samantā asītihatthamattaṃ ṭhānaṃ chabbaṇṇā buddharasmiyo vijjotamānā vipphandamānā kaṇcanadaṇḍadīpikāhi niccharitvā ākāsaṃ pakkhandajālā viya cātuddīpikamahāmeghato nikkhantavijjullatā viya vidhāvīṃsu. Sabbadisābhāgā suvaṇṇacampakapupphehi vikiriyaṃānā viya, suvaṇṇaghaṭṭā nikkhantasuvaṇṇarasadhārāhi siṅcamānā viya, pasāritasuvaṇṇapaṭaparikkhattā viya, verambhavātasamuṭṭhitakīṃsukakaṇṇikārapupphacuṇṇasamokiṇṇā viya vippakiriṃsu.

Bhagavatopi asītiyanubyañjanabyāmapabhādvattiṃsavalarakkhaṇasamujjalaṃ sarīraṃ samuggatatārakaṃ viya gaganatalaṃ, vikasitama viya padumavanaṃ, sabbapāliphullo viya yojanasatiko pāricchattako, paṭipāṭiyā ṭhapitānaṃ dvattiṃsūcandānaṃ dvattiṃsasūriyānaṃ dvattiṃsacakkavattīnaṃ dvattiṃsadevarājānaṃ dvattiṃsamahābrahmānaṃ siriyā sirīṃ abhibhavamānaṃ viya virocittha, yathā taṃ dasahi pāramīhi dasahi upapāramīhi dasahi paramatthapāramīhi supūritāhi samattiṃsapāramitāhi alaṅkataṃ. Kappasatasahasādhikāni cattāri asaṅkhyeyyāni dinnadānaṃ rakkhitasīlaṃ katakalyāṇakammaṃ ekasmiṃ attabhāve osaritvā vipākaṃ dātuṃ ṭhānaṃ alabhamānaṃ sambādhapattaṃ viya ahoṣi. Nāvāsahassabhaṇḍaṃ ekaṇāvaṃ āropanakālo viya, sakaṭasahassabhaṇḍaṃ ekasakaṭaṃ āropanakālo viya, pañcaviṣṭiyā nadīnaṃ oghassa sambhijja mukhadvāre ekato rāsībhūtakālo viya ca ahoṣi.

Imāya buddhasiriyā obhāsamānassāpi ca bhagavato purato anekāni daṇḍadīpikasahassāni ukkhipiṃsu. Tathā pacchato. Vāmapasse dakkhiṇapasse. Jātikusumacampakavanamallikarattuppalanīluppalamakulasinduvārapupphāni ceva nīlapītādivaṇṇasugandhagandhacuṇṇāni ca cātuddīpikameghavissatṭhodakavuṭṭhiyo viya vippakiriṃsu. Pañcaṅgikatūriyanigghosā ceva buddhadhammasaṅghaguṇappaṭisaṃyuttā thutighosā ca sabbadisā pūrayiṃsu. Devamanussanāgasupaṇṇagandhabbayakkhādīnaṃ akkhīni amatapānaṃ viya labhiṃsu. Imasmiṃ pana ṭhāne ṭhatvā **padasahassena** gamanavaṇṇaṃ vattum vaṭṭati. Tatridaṃ mukhamattaṃ –

“Evaṃ sabbaṅgasampanno, kampaṃyanto vasundharaṃ;
Aheṭṭhayanto paṇāni, yāti lokavināyako.

Dakkhiṇaṃ paṭhamaṃ pādaṃ, uddharanto narāsabho;
Gacchanto sirisampanno, sobhate dvipaduttamo.

Gacchato buddhaseṭṭhassa, heṭṭhā pādātalaṃ mudu;
Samaṃ samphusate bhūmiṃ, rajasā nupalippati.

Ninnaṭṭhānaṃ unnamati, gacchante lokanāyake;
Unnataṅca samaṃ hoti, pathavī ca acetanā.

Pāsāṇā sakkharā ceva, kthalā khāṇukaṇṭakā;
Sabbe maggā vivajjanti, gacchante lokanāyake.

Nātidūre uddharati, naccāsanne ca nikkhipaṃ;
Aghaṭṭayanto niyyāti, ubho jāṇū ca gopphake.

Nātisīghaṃ pakkamati, sampannacaraṇo muni;
Na cātisaṇikaṃ yāti, gacchamāno samāhito.

Uddhaṃ adho ca tiriyaṃ, disaṇca vidisaṃ tathā;
Na pekkhamāno so yāti, yugamattamhi pekkhati.

Nāgavikkantacāro so, gamane sobhate jino;
Cāruṃ gacchati lokaggo, hāsayinganto sadevake.

Uḷurājāva sobhanto, catucārīva kesarī;
Tosayinganto bahū satte, puram seṭṭham upāgamī’ ti.

Vaṇṇakālo nāma kiresa, evaṃvidhesu kālesu buddhassa sarīravaṇṇe vā guṇavaṇṇe vā dhammakathikassa thāmoyeva pamāṇaṃ cuṇṇiyapadehi vā gāthābandhena vā yattakaṃ sakkoti, tattakaṃ vattabbaṃ. Dukkathitanti na vattabbaṃ. Appamāṇavaṇṇā hi buddhā, tesam buddhāpi anavasesato vaṇṇaṃ vattuṃ asamattā, pageva itarā pajāti. Iminā sirivilāsena alaṅkatappaṭiyattaṃ sakyarājapuram pavisitvā bhagavā pasannacittena janena gandhadhūmavāsacūṇṇādīhi pūjayamāno santhāgāraṃ pāvīsi. Tena vuttaṃ – ‘‘atha kho bhagavā nivāsetvā pattacīvaramādāya saddhiṃ bhikkhusaṅghena yena evaṃ santhāgāraṃ tenupasaṅkamī’ ti.

Bhagavantamyeva purakkhatvāti bhagavantaṃ purato katvā. Tattha bhagavā bhikkhūnañceva upāsakānañca majjhe nisīno gandhodakena nhāpetvā dukūlacumbaṭakena vodakaṃ katvā jātiṅgulakena majjivā rattakambalapaliveṭṭhite pīṭhe ṭhapitarattasuvaṇṇaghanapaṭimā viya ativirocittha. Ayaṃ panettha porāṇānaṃ vaṇṇabhaṇanamaggo –

‘‘Gantvāna maṇḍalamāḷaṃ, nāgavikkantacaraṇo;
Obhāsayinganto lokaggo, nisīdi varamāsane.

Tasmiṃ nisīno naradammaśārathi,
Devātidevo satapuñṇalakkhaṇo;
Buddhāsane majjhagato virocāti,
Suvaṇṇanekkhaṃ viya paṇḍukambale.

Nekkhaṃ jambonadasseva, nikkhattaṃ paṇḍukambale;
Virocāti vītamalo, maṇiverocano yathā.

Mahāsālova samphullo, nerurājāvalaṅkato;
Suvaṇṇayūpasaṅkāso, padumo kokanado yathā.

Jalanto dīparukkhova, pabbatagge yathā sikhī;
Devānaṃ pāricchattova, sabbaphullo virocathā’ ti.

Kāpilavatthave sakye bahudeva rattim dhammiyā kathāyāti ettha dhammī kathā nāma santhāgāraanumodanappaṭisaṃyuttā pakīṇṇakakathā veditabbā. Tadā hi bhagavā ākāsagaṅgaṃ otārento viya pathavojaṃ ākaḍḍhanto viya mahājambuṃ khandhe gahetvā cārento viya yojanikaṃ

madhubhaṇḍaṃ cakkayantena piḷetvā madhupānaṃ pāyamāno viya kāpilavatthavānaṃ sakyānaṃ hitasukhāvahaṃ pakiṇṇakakathaṃ kathesi. “Āvāsadānaṃ nāmetaṃ mahārāja mahantaṃ, tumhākaṃ āvāso mayā paribhutto bhikkhusaṅghena paribhutto mayā ca bhikkhusaṅghena ca paribhutto pana dhammaratanena paribhutto yevāti tīhi ratanehi paribhutto nāma hoti. Āvāsadānasmiñhi dinne sabbadānaṃ dinnameva hoti. Bhūmaṭṭhakapaṇṇasālāya vā sākḥamaṇḍapassa vāpi ānisaṃso nāma paricchinditūṃ na sakkā”ti nānāyavicittāṃ bahūṃ dhammakathaṃ kathetvā –

“Sītaṃ uṇhaṃ paṭihanti, tato vāḷamigāni ca;
Sarīsape ca makase, sisire cāpi vuṭṭhiyo.

Tato vātātapo ghorō, sañjāto paṭihaññati;
Leṇatthañca sukhatthañca, jhāyituñca vipassitūṃ.

Vihāradānaṃ saṅghassa, aggaṃ buddhena vaṇṇitaṃ;
Tasmā hi paṇḍito poso, sampassaṃ atthamattano.

Vihāre kāraye ramme, vāsayettha bahussute;
Tesaṃ annañca pānañca, vatthasenāsanāni ca.

Dadeyya ujubhūtesu, vippasannena cetasā;
Te tassa dhammaṃ desenti, sabbadukkhāpanūdanaṃ;
Yaṃ so dhammaṃ idhaññāya, parinibbāti anāsavo”ti. (cūḷava. 295) –

Evamaṃ ayampi āvāse ānisaṃso, ayampi ānisaṃsoti bahudevarattimā atirekataraṃ diyaḍḍhayāmaṃ āvāsānisaṃsakathaṃ kathesi. Tattha imā gāthāva saṅgahaṃ āruḷhā, pakiṇṇakadhammadesanā pana saṅgahaṃ na ārohati. **Sandassesīti**ādini vuttatthāneva.

Āyasmantaṃ ānandaṃ āmantesīti dhammakathaṃ kathāpetukāmo jānāpesi. Atha kasmā sārīputtamahāmogallānamahākassapādīsū asītimahātheresu vijjamānesu bhagavā ānandattherassa bhāramakāsīti. Parisajjhāsaya vasena. Āyasmā hi ānando bahussutānaṃ aggo, pahosi parimaṇḍalehi padabyañjanehi madhuradhammakathaṃ kathetunti sākiyamaṇḍale pākaṭo paññāto. Tassa sakyarājūhi vihāraṃ gantvāpi dhammakathā sutapubbā, orodhā pana nesaṃ na yathāruciya vihāraṃ gantuṃ labhanti, tesaṃ etadahosi – “aho vata bhagavā appamyeva dhammakathaṃ kathetvā amhākaṃ ñātisetṭhassa ānandassa bhāraṃ kareyyā”ti. Tesaṃ ajjhāsaya vasena bhagavā tasseva bhāramakāsi.

Sekho paṭipadoti paṭipannako sekhasamaṇo. So tuyhaṃ paṭibhātu upaṭṭhātu, tassa paṭipadaṃ deseḥīti paṭipadāya puggalaṃ niyamevā dasseti. Kasmā pana bhagavā imaṃ paṭipadaṃ niyamesi? Bahūhi kāraṇehi. Ime tāva sakyā maṅgalasālāya maṅgalaṃ paccāsīsanti vaḍḍhim icchanti, ayañca sekhaṇḍapaṭipadā mayhaṃ sāsane maṅgalapaṭipadā vaḍḍhamānakapaṭipadātipi imaṃ paṭipadaṃ niyamesi. Tassañca parisati sekhaṇḍa bahū nisinnā, te attanā paṭividdhaṭṭhāne kathiyamāne akilamantāva sallakkhessantītipi imaṃ paṭipadaṃ niyamesi. Āyasmā ca ānando sekhaṇḍasambhidāpattova, so attanā paṭividdhe paccakkhaṭṭhāne kathento akilamanto viññāpetuṃ sakkhissatītipi imaṃ paṭipadaṃ niyamesi. Sekhaṇḍapaṭipadāya ca tissopi sikkhā oṣāṭā, tattha adhisīlasikkhāya kathitāya sakalaṃ vinayaṭṭakaṃ kathitameva hoti, adhicitasikkhāya kathitāya sakalaṃ suttantapaṭṭakaṃ kathitaṃ hoti, adhipaññāsikkhāya kathitāya sakalaṃ abhidhammapaṭṭakaṃ kathitaṃ hoti, ānando ca bahussuto tipaṭṭakadharo, so pahoti tīhi paṭṭakehi tisso sikkhā kathetuṃ, evamaṃ kathite sakyānaṃ maṅgalameva vaḍḍhiyeva bhavissatītipi imaṃ paṭipadaṃ niyamesi.

Piṭṭhi me āgilāyatīti kasmā āgilāyati? Bhagavato hi chabbassāni padhānaṃ padahantassa mahantaṃ kāyadukkhaṃ ahosi, athassa aparabhāge mahallakakāle piṭṭhivāto uppajji. Akāraṇaṃ vā etaṃ. Pahoti hi bhagavā uppannaṃ vedanaṃ vikkhambhetvā ekampi dvepi sattāhe ekapallaṅkena

nisīdituṃ. Santhāgārasālaṃ pana catūhi iriyāpathehi paribhuñjitukāmo ahoṣi, tattha pādadhovanaṭṭhānato yāva dhammāsanā agamāsi, ettake ṭhāne gamanaṃ nipphannaṃ. Dhammāsanam patto thokaṃ ṭhatvā nisīdi, ettake ṭhānaṃ. Diyadḍhayāmaṃ dhammāsane nisīdi, ettake ṭhāne nisajjā nipphannā. Idāni dakkhiṇena passena thokaṃ nipanne sayanaṃ nipphajjissatīti evaṃ catūhi iriyāpathehi paribhuñjitukāmo ahoṣi. Upādinnakasarīraṅca nāma “no āgilāyatī”ti na vattabbaṃ, tasmā ciraṃ nisajjāya sañjātaṃ appakampi āgilāyanaṃ gahetvā evamāha.

Saṅghāṭiṃ paññāpetvāti santhāgārassa kira ekapasse te rājāno paṭṭasāṇiṃ parikkhipāpetvā kappiyamañcakaṃ paññāpetvā kappiyapaccattharaṇena attharivā upari suvaṇṇa-tāraka-gandhamālā-dāmapaṭiṃḍitaṃ vitānaṃ bandhitvā gandhatelappadīpaṃ āropayimsu “appeva nāma satthā dhammāsanato vuṭṭhāya thokaṃ vissamanto idha nipajjeyya, evaṃ no imaṃ santhāgāraṃ bhagavatā catūhi iriyāpathehi paribhuttaṃ dīgharattaṃ hitāya sukhāya bhavissatī”ti. Satthāpi tadeva sandhāya tattha saṅghāṭiṃ paññāpetvā nipajji. **Uṭṭhānasaññaṃ manasi karitvā**ti ettakaṃ kālaṃ atikkamitvā vuṭṭhahissāmīti vuṭṭhānasaññaṃ citte ṭhapetvā.

23. Mahānāmaṃ sakkaṃ āmantesīti so kira tasmim kāle tassaṃ parisati jeṭṭhako pāmokkho, tasmim saṅgahite sesaparīsā saṅgahitāva hotīti thero tameva āmantesi. **Sīlasampannoti** sīlena sampanno, sampannasīlo paripuṇṇasīloti attho. **Saddhammehīti** sundaradhammehi, sataṃ vā sappurisānaṃ dhammehi.

24. Kathaṅca mahānāmāti iminā ettakena ṭhānena sekhaṭṭapadāya mātikaṃ ṭhapetvā paṭipāṭiyā vitthāretukāmo evamāha. Tattha **sīlasampannoti**ādīni “sampannasīlā, bhikkhave, viharathā”ti ākankheyyasuttādīsū vuttanayeneva veditabbāni.

25. Kāyaduccaritenātiādīsū upayogathe karaṇavacanaṃ, hiriyitabbāni kāyaduccaritādīni hiriyati jīgucchātīti attho. Ottappaniddese hetvatthe karaṇavacanaṃ, kāyaduccaritādīhi ottappassa hetubhūtehi ottappati bhāyatīti attho. **Āraddhavīriyoti** paggahitavīriyo anosakkitaṃ mānaso. **Pahānāyāti** pahānatthāya. **Upasampadāyāti** paṭilābhathāya. **Thāmavāti** vīriyathāmena samannāgato. **Dalhaparakkamoti** thiraparakkamo. **Anikkhittadhuro kusalesu dhammesūti** kusalesu dhammesu anoropitadhuro anosakkitaṃ vīriyo. **Paramenāti** uttamena. **Satinepakkenāti** satiyā ca nipakabhāvena ca. Kasmā pana satibhājaniye paññā āgatāti? Satiyā balavabhāvadīpanatthaṃ. Paññāvippayuttā hi sati dubbalā hoti, sampayuttā balavatīti.

Cirakatampīti attanā vā parena vā kāyena cirakataṃ cetiyaṅgaṇavattādi asīti mahāvattapaṭipattipūraṇaṃ. **Cirabhāsitaṃ**pi attanā vā parena vā vācāya cirabhāsitaṃ sakkaccaṃ uddisana-uddisāpana-dhammosāraṇa-dhammadesanā-upanīsinakathā-anumodaniyādivasena pavattitaṃ vacīkammaṃ. **Saritā anussarītāti** tasmim kāyena cirakate “kāyo nāma kāyaviññatti, cirabhāsīte vācā nāma vacīviññatti. Tadubhayampi rūpaṃ, taṃsamutṭhāpikā cittacetāsikā arūpaṃ. Iti ime rūpārūpadhammā evaṃ uppajjitvā evaṃ niruddhā”ti sarati ceva anussarati ca, satisambojjhaṅgaṃ samutṭhāpetīti attho. Bojjhaṅgasamutṭhāpikā hi sati idha adhippetā. Tāya satiyā esa sakimpī saraṇena saritā, punappunaṃ saraṇena anussarītāti veditabbā.

Udayatthagāminiyāti pañcannaṃ khandhānaṃ udayavayagāminiyā udayaṅca vāyaṅca paṭivijjhitaṃ samatthāya. **Ariyāyāti** vikkhambhanavasena ca samucchadavasena ca kilesehi ārakā ṭhitāya parisuddhāya. **Paññāya samannāgatoti** vipassanāpaññāya ceva maggapaññāya ca samaṅgībhūto. **Nibbedhikāyāti** sāyeva nibbijjhanato nibbedhikāti vuccati, tāya samannāgatoti attho. Tattha maggapaññāya samucchadavasena anibbidhappubbaṃ apadālitapubbaṃ lobhakkhandhaṃ dosakkhandhaṃ mohakkhandhaṃ nibbijjhati padāletīti nibbedhikā. Vipassanāpaññāya tadaṅgavasena nibbedhikāya maggapaññāya paṭilābhasaṃvattanato cāti vipassanā “nibbedhikā”ti vattuṃ vaṭṭati. **Sammā dukkhakkhayagāminiyāti** idhāpi maggapaññā “sammā hetunā nayena vaṭṭadukkhāṃ khepayamānā gacchatīti sammā dukkhakkhayagāminī nāma. Vipassanā tadaṅgavasena vaṭṭadukkhāṅca

kilesadukkhañca khepayamānā gacchatīti dukkhakkhayagāminī. Dukkakkhayagāminiyā vā maggapaññāya paṭilābhasamvattanato eṣā dukkhakkhayagāminī’ ti veditabbā.

26. Abhicetasikānanti abhicittaṃ seṭṭhacittaṃ sitānaṃ nissitānaṃ.

Diṭṭhadhammasukhavihārānanti appitappitakkhaṇe sukhaṭṭilābhahetūnaṃ. **Nikāmalābhīti** icchiticchitakkhaṇe samāpajjitā. **Akicchalābhīti** nidukkhalābhī. **Akasiralābhīti** vipulalābhī. Paṅuṇabhāvena eko icchiticchitakkhaṇe samāpajjitum sakkoti, samādhipāripanthikadhamme pana akilamanto vikkhambhetum na sakkoti, so attano anicchāya khippameva vuṭṭhāti, yathāparicchedavasena samāpattim ṭhāpetum na sakkoti ayaṃ kicchalābhī kasiralābhī nāma. Eko icchiticchitakkhaṇe ca samāpajjitum sakkoti, samādhipāripanthikadhamme ca akilamanto vikkhambheti, so yathāparicchedavaseneva vuṭṭhātum sakkoti, ayaṃ akicchalābhī akasiralābhī nāma.

27. Ayaṃ vuccati mahānāma ariyasāvako sekho pāṭipadoti mahānāma ariyasāvako sekho pāṭipado vipassanāgabbhāya vaḍḍhamānakapaṭipadāya samannāgatoti vuccatīti dasseti.

Apuccaṇḍatāyāti apūtiṇḍatāya. **Bhabbo abhinibbhidāyāti** vipassanādiñāṇappabhedāya bhabbo. **Sambodhāyāti** ariyamaggāya. **Anuttarassa yogakkhemassāti** arahattaṃ anuttaro yogakkhemo nāma, tadabhiḅamāya bhabboti dasseti. Yā panāyamettha atthadīpanatthaṃ upamā āhaṭā, sā cetokhilasutte vuttanayeneva veditabbā. Kevalañhi tattha “tassā kukkuṭiyā aṇḍesu tividhakiriyakaraṇaṃ viya hi imassa bhikkhuno ussoḥhipannarasehi aṅgehi samannāgatabhāvo” ti yaṃ evaṃ opammasamsandanaṃ āgataṃ, taṃ idha evaṃ sīlasampanno hotītiādivacanato “tassā kukkuṭiyā aṇḍesu tividhakiriyakaraṇaṃ viya imassa bhikkhuno sīlasampannatādīhi pannarasehi dhammehi samaṅgibhāvo” ti. Evaṃ yojetvā veditabbaṃ. Sesam sabbattha vuttasadisameva.

28. Imamyeva anuttaraṃ upekkhāsati pārisuddhinti imaṃ paṭhamādiḅjhānehi asadisam uttamaṃ catutthajjhānikaṃ upekkhāsati pārisuddhim. **Paṭhamābhiniibbhidāti** paṭhamo ñāṇabhedo. Dutiyādisupi eseva nayo. Kukkuṭacchāpako pana ekavāraṃ mātukucchito ekavāraṃ aṇḍakosatotī dve vāre jāyati. Ariyasāvako tīhi vijjāhi tāyo vāre jāyati. Pubbenivāsacchādakaṃ tamaṃ vinodetvā pubbenivāsañāṇena paṭhamaṃ jāyati, sattānaṃ cutipaṭisandhicchādakaṃ tamaṃ vinodetvā dibbacakkhuñāṇena dutiyaṃ jāyati, catusaccapaṭicchādakaṃ tamaṃ vinodetvā āsavakkhayañāṇena tatiyaṃ jāyati.

29. Idampissa hoti caraṇasminti idampi sīlaṃ assa bhikkhuno caraṇaṃ nāma hotīti attho.

Caraṇaṃ nāma bahu anekavidhaṃ, sīlādayo pannarasadhammā, tattha idampi ekaṃ caraṇanti attho. Padattho pana carati tena agatapubbaṃ disaṃ gacchatīti caraṇaṃ. Esa nayo sabbattha.

Idampissa hoti vijjāyāti idaṃ pubbenivāsañāṇaṃ tassa **vijjā** nāma hotīti attho. Vijjā nāma bahu anekavidhā, vipassanañāṇādīni aṭṭha ñāṇāni, tattha idampi ñāṇaṃ ekā vijjātipi attho. Padattho pana vinivijjhātvā eṭāya jānātīti vijjā. Esa nayo sabbattha. **Vijjāsampanno itipīti** tīhi vijjāhi vijjāsampanno itipi. **Caraṇasampanno itipīti** pañcadasahi dhammehi caraṇasampanno itipi. Tadubhayena pana vijjācaraṇasampanno itipīti.

30. Sanaṅkumārenāti porāṇakakumārena, cirakālato paṭṭhāya kumāroti paññātena. So kira manussapathe pañcacūlakakumārakāle jhānaṃ nibbattetvā aparihīnājjhāno brahmaloke nibbatti, tassa so attabhāvo piyo ahosi manāpo, tasmā tādiseneva attabhāvena carati, tena naṃ **sanaṅkumāroti** sañjānanti. **Janetasminti** janitasmim, pajāyāti attho. **Ye gottapaṭisārīnoti** ye janetasmim gottaṃ paṭisaranti “ahaṃ gotamo, ahaṃ kassapo” ti, tesu loke gottapaṭisārīsu khattiyo seṭṭho. **Anumatā bhagavatāti** mama pañhabyākaraṇena saddhim samsanditvā desitāti ambaṭṭhasutte buddhena bhagavatā “ahampi, ambaṭṭha, evaṃ vadāmi –

‘Khattiyo seṭṭho janetasmim, ye gottapaṭisārīno;
Vijjācaraṇasampanno, so seṭṭho devamānuse’ ti’’. (dī. ni. 1.277) –

Evam bhāsantena anuññātā anumoditā. **Sādhu sādhu ānandāti**, bhagavā kira ādito paṭṭhāya niddam anokkamantova imaṃ suttaṃ sutvā ānandena sekhapaṭipadāya kūṭaṃ gahitanti ñatvā uṭṭhāya pallankam ābhujitvā nisinno sādhuṅkāraṃ adāsi. Ettāvata ca pana idaṃ suttaṃ jinabhāsitaṃ nāma jātaṃ. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Sekhasuttavaṇṇanā niṭṭhitā.

4. Potaliyasuttavaṇṇanā

31. Evam me sutanti potaliyasuttaṃ. Tattha **āṅguttarāpesūti** āṅgāyeva so janapado, mahiyā panassa uttarena yā āpo, tāsam avidūrattā uttarāpotipi vuccati. Kataramahiyā uttarena yā āpoti, mahāmahiyā. Tathāyaṃ āvibhāvakathā – ayam kira jambudīpo dasasahassayojanaparimāṇo. Tattha ca catusahassayojanappamāṇo padeso udakena ajjhotthaṭṭo samuddoti saṅkham gato. Tisahassayojanappamāṇe manussā vasanti. Tisahassayojanappamāṇe himavā patiṭṭhito ubbedhena pañcayojanasatiko caturāsītikūṭasahassapaṭimaṇḍito samantato sandamānapañcasatanadīvicitto, yattha āyāmaṅgalaṃ ceva gambhīratāya ca paṇṇāsapaṇṇāsayojanā diyaḍḍhayojanasataparimaṇḍalā anotattadaho kaṇṇamuṇḍadaho rathakāradaho chaddantadaho kuṇḍaladaho mandākinīdaho sīhapapātadahoti satta mahāsarā patiṭṭhitā. Tesu anotattadaho sudassanakūṭaṃ citrakūṭaṃ kālākūṭaṃ gandhamādanakūṭaṃ kelāsakūṭanti imehi pañcahi pabbatehi parikkhitto.

Tattha sudassanakūṭaṃ sovaṇṇamayaṃ dviyojanasatubbedham antovaṅkaṃ kākamukhasaṅghānam tameva saram paṭicchādetvā ṭhitam. Citrakūṭaṃ sabbaratanamayaṃ. Kālākūṭaṃ añjanamayaṃ. Gandhamādanakūṭaṃ sānumayaṃ abbhantare muggavaṇṇam, mūlagandho sārāgandho pheggugandho tacagandho papaṭikagandho rasagandho pattagandho pupphagandho phalagandho gandhagandhoti imehi dasahi gandhehi ussannaṃ nānappakāraosadhasañchannaṃ, kālāpakkauposathadivase ādittamiva āṅgāraṃ jalantaṃ tiṭṭhati. Kelāsakūṭaṃ rajatamayaṃ. Sabbāni sudassanena samānubbedhasaṅghānāni, tameva saram paṭicchādetvā ṭhitāni. Tāni sabbāni devānubhāvena nāgānubhāvena ca vassanti, nadiyo ca tesu sandanti. Taṃ sabbampi udakaṃ anotattameva pavisati. Candimasūriyā dakkhiṇena vā uttarena vā gacchantā pabbatantarena tattha obhāsam karonti, ujum gacchantā na karonti, tenevassa anotattanti saṅkhā udapādi.

Tattha manoharasilātalāni nimmacchakacchapāni phalikasadisanimmaludakāni nhānatitthāni supaṭiyattāni honti, yesu buddhaccekabuddhakhīṇāsavā ca iddhimanto ca isayo nhāyanti, devayakkhādayo uyyānakīlakam kīḷanti.

Tassa catūsu passesu sīhamukhaṃ hatthimukhaṃ assamukhaṃ usabhamukhanti cattāri mukhāni honti, yehi catasso nadiyo sandanti. Sīhamukhena nikkhantanadīre sīhā bahutarā honti. Hatthimukhādīhi hatthiassausabhā. Puratthimadisato nikkhantanadī anotattaṃ tikkhattuṃ padakkhiṇaṃ katvā itarā tisso nadiyo anupagamma pācīnahimavanteneva amanussapathaṃ gantvā mahāsamuddam pavisati. Pacchimadisato ca uttaradisato ca nikkhantanadiyopi tatheva padakkhiṇaṃ katvā pacchimahimavanteneva uttarahimavanteneva ca amanussapathaṃ gantvā mahāsamuddam pavisanti. Dakkhiṇadisato nikkhantanadī pana taṃ tikkhattuṃ padakkhiṇaṃ katvā dakkhiṇena ujukaṃ pāsānapiṭṭheneva saṭṭhiyojanāni gantvā pabbataṃ paharivā vuṭṭhāya parikkhepena tigāvutappamāṇā udakadhārā ca hutvā ākāseṇa saṭṭhiyojanāni gantvā tiyaggaḷe nāma pāsāne patitā, pāsāno udakadhārāvegena bhinno. Tattha paññāsayojanappamāṇā tiyaggaḷā nāma pokkharāṇi jāta, pokkharāṇiyā kūlam bhinditvā pāsānaṃ pavisitvā saṭṭhiyojanāni gatā. Tato ghanapathaviṃ bhinditvā umaṅgena saṭṭhiyojanāni gantvā viñjhum nāma tiracchānapabbataṃ paharivā hatthatale pañcaṅgulisadisā pañcadhārā hutvā pavattanti. Sā tikkhattuṃ anotattaṃ padakkhiṇaṃ katvā gataṭṭhāne āvaṭṭagaṅgāti vuccati. Ujukaṃ pāsānapiṭṭhena saṭṭhiyojanāni gataṭṭhāne kaṇhagaṅgāti, ākāseṇa saṭṭhiyojanāni

gataṭṭhāne ākāsagaṅgāti, tiyaggaḷapāsāṇe paññāsayojanokāse ṭhitā tiyaggaḷapokkharanīti, kūlaṃ bhinditvā pāsāṇaṃ pavisitvā saṭṭhiyojanāni gataṭṭhāne bahalagaṅgāti, umaṅgena saṭṭhiyojanāni gataṭṭhāne umaṅgagaṅgāti vuccati. Viñjhuṃ nāma tiracchānapabbataṃ paharivā pañcadhārā hutvā pavattaṭṭhāne pana gaṅgā yamunā aciravatī sarabhū mahīti pañcadhā saṅkhaṃ gatā. Evametā pañca mahānadiyo himavantato pabhavanti. Tāsu yā ayaṃ pañcamī mahī nāma, sā idha mahāmahīti adhippetā. Tassā uttarena yā āpo, tāsam avidūrattā so janapado aṅguttarāpoti veditabbo. Tasmim aṅguttarāpesu janapade.

Āpaṇaṃ nāmāti tasmim kira niḡame vīsati āpaṇamukhasahassāni vibhattāni ahesuṃ. Iti so āpaṇānaṃ ussannattā āpaṇantveva saṅkhaṃ gato. Tassa ca niḡamassa avidūre nadīre ghanacchāyo ramaṇīyo bhūmibhāgo mahāvanasaṅḍo, tasmim bhagavā viharati. Tenevettha vasanaṭṭhānaṃ na niyāmitanti veditabbaṃ. **Yenaññataro vanasaṅḍo tenupasaṅkamīti** bhikkhusaṅghaṃ vasanaṭṭhānaṃ pesetvā ekakova upasaṅkami potaliyaṃ gahapatiṃ sandhāya. **Potaliyopi kho gahapatīti** potaliyoti evaṃnāmako gahapati. **Sampannanivāsanapāvuraṇoti** paripuṇṇanivāsanapāvuraṇo, ekaṃ dīghadasaṃ sātakaṃ nivattho ekaṃ pārutoti attho. **Chattupāhanāhīti** chattaṃ gahetvā upāhanā āruyāhīti attho. **Āsanānīti** pallaṅkapīṭhapalālapīṭhakādīni. Antamaso sākābhāṅgampi hi āsananteva vuccati. **Gahapativādenāti** gahapatīti iminā vacanena. **Samudācaratīti** voharati.

Bhagavantaṃ etadavocāti tatiyaṃ gahapatīti vacanaṃ adhvāsetuṃ asakkonto bhagavantametaṃ “tayidaṃ, bho, gotamā” tiādivacanaṃ avoca. Tattha **nacchannanti** na anucchavikaṃ. **Nappatirūpanti** na sārappaṃ. **Ākāraṭīdīni** sabbāneva kāraṇavevacanāni. Dīghadasavatthadhāraṇa-kesamassunakhaṭṭhapanādīni hi sabbāneva gihībyañjanāni tassa gihībhāvaṃ pākataṃ karontīti **ākārā**, gihīsaṅghānena saṅghitattā **liṅgā**, gihībhāvassa sañjānananimittatāya **niḡmittāti** vuttā. **Yathā taṃ gahapatissāti** yathā gahapatissa ākāraliṅganimittā bhavēyyuṃ, tatheva tuyhaṃ. Tena tāhaṃ evaṃ samudācarāmīti dasseti. Atha so yena kāraṇena gahapativādaṃ nādhvāseti, taṃ pakāsento “tathā hi pana me” tiādimāha.

Niyyātanti niyyātitaṃ. **Anovādī anupavādīti** “tātā, kasatha, vapatha, vaṇippathaṃ payojethā” tiādinā hi nayena ovadanto ovādī nāma hoti. “Tumhe na kasatha, na vapatha, na vaṇippathaṃ payojetha, kathaṃ jīvissatha, puttadāraṃ vā bharissathā” tiādinā nayena pana upavadanto upavādī nāma hoti. Ahaṃ pana ubhayampi taṃ na karomi. Tenāhaṃ tattha anovādī anupavādīti dasseti. **Ghāsaḥādanaparamo viharāmīti** ghāsamattañceva acchādanamattañca paramaṃ katvā viharāmi, tato paraṃ natthi, na ca patthemīti dīpeti.

32. Giddhiloḅho pahātabboti gedhabhūto loḅho pahātabbo. **Anindārosanti** anindābhūtaṃ aghaṭṭanaṃ. **Nindārosoti** nindāghaṭṭanā. **Vohārasamucchedāyāti** ettha **vohāroti** byavahāravohāropi paṇṇattipi vacanampi cetanāpi. Tattha –

“Yo hi koci manussesu, vohāraṃ upajīvati;
Evaṃ vāsetṭha jānāhi, vāñijo so na brāhmaṇo” ti. (ma. ni. 2.457) –

Ayaṃ byavahāravohāro nāma. “Saṅkhā samaññā paññatti vohāro” ti (dha. sa. 1313-1315) ayaṃ paṇṇattivohāro nāma. “Tathā tathā voharati aparāmasa” nti (ma. ni. 3.332) ayaṃ vacanavohāro nāma. “Aṭṭha ariyavohārā aṭṭha anariyavohārā” ti (a. ni. 8.67) ayaṃ cetanāvohāro nāma, ayamidhādhippeto. Yasmā vā pabbajitakālato paṭṭhāya gihīti cetanā natthi, samaṇoti cetanā hoti. Gihīti vacanaṃ natthi, samaṇoti vacanaṃ hoti. Gihīti paṇṇatti natthi, samaṇoti paṇṇatti hoti. Gihīti byavahāro natthi, samaṇoti vā pabbajitoti vā byavahāro hoti. Tasmā sabbepete labbhanti.

33. Yesaṃ kho ahaṃ saṃyojanānaṃ hetu pāṇātipātīti ettha pāṇātipātova saṃyojanaṃ. Pāṇātipātasēva hi hetu pāṇātipātapaccayā pāṇātipātī nāma hoti. Pāṇātipātānaṃ pana bahutāya “yesaṃ kho aha” nti vuttaṃ. **Tesāhaṃ saṃyojanānanti** tesāhaṃ pāṇātipātābandhanānaṃ. **Pahānāya**

samucchedāya paṭipannoti iminā apāṇātipātasaṅkhātena kāyikasīlasaṃvarena pahānatthāya samucchedanattāya paṭipanno. **Attāpi maṃ upavadeyyāti** kunthakipillikampi nāma jīvītā avoropanakasāsane pabbajitvā pāṇātipātamatatopi oramituṃ na sakkomi, kiṃ mayhaṃ pabbajjāyāti evaṃ attāpi maṃ upavadeyya. **Anuviccāpi maṃ viññū garaheyyunti** evarūpe nāma sāsane pabbajitvā pāṇātipātamatatopi oramituṃ na sakkoti, kiṃ etassa pabbajjāyāti evaṃ anuvicca tulayitvā pariyoḡāhetvā aññepi viññū paṇḍitā garaheyyuṃ. **Etadeva kho pana saṃyojanametam nīvaraṇanti** dasasu saṃyojanesu pañcasu ca nīvaraṇesu apaniyāpannampi “aṭṭha nīvaraṇā”ti desanāvāsenetaṃ vuttaṃ. Vaṭṭabandhanaṭṭhena hi hitapaṭicchādanaṭṭhena ca saṃyojanantipi nīvaraṇantipi vuttaṃ. **Āsavāti** pāṇātipātakāraṇā eko avijjāsavo uppajjati. **Vighātapariḷāhāti** vighātā ca pariḷāhā ca. Tattha vighātaggahaṇena kilesadukkhaṇca vipākadukkhaṇca gahitaṃ, pariḷāhaggahaṇenapi kilesapariḷāho ca vipākapariḷāho ca gahito. Iminā upāyena sabbattha attho veditabbo.

34-40. Ayaṃ pana viśeso – **tesāhaṃ saṃyojanānaṃ pahānāyāti** imasmiṃ pade iminā dinnādānasaṅkhātena kāyikasīlasaṃvarena, saccavācāsaṅkhātena vācasikasīlasaṃvarena, apisuṇāvācāsaṅkhātena vācasikasīlasaṃvarena, agiddhilobhasaṅkhātena mānasikasīlasaṃvarena, anindārosasaṅkhātena kāyikavācasikasīlasaṃvarena, akodhupāyāsasaṅkhātena mānasikasīlasaṃvarena, anatimānasaṅkhātena mānasikasīlasaṃvarena pahānatthāya samucchedanattāya paṭipannoti evaṃ sabbavāresu yojanā kātābbā.

Attāpi maṃ upavadeyya anuviccāpi maṃ viññū garaheyyunti imesu pana padesu tiṇasalākampi nāma upādāya adinnaṃ aggahaṇasāsane pabbajitvā adinnādānamattatopi viramituṃ na sakkomi, kiṃ mayhaṃ pabbajjāyāti evaṃ attāpi maṃ upavadeyya. Evarūpe nāma sāsane pabbajitvā adinnādānamattatopi oramituṃ na sakkoti, kiṃ imassa pabbajjāyāti evaṃ anuviccāpi maṃ viññū garaheyyuṃ? Hasāpekkhatāyapi nāma davakamyatāya vā musāvādaṃ akaraṇasāsane pabbajitvā. Sabbākārena pisuṇaṃ akaraṇasāsane nāma pabbajitvā. Appamattakampi giddhilobhaṃ akaraṇasāsane nāma pabbajitvāpi. Kakacena aṅgesu okkantiyamānesupi nāma paresaṃ nindāroṣaṃ akaraṇasāsane pabbajitvā. Chinnakhāṇukaṇṭakādīsupi nāma kodhupāyāsaṃ akaraṇasāsane pabbajitvā. Adhimānamattampi nāma mānaṃ akaraṇasāsane pabbajitvā atimānamattampi pajahituṃ na sakkomi, kiṃ mayhaṃ pabbajjāyāti evaṃ attāpi maṃ upavadeyya. Evarūpe nāma sāsane pabbajitvā atimānamattampi pajahituṃ na sakkoti, kiṃ imassa pabbajjāyāti evaṃ anuviccāpi maṃ viññū garaheyyunti evaṃ sabbavāresu yojanā kātābbā.

Āsavāti imasmiṃ pana pade adinnādānakāraṇā kāmāsavo diṭṭhāsavo avijjāsavoti tayo āsavā uppajjanti, tathā musāvādakāraṇā pisuṇāvācākāraṇā ca, giddhilobhakāraṇā diṭṭhāsavo avijjāsavo ca, nindārosakāraṇā avijjāsavova, tathā kodhupāyāsakāraṇā, atimānakāraṇā bhavāsavo avijjāsavo cāti dveva āsavā uppajjantīti evaṃ āsavuppatti veditābbā.

Imesu pana aṭṭhasupi vāresu asammohatthaṃ puna ayaṃ saṅkhepavinicchayo – purimesu tāva catūsu viramituṃ na sakkomīti vattabbaṃ, pacchimesu pajahituṃ na sakkomīti. Pāṇātipātanindārosakodhupāyāsesu ca eko avijjāsavova hoti, adinnādānamusāvādapisuṇāvācāsu kāmāsavo diṭṭhāsavo avijjāsavo, giddhilobhe diṭṭhāsavo avijjāsavo, atimāne bhavāsavo avijjāsavo, apāṇātipātaṃ dinnādānaṃ kāyikaṃ sīlaṃ, amusā apisuṇaṃ vācasikasīlaṃ, ṭhapetvā anindāroṣaṃ sesāni tīṇi mānasikasīlāni. Yasmā pana kāyenapi ghaṭṭeti roseti vācāyapi, tasmā anindāroso dve ṭhānāni yāti, kāyikasīlampi hoti vācasikasīlampi. Ettāvataṃ kiṃ kathitaṃ? Pātimokkhasaṃvarasīlaṃ. Pātimokkhasaṃvarasīle ṭhitassa ca bhikkhuno paṭisaṅkhāpahānavasena gihivohārasamucchedo kathitoti veditabbo.

Kāmādīnavakathāvaṇṇanā

42. Vitthāradesanāyaṃ **tameṇaṃ dakkhoti** padassa **upasumbheyyāti** iminā saddhiṃ sambandho veditabbo. Iduṃ vuttaṃ hoti, tameṇaṃ kukkuraṃ upasumbheyya, tassa samīpe khipeyyāti attho.

Aṭṭhikaṅkalanti uraṭṭhiṃ vā piṭṭhikaṅṭakaṃ vā sīsattḥiṃ vā. Tañhi nimmaṃsattā kaṅkalanti vuccati. **Sunikkantaṃ nikkantaṃ** yathā sunikkantaṃ hoti, evaṃ nikkantaṃ nillikhitaṃ, yadetta allīnamāṃsaṃ atthi, taṃ sabbaṃ nillikhitvā aṭṭhimattameva katanti attho. Tenevāha “nimmaṃsa”nti. Lohitaṃ pana makkhitvā tiṭṭhati, tena vuttaṃ “lohitamakkhita”nti.

Bahudukkhā bahupāyāsāti diṭṭhadhammikasamparāyikehi dukkhehi bahudukkhā, upāyāsasaṃkilesehi bahupāyāsā. **Yāyaṃ upekkhā nānattā nānattasitāti** yā ayaṃ pañcakāmaguṇārammaṇavasena nānāsabhāvā, tāneva ca ārammaṇāni nissitattā “nānattasitā”ti vuccati pañcakāmaguṇūpekkhā, taṃ abhinivajjetvā. **Ekattā ekattasitāti** catutthajjhānupekkhā, sā hi divasampi ekasmiṃ ārammaṇe uppajjanato ekasabhāvā, tadeva ekaṃ ārammaṇaṃ nissitattā ekattasitā nāma. **Yattha sabbaso lokāmisūpādānā aparisesā nirujjhantī** yattha catutthajjhānupekkhāyaṃ yaṃ upekkhaṃ āgamma yaṃ paṭicca sabbena sabbaṃ aparisesā lokāmisasaṅkhātā pañcakāmaguṇāmisā nirujjhanti. **Pañcakāmaguṇāmisāti** ca kāmaguṇārammaṇachandarāgā, gahaṇaṭṭhena teyeva ca upādānātipi vuttā. **Tamevūpekkhaṃ bhāvetī** taṃ lokāmisūpādānānaṃ paṭipakkhabhūtaṃ catutthajjhānupekkhameva vaḍḍheti.

43. Udḍiyyeyāti uppativā gaccheyya. **Anupatitvāti** anubandhitvā. **Vitaccheyyunti** mukhatuṇḍakena ḍaṃsantā taccheyyūṃ. **Vissajjeyyunti** maṃsapesiṃ nakhehi kaḍḍhitvā pāteyyūṃ.

47. Yānaṃ vā poriseyyanti purisānucchavikaṃ yānaṃ. **Pavaramaṇikuṇḍalanti** nānappakāraṃ uttamamaṇiṅca kuṇḍalaṅca. **Sāni harantī** attano bhaṇḍakāni gaṇhanti.

48. Sampannaphalanti madhuraphalaṃ. **Upapannaphalanti** phalūpapannaṃ bahuphalaṃ.

49. Anuttaranti uttamaṃ pabhassaraṃ nirupakkilesaṃ.

50. Ārakā ahaṃ, bhanteti pathavito nabhaṃ viya samuddassa orimatīrato paratīraṃ viya ca suvidūravidūre ahaṃ. **Anājānīyati** gihivohārasamucchedanassa kāraṇaṃ ajānanaṃ. **Ājānīyabhojananti** kāraṇaṃ jānantehi bhuñjitabbaṃ bhojanaṃ. **Anājānīyabhojananti** kāraṇaṃ ajānantehi bhuñjitabbaṃ bhojanaṃ. Sesamaṃ sabbattha uttānamevāti.

Papañcasūdaniyā majjhimanikāyaṭṭhakathāya

Potaliyasuttavaṇṇanā niṭṭhitā.

5. Jīvakasuttavaṇṇanā

51. Evaṃ me sutanti jīvakasuttaṃ. Tattha **jīvakassa komārabhaccassa ambavaneti** ettha jīvatīti **jīvako**. Kumārena bhatoti **komārabhacco**. Yathāha “kiṃ etaṃ bhaṇe kākehi samparikiṇṇanti? Dāraṃ devāti. Jīvati bhaṇeti? Jīvati devāti. Tena hi bhaṇe taṃ dāraṃ amhākaṃ antepuraṃ netvā dhātīnaṃ detha poseṭunti. Tassa jīvatīti jīvakoti nāmaṃ akaṃsu, kumārena posāpitoti komārabhaccoti nāmaṃ akaṃsū”ti (mahāva. 328). Ayamettha saṅkhepo. Vitthārena pana jīvakavatthu khandhake āgatameva. Vinicchayakathāpissa **samantapāsādikāya vinayaṭṭhakathāya** vuttā.

Ayaṃ pana jīvako ekasmiṃ samaye bhagavato dosābhisannaṃ kāyaṃ virecivā siveyyakaṃ dussayugaṃ datvā vatthānumodanapariyosāne sotāpattiphale patiṭṭhāya cintesi – “mayā divasassa dvattikkhattuṃ buddhupaṭṭhānaṃ gantabbaṃ, idaṅca veḷuvanaṃ atidūre, mayhaṃ uyyānaṃ ambavanaṃ āsannataraṃ, yaṃnūnāhamettha bhagavato vihāraṃ kāreyya”nti. So tasmīṃ ambavane rattiṭṭhānadivāṭṭhānaleṇakuṭimaṇḍapādīni sampādetvā bhagavato anucchavikaṃ gandhakuṭiṃ kāretvā ambavanaṃ aṭṭhārasaṭṭhubbedhena tambapaṭṭavaṇṇena pākārena parikkhipāpetvā buddhappamukhaṃ

bhikkhusaṅghaṃ cīvarabhattena santappetvā dakkhiṇodakaṃ pātetvā vihāraṃ niyyātesi. Taṃ sandhāya vuttaṃ – ‘jīvakassa komārabhaccassa ambavane’ ti.

Ārabhantīti ghātentī. **Uddissakatanti** uddisitvā kataṃ. **Paṭiccamanti** attānaṃ paṭicca kataṃ. Atha vā **paṭiccamanti** nimittakammassetāṃ adhivacanaṃ, taṃ paṭicca kammamettha atthīti maṃsaṃ ‘‘paṭiccamma’’nti vuttaṃ hoti yo evarūpaṃ maṃsaṃ paribhuñjati, sopi tassa kamma dāyādo hoti, vadhakassa viya tassāpi pāṇaghātakammaṃ hotīti tesāṃ laddhi. **Dhammassa cānudhammaṃ byākarontīti** bhagavatā vuttakāraṇassa anukāraṇaṃ kathenti. Ettha ca kāraṇaṃ nāma tikoṭiparisuddhammacchamaṃsaparibhogo, anukāraṇaṃ nāma mahājanassa tathā byākaraṇaṃ. Yasmā pana bhagavā uddissakataṃ na paribhuñjati, tasmā neva taṃ kāraṇaṃ hoti, na titthiyānaṃ tathā byākaraṇaṃ anukāraṇaṃ. **Sahadhammiko vādānuvādoti** parehi vuttakāraṇena sakāraṇo hutvā tumhākaṃ vādo vā anuvādo vā viññūhi garahitabbakāraṇaṃ koci appamattakopi kiṃ na āgacchati. Idaṃ vuttaṃ hoti – ‘‘kiṃ sabbākārenapi tumhākaṃ vāde gārayhaṃ kāraṇaṃ natthī’’ti. **Abbhācikkhantīti** abhibhavitvā ācikkhanti.

52. Thānehīti kāraṇehi. Diṭṭhādīsu **diṭṭhaṃ** nāma bhikkhūnaṃ atthāya migamacche vadhitvā gayhamānaṃ diṭṭhaṃ. **Sutaṃ** nāma bhikkhūnaṃ atthāya migamacche vadhitvā gahitanti sutaṃ. **Parisaṅkitam** nāma diṭṭhapaṅkitam sutapaṅkitam tadubhayavimuttapaṅkitanti tividhaṃ hoti.

Tatrāyaṃ sabbasaṅgāhakavinicchayo – idha bhikkhū passanti manusse jālavāgurādihatthe gāmato vā nikkhamante araṅṅe vā vicarante. Dutiyadivase ca nesāṃ taṃ gāmaṃ piṇḍāya pavitṭhānaṃ samacchamaṃsaṃ piṇḍapātaṃ abhiharanti. Te tena diṭṭhena paṅkitanti ‘‘bhikkhūnaṃ nu kho atthāya kata’’nti, idaṃ **diṭṭhapaṅkitam** nāma, etaṃ gahetuṃ na vaṭṭati. Yaṃ evaṃ aparisaṅkitam, taṃ vaṭṭati. Sace pana te manussā ‘‘kasmā, bhante, na gaṇhathā’’ti pucchitvā tamatthaṃ sutvā ‘‘nayidaṃ, bhante, bhikkhūnaṃ atthāya kataṃ, amhehi attano atthāya vā rājayuttādīnaṃ atthāya vā kata’’nti vadanti, kappati.

Na heva kho bhikkhū passanti, apica suṇanti ‘‘manussā kira jālavāgurādihatthā gāmato vā nikkhamanti araṅṅe vā vicaranti’’ti. Dutiyadivase ca nesāṃ taṃ gāmaṃ piṇḍāya pavitṭhānaṃ samacchamaṃsaṃ piṇḍapātaṃ abhiharanti. Te tena sutena paṅkitanti ‘‘bhikkhūnaṃ nu kho atthāya kata’’nti, idaṃ **sutapaṅkitam** nāma, etaṃ gahetuṃ na vaṭṭati. Yaṃ evaṃ aparisaṅkitam, taṃ vaṭṭati. Sace pana te manussā ‘‘kasmā, bhante, na gaṇhathā’’ti pucchitvā tamatthaṃ sutvā ‘‘nayidaṃ, bhante, bhikkhūnaṃ atthāya kataṃ, amhehi attano atthāya vā rājayuttādīnaṃ atthāya vā kata’’nti vadanti, kappati.

Na heva kho pana passanti na suṇanti, apica tesāṃ gāmaṃ piṇḍāya pavitṭhānaṃ pattaṃ gahetvā samacchamaṃsaṃ piṇḍapātaṃ abhisaṅkharitvā abhiharanti. Te paṅkitanti ‘‘bhikkhūnaṃ nu kho atthāya kata’’nti, idaṃ **tadubhayavimuttapaṅkitam** nāma. Etampi gahetuṃ na vaṭṭati. Yaṃ evaṃ aparisaṅkitam, taṃ vaṭṭati. Sace pana te manussā ‘‘kasmā, bhante, na gaṇhathā’’ti pucchitvā tamatthaṃ sutvā ‘‘nayidaṃ, bhante, bhikkhūnaṃ atthāya kataṃ, amhehi attano atthāya vā rājayuttādīnaṃ atthāya vā kataṃ, pavattamaṃsaṃ vā kataṃ, kappiyameva labhitvā bhikkhūnaṃ atthāya sampādita’’nti vadanti, kappati.

Matānaṃ petakiccathāya maṅgalādīnaṃ vā atthāya katepi eseva nayo. Yaṃ yañhi bhikkhūnaṃyeva atthāya akataṃ, yatha ca nibbematikā honti, taṃ sabbaṃ kappati. Sace pana ekasmiṃ vihāre bhikkhū uddissa kataṃ hoti, te ca attano atthāya katabhāvaṃ na jānanti, aṅṅe jānanti. Ye jānanti, tesāṃ na vaṭṭati, itaresāṃ vaṭṭati. Aṅṅe na jānanti, teyeva jānanti, tesāṃyeva na vaṭṭati, aṅṅesaṃ vaṭṭati. Tepi ‘‘amhākaṃ atthāya kataṃ’’ti jānanti aṅṅepi ‘‘etesāṃ atthāya kata’’nti jānanti, sabbesampi taṃ na vaṭṭati. Sabbe na jānanti, sabbesaṃ vaṭṭati. Pañcasu hi sahadhammikesu yassa kassaci vā atthāya uddissa kataṃ sabbesaṃ na kappati.

Sace pana koci ekaṃ bhikkhuṃ uddissa pāṇaṃ vadhitvā tassa pattaṃ pūretvā deti, so ce attano atthāya katabhāvaṃ jānaṃyeva gahetvā aññassa bhikkhuno deti, so tassa saddhāya paribhuñjati. Kassāpattīti? Dvinnampi anāpatti. Yañhi uddissa kataṃ, tassa abhuttatāya anāpatti, itarassa ajānanatāya. Kappiyamaṃsassa hi paṭiggahaṇe āpatti natthi. Uddissakatañca ajānitvā bhuttassa pacchā ñatvā āpattidesanākiccaṃ nāma natthi. Akappiyamaṃsaṃ pana ajānitvā bhuttena pacchā ñatvāpi āpatti desetabbā. Uddissakatañhi ñatvā bhuñjatova āpatti, akappiyamaṃsaṃ ajānitvā bhuttassāpi āpattiyeva. Tasmā āpattibhūrukena rūpaṃ sallakkhentenāpi pucchitvāva maṃsaṃ paṭiggahetabbam, paribhogakāle pucchitvā paribhuñjissāmīti vā gahetvā pucchitvāva paribhuñjitabbam. Kasmā? Duviññeyyattā. Acchamaṃsañhi sūkaramaṃsasadisam hoti, dīpimaṃsādīni ca migamaṃsasadisāni, tasmā pucchitvā gahaṇameva vaṭṭatīti vadanti.

Adiṭṭhanti bhikkhūnaṃ atthāya vadhitvā gayhamānaṃ adiṭṭhaṃ. **Asutanti** bhikkhūnaṃ atthāya vadhitvā gahitanti asutaṃ. **Aparisaṅkitanti** diṭṭhaparisaṅkitādivasena aparisaṅkitaṃ. **Paribhoganti vadāmīti** imehi tīhi kāraṇehi parisuddhaṃ **tikoṭiparisuddhaṃ** nāma hoti, tassa paribhogo araṇṇe jātasūpeyyasākaparibhogasadisam hoti, tathārūpaṃ paribhuñjantassa mettāvihārissa bhikkhuno doso vā vajiṃ vā natthi, tasmā taṃ paribhuñjitabbanti vadāmīti attho.

53. Idāni tādisassa paribhoge mettāvihārinopi anavajjataṃ dassetuṃ **idha, jīvaka, bhikkhūti**tiādīmāha. Tattha kiñcāpi aniyamtvā **bhikkhūti** vuttaṃ, atha kho attānameva sandhāya etaṃ vuttanti veditabbam. Bhagavatā hi mahāvaccagottasutte, caṅkīsutte, imasmiṃ sutteti tīsu ṭhānesu attānaṃyeva sandhāya desanā katā. **Pañitena piṇḍapātenāti** heṭṭhā anaṅgaṇasutte yo koci mahaggho piṇḍapāto pañitapiṇḍapātoti adhippeto, idha pana maṃsūpasecanova adhippeto. **Agathitoti** taṇhāya agathito. **Amucchitoti** taṇhā mucchanāya amucchito. **Anajjhopannoti** na adhiopanno, sabbaṃ ālumpitvā ekappahārenea gilitukāmo kāko viya na hotīti attho. **Ādīnavadassāvīti** ekarattivāsena udarapaṭalaṃ pavisitvā navahi vaṇamukhehi nikkhamissatītiādīnā nayena ādīnavam passanto. **Nissaraṇapañño paribhuñjati**ti idamatthamāhāraparibhogoti paññāya paricchinditvā paribhuñjati. **Attabyābādhāya vā cetetīti** attadukkhāya vā citeti. **Sutametanti** sutam mayā etaṃ pubbe, etaṃ mayhaṃ savanamattamevāti dasseti. **Sace kho te, jīvaka, idam sandhāya bhāsītanti**, jīvaka, mahābrahmunā vikkhambhanappahānena byāpādādayo pahīnā, tena so mettāvihārī mayhaṃ samucchadappahānena, sace te idam sandhāya bhāsītaṃ, evaṃ sante tava idam vacanaṃ anujānāmīti attho. So sampaṭicchī.

54. Athassa bhagavā sesabrahmavihāravasenāpi uttari desanaṃ vaḍḍhento “idha, jīvaka, bhikkhū”tiādīmāha. Taṃ uttānatthameva.

55. **Yo kho jīvaka**ti ayaṃ pāṭiekkho anusandhi. Imasmiñhi ṭhāne bhagavā dvāraṃ thaketi, sattānuddayaṃ dasseti. Sace hi kassaci evamassa “ekaṃ rasapiṇḍapātaṃ datvā kappasatasahassaṃ saggasampattim paṭilabhanti, yaṃkiñci katvā paraṃ māretvāpi rasapiṇḍapātova dātabbo”ti, taṃ paṭisedhento “yo kho, jīvaka, tathāgataṃ vā”tiādīmāha.

Tattha **iminā paṭhamena ṭhānenāti** iminā ānattimatteneva tāva paṭhamena kāraṇena. **Galappavedhakenāti** yottena gale bandhitvā kaḍḍhito galena pavedhentena. **Ārabhiyamānoti** māriyamāno. **Akappiyena āsādetīti** acchamaṃsaṃ sūkaramaṃsanti, dīpimaṃsaṃ vā migamaṃsanti khādāpetvā – “tvaṃ kiṃ samaṇo nāma, akappiyamaṃsaṃ te khādita”nti ghaṭṭeti. Ye pana dubbhikkhādīsu vā byādhiniggahaṇatthaṃ vā “acchamaṃsaṃ nāma sūkaramaṃsasadisam, dīpimaṃsaṃ migamaṃsasadisam”nti jānantā “sūkaramaṃsaṃ idam, migamaṃsaṃ ida”nti vatvā hitajjhāsayena khādāpentī, na te sandhāyetaṃ vuttaṃ. Tesañhi bahupuññameva hoti. **Esāham, bhante, bhagavantaṃ saraṇaṃ gacchāmi dhammañca bhikkhusaṅghañcāti** ayaṃ āgataphalo viññātasāsano diṭṭhasacco ariyasāvako. Imaṃ pana dhammadesanaṃ ogāhanto pasādaṃ uppādetvā dhammakathāya thutim karonto evamāha. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Jīvakasuttavaṇṇanā niṭṭhitā.

6. Upālisuttavaṇṇanā

56. Evaṃ me sutanti upālisuttaṃ. Tattha **nālandāyanti** nālandāti evaṃnāmake nagare taṃ nagaraṃ gocaragāmaṃ katvā. **Pāvārikambavaneti** dussapāvārikaseṭṭhino ambavane. Taṃ kira tassa uyyānaṃ ahosi, so bhagavato dhammadesanaṃ sutvā bhagavati pasanno tasmīṃ uyyāne kuṭiḷenaṃaṇḍapādiṇaṃaṇḍitaṃ bhagavato vihāraṃ katvā niyyādesi, so vihāro jīvakambavanaṃ viya pāvārikambavananteva saṅkhaṃ gato. Tasmīṃ pāvārikambavane viharatūti attho. **Dīghatapassīti** dīghattā evaṃladdhanāmo. **Piṇḍapātapaṭikkantoti** piṇḍapātato paṭikkanto. Sāsane viya kiṃ pana bāhirāyatane piṇḍapātoti vohāro atthīti, natthi.

Paññāpetīti dasseti ṭhapeti. **Daṇḍāni paññāpetīti** idaṃ nigaṇṭhasamayena pucchanto āha. **Kāyadaṇḍaṃ vacīdaṇḍaṃ manodaṇḍanti** ettha purimadaṇḍadvayaṃ te acittakaṃ payyapenti. Yathā kira vāte vāyante sākhaṃ calati, udakaṃ calati, na ca tattha cittaṃ atthi, evaṃ kāyadaṇḍopi acittakova hoti. Yathā ca vāte vāyante tālapaṇḍāṇi saddaṃ karonti, udakāni saddaṃ karonti, na ca tattha cittaṃ atthi, evaṃ vacīdaṇḍopi acittakova hotīti imaṃ daṇḍadvayaṃ acittakaṃ paññāpeti. Cittaṃ pana manodaṇḍanti paññāpeti. Athassa bhagavā vacanaṃ patiṭṭhapetukāmo “kiṃ pana tapassī”tiādimāha.

Tattha **kathāvatthusminti** ettha kathāyeva kathāvatthu. Kathāyaṃ patiṭṭhapesīti attho. Kasmā pana bhagavā evamakāsi? Passati hi bhagavā “ayaṃ imaṃ kathaṃ ādāya gantvā attano satthu mahānigaṇṭhassa āroccasati, tāsāṃca parisati, upāli gahapati nisinno, so imaṃ kathaṃ sutvā mama vādaṃ āropetuṃ āgamissati, tassāhaṃ dhammaṃ desessāmi, so tikkhattuṃ saraṇaṃ gamissati, athassa cattāri saccāni pakāsessāmi, so saccapakāsanāvasāne sotāpattiphale patiṭṭhahissati, paresaṃ saṅghatthameva hi mayā pāramiyo pūritā”ti. Imamatthaṃ passanto evamakāsi.

57. Kammāni paññāpesīti idaṃ nigaṇṭho buddhasamayena pucchanto āha. **Kāyakammaṃ vacīkammaṃ manokammaṃ** ettha kāyadvāre ādānagahaṇamuñcanacopanapattā aṭṭhakāmāvacarakusalacetanā dvādasākusalacetanāti vīsaticetanā **kāyakammaṃ** nāma. Kāyadvāre ādānāṇi apatvā vacīdvāre vacanabhedāṃ pāpayamānā uppannā tāyeva vīsaticetanā **vacīkammaṃ** nāma. Ubhayadvāre copanaṃ appatvā manodvāre uppannā ekūnatīṃsakusalākusalacetanā **manokammaṃ** nāma. Apica saṅkhepato tividhaṃ kāyaduccaritaṃ kāyakammaṃ nāma, catubbidhaṃ vacīduccaritaṃ vacīkammaṃ nāma, tividhaṃ manoduccaritaṃ manokammaṃ nāma. Imasmiṃca sutte kammaṃ dhuraṃ, anantarasutte “cattārimāni puṇṇa kammāni mayā sayāṃ abhiññā sacchikatvā paveditāni”ti (ma. ni. 2.81) evamāgatepi cetanā dhuraṃ. Yattha katthaci pavattā cetanā “kaṇhaṃ kaṇhavipāka”ntiādiḥbhedāṃ labhati. Niddesavāre cassa “sabyābajjhaṃ kāyasāṅkhāraṃ abhisāṅkharotī”tiādinā nayena sā vuttāva. Kāyadvāre pavattā pana idha kāyakammanti adhippetāṃ, vacīdvāre pavattā vacīkammaṃ, manodvāre pavattā manokammaṃ. Tena vuttaṃ – “imasmiṃ sutte kammaṃ dhuraṃ, anantarasutte cetanā”ti. Kammampi hi bhagavā kammanti paññāpeti yathā imasmiṃyeva sutte. Cetanampi, yathāha – “cetanāhaṃ, bhikkhave, kammaṃ vadāmi, cetayitvā kammaṃ karotī”ti (a. ni. 6.63). Kasmā pana cetanā kammanti vuttā? Cetanāmūlakattā kammaṃ.

Ettha ca akusalaṃ patvā kāyakammaṃ vacīkammaṃ mahantanti vadanto na kilamati, kusalaṃ patvā manokammaṃ. Tathā hi mātughātāṇi cattāri kammāni kāyeneva upakkamitvā kāyeneva karoti, niraye kappatṭhikasāṅghabhedakammaṃ vacīdvārena karoti. Evaṃ akusalaṃ patvā kāyakammaṃ vacīkammaṃ mahantanti vadanto na kilamati nāma. Ekā pana jhānacetanā caturāsītīkappasahassāni saggasampattiṃ āvahati, ekā maggacetanā sabbākusalaṃ samugghātetvā arahattaṃ gaṇhāpeti. Evaṃ kusalaṃ patvā manokammaṃ mahantanti vadanto na kilamati nāma. Imasmiṃ pana ṭhāne bhagavā akusalaṃ patvā manokammaṃ mahāsāvajjaṃ vadamāno niyatamicchādīṭṭhiṃ sandhāya vadati. Tenevāha – “nāhaṃ, bhikkhave, aññaṃ ekadhammampi samanupassāmi, yaṃ evaṃ mahāsāvajjaṃ, yathayidaṃ, bhikkhave, micchādīṭṭhi. Micchādīṭṭhiparamāni, bhikkhave, mahāsāvajjāni”ti (a. ni. 1.310).

Idāni nigaṇṭhopi tathāgatena gatamaggaṃ paṭipajjanto kiñci atthanipphattiṃ apassantopi “kiṃ panāvuso, gotamā” tiādimaḥa.

58. Bālakiniyāti upālissa kira bālakaloṇakāragāmo nāma atthi, tato āyaṃ gahetvā manussā āgatā, so “etha bhaṇe, amhākaṃ satthāraṃ mahānigaṇṭhaṃ passissāmā” ti tāya parisāya parivuto tattha agamāsi. Taṃ sandhāya vuttaṃ “bālakiniyā parisāyā” ti, bālakagāmaṃvāsiniyāti attho.

Upālīpamukhāyāti upālījeṭṭhakāya. Apica **bālakiniyāti** bālavatīyā bālussannāyāti pi attho.

Upālīpamukhāyāti upālīgahapatiyeva tattha thokaṃ sappañño, so tassā pamukho jeṭṭhako. Tenāpi vuttaṃ “upālīpamukhāyā” ti. **Handāti** vacasāyathe nipāto. **Chavoti** lāmako. **Ojārikassāti** mahantassa.

Upānidhāyāti upanikkhipitvā. Idaṃ vuttaṃ hoti, kāyadaṇḍassa santike nikkhipitvā “ayaṃ nu kho mahanto, ayaṃ mahanto” ti evaṃ olokiyamāno chavo manodaṇḍo kiṃ sobhati, kuto sobhissati, na sobhati, upanikkhepamattampi nappahotīti dīpeti. **Sādhu sādhu, bhante, tapassīti** dīghatapassissa sādhuḥkāraṃ dento, bhanteti nāṭaputtamālapati.

60. Na kho metaṃ, bhante, ruccatīti, bhante, etaṃ mayhaṃ na ruccati. **Māyāvīti** māyākāro. **Āvaṭṭanimāyanti** āvaṭṭetvā gahaṇamāyaṃ. **Āvaṭṭetīti** āvaṭṭetvā parikkhipitvā gaṇhāti. **Gaccha tvaṃ gahapatīti** kasmā mahānigaṇṭho gahapatiṃ yāvattiyāṃ paṇḍitīyeva? Dīghatapassī pana paṭibāhateva? Mahānigaṇṭhena hi bhagavatā saddhiṃ ekaṃ nagaraṃ upanissāya viharantenapi na bhagavā dīṭṭhapubbo. Yo hi satthuvādapaṭiñño hoti, so taṃ paṭiññaṃ appahāya buddhadassane abhabbo. Tasmā esa buddhadassanassa aladdhapubbattā dasabalassa dassanasampattiñca niyyānikakathābhāvañca ajānanto yāvattiyāṃ paṇḍiteva. Dīghatapassī pana kālena kālaṃ bhagavantaṃ upasaṅkamitvā tiṭṭhatipi nisīdatipi pañhampi pucchati, so tathāgatassa dassanasampattimpī niyyānikakathābhāvampī jānāti. Athassa etadahosi – “ayaṃ gahapati paṇḍito, samaṇassa gotamassa santike gantvā dassanepi pasīdeyya, niyyānikakathaṃ sutvāpi pasīdeyya. Tato na puna amhākaṃ santikaṃ āgaccheyyā” ti. Tasmā yāvattiyāṃ paṭibāhateva.

Abhivādetvāti vanditvā. Tathāgatañhi disvā pasannāpi appasannāpi yebhuyyena vandantiyeva, appakā na vandanti. Kasmā? Atiucce hi kule jāto agāraṃ ajjhāvasantopi vanditabboyevāti. Ayaṃ pana gahapati pasannattāva vandi, dassaneyeva kira pasanno. **Āgamā nu khvidhāti** āgamā nu kho idha.

61. Sādhu sādhu, bhante, tapassīti dīghatapassissa sādhuḥkāraṃ dento, bhanteti, bhagavantaṃ ālapati. **Sacce paṭiṭṭhāyāti** thusarāsīmhi ākoṭitakhāṇuko viya acalanto vacīsacce paṭiṭṭhahitvā. **Siyā noti** bhavyeva amhākaṃ.

62. Idhāti imasmim loke. **Assāti** bhavyeva. **Sītodakapaṭikkhittoti** nigaṇṭhā sattasaññāya sītodakaṃ paṭikkhipanti. Taṃ sandhāyetaṃ vuttaṃ. **Manosattā nāma devāti** manamhi sattā laggā lagitā. **Manopaṭibaddhoti** yasmā manamhi paṭibaddho hutvā kālaṅkaroti, tasmā manosattesu devesu upapajjati dasseti. Tassa hi pittajararogo bhavissati. Tenassa uṇhodakaṃ pivituṃ vā hatthapādādīdihovanatthāya vā gattaparisiñcanatthāya vā upanetuṃ na vaṭṭati, rogo balavataro hoti. Sītodakaṃ vaṭṭati, rogaṃ vūpasameti. Ayaṃ pana uṇhodakameva paṭisevati, taṃ alabhamāno odanakañjikaṃ paṭisevati. Cittena pana sītodakaṃ pātukāmo ca paribhuñjitukāmo ca hoti. Tenassa manodaṇḍo tattheva bhijjati. So kāyadaṇḍaṃ vacīdaṇḍaṃ rakkhāmīti sītodakaṃ pātukāmo vā paribhuñjitukāmo vā sītodakameva dethāti vattuṃ na visahati. Tassa evaṃ rakkhitāpi kāyadaṇḍavacīdaṇḍā cutim vā paṭisandhim vā ākaḍḍhituṃ na sakkonti. Manodaṇḍo pana bhinnopi cutimpī paṭisandhimpī ākaḍḍhatīyeva. Iti naṃ bhagavā dubbalakāyadaṇḍavacīdaṇḍā chavā lāmakā, manodaṇḍova balavā mahantoti vadāpesi.

Tassapi upāsakassa etadahosi. “Mucchāvasena asaññibhūtānañhi sattāhampi assāsapassāsā nappavattanti, cittasantatipavattimatteneva pana te matāti na vuccanti. Yadā nesam cittaṃ nappavattati, tadā ‘matā ete nīharitvā te jhāpethā’ ti vattabbataṃ āpajjanti. Kāyadaṇḍo nirīho abyāpāro, tathā vacīdaṇḍo. Citteneva pana tesam cutipi paṭisandhipi hoti. Itipi manodaṇḍova mahanto. Bhijjivāpi

cutipaṭisandhiākaḍḍhanato eseva mahanto. Amhākaṃ pana mahānigaṇṭhassa kathā aniyyānikā’’ti sallakkhesi. Bhagavato pana vicittāni pañhapaṭibhānāni sotukāmo na tāva anujānāti.

Na kho te sandhiyatīti na kho te ghaṭiyati. **Purimena vā pacchimanti** ‘‘kāyadaṇḍo mahanto’’ti iminā purimena vacanena idāni ‘‘manodaṇḍo mahanto’’ti idaṃ vacanaṃ. **Pacchimena vā purimanti** tena vā pacchimena aduṃ purimavacanaṃ na ghaṭiyati.

63. Idānissa bhagavā aññānīpi kāraṇāni āharanto ‘‘taṃ kiṃ maññasī’’tiādīmāha. Tattha **cātuyāmasaṃvarasaṃvutoti** na pāṇamatipāteti, na pāṇamatipātayati, na pāṇamatipātayato samanūñño hoti. Na adinnaṃ ādiyati, na adinnaṃ ādiyāpeti, na adinnaṃ ādiyato samanūñño hoti. Na musā bhaṇāti, na musā bhaṇāpeti, na musā bhaṇato samanūñño hoti. Na bhāvitamāsīsati, na bhāvitamāsīsāpeti, na bhāvitamāsīsato samanūñño hotīti iminā catukoṭṭhāsena saṃvarena saṃvuto. Ettha ca **bhāvīanti** pañcakāmaguṇā.

Sabbavārivāritoti vāritasabbaudako, paṭikkhittasabbasītodakoti attho. So hi sītodake sattasaññī hoti, tasmā na taṃ valañjēti. Atha vā **sabbavārivāritoti** sabbena pāpavāraṇena vāritapāpo. **Sabbavāriyuttoti** sabbena pāpavāraṇena yutto. **Sabbavāridhutoti** sabbena pāpavāraṇena dhutapāpo. **Sabbavāriphuṭoti** sabbena pāpavāraṇena phuṭo. **Khuddake pāṇe saṅghātaṃ āpādetīti** khuddake pāṇe vadhaṃ āpādeti. So kira ekindriyaṃ pāṇaṃ duvindriyaṃ pāṇanti paññāpeti. Sukkhadaṇḍaka-purāṇapaṇṇasakkhara-kathalānīpi pāṇoteva paññāpeti. Tattha khuddakaṃ udakabindu khuddako pāṇo, mahantaṃ mahantoti saññī hoti. Taṃ sandhāyetaṃ vuttaṃ. **Kismiṃ paññāpetīti** kattha katarasmim koṭṭhāse paññāpeti. **Manodaṇḍasminti** manodaṇḍakoṭṭhāse, bhanteti. Ayaṃ pana upāsako bhaṇantova sayampi sallakkhesi – ‘‘amhākaṃ mahānigaṇṭho ‘asañcetanikaṃ kammaṃ appasāvajjaṃ, sañcetanikaṃ mahāsāvajja’’nti paññāpetvā cetanaṃ manodaṇḍoti paññāpeti, aniyyānikā etassa kathā, bhagavatova niyyānikā’’ti.

64. **Iddhāti** samiddhā. **Phīṭāti** atisamiddhā sabbapāliphullā viya. **Ākiṇṇamanussāti** janasaṃmākulā. **Pāṇāti** hatthiassādayo tiracchānagatā ceva itthipurisadārakādayo manussajātikā ca. **Ekaṃ maṃsakhālanti** ekaṃ maṃsarāsīm. **Puñjanti** tasseva vevacanaṃ. **Iddhimāti** ānubhāvasampanno. **Cetovasippattoti** citte vasībhāvappatto. **Bhasmaṃ karissāmīti** chārikaṃ karissāmi. **Kiñhi sobhati ekā chavā nālandāti** idampi bhaṇanto so gahapati – ‘‘kāyapayogena paññāsampi manussā ekaṃ nālandaṃ ekaṃ maṃsakhalaṃ kātum na sakkonti, iddhimā pana eko ekeneva manopadosena bhasmaṃ kātum samattho. Amhākaṃ mahānigaṇṭhassa kathā aniyyānikā, bhagavatova kathā niyyānikā’’ti sallakkhesi.

65. **Araññaṃ araññabhūtanti** agāmakāṃ araññaṃ hutvā araññaṃ jātaṃ. **Isīnaṃ manopadosenāti** isīnaṃ atthāya katena manopadosena taṃ manopadosaṃ asahamānāhi devatāhi tāni raṭṭhāni vināsītāni. Lokikā pana isayo manaṃ padosetvā vināsayaṃsūti maññanti. Tasmā imasmim lokavāde ṭhatvāva idaṃ vādāropanaṃ katanti vedītabbaṃ.

Tattha daṇḍakīraññādīnaṃ evaṃ araññabhūtabhāvo jānitabbo – sarabhaṅgabodhisattassa tāva parisāya ativepullataṃ gatāya kisavaccho nāma tāpaso mahāsattassa antevāsī vivekavāsaṃ patthayamāno gaṇaṃ pahāya godhāvarītīrato kaliṅgaratṭhe **daṇḍakīrañño** kumbhapuraṃ nāma nagaraṃ upanissāya rājuyyāne vivekamanubrūhayamāno viharati. Tassa senāpati upaṭṭhāko hoti.

Tadā ca ekā gaṇikā rathaṃ abhiruhitvā pañcamātugāmasataparivārā nagaraṃ upasobhayamānā vicarati. Mahājano tameva olokayamāno parivāretvā vicarati, nagaravīthiyo nappahonti. Rājā vātapānaṃ vivarivā ṭhito taṃ disvā kā esāti pucchi. Tumhākaṃ nagarasobhinī devatī. So ussūyamāno ‘‘kiṃ etāya sobhati, nagaraṃ sayāṃ sobhissatī’’ti taṃ ṭhānantaraṃ acchindāpesi.

Sā tato paṭṭhāya kenaci saddhim santhavaṃ katvā ṭhānantaraṃ pariyesamānā ekadivasaṃ rājuyyānaṃ pavisitvā caṅkamanakoṭiyaṃ ālambanaphalakaṃ nissāya pāsāṇaphalake nisinnaṃ tāpasam

disvā cintesi – “kiliṭṭho vatāyaṃ tāpaso anañjitamaṇḍito, dāṭhikāhi parulhāhi mukhaṃ pihitaṃ, massunā uraṃ pihitaṃ, ubho kacchā parulhā”ti. Athassā domanassaṃ uppajji – “ahaṃ ekena kiccena vicarāmi, ayañca me kāḷakaṇṇī diṭṭho, udakaṃ āharatha, akkhīni dhovissāmi”ti udakadantakaṭṭhaṃ āharāpetvā dantakaṭṭhaṃ khāditvā tāpasassa sarīre piṇḍaṃ piṇḍaṃ kheḷaṃ pātetvā dantakaṭṭhaṃ jaṭamatthake khipitvā mukhaṃ vikkhāletvā udakaṃ tāpasassa matthakasmimyeva siñcivā – “yehi me akkhīni kāḷakaṇṇī diṭṭho, tāni dhotāni kalipavāhito”ti nikkhantā.

Taṃdivasañca rājā satim paṭilabhitvā – “bho kuhiṃ nagarasobhinī”ti pucchi. Imasmimyeva nagare devāti. Pakatiṭṭhānantaraṃ tassa dethāti ṭhānantaraṃ dāpesi. Sā pubbe sukatakammaṃ nissāya laddhaṃ ṭhānantaraṃ tāpasassa sarīre kheḷapātanena laddhanti saññamakāsi.

Tato katipāhassaccayena rājā purohitassa ṭhānantaraṃ gaṇhi. So nagarasobhiniyā santikaṃ gantvā “bhagini kinti katvā ṭhānantaraṃ paṭilabhi”ti pucchi. “Kiṃ brāhmaṇa aññaṃ kātabbaṃ atthi, rājuyyāne anañjitakāḷakaṇṇī kūṭajaṭilo eko atthi, tassa sarīre kheḷaṃ pātehi, evaṃ ṭhānantaraṃ labhissasi”ti āha. So “evaṃ karissāmi bhagini”ti tattha gantvā tāya kathitasadisameva sabbaṃ katvā nikkhami. Rājāpi taṃdivasameva satim paṭilabhitvā – “kuhiṃ, bho, brāhmaṇo”ti pucchi. Imasmimyeva nagare devāti. “Amhehi anupadhāretvā kataṃ, tadevassa ṭhānantaraṃ dethā”ti dāpesi. Sopi puññabalena labhitvā “tāpasassa sarīre kheḷapātanena laddhaṃ me”ti saññamakāsi.

Tato katipāhassaccayena rañño paccanto kupito. Rājā paccantaṃ vūpasameśsamīti caturaṅginiyā senāya nikkhami. Purohito gantvā rañño purato ṭhatvā “jayatu mahārājā”ti vatvā – “tumhe, mahārāja, jayathāya gacchathā”ti pucchi. Āma brāhmaṇāti. Evaṃ sante rājuyyāne anañjitakāḷakaṇṇī eko kūṭajaṭilo vasati, tassa sarīre kheḷaṃ pātetthāti. Rājā tassa vacanaṃ gahetvā yathā gaṇikāya ca tena ca kataṃ, tatheva sabbaṃ katvā orodhepi āṇāpesi – “etassa kūṭajaṭilassa sarīre kheḷaṃ pātetthā”ti. Tato orodhāpi orodhapālakāpi tatheva akamsu. Atha rājā uyyānavāre rakkhaṃ ṭhapāpetvā “rañña saddhim nikkhamantā sabbe tāpasassa sarīre kheḷaṃ apātetvā nikkhamituṃ na labhanti”ti āṇāpesi. Atha sabbo balakāyo ca seniyo ca teneva niyāmena tāpasassa upari kheḷaṃca dantakaṭṭhāni ca mukhavikkhālita udakañca pāpayimsu, kheḷo ca dantakaṭṭhāni ca sakalasarīraṃ avattharimsu.

Senāpati sabbapaccā suṇitvā “mayhaṃ kira sathāraṃ bhavantaṃ puññakkhettaṃ saggasopānaṃ evaṃ ghaṭṭayimsu”ti usumajātahadayo mukhena assasanto vegena rājuyyānaṃ āgantvā tathā byasanapattaṃ isim disvā kacchaṃ bandhitvā dvīhi hatthehi dantakaṭṭhāni apaviyūhitvā ukkhipitvā nisīdāpetvā udakaṃ āharāpetvā nhāpetvā sabbaosadhehi ceva catujjātigandhehi ca sarīraṃ ubbaṭṭetvā sukhumasātakena puñchitvā purato añjalim katvā ṭhito evamāha “ayuttaṃ, bhante, manussehi kataṃ, etesaṃ kiṃ bhavissati”ti. Devatā senāpati tidhā bhinnā, ekaccā “rājānameva nāsessāmā”ti vadanti, ekaccā “saddhim parisāya rājāna”nti, ekaccā “rañño vijitaṃ sabbaṃ nāsessāmā”ti. Idam vatvā pana tāpaso appamattakampi kopam akatvā lokassa santiupāyameva ācikkhanto āha “aparādho nāma hoti, accayaṃ pana desetum jānantassa pākatikameva hoti”ti.

Senāpati nayaṃ labhitvā rañño santikaṃ gantvā rājānaṃ vanditvā āha – “tumhehi, mahārāja, nirāparādhe mahiddhike tāpase aparajjhantehi bhāriyaṃ kammaṃ kataṃ, devatā kira tidhā bhinnā evaṃ vadanti”ti sabbaṃ ārocetvā – “khamāpīte kira, mahārāja, pākatikaṃ hoti, raṭṭhaṃ mā nāsetha, tāpasam khamāpethā”ti āha. Rājā attani dosaṃ kataṃ disvāpi evaṃ vadati “na taṃ khamāpessāmi”ti. Senāpati yāvatiyaṃ yācitvā anicchantamāha – “ahaṃ, mahārāja, tāpasassa balaṃ jānāmi, na so abhūtavādī, nāpi kupito, sattānuddayena pana evamāha khamāpetha naṃ mahārājā”ti. Na khamāpemi. Tena hi senāpatiṭṭhānaṃ aññaṃ detha, ahaṃ tumhākaṃ āṇāpavattiṭṭhāne na vasissāmi. Tvaṃ yena kammaṃ gaccha, ahaṃ mayhaṃ senāpatiṃ labhissāmi. Tato senāpati tāpasassa santikaṃ āgantvā vanditvā “kathaṃ paṭipajjāmi, bhante”ti āha. Senāpati ye te vacanaṃ suṇanti, sabbe saparikkhāre sadhane sadvipadacatuppade gahetvā sattadivasabbhantare bahi rajjasīmaṃ gaccha, devatā ativiya kupitā dhuvam raṭṭhampi araṭṭhaṃ karissanti. Senāpati tathā akāsi.

Rājā gatamattoyeva amittamathanam katvā janapadam vūpasametvā āgamma jayakhandhāvāraṭṭhāne nisīditvā nagaram paṭijaggāpetvā antonagaram pāvīsi. Devatā paṭhamamyeva udakavuṭṭhiṃ pātayīmsu. Mahājano attamano ahosi “kūṭajaṭilam aparaddhakālato paṭṭhāya amhākam rañño vaḍḍhiyeva, amitte nimmathesi, āgatadivaseyeva devo vuṭṭho”ti. Devatā puna sumanapupphavuṭṭhiṃ pātayīmsu, mahājano attamanataro ahosi. Devatā puna māsakavuṭṭhiṃ pātayīmsu. Tato kahāpaṇavuṭṭhiṃ, tato kahāpaṇattham na nikkhameyyunti maññamānā hatthūpagapādūpagādikatabhaṇḍavuṭṭhiṃ pātesum. Mahājano sattabhūmikapāsāde ṭhitopi otarivā ābharaṇāni piḷandhanto attamano ahosi. “Arahati vata kūṭajaṭilake kheḷapātanam, tassa upari kheḷapātitaḷato paṭṭhāya amhākam rañño vaḍḍhi jātā, amittamathanam katam, āgatadivaseyeva devo vassi, tato sumanavuṭṭhi māsakavuṭṭhi kahāpaṇavuṭṭhi katabhaṇḍavuṭṭhīti catasso vuṭṭhiyo jātā”ti attamanavācam nicchāretvā rañño katapāpe samanunño jāto.

Tasmim samaye devatā ekatodhāraubhatodhārādīni nānappakārāni āvudhāni mahājanassa upari phalake maṃsam koṭṭayamānā viya pātayīmsu. Tadanantaram vītaccike vītadhūme kiṃsukapupphavaṇṇe aṅgāre, tadanantaram kūṭagārappamāṇe pāsāṇe, tadanantaram antomuṭṭhiyam asaṅṭhahanikam sukhumavālikam vassāpayamānā asītihatthubbedham thalam akamsu. Rañño vijitattṭhāne kisavacchatāpaso senāpati mātuposakarāmoti tayova manussabhūtā arogā ahesum. Sesānam tasmim kamme asamaṅgībhūtānam tiracchānānam pānīyattṭhāne pānīyam nāhosi, tiṇattṭhāne tiṇam. Te yena pānīyam yena tiṇanti gacchantā appatteyeva sattame divase bahirajjasīmam pāpuṇīmsu. Tenāha sarabhaṅgabodhisatto –

“Kisañhi vaccham avakiriya daṇḍakī,
Ucchinnamūlo sajano saraṭṭho;
Kukkuḷanāme nirayamhi paccati,
Tassa phuliṅgāni patanti kāye”ti. (jā. 2.17.70);

Evam tāva **daṇḍakīraññassa** araññabhūtabhāvo veditabbo.

Kalīngaraṭṭhe pana **nāḷikīraraññe** rajjam kārayamāne himavati pañcasatatāpasā anitthigandhā ajinajaṭavākacīradharā vanamūlaphalabhakkhā hutvā ciram vītināmetvā loṇambilasevanattham manussapatham otarivā anupubbena kalīngaraṭṭhe nāḷikīrarañño nagaram sampattā. Te jaṭajīnavākacīrāni saṅṭhapetvā pabbajitānurūpaṃ upasamasiriṃ dassayamānā nagaram bhikkhāya pavisiṃsu. Manussā anuppanne buddhuppāde tāpasapabbajite disvā pasannā nisajjattṭhānam samvidhāya hatthato bhikkhābhājanam gahetvā nisīdāpetvā bhikkham sampādetvā adamsu. Tāpasā katabhattakiccā anumodanam akamsu. Manussā sutvā pasannacittā “kuhiṃ bhadantā gacchantī”ti pucchiṃsu. Yathāphāsukaṭṭhānam, āvusoti. Bhante, alam aññattha gamanena, rājuyyāne vasatha, mayam bhuttapātarāsā āgantvā dhammakatham sossāmāti. Tāpasā adhvāsetvā uyyānam agamaṃsu. Nāgarā bhuttapātarāsā suddhavatthanivatthā “dhammakatham sossāmā”ti saṅghā gaṇā gaṇībhūtā uyyānābhīmukhā agamaṃsu. Rājā uparipāsāde ṭhito te tathā gacchamāne disvā upaṭṭhākam pucchi “kiṃ ete bhaṇe nāgarā suddhavatthā suddhuttarāsāṅgā hutvā uyyānābhīmukhā gacchanti, kimettha samajjam vā nātakam vā atthi”ti? Natthi deva, ete tāpasānam santike dhammam sotukāmā gacchantīti. Tena hi bhaṇe ahampi gacchissāmi, mayā saddhiṃ gacchantūti. So gantvā tesam ārocesi – “rājāpi gantukāmo, rājānam parivāretvāva gacchathā”ti. Nāgarā pakatiyāpi attamanā tam sutvā – “amhākam rājā assaddho appasanno dussīlo, tāpasā dhammikā, te āgamma rājāpi dhammiko bhavissatī”ti attamanatarā ahesum.

Rājā nikkhamitvā tehi parivārito uyyānam gantvā tāpasehi saddhiṃ paṭisanthāram katvā ekamantam nisīdi. Tāpasā rājānam disvā parikathāya kusalassekassa tāpasassa “rañño dhammam kathehi”ti saññamadamsu, so tāpaso parisam oloketvā pañcasu veresu ādīnavam pañcasu ca sīlesu ānisamsam kathento –

“Pāṇo na hantabbo, adinnam nādātabbam, kāmesumicchācāro na caritabbo, musā na

bhāsītābbā, majjamaṃ na pātābbamaṃ, paṇātipāto nāma nirayasamaṃvattaniko hoti tiracchānāyonisamaṃvattaniko pēttivīsayasamaṃvattaniko, tathā adinnādānādīni. Paṇātipāto niraye paccitvā manussalokaṃ āgatassa vipākāvasesena appāyukasamaṃvattaniko hoti, adinnādānaṃ appabhogasamaṃvattanikaṃ, micchācāro bahusapattasamaṃvattaniko, musāvādo abhūtābhakkhānasamaṃvattaniko, majjapānaṃ ummattakabhāvasamaṃvattanika’’nti –

Pañcasu veresu imaṃ ādīnavaṃ kathesi.

Rājā pakatiyāpi assaddho appasanno dussīlo, dussīlassa ca sīlakathā nāma dukkathā, kaṇṇe sūlappavesanaṃ viya hoti. Tasmā so cintesi – ‘‘āhaṃ ‘ete paggaṇhissāmī’’ti āgato, ime pana mayhaṃ āgatakālato paṭṭhāya maṃyeva ghaṭṭentā vijjhantā parisamajjhe kathenti, karissāmī nesaṃ kāttabba’’nti. So dhammakathāpariyosāne ‘‘ācariyā sve mayhaṃ gehe bhikkhaṃ gaṇhathā’’ti nimantetvā agamāsi. So dutiyādivase mahante mahante koḷumbe āharāpetvā gūthassa pūrāpetvā kadalipatthehi nesaṃ mukhāni bandhāpetvā tattha tattha ṭhapāpesi, puna bahalamadhukatelanāgabalapicchillādīnaṃ kūṭe pūretvā nisseṇimattthake ṭhapāpesi, tattheva ca mahāmalle baddhakacce hatthehi muggare gāhāpetvā ṭhapetvā āha ‘‘kūṭatāpasā ativiya maṃ viheṭṭhayiṃsu, tesamaṃ pāsādato otaraṇakāle kūṭehi picchillamaṃ sopānamattthake vissajjetvā sīse muggarehi pothetvā gale gahetvā sopāne khipathā’’ti. Sopānapādamūle pana caṇḍe kukkure bandhāpesi.

Tāpasāpi ‘‘sve rājagehe bhuñjissāmā’’ti aññamaññaṃ ovadiṃsu – ‘‘mārisā rājagehaṃ nāma sāsāṅkaṃ sappatibhayaṃ, pabbajitehi nāma chadvārārammaṇe saññatehi bhavitābbamaṃ, diṭṭhaditṭhe ārammaṇe nimittamaṃ na gahetābbamaṃ, cakkhuvāre saṃvaro paccupaṭṭhapetābbo’’ti.

Punādivase bhikkhācāravelamaṃ sallakkhetvā vākacīraṃ nivāsetvā ajinacammaṃ ekamaṃsagataṃ katvā jāṭakālāpaṃ saṅṭhapetvā bhikkhābhājanamaṃ gahetvā paṭipāṭiyā rājanivesanaṃ abhiruḷhā. Rājā āruḷhabhāvaṃ ṇatvā gūthakoḷumbamukhato kadalipattamaṃ nīharāpesi. Duggandho tāpasānaṃ nāsapuṭamaṃ paharitvā matthaluṅgapātānākārapatto ahoṣi. Mahātāpasō rājānaṃ olokesi. Rājā – ‘‘ettha bhonto yāvadatthaṃ bhuñjantu ceva harantu ca, tumhākametaṃ anucchavikaṃ, hiyyo āhaṃ tumhe paggaṇhissāmīti āgato, tumhe pana maṃyeva ghaṭṭentō vijjhantā parisamajjhe kathayittha, tumhākamidaṃ anucchavikaṃ, bhuñjathā’’ti mahātāpasassa uluṅkena gūthamaṃ upanāmesi. Mahātāpasō dhī dhīti vadanto paṭinivatti. ‘‘Ettakeneva gacchissatha tumhe’’ti sopāne kūṭehi picchillamaṃ vissajjāpetvā mallānaṃ saññamadāsi. Mallā muggarehi sīsāni pothetvā gīvāya gahetvā sopāne khipiṃsu, ekopi sopāne paṭiṭṭhātuṃ nāsakkhi, pavaṭṭamānā sopānapādamūlamaṃyeva pāpuṇiṃsu. Sampatte sampatte caṇḍakukkurā paṭapaṭāti luṅcamānā khādiṃsu. Yopi nesaṃ utṭhahitvā palāyati, sopi āvāṭe patati, tatrāpi naṃ kukkurā anubandhitvā khādantiyeva. Iti nesaṃ kukkurā aṭṭhisāṅkhalikameva avasesayiṃsu. Evaṃ so rājā tapasampanne pañcasate tāpase ekadivaseneva jīvitā voropesi.

Athassa raṭṭhe devatā purimanayeneva puna navavuṭṭhiyo pātesuṃ. Tassa rajjamaṃ saṭṭhiyojanubbedhena vālikathalena avacchādiyittha. Tenāha sarabhaṅgo bodhisatto –

‘‘Yo saññate pabbajite avañcayī,
Dhammaṃ bhaṇante samaṇe adūsake;
Tamaṃ nāḷikeramaṃ sunakhā parattha,
Saṅgama khādanti viphandamāna’’nti. (jā. 2.17.71);

Evaṃ **kāliṅgārañña** araññabhūtabhāvo veditābbo.

Atīte pana bārānasinagare diṭṭhamaṅgalikā nāma cattālīsakoṭivibhavassa seṭṭhino ekā dhītā ahoṣi dassanīyā pāsādikā. Sā rūpabhogakulasampattisampannatāya bahūnaṃ patthanīyā ahoṣi. Yo panassā vāreyyathāya pahīṇāti, tamaṃ tamā disvānassa jātiyamaṃ vā hatthapādādīsu vā yattha katthaci dosamaṃ āropetvā ‘‘ko esa dujjāto dussaṅghito’’tiādīni vatvā – ‘‘nīharatha na’’nti nīharāpetvā ‘‘evarūpampi nāma addasamaṃ,

udakaṃ āharatha, akkhīni dhovissāmi’’ti akkhīni dhovati. Tassā diṭṭhaṃ diṭṭhaṃ vippakāraṃ pāpetvā nīharāpetīti diṭṭhamaṅgalikā tveva saṅkhā udapādi, mūlanāmaṃ antaradhāyi.

Sā ekadivasaṃ gaṅgāya udakakīlaṃ kīlissāmi’’ti titthaṃ sajjāpetvā pahūtaṃ khādanīyabhojanīyaṃ sakātesu pūrāpetvā bahūni gandhamālādīni ādāya paṭicchannayānaṃ āruyha nātigaṇaparivutā gehamhā nikkhami. Tena ca samayena mahāpuriso caṇḍālayoniyāṃ nibbatta bahinagare cammagehe vasati, mātaṅgotvevassa nāmaṃ ahoṣi. So soḷasavassuddesiko hutvā kenacideva karaṇīyena antonagaraṃ pavisitukāmo ekaṃ nīlapilotikaṃ nivāsetvā ekaṃ hatthe bandhitvā ekena hatthena pacchiṃ, ekena ghaṇḍaṃ gahetvā ‘‘ussaratha ayyā, caṇḍāloha’’nti jānāpanatthaṃ taṃ vādentō nīcacittaṃ paccupaṭṭhapetvā diṭṭhadiṭṭhe manusse namassamāno nagaraṃ pavisitvā mahāpathaṃ paṭipajji.

Diṭṭhamaṅgalikā ghaṇḍasaddaṃ sutvā sāṇiantarena olokenṭi dūratova taṃ āgacchantaṃ disvā ‘‘kimeta’’nti pucchi. Mātaṅgo ayyeti. ‘‘Kiṃ vata, bho, akusalaṃ akaramha, kassāyaṃ nissando, vināso nu kho me paccupaṭṭhito, maṅgalakiccena nāma gacchamānā caṇḍālaṃ addasa’’nti sarīraṃ kampaṭvā jīgucchamānā kheḷaṃ pātetvā dhātiyo āha – ‘‘vegena udakaṃ āharatha, caṇḍālo diṭṭho, akkhīni ceva nāma gahitamukhaṇca dhovissāmi’’ti dhovitvā rathaṃ nivattāpetvā sabbapaṭiyādānaṃ gehaṃ pesetvā pāsādaṃ abhiruhi. Surāsoṇḍādayo ceva tassā upaṭṭhākamanussā ca ‘‘kuhiṃ, bho diṭṭhamaṅgalikā, imāyapī velāya nāgacchatī’’ti pucchantā taṃ pavattiṃ sutvā – ‘‘mahantaṃ vata, bho, surāmaṃsagandhamālādisakkāraṃ caṇḍālaṃ nissāya anubhavituṃ na labhimha, gaṇhatha caṇḍāla’’nti gataṭṭhānaṃ gavesitvā nirāparādhaṃ mātaṅgapaṇḍitaṃ tajjitvā – ‘‘are mātaṅga taṃ nissāya idaṇcīdaṇca sakkāraṃ anubhavituṃ na labhimhā’’ti kesesu gahetvā bhūmiyaṃ pātetvā jāṇukapparaṃpāsānādīhi koṭṭetvā matoti saññāya pāde gahetvā kaḍḍhantā saṅkarakūṭe chaḍḍesuṃ.

Mahāpuriso saññaṃ paṭilabhitvā hatthapāde parāmasitvā – ‘‘idaṃ dukkhaṃ kaṃ nissāya uppanna’’nti cintento – ‘‘na aññaṃ kañci, diṭṭhamaṅgalikaṃ nissāya uppanna’’nti nītvā ‘‘sacāhaṃ puriso, pādesu naṃ nipātesāmi’’ti cintetvā vedhamāno diṭṭhamaṅgalikāya kuladvāraṃ gantvā – ‘‘diṭṭhamaṅgalikaṃ labhanto vuṭṭhahissāmi, alabhantassa ettheva maraṇa’’nti gehaṅgaṇe nipajji. Tena ca samayena jambudīpe ayaṃ dhammatā hoti – yassa caṇḍālo kujjhitvā gabbhadvāre nipanno marati, ye ca tasmīṃ gabbhe vasanti, sabbe caṇḍālā honti. Gehamajjhamhi mate sabbe gehavāsino, dvāraṃhi mate ubhato anantaragehavāsikā, aṅgaṇaṃhi mate ito satta ito sattāti cuddasagehavāsino sabbe caṇḍālā hontīti. Bodhisatto pana aṅgaṇe nipajji.

Seṭṭhissa ārocesuṃ – ‘‘mātaṅgo te sāmī gehaṅgaṇe patito’’ti gacchatha bhaṇe, kiṃ karaṇāti vatvā ekamāsakaṃ datvā uṭṭhāpethāti. Te gantvā ‘‘imaṃ kira māsakaṃ gahetvā uṭṭhahā’’ti vadiṃsu. So – ‘‘nāhaṃ māsakatthāya nipanno, diṭṭhamaṅgalikāya svāhaṃ nipanno’’ti āha. Diṭṭhamaṅgalikāya ko dosoti? Kiṃ tassā dosaṃ na passatha, niraparādho ahaṃ tassā manussehi byasanaṃ pāpito, taṃ labhantova vuṭṭhahissāmi, alabhanto na vuṭṭhahissāmi.

Te gantvā seṭṭhissa ārocesuṃ. Seṭṭhi dhītu dosaṃ nītvā ‘‘gacchatha, ekaṃ kahāpaṇaṃ dethā’’ti peseti. So ‘‘na icchāmi kahāpaṇaṃ, tameva icchāmi’’ti āha. Taṃ sutvā seṭṭhi ca seṭṭhibhariyā ca – ‘‘ekāyeva no piyadhīta, paveniyā ghaṭako añño dārakopi natthī’’ti saṃvegappattā – ‘‘gacchatha tāta, koci amhākaṃ asahanako etaṃ jīvitāpi voropeyya, etasmīṃhi mate sabbe mayāṃ natthā homa, ārakkhamassa gaṇhathā’’ti parivāretvā ārakkhaṃ saṃvidhāya yāguṃ pesayīṃsu, bhattaṃ dhaṇaṃ pesayīṃsu, evaṃ so sabbāṃ paṭikkhipi. Evaṃ eko divaso gato; dve, tayo, cattāro, pañca divasā gatā.

Tato sattasattagehavāsikā uṭṭhāya – ‘‘na sakkoma mayāṃ tumhe nissāya caṇḍālā bhavituṃ, amhe mā nāsetha, tumhākaṃ dārikaṃ datvā etaṃ uṭṭhāpethā’’ti āhaṃsu. Te satampī sahasampī satahasampī paṇiṃsu, so paṭikkhipateva. Evaṃ cha divasā gatā. Sattame divase ubhato cuddasagehavāsikā sannipatitvā – ‘‘na mayāṃ caṇḍālā bhavituṃ sakkoma, tumhākaṃ akāmakānampī mayāṃ etassa dārikaṃ dassāmā’’ti āhaṃsu.

Mātāpitaro sokasallasamappitā visaññī hutvā sayane nipatiṃsu. Ubhato cuddasagehavāsino pāsādaṃ āruya supupphitakiṃsukasākhaṃ ucchindantā viya tassā sabbābharaṇāni omuñcivā nakhehi sīmantam katvā kese bandhitvā nīlasātakam nivāsāpetvā hatthe nīlapilotikakhaṇḍam veṭhetvā kaṇṇesu tipupaṭṭake piḷandhāpetvā tālapaṇṇapacchim datvā pāsādato otārapetvā dvīsu bāhāsu gahetvā – “tava sāmikam gahetvā yāhī”ti mahāpurisassa adamsu.

Nīluppalampi atibhāroti anukkhittapubbā sukhumāladārikā “uṭṭhāhi sāmi, gacchāma”ti āha. Bodhisatto nipannakova āha “nāham uṭṭhahāmī”ti. Atha kinti vadāmīti. “Uṭṭhehi ayya mātaṅgā”ti evaṃ maṃ vadāhīti. Sā tathā avoca. Na tuyham manussā uṭṭhānasamattham maṃ akaṃsu, bāhāya maṃ gahetvā uṭṭhāpehīti. Sā tathā akāsi. Bodhisatto uṭṭhahanto viya parivaṭṭetvā bhūmiyam pativā – “nāsitam, bho, diṭṭhamaṅgalikāya paṭhamam manussehi koṭṭāpetvā, idāni sayam koṭṭeti”ti viravittha. Sā kiṃ karomi ayyāti? Dvīhi hatthehi gahetvā uṭṭhāpehīti. Sā tathā uṭṭhāpetvā nisīdāpetvā gacchāma sāmīti. Gacchā nāma araṇṇe honti, mayam manussā, atikoṭṭitomi tuyham manussehi, na sakkomi padasā gantum, piṭṭhiyā maṃ nehīti. Sā onamitvā piṭṭhim adāsi. Bodhisatto abhiruhi. Kuhiṃ nemi sāmīti? Bahinagaram nehīti. Sā pācīnadvāram gantvā – “idha te sāmi vasanaṭṭhāna”nti pucchi. Kataratṭhānam etanti? Pācīnadvāram sāmīti. Pācīnadvāre caṇḍālaputtā vasitum na labhantīti attano vasanaṭṭhānam anācikkhitvāva sabbadvārāni āhiṇḍāpesi. Kasmā? Bhavaggapattamassā mānam pātesāmi. Mahājano ukkuṭṭhimakāsi – “ṭhapetvā tumhādisam añño etissā mānam bhedako natthī”ti.

Sā pacchimadvāram patvā “idha te sāmi vasanaṭṭhāna”nti pucchi. Kataratṭhānam etanti? Pacchimadvāram sāmīti. Iminā dvārena nikkhamitvā cammageham oloketi gacchāti. Sā tattha gantvā āha “idaṃ cammageham tumhākam vasanaṭṭhānam sāmī”ti? Āmāti piṭṭhito otarivā cammageham pāvīsi.

Tattha sattaṭṭhadivase vasanto sabbaññutagavesanadhīro ettakesu divasesu na ca jātisambhedamakāsi. “Mahākulassa dhītā sace maṃ nissāya mahantam yasam na pāpuṇāti, na camhāham catuvīsatiyā buddhānam antevāsiko. Etissā pādadhovanaudakena sakalajambudīpe rājūnam abhisekakiccam karissāmī”ti cintetvā puna cintesi – “agāramajjhevasanto na sakkhissāmi, pabbajitvā pana sakkhissāmī”ti. Cintetvā tam āmantesi – “diṭṭhamaṅgalike mayam pubbe ekacarā kammam katvāpi akatvāpi sakkā jīvitum, idāni pana dārabharaṇam paṭipannamha, kammam akatvā na sakkā jīvitum, tvam yāvāham āgacchāmi, tāva mā ukkaṇṭhitthā”ti araṇṇam pavisitvā susānādīsu nantakāni saṅkaḍḍhitvā nivāsanapārūpanam katvā samaṇapabbajjam pabbajitvā ekacaro laddhakāyaviveko kaṣiṇaparikkammam katvā aṭṭha samāpattiyo pañca abhiññāyo ca nibbattetvā “idāni sakkā diṭṭhamaṅgalikāya avassayena mayā bhavitu”nti bārāṇasiabhimukho gantvā cīvaram pārupitvā bhikkham caramāno diṭṭhamaṅgalikāya gehābhimukho agamāsi.

Sā tam dvāre ṭhitam disvā asaṅjānantī – “aticchatha, bhante, caṇḍālānam vasanaṭṭhānameta”nti āha. Bodhisatto tattheva aṭṭhāsi. Sā punappunam oloketi saṅjānitvā hatthehi uram paharivā viravamānā pādāmūle pativā āha – “yadi te sāmi edisam cittam atthi, kasmā maṃ mahatā yasā parihāpetvā anātham akāsi”ti. Nānappakāram paridevam paridevitvā akkhīni puñchamānā uṭṭhāya bhikkhābhājanam gahetvā antogehe nisīdāpetvā bhikkham adāsi. Mahāpuriso bhattakiccam katvā āha – “diṭṭhamaṅgalike mā soci mā paridevi, aham tuyham pādadhovanaudakena sakalajambudīpe rājūnam abhisekakiccam kāretum samattho, tvam pana ekaṃ mama vacanam karohi, nagaram pavisitvā ‘na mayham sāmiko caṇḍālo, mahābrahmā mayham sāmiko’ti ugghosayamānā sakalanagaram carāhī”ti.

Evaṃ vutte diṭṭhamaṅgalikā – “pakatiyāpi aham sāmi mukhadoseneva byasanam pattā, na sakkhissāmevam vattu”nti āha. Bodhisatto – “kiṃ pana tayā mayham agāre vasantassa alikavacanam sutapubbam, aham tadāpi alikam na bhaṇāmi, idāni pabbajito kiṃ vakkhāmi, saccavādī puriso nāmāha”nti vatvā – “ajja pakkhassa aṭṭhamī, tvam ‘ito sattāhassaccayena uposathdivase mayham sāmiko mahābrahmā candamaṇḍalam bhinditvā mama santikam āgamissati’ti sakalanagare ugghosehī”ti vatvā pakkāmi.

Sā saddahitvā haṭṭhatuṭṭhā sūrā hutvā sāyampātaṃ nagaraṃ pavisitvā tathā ugghosesi. Manussā paṇinā paṇiṃ paharantā – “passatha, ambhākaṃ diṭṭhamaṅgalikā caṇḍālaputtaṃ mahābrahmānaṃ karoti”ti hasantā keḷiṃ karonti. Sā punadivasepi tatheva sāyampātaṃ pavisitvā – “idāni chāhaccayena, pañcāha-catūha-tīha-dvīha-ekāhaccayena mayhaṃ sāmiko mahābrahmā candamaṇḍalaṃ bhinditvā mama santikaṃ āgamissati”ti ugghosesi.

Brāhmaṇā cintayimṣu – “ayaṃ diṭṭhamaṅgalikā atisūrā hutvā katheti, kadāci evaṃ siyā, etha mayaṃ diṭṭhamaṅgalikāya vasanaṭṭhānaṃ paṭijaggāma”ti cammagehassa bāhirabhāgaṃ samantā tacchāpetvā vālikaṃ okirimṣu. Sāpi uposathadivase pātova nagaraṃ pavisitvā “ajja mayhaṃ sāmiko āgamissati”ti ugghosesi. Brāhmaṇā cintayimṣu – “ayaṃ bho na dūraṃ apadissati, ajja kira mahābrahmā āgamissati, vasanaṭṭhānaṃ saṃvidahāma”ti cammagehaṃ samajjāpetvā haritūpalittaṃ ahatavatthehi parikkhipitvā mahārahaṃ pallākaṃ attharivā upari celavitānaṃ bandhitvā gandhamāladāmāni osārayimṣu. Tesāṃ paṭijaggantānaṃyeva sūriyo atthaṃ gato.

Mahāpuriso cande uggaṭamatte abhiññāpādakajjhānaṃ samāpajjitvā vuṭṭhāya kāmāvacaracittena parikkammaṃ katvā iddhicittena dvādasayojanikaṃ brahmattabhāvaṃ māpetvā vehāsaṃ abbhuggantvā candavimānassa anto pavisitvā vanantato abbhussakkamānaṃ candaṃ bhinditvā candavimānaṃ ohāya purato hutvā “mahājano maṃ passatū”ti adhiṭṭhāsi. Mahājano disvā – “saccaṃ, bho, diṭṭhamaṅgalikāya vacanaṃ, āgacchantaṃ mahābrahmānaṃ pūjessāma”ti gandhamālaṃ ādāya diṭṭhamaṅgalikāya gharaṃ parivāretvā aṭṭhāsi. Mahāpuriso matthakamatthakena sattavāre bārāṇasiṃ anuparigantvā mahājanena diṭṭhabhāvaṃ ñatvā dvādasayojanikaṃ attabhāvaṃ vijahitvā manussappamāṇameva māpetvā mahājanassa passantasseva cammagehaṃ pāvīsi. Mahājano disvā – “otiṇṇo no mahābrahmā, sāṇiṃ āharathā”ti nivesanaṃ mahāsāṇiyā parikkhipitvā parivāretvā ṭhito.

Mahāpurisopi sirisayanamajjhe nisīdi. Diṭṭhamaṅgalikā samīpe aṭṭhāsi. Atha naṃ pucchi “utusamayo te diṭṭhamaṅgalike”ti. Āma ayyāti. Mayā dinnāṃ puttaṃ gaṇhāhīti aṅguṭṭhakena nābhimaṇḍalaṃ phusi. Tassā parāmasaneneva gabbho paṭiṭṭhāsi. Mahāpuriso – “ettāvata te diṭṭhamaṅgalike pādadhovanaudakaṃ sakalajambudīpe rājūnaṃ abhisekodakaṃ bhavissati, tvaṃ tiṭṭhā”ti vatvā brahmattabhāvaṃ māpetvā passantasseva mahājanassa nikkhamitvā vehāsaṃ abbhuggantvā caṇḍamaṇḍalameva pavitṭho. Sā tato paṭṭhāya brahmapajāpatī nāma jātā. Pādadhovanaudakaṃ labhanto nāma natthi.

Brāhmaṇā – “brahmapajāpatiṃ antonagare vasāpessāma”ti suvaṇṇasivikāya āropetvā yāva sattamakoṭiyā aparisuddhajātikassa sivikaṃ gahetuṃ na adamsu. Soḷasa jātimantabrāhmaṇā gaṇhimṣu. Sesā gandhapupphādīhi pūjetvā nagaraṃ pavisitvā – “na sakkā, bho, ucchiṭṭhagehe brahmapajāpatiyā vasituṃ, vatthuṃ gahetvā geḥaṃ karissāma, yāva pana taṃ kariyati, tāva maṇḍapeva vasatū”ti maṇḍape vasāpesuṃ. Tato paṭṭhāya cakkhupathe ṭhatvā vanditukāmā kahāpaṇaṃ datvā vandituṃ labhanti, savanūpacāre vanditukāmā sataṃ datvā labhanti, āsanne pakatikathaṃ savanaṭṭhāne vanditukāmā pañcasatāni datvā labhanti, pādapiṭṭhiyaṃ sīsaṃ ṭhapetvā vanditukāmā sahasaṃ datvā labhanti, pādadhovanaudakaṃ patthayamānā dasasahasāni datvā labhanti. Bahinagarato antonagare yāva maṇḍapā āgacchantiyā laddhadhanaṃyeva koṭisatamatamā ahoṣi.

Sakalajambudīpo saṅkhubhī, tato sabbarājāno “brahmapajāpatiyā pādadhovanena abhisekaṃ karissāma”ti satahasaṃ pesetvā labhimṣu. Maṇḍape vasantiyā eva gabbhavuṭṭhānaṃ ahoṣi. Mahāpurisaṃ paṭicca laddhakumāro pāsādiko ahoṣi lakkhaṇasampanno. Mahābrahmuno putto jātoti sakala jambudīpo ekakolāhalo ahoṣi. Kumārassa khīramaṇimūlaṃ hotūti tato tato āgatadhanaṃ koṭisahasānaṃ ahoṣi. Ettāvata nivesanampi niṭṭhitaṃ. Kumārassa nāmakaraṇaṃ karissāmaṃti nivesanaṃ sajjetvā kumāraṃ gandhodakena nhāpetvā alaṅkaritvā maṇḍape jātattā **maṇḍabyotveva** nāmaṃ akaṃsu.

Kumāro sukkena saṃvaddhamāno sippuggahaṇavayapattoti sakalajambudīpe sippajānanakā tassa santike āgantvā sippaṃ sikkhāpentī. Kumāro medhāvī paññavā sutāṃ sutāṃ mutāṃ āvunanto viya

gaṇhāti, gahitagahitaṃ suvaṇṇaghaṭe pakkhittatelaṃ viya tiṭṭhati. Yāvatā vācuggatā pariyatti atthi, tena anuggahitā nāma nāhosi. Brāhmaṇā taṃ parivāretvā caranti, sopi brāhmaṇabhatto ahosi. Gehe asītibrahmaṇasahassāni niccabhattaṃ bhuñjanti. Gehampissa sattadvārakoṭṭhakaṃ mahantaṃ ahosi. Gehe maṅgaladivase jambudīpavāsīhi pesitadhanaṃ koṭisahasamattaṃ ahosi.

Bodhisatto āvajjesi – “pamatto nu kho kumāro appamatto”ti. Athassa taṃ pavattiṃ ñatvā – “brāhmaṇabhatto jāto, yattha dinnam mahapphalaṃ hoti, taṃ na jānāti, gacchāmi naṃ damemī”ti cīvaraṃ pārupitvā bhikkhābhājanaṃ gahetvā – “dvārakoṭṭhakaṃ atisambādā, na sakkā koṭṭhakena pavisitu”nti ākāsenāgantvā asītibrahmaṇasahassānaṃ bhuñjanaṭṭhāne ākāsaṅgaṇe otari. Maṇḍabyakumāropi suvaṇṇakaṭacchuṃ gāhāpetvā – “idha sūpaṃ detha idha odana”nti parivisāpento bodhisattaṃ disvā daṇḍakena ghaṭṭitaāsiviso viya kupitvā imaṃ gāthamāha –

“Kuto nu āgacchasi dummavāsī,
Otallako paṃsupisācakova;
Sāṅkāracoḷaṃ paṭimuñca kaṇṭhe,
Ko re tuvaṃ hosi adakkiṇeyyo”ti. (jā. 1.15.1);

Atha naṃ mahāsatto akujjhivāva ovaḍanto āha –

“Annaṃ tavedaṃ pakataṃ yasassi,
Taṃ khajjare bhuñjare piyyare ca;
Jānāsi maṃ tvaṃ paradattūpajīviṃ,
Uttiṭṭha piṇḍaṃ labhataṃ sapāko”ti. (jā. 1.15.2);

So nayidaṃ tumhādisānaṃ paṭiyattanti dassento āha –

“Annaṃ mamedam pakataṃ brāhmaṇānaṃ,
Atthatthitaṃ saddahato mamedam;
Apehi etto kimidhaṭṭhitosi,
Na mādisā tuyhaṃ dadanti jammā”ti. (jā. 1.15.3);

Atha bodhisatto “dānaṃ nāma sakuṇassapi nigguṇassapi yassa kassaci dātabbam, yathā hi ninnepi thalepi paṭiṭṭhāpitaṃ bījaṃ pathavīrasaṃ āporasañca āgamma sampajjati, evaṃ nipphalaṃ nāma natthi, sukhetta vapitabījaṃ viya guṇavante mahapphalaṃ hoti”ti dassetuṃ imaṃ gāthamāha –

“Thale ca ninne ca vapanti bījaṃ,
Anūpakhetta phalamāsamānā;
Etāya saddhāya dadāhi dānaṃ,
Appeva ārādhaye dakkhiṇeyye”ti. (jā. 1.15.4);

Atha kumāro kodhābhībhūto – “kenimassa muṇḍakassa paveso dinno”ti dvārarakkhādayo tajjetvā

–
“Khettāni mayhaṃ viditāni loke,
Yesāhaṃ bījāni paṭiṭṭhapemi;
Ye brāhmaṇā jātimantūpapannā,
Tānīdha khettāni supesalāni”ti. (jā. 1.15.5) –

Gātham vatvā “imaṃ jammaṃ veṇupadarena pothetvā gīvāyaṃ gahetvā sattapi dvārakoṭṭhake atikkamitvā bahi nīharathā”ti āha. Atha naṃ mahāpuriso āha –

“Giriṃ nakhena khaṇasi, ayo dantebhi khādasi;
Jāavedaṃ padahasi, yo isiṃ paribhāsasi”ti. (jā. 1.15.9);

Evañca pana vatvā – “sace myāyaṃ hatthe vā pāde vā gaṇhāpetvā dukkhaṃ uppādeyya, bahuṃ apuññaṃ pasaveyyā”ti sattānuddayatāya vehāsaṃ abbhuggantvā antaravīthiyaṃ otari. Bhagavā sabbaññutaṃ patto tamatthaṃ pakāsento imaṃ gāthamāha –

“Idaṃ vatvāna mātāṅgo, isi saccaparakkamo;
Antalikkhasmiṃ pakkāmi, brāhmaṇānaṃ udikkhata”nti. (jā. 1.15.10);

Tāvadeva nagararakkhikadevatānaṃ jeṭṭhakadevarājā maṇḍabyassa gīvaṃ parivattesi. Tassa mukhaṃ parivattetiṭvā pacchāmukhaṃ jātaṃ, akkhīni parivattāni, mukhena kheḷaṃ vamaṭi, sarīraṃ thaddhaṃ sūle āropitaṃ viya ahosi. Asītisahassā paricārayakkhā asītibrahmaṇasahassāni tatheva akaṃsu. Vegena gantvā brahmapajāpatiyā ārocayīṃsu. Sā taramānarūpā āgantvā taṃ vippakāraṃ disvā gāthamāha –

“Āvedhitaṃ piṭṭhito uttamaṅgaṃ,
Bāhuṃ pasāreti akammaneyyaṃ;
Setāni akkhīni yathā matassa,
Ko me imaṃ puttamakāsi eva”nti. (jā. 1.15.11);

Athassā ārocesuṃ –

“Idhāgamā samaṇo dummavāsī,
Otallako paṃsupisācakova,
Saṅkāracoḷaṃ paṭimuñca kaṇṭhe,
So te imaṃ puttamakāsi eva”nti. (jā. 1.15.12);

Sā sutvāva aññasi – “mayhaṃ yasadāyako ayyo anukampāya puttassa pamattabhāvaṃ ñatvā āgato bhavissati”ti. Tato upaṭṭhāke pucchi –

“Katamaṃ disaṃ agamā bhūripañño,
Akkhātha me māṇavā etamatthaṃ;
Gantvāna taṃ paṭikaremu accayaṃ,
Appeva naṃ putta labhemu jīvita”nti. (jā. 1.15.13);

Te āhaṃsu –

“Vehāyasam agamā bhūripañño,
Pathaddhuno pannaraseva cando;
Apicāpi so purimadisam agacchi,
Saccappaṭiñño isi sādhurūpo”ti. (jā. 1.15.14);

Mahāpurisopi antaravīthiyaṃ otiṇṇaṭṭhānato paṭṭhāya – “mayhaṃ padavaḷaṅgaṃ hatthiassādīnaṃ vasena mā antaradhāyittha, diṭṭhamaṅgalikāyeva naṃ passatu, mā aññe”ti adhiṭṭhahitvā piṇḍāya caritvā yāpanamattaṃ missakodanaṃ gahetvā paṭikkamanasālāyaṃ nisinno bhuñjitvā thokaṃ bhuttāvasesaṃ bhikkhābhājaneyeva ṭhapesi. Diṭṭhamaṅgalikāpi pāsādā oruyha antaravīthiṃ paṭipajjamānā padavaḷaṅgaṃ disvā – “idaṃ mayhaṃ yasadāyakassa ayyassa pada”nti padānusārenāgantvā vanditvā āha – “tumhākaṃ, bhante, dāsena katāparādhaṃ mayhaṃ khamatha, na hi tumhe kodhavasikā nāma, detha me puttassa jīvita”nti.

Evañca pana vatvā –

“Āvedhitam piṭṭhito uttamaṅgam,
Bāhum pasāreti akammaneyyam;
Setāni akkhīni yathā matassa,
Ko me imaṃ puttamakāsi eva’nti. (jā. 1.15.15) –

Gātham abhāsi. Mahāpuriso āha – “na mayaṃ evarūpaṃ karoma, pabbajitaṃ pana himsante disvā pabbajitesu sagāravāhi bhūtayakkhadevatāhi kataṃ bhavissatī”ti.

Kevalam, bhante, tumhākaṃ manopadoso mā hotu, devatāhi kataṃ hotu, sukhamāpayā, bhante, devatā, apicāham, bhante, katham paṭipajjāmīti. Tena hi osadham te kathessāmi, mama bhikkhābhājane bhuttāvasesam bhattamatthi, tattha thokaṃ udakaṃ āsiñcivā thokaṃ gahetvā tava puttassa mukhe pakkhipa, avasesam udakacāṭiyam āloletvā asītiyā brāhmaṇasahassānam mukhe pakkhipāti. Sā evaṃ karissāmīti bhattam gahetvā mahāpurisam vanditvā gantvā tathā akāsi.

Mukhe pakkhittamate jeṭṭhakadevarājā – “sāmihi sayam bhesajjam karonte amhehi na sakkā kiñci kātu’nti kumāram vissajjesi. Sopi khipitvā kiñci dukkham appattapubbo viya pakativanṇo aho. Atha nam mātā avoca – “passa tāta tava kulupakānam hirottapparahitānam vipakāram, samaṇā pana na evarūpā honti, samaṇe tāta bhojeyyāsi”ti. Tato sesakam udakacāṭiyam āluḷāpetvā brāhmaṇānam mukhe pakkhipāpesi. Yakkhā tāvadeva vissajjetvā palāyimsu. Brāhmaṇā khipitvā khipitvā uṭṭahitvā kiṃ amhākaṃ mukhe pakkhittanti pucchiṃsu. Mātāṅgaisissa ucchiṭṭhabhattanti. Te “caṇḍālassa ucchiṭṭhakam khādāpitamhā, abrahmaṇā dānimhā jātā, idāni no brāhmaṇā ‘asuddhabrahmaṇā ime’ti sambhogam na dassantī”ti tato palāyitvā majjharattham gantvā majjharājassa nagare aggāsānikā brāhmaṇā nāma mayanti rājagehe bhūñjanti.

Tasmiṃ samaye bodhisatto pāpaniggaham karonto mānājātike nimmadayanto vicarati. Atheko “jātimantatāpaso nāma mayā sadiso natthī”ti aññesu saññampi na karoti. Bodhisatto tam gaṅgātīre vasamānam disvā “mānaniggahamassa karissāmī”ti tattha agamāsi. Tam jātimantatāpaso pucchi – “kiṃ jacco bhava’nti? Caṇḍālo aham ācariyāti. Apehi caṇḍāla apehi caṇḍāla, heṭṭhāgaṅgāya vasa, mā uparigaṅgāya udakam ucchiṭṭhamakāsīti.

Bodhisatto – “sādhu ācariya, tumhehi vuttaṭṭhāne vasissāmī”ti heṭṭhāgaṅgāya vasanto “gaṅgāya udakam paṭisotam sandatū”ti adhiṭṭhāsi. Jātimantatāpaso pātova gaṅgam oruyha udakam ācamati, jaṭā dhovati. Bodhisatto dantakattham khādanto piṇḍam piṇḍam kheḷam udake pāpeti. Dantakatthakucchiṭṭhakampi tattheva pavāheti. Yathā ce tam aññattha alaggitvā tāpasasseva jaṭāsu laggati, tathā adhiṭṭhāsi. Kheḷampi dantakatthampi tāpasassa jaṭāsuyeva patiṭṭhāti.

Tāpaso caṇḍalassidaṃ kammaṃ bhavissatīti vipaṭisārī hutvā gantvā pucchi – “idaṃ, bho caṇḍāla, gaṅgāya udakam tayā paṭisotagāmikata’nti? Āma ācariya. Tena hi tvam heṭṭhāgaṅgāya mā vasa, uparigaṅgāya vasāti. Sādhu ācariya, tumhehi vuttaṭṭhāne vasissāmīti tattha vasanto iddhiṃ paṭippassambhesi, udakam yathāgatikameva jātam. Puna tāpaso tadeva byasanam pāpuṇi. So puna gantvā bodhisattam pucchi, – “bho caṇḍāla, tvamidaṃ gaṅgāya udakam kālena paṭisotagāmim kālena anusotagāmim karosī”ti? Āma ācariya. Caṇḍāla, “tvam sukhavihārīnam pabbajitānam sukkena vasitum na desi, sattame te divase sattadhā muddhā phalatū”ti. Sādhu acariya, aham pana sūriyassa uggantum na dassāmīti.

Atha mahāsatto cintesi – “etassa abhisāpo etasseva upari patissati, rakkhāmi na’nti sattānuddayatāya punadivase iddhiyā sūriyassa uggantum na adāsi. Iddhimato iddhivisayo nāma acinteyyo, tato paṭṭhāya aruṇuggam na paññāyati, rattindivaparicchedo natthi, kasivañijjādīni kammāni payojento nāma natthi.

Manussā – “yakkhāvatto nu kho ayam bhūtadevaṭṭonāgasupaṇṇāvatto”ti upaddavappattā “kiṃ nu kho kātabba”nti cintevā “rājakulaṃ nāma mahāpaññaṃ, lokassa hitaṃ cintetuṃ sakkoti, tatta gacchāmā”ti rājakulaṃ gantvā tamatthaṃ ārocesuṃ. Rājā sutvā bhītopi abhītākāraṃ katvā – “mā tātā bhāyatha, imaṃ kāraṇaṃ gaṅgātīravāsī jātimantatāpasō jānissati, taṃ pucchitvā nikkankhā bhavissāmā”ti katipayeheva atthacarakehi manussehi saddhiṃ tāpasāṃ upasaṅkamitvā katapaṭisanthāro tamatthaṃ pucchi. Tāpasō āha – “āma mahārāja, eko caṇḍālo atthi, so imaṃ gaṅgāya udakaṃ kālena anusotagāmiṃ kālena patisotagāmiṃ karoti, mayā tadatthaṃ kiñci kathitaṃ atthi, taṃ pucchatha, so jānissati”ti.

Rājā mātaṅgaisissa santikaṃ gantvā – “tumhe, bhante, aruṇassa uggantuṃ na dethā”ti pucchi. Āma, mahārājāti. Kiṃ kāraṇā bhanteti? Jātimantatāpasakāraṇā, mahārāja, jātimantatāpasena āgantvā maṃ vanditvā khamāpitakāle dassāmi mahārājāti. Rājā gantvā “etha ācariya, tāpasāṃ khamāpethā”ti āha. Nāhaṃ, mahārāja, caṇḍālaṃ vandāmīti. Mā ācariya, evaṃ karotha, janapadassa mukhaṃ passathāti. So puna paṭikkhipiyeva. Rājā bodhisattaṃ upasaṅkamitvā “ācariyo khamāpetuṃ na icchitī”ti āha. Akhamāpīte ahaṃ sūriyaṃ na muñcāmīti. Rājā “ayaṃ khamāpetuṃ na icchati, ayaṃ akhamāpīte sūriyaṃ na muñcati, kiṃ amhākaṃ tena tāpasena, lokaṃ olokessāmā”ti “gacchatha, bho, tāpasasantikaṃ, taṃ hatthesu ca pādesu ca gahetvā mātaṅgaisissa pādamūle netvā nipajjāpetvā khamāpetha etassa janapadānuddayaṃ paṭiccā”ti āha. Te rājapurisā gantvā taṃ tathā katvā ānetvā mātaṅgaisissa pādamūle nipajjāpetvā khamāpesuṃ.

Ahaṃ nāma khamitabbaṃ khamāmi, apica kho pana etassa kathā etasseva upari patissati. Mayā sūriye vissajjite sūriyārasmi etassa matthake patissati, athassa sattadhā muddhā phalissati. Tañca kho panesa byasanaṃ mā pāpuṇātu, etha tumhe etaṃ galappamaṇe uduke otāretvā mahantaṃ mattikāpiṇḍamaṃ sīse ṭhapetha. Athahaṃ sūriyaṃ vissajjissāmi. Sūriyārasmi mattikāpiṇḍe patitvā taṃ sattadhā bhindissati. Athesa mattikāpiṇḍaṃ chaḍḍetvā nimujjitvā aññaena titthena uttaratu, iti naṃ vadatha, evamassa sotthi bhavissatīti. Te manussā “evaṃ karissāmā”ti tathā kāresuṃ. Tassāpi tatheva sotthi jātā. So tato paṭṭhāya – “jāti nāma akāraṇaṃ, pabbajitānaṃ abbhantare guṇova kāraṇa”nti jātigottamānaṃ pahāya nimmado ahoṣi.

Iti jātimantatāpase damite mahājano bodhisattassa thāmaṃ aññāsi, mahākolāhalaṃ jātaṃ. Rājā attano nagaraṃ gamanattāya bodhisattaṃ yāci. Mahāsatto paṭiññaṃ datvā tāni ca asītibrahmaṇasahassāni damessāmi, paṭiññaṃca mocessāmīti majjharājassa nagaraṃ agamāsi. Brāhmaṇā bodhisattaṃ disvāva – bho, “ayaṃ so, bho mahācoro, āgato, idāneva sabbe ete mayhaṃ ucchiṭṭhakaṃ khādītva abrahmaṇā jātāti amhe pākaṭe karissati, evaṃ no idhāpi āvāso na bhavissati, paṭikacceva māressāmā”ti rājānaṃ puna upasaṅkamitvā āhaṃsu – “tumhe, mahārāja, etaṃ caṇḍālapabbajitaṃ mā sādhurūpoti maññittha, esa garukamantaṃ jānāti, pathaviṃ gahetvā ākāsaṃ karoti, ākāsaṃ pathaviṃ, dūraṃ gahetvā santikaṃ karoti, santikaṃ dūraṃ, gaṅgaṃ nivattetvā uddhagāminiṃ karoti, icchanto pathaviṃ ukkhipitvā pātetuṃ mañña sakkoti. Parassa vā cittaṃ nāma sabbakālaṃ na sakkā gahetuṃ, ayaṃ idha paṭiṭṭhaṃ labhanto tumhākaṃ rajjampī nāseyya, jīvitantarāyampī vaṃsupacchedampī kareyya, amhākaṃ vacanaṃ karotha, mahārāja, ajjeva imaṃ māretuṃ vaṭṭatī”ti.

Rājāno nāma parapattiyā honti, iti so bahūnaṃ kathāvasena niṭṭhaṃ gato. Bodhisatto pana nagare piṇḍāya caritvā udakaphāsukaṭṭhāne missakodanaṃ bhuñjitvā rājuyyānaṃ gantvā nirāparādhatāya nirāsaṅko maṅgalasilāpaṭṭe nisīdi. Atīte cattālīsa, anāgate cattālīsātī asītikappe anussarituṃ samatthaññaṃ anāvajjanatāya muhuttamattake kāle sati nappahoti, rājā aññaṃ ajanāpetvā sayameva gantvā nirāvajjanatāya pamādena nisinnaṃ mahāpurisaṃ asinā paharivā dve bhāge akāsi. Imassa rañño vijite aṭṭhamaṃ lohakūṭavassaṃ, navamaṃ kalalavassaṃ vassi. Iti imassāpi raṭṭhe nava vuṭṭhiyo patitā. So ca rājā sapaṇṇaṃ mahānirāya nibbatto. Tenāha saṃkiccapaṇḍito –

“Upahacca manāṃ majjho, mātaṅgasmīṃ yasassine;
Sapārisajjo ucchinno, majjhāraññaṃ tadā ahūti”. (jā. 2.19.96) –

Evam majjhāraññaṃsā araññaabhūtabhāvo veditabbo. Mātaṅgassa pana isino vasena tadeva **mātaṅgāraññaṃ** vuttam.

66. Pañhapaṭibhānānī pañhabyākaraṇāni. **Paccanīkaṃ katabbanti** paccanīkaṃ katabbamaṃ. **Amaññissanti** vilomabhāgaṃ gaṇhanto viya ahosinti attho.

67. Anuviccekāraṇanti anuvicāretvā cintetvā tulayitvā katabbamaṃ karohīti vuttam hoti. **Sādhū hotīti** sundaro hoti. Tumhādisasmiñhi maṃ disvā maṃ saraṇaṃ gacchante nigaṇṭhaṃ disvā nigaṇṭhaṃ saraṇaṃ gacchante – “kim ayaṃ upāli diṭṭhadiṭṭhameva saraṇaṃ gacchatī”ti? Garahā uppajjissati, tasmā anuviccekāro tumhādisānaṃ sādhuṃ dasseti. **Paṭākaṃ parihareyyunti** te kira evarūpaṃ sāvakaṃ labhitvā – “asuko nāma rājā vā rājamahāmatto vā seṭṭhi vā amhākaṃ saraṇaṃ gato sāvako jāto”ti paṭākaṃ ukkhipitvā nagare ghosentā āhiṇḍanti. Kasmā? Evam no mahantabhāvo āvi bhavissatīti ca, sace tassa “kimahaṃ etesaṃ saraṇaṃ gato”ti vipptaṅsāro uppajjeyya, tampi so “etesaṃ me saraṇagatabhāvaṃ bahū jānanti, dukkhaṃ idāni paṭinivattitu”nti vinodetvā na paṭikkamissatīti ca. “Tenāha paṭākaṃ parihareyyu”nti.

68. Opānabhūtaṇti paṭiyattaudapāno viya ṭhitam. **Kulanti** tava nivesanaṃ. **Dātabbamaṃ maññeyyāsīti** pubbe dasapi vīsati paṭiṭṭhi jane āgate disvā natthīti avatvā deti. Idāni maṃ saraṇaṃ gatakarānamattenava mā imesaṃ deyyadhammaṃ, upacchindittha, sampattānañhi dātabbamevāti ovadati. **Sutametaṃ, bhanteti** kuto sutam? Nigaṇṭhānaṃ santikā, te kira kulagharesu evam pakāsentī – “mayam ‘yassa kassaci sampattassa dātabba’nti vadāma, samaṇo pana gotamo ‘mayameva dānaṃ dātabbamaṃ...pe... na aññesaṃ sāvakaṇaṃ dīnaṃ mahapphala’nti vadatī”ti. Tam sandhāya ayaṃ gahapati “sutameta”nti āha.

69. Anupubbim kathanti dānānantaraṃ sīlaṃ, sīlānantaraṃ saggaṃ, saggānantaraṃ magganti evam anupaṭipāṭikathaṃ. Tattha **dānakathanti** idaṃ dānaṃ nāma sukhānaṃ nidānaṃ, sampattīnaṃ mūlaṃ, bhogānaṃ paṭiṭṭhā, visamagatassa tānaṃ leṇaṃ gatiparāyaṇaṃ, idhalokaparalokesu dānasadisō avassayo paṭiṭṭhā ārammaṇaṃ tānaṃ leṇaṃ gati parāyaṇaṃ natthi. Idañhi avassayaṭṭhena ratanamayasīhāsanasadisāṃ, paṭiṭṭhānaṭṭhena mahāpathavisadisāṃ, ālambanaṭṭhena ālambanarajjusadisāṃ. Idañhi dukkhanittharaṇaṭṭhena nāvā, samassāsanaṭṭhena saṅgāmasūro, bhayaparittānaṭṭhena susaṅkhatanagaraṃ, maccheramalādīhi anupalittaṭṭhena padumaṃ, tesam nidhanaṭṭhena aggi, durāsadaṭṭhena āsīvisō. Asantāsanaṭṭhena sīho, balavantaṭṭhena hatthī, abhimaṅgalasammataṭṭhena setavasabho, khemantabhūmisampāpanaṭṭhena valāhako assarājā. Dānaṃ nāmebhaṃ mayhaṃ gatamaggo, mayheveso vaṃso, mayā dasa pāramiyo pūrentena velāmamahāyañño, mahāgovindamahāyañño mahāsudassanamahāyañño, vessantaramahāyaññoti anekamahāyaññā pavattitā, sasabhūtena jalite aggikkhandhe attānaṃ niyyādentena sampattayācakānaṃ cittaṃ gahitaṃ. Dānañhi loke sakkasampattiṃ deti, mārasampattiṃ deti, brahmasampattiṃ deti, cakkavattisampattiṃ deti, sāvakaṃpāramiññaṃ, paccekabodhiññaṃ, abhisambodhiññaṃ detīti evamādiṃ dānagūṇapaṭisaṃyuttaṃ kathaṃ.

Yasmā pana dānaṃ dadanto sīlaṃ samādātuṃ sakkoti, tasmā tadanantaraṃ sīlakathaṃ kathesi. **Sīlakathanti** sīlaṃ nāmetaṃ avassayo paṭiṭṭhā ārammaṇaṃ tānaṃ leṇaṃ gati parāyaṇaṃ, sīlaṃ nāmetaṃ mama vaṃso, ahaṃ saṅkhapālanāgarājakāle, bhūridattanāgarājakāle, campeyyanāgarājakāle, sīlavanāgarājakāle, mātuposakahatthirājakāle, chaddantahatthirājakāleti anantesu attabhāvesu sīlaṃ paripūresiṃ. Idhalokaparalokasampattīnañhi sīlasadisō avassayo, sīlasadisā paṭiṭṭhā, ārammaṇaṃ tānaṃ leṇaṃ gati parāyaṇaṃ natthi, sīlālaṅkārasadisō alaṅkāro natthi, sīlapupphasadisāṃ pupphaṃ natthi, sīlagandhasadisō gandho natthi. Sīlālaṅkārena hi alaṅkataṃ sīlakusumapiṇḍanaṃ sīlagandhānulittaṃ sadevakopi loko olokento tittiṃ na gacchatīti evamādiṃ sīlagūṇapaṭisaṃyuttaṃ kathaṃ.

Idaṃ pana sīlaṃ nissāya ayaṃ saggo labbhatīti dassetuṃ sīlānantaraṃ saggakathaṃ kathesi. **Saggakathanti** ayaṃ saggo nāma iṭṭho kanto manāpo, nīcāmettha kīlā, nīcaṃ sampattiyo labbhanti,

cātumahārājikā devā navutivassasatasahassāni dibbasukhaṃ dibbasampattiṃ anubhavanti, tāvatimsā tisso ca vassakoṭṭiyo saṭṭhi ca vassasatasahassānīti evamādiṃ saggaguṇapaṭisamyuttaṃ kathaṃ. Saggasampattiṃ kathayantānañhi buddhānaṃ mukhaṃ nappahoti. Vuttampi cetam “anekapariyāyena kho ahaṃ, bhikkhave, saggakathaṃ katheyya”ntiādi (ma. ni. 3.255).

Evam saggakathāya palobhetvā puna hatthiṃ alaṅkaritvā tassa soṇḍaṃ chindanto viya – “ayampi saggo anicco addhuvo, na ettha chandarāgo kātabbo”ti dassanatthaṃ – “appassādā kāmā vuttā mayā bahudukkhā bahupāyāsā, ādīnavo ettha bhiyyo”tiādinā (pāci. 417; ma. ni. 1.235) nayena kāmānaṃ ādīnavam okāraṃ saṃkilesaṃ kathesi. Tattha **ādīnavoti** doso. **Okāroti** avakāro lāmakabhāvo. **Samkilesoti** tehi sattānaṃ saṃsāre saṃkilissanaṃ. Yathāha “kilissanti vata, bho, sattā”ti (ma. ni. 2.351).

Evam kāmādīnavena tajjivā nekkhamme ānisaṃsaṃ pakāsesi. **Kallacittanti** arogacittaṃ. **Sāmuksikāti** sāmam ukksikā attanāyeva gahetvā uddharitvā gahitā, sayambhūñāṇena diṭṭhā, asādhāraṇā aññesanti attho. Kā panesāti, ariyasaccadesanā? Tenevāha – “dukkhaṃ samudayaṃ nirodhaṃ magga”nti.

Virajaṃ vītamalanti rāgarajādīnaṃ abhāvā virajaṃ, rāgamalādīnaṃ vigatattā vītamalaṃ. **Dhammacakkhanti** upari brahmāyusutte tiṇṇaṃ maggānaṃ, cūlarāhulovāde āsavakkhayassetam nāmaṃ. Idha pana sotāpattimaggo adhippeto. Tassa uppattiākāradassanatthaṃ “yaṃkiñci samudayadhammaṃ, sabbaṃ taṃ nirodhadhamma”nti āha. Tañhi nirodhaṃ ārammaṇaṃ katvā kiccavasena evam sabbasaṅkhatam paṭivijjhantaṃ uppajjati.

Diṭṭho ariyasaccadhammo etenāti **diṭṭhadhammo**. Esa nayo sesapadesupi. Tiṇṇā vicikicchā anenāti **tiṇṇavicikiccho**. Vigatā kathaṃkathā assāti **vigatakathaṃkatho**. **Vesārajappattoti** vesārajjam patto. Kattha? Satthu sāsane. Nāssa paro paccayo, na parassa saddhāya ettha vattatīti **aparappaccayo**.

70. Cittena sampaṭicchamaṇo **abhinanditvā**, vācāya pasamsamaṇo **anumoditvā**. **Āvarāmīti** thakemi pidahāmi. **Anāvaṇanti** na āvaritaṃ vivaṇam ugghāṭitaṃ.

71. Assosi kho **dīghatapassīti** so kira tassa gatakālato paṭṭhāya – “paṇḍito gahapati, samaṇo ca gotamo dassanasampanno niyyānikakatho, dassanepi tassa pasīdissati, dhammakathāyapi pasīdissati, pasīditvā saraṇaṃ gamissati, gato nu kho saraṇaṃ gahapati na tāva gato”ti ohitasotova hutvā vicarati. Tasmā paṭhamāyeva assosi.

72. Tena hi **sammāti** balavasokena abhibhūto “ettheva tiṭṭhā”ti vacanaṃ sutvāpi atthaṃ asallakkhento dovārikena saddhiṃ sallapatiyeva.

Majjhimāya dvārasālāyanti yassa gharassa satta dvārakoṭṭhakā, tassa sabbaabbhantarato vā sabbabāhirato vā paṭṭhāya catutthadvārakoṭṭhako, yassa pañca, tassa tatiyo, yassa tayo, tassa dutiyo dvārakoṭṭhako **majjhimadvārasālā** nāma. Ekadvārakoṭṭhakassa pana gharassa majjhapaṭṭhāne maṅgalatthambhaṃ nissāya majjhimadvārasālā. Tassa pana gehassa satta dvārakoṭṭhakā, pañcātipi vuttaṃ.

73. Aggantiādīni sabbāni aññamaññavevacanāni. **Yaṃ sudanti** ettha yaṃ nāṭaputtaṃ. **Sudanti** nipātamattaṃ. **Pariggahetvāti** teneva uttarāsaṅgena udare parikkhipanto gahetvā. **Nisīdāpetīti** saṅikaṃ ācariya, saṅikaṃ ācariyāti mahantaṃ telaghaṭam ṭhapento viya nisīdāpeti. **Dattosīti** kiṃ jalosi jātoti attho. **Paṭimukkoti** sīse parikkhipitvā gahito. **Aṇḍahārakoti**ādiṃ duṭṭhullavacanampi samānaṃ upaṭṭhākassa aññathābhāvena uppannabalavasokatāya idaṃ nāma bhaṇāmīti asallakkhetvāva bhaṇati.

74. **Bhaddikā, bhante, āvaṭṭanīti** nigaṇṭho māyameva sandhāya vadati, upāsako attanā

paṭividdham sotāpattimaggaṃ. **Tena hīti** nipātamattametam, bhante, upamaṃ te karissāmicceva attho. Kāraṇavacanam vā, yena kāraṇena tumhākaṃ sāsanaṃ aniyyānikaṃ, mama satthu niyyānikaṃ, tena kāraṇena upamaṃ te karissāmīti vuttam hoti.

75. Upavijaññāti vijāyanakālaṃ upagatā. **Makkaṭacchāpakanti** makkaṭapotakaṃ. **Kiṇitvā ānehīti** mūlaṃ datvāva āhara. Āpaṇesu hi saviññāṇakampi aviññāṇakampi makkaṭādikīlanabhaṇḍakaṃ vikkiṇanti. Taṃ sandhāyetaṃ āha. **Rajitanti** bahalabahalaṃ pītāvalepanaraṅgajātaṃ gahetvā rajitvā dinnam imaṃ icchāmīti attho. **Ākoṭitapaccākoṭitanti** ākoṭitañceva parivattetvā punappunaṃ ākoṭitañca. **Ubhatobhāgavimaṭṭhanti** maṇipāsāṇena ubhosu passesu suṭṭhu vimaṭṭham ghaṭṭetvā uppāditacchaviṃ.

Raṅgakkhamo hi khoti saviññāṇakampi aviññāṇakampi raṅgaṃ pivati. Tasmā evamāha. **No ākoṭṭanakkhamoti** saviññāṇakassa tāva ākoṭṭanaphalake ṭhapetvā kucchiyaṃ ākoṭitassa kucchi bhijjati, karīsaṃ nikkhamati. Sesī ākoṭitassa sīsaṃ bhijjati, mattaluṅgaṃ nikkhamati. Aviññāṇako khaṇḍakhaṇḍitaṃ gacchati. Tasmā evamāha. **No vimajjanakkhamoti** saviññāṇako maṇipāsāṇena vimaddiyamāno nillomataṃ nicchavitañca āpajjati, aviññāṇakopi vacuṇṇakabhāvaṃ āpajjati. Tasmā evamāha. **Raṅgakkhamo hi kho bālānanti** bālānaṃ mandabuddhīnaṃ raṅgakkhamo, rāgamattaṃ janeti, piyo hoti. Paṇḍitānaṃ pana niḅhaṇṭhavādo vā añño vā bhāratarāmasītāharaṇādi niratthakakathāmaggo appiyova hoti. **No anuyogakkhamo, no vimajjanakkhamoti** anuyogaṃ vā vīmaṃsaṃ vā na khamati, thuse koṭṭetvā taṇḍulapariyesanaṃ viya kadaliyaṃ sārāgavesanaṃ viya ca rittako tucchakova hoti. **Raṅgakkhamo ceva paṇḍitānanti** catusaccakathā hi paṇḍitānaṃ piyā hoti, vassasatampi suṇanto tittim na gacchati. Tasmā evamāha. Buddhavacanaṃ pana yathā yathāpi ogāhissati mahāsamuddo viya gambhīrameva hotīti “anuyogakkhamo ca vimajjanakkhamo cā” ti āha. **Suṇohi yassāham sāvako** ti tassa guṇe suṇāhīti bhagavato vaṇṇe vattum āradhho.

76. Dhīrassāti dhīraṃ vuccati paṇḍiccaṃ, yā paññā pajānaṇā...pe... sammādiṭṭhi, tena samannāgatassa dhātuāyatanapaṭiccasamuppādaṭṭhānāṭṭhānakusalassa paṇḍitassāham sāvako, so mayham satthāti evaṃ sabbapadesu sambandho veditabbo. **Pabhinnakhīlassāti** bhinnapañcacetokhīlassa. Sabbaputhujane vijiniṃsu vijinanti vijinissanti vāti vijayā. Ke te, maccumārakilesamāradevaputtamārāti? Te vijitā vijayā etenāti vijitavijayo. Bhagavā, tassa **vijitavijayassa**. **Anīghassāti** kilesadukkhenapi vipākadukkhenapi niddukkhassa. **Susamacittassāti** devadattadhanapālakaṅgulimālarāhulatherādīsipi devamanussesu suṭṭhu samacittassa. **Vuddhasīlassāti** vaḍḍhitācārassa. **Sādhupaññassāti** sundarapaññassa. **Vesamantarassāti** rāgādivisamaṃ taritvā vitaritvā ṭhitassa. **Vimalassāti** vigatarāgādimalassa.

Tusitassāti tuṭṭhacittassa. **Vantalokāmisassāti** vantakāmaguṇassa. **Muditassāti** muditāvihāravasena muditassa, punaruttameva vā etaṃ. Pasādasasena hi ekampi guṇaṃ punappunaṃ vadatiyeva. **Katasamaṇassāti** katasāmaññassa, samaṇadhammassa matthakaṃ pattassāti attho. **Manujassāti** lokavohāravasena ekassa sattassa. **Narassāti** punaruttaṃ. Aññathā vuccamāne ekekaḅhāya dasa guṇā nappahonti.

Venayikassāti sattānaṃ vināyakassa. **Ruciradhammassāti** sucidhammassa. **Pabhāsakassāti** obhāsakassa. **Vīrassāti** vīriyasampannaṃ. **Nisabhassāti** usabhavasabhanisabhesu sabbattha appaṭisamaṭṭhena nisabhassa. **Gambhīrassāti** gambhīraguṇassa, guṇehi vā gambhīrassa. **Monapattassāti** ñāṇapattassa. **Vedassāti** vedo vuccati ñāṇaṃ, tena samannāgatassa. **Dhammaṭṭhassāti** dhamme ṭhitassa. **Samvutattassāti** pihitattassa.

Nāgassāti catūhi kāraṇehi nāgassa. **Pantassenassāti** pantasenāsanassa. **Paṭimantakassāti** paṭimantanapaññāya samannāgatassa. **Monassāti** monaṃ vuccati ñāṇaṃ, tena samannāgatassa, dhutakilesassa vā. **Dantassāti** nibbisevanassa.

Isisattamassāti vipassīdayo cha isayo upādāya sattamassa. **Brahmapattassāti** seṭṭhapattassa.

Nhātakassāti nhātakilesassa. **Padakassāti** akkharādīni samodhānetvā gāthāpadakaraṇakusalassa. **Viditavedassāti** viditaññassa. **Purindadassāti** sabbapaṭhamam dhammānādayakassa. **Sakkassāti** samatthassa. **Pattipattassāti** ye pattaḅbā guṇā, te pattassa. **Veyyākaraṇassāti** vitthāretvā atthadīpakassa. Bhagavatā hi abyākatam nāma tanti padaṃ natthi sabbesaṃyeva attho kathito.

Vipassissāti vipassanakassa. **Anabhinatassāti** anatassa. **No apanatassāti** aduṭṭhassa.

Ananugatantarassāti kilese ananugatacittassa. **Asitassāti** abaddhassa.

Bhūripaññassāti bhūri vuccati pathavī, tāya pathavīsamāya paññāya vipulāya mahantāya vitthatāya samannāgatassāti attho. **Mahāpaññassāti** mahāpaññāya samannāgatassa.

Anupalittassāti taṇhādīṭṭhikilesehi alittassa. **Āhuneyyassāti** āhutiṃ paṭiggahetuṃ yuttassa. **Yakkhassāti** ānubhavadassanaṭṭhena ādissamānakaṭṭhena vā bhagavā yakkho nāma. Tenāha “yakkhassā”ti. **Mahatoti** mahantassa. **Tassa sāvakoḥasmīti** tassa evaṃvividhaguṇassa satthussa ahaṃ sāvakoti. Upāsakassa sobhāpattimaggeneva paṭisambhidā āgatā. Iti paṭisambhidāvisaye ṭhatvā padasatena dasabalassa kilesappahānavaṇṇam kathento “kassa taṃ gahapati sāvakaṃ dhāremā”ti pañhassa attham vissajjesi.

77. Kadā saññūḷhāti kadā sampiṇḍitā. Evaṃ kirassa ahosi – “ayaṃ idāneva samaṇassa gotamassa santikaṃ gantvā āgato, kadāneva ete vaṇṇā sampiṇḍitā”ti. Tasmā evamāha. **Vicittam mālam gantheyyāti** sayampi dakkhatāya pupphānampi nānāvaṇṇatāya ekatovaṇṭikādibhedam vicitrāmālam gantheyya. **Evameva kho, bhanteti** ettha nānāpupphānam mahāpuppharāsi viya nānāvidhānam vaṇṇānam bhagavato sinerumatto vaṇṇarāsi daṭṭhabbo. Chekamālākāro viya upāli gahapati. Mālākārassa vicitrāmālāgantham viya gahapatino tathāgatassa vicitravaṇṇagantham.

Uḥam lohitaṃ mukhato uggañchīti tassa hi bhagavato sakkāram asahamānassa etadahosi – “anattiko dāni ayaṃ gahapati amhehi, sve paṭṭhāya paṇṇāsa satṭhi jane gahetvā etassa gharam pavisitvā bhujjituṃ na labhissāmi, bhinnā me bhattakumbhī”ti. Athassa upaṭṭhākavipariṇāmena balavasoko uppajji. Ime hi sattā attano attanova cintayanti. Tassa tasmim soke uppanne abbhantaram uḥam ahosi, lohitaṃ vilīyittha, taṃ mahāvātena samuddharitam kuṭe pakkhittarajanam viya pattamattam mukhato uggañchi. Nidhānagatalohitam vamtivā pana appakā sattā jīvitum sakkonti. Nigaṇṭho tattheva jāṇunā patito, atha nam pāṭaṅkiyā bahinagaraṃ nīharitvā mañcakasivikāya gahetvā pāvaṃ agamaṃsu, so na cirasseva pāvāyam kālamakāsi. Imasmim pana sutte ugghāṭitaññūpuggalassa vasena dhammadesanā pariniṭṭhitāti.

Papañcasūdaniyā majjhimanikāyaṭṭhakathāya

Upālisuttavaṇṇanā niṭṭhitā.

7. Kukkuravatikasuttavaṇṇanā

78. Evaṃ me sutanti kukkuravatikasuttam. Tattha **koliyesūti** evaṃnāmake janapade. So hi ekopi kolanagare patiṭṭhitānam koliyānam rājakumārānam nivasaṭṭhānattā evaṃ vuccati. Tasmim koliyesu janapade. **Haliddavasananti** tassa kira nigamassa māpitakāle pītakavatthanivatthā manussā nakkhattam kilīmsu. Te nakkhattakīlavāsāne nigamassa nāmam āropentā haliddavasananti nāmam akaṃsu. Tam gocaragāmam katvā viharatīti attho. Vihāro panettha kiñcāpi na niyāmito, tathāpi buddhānam anucchavike senāsaneyeva vihāsīti veditabbo. **Govatikoti** samādinnaḡovato, sīse siṅgāni ṭhapetvā naṅguṭṭham bandhitvā gāvīhi saddhim tiṇāni khādanto viya carati. **Aceloti** naggo niccelo. **Seniyoti** tassa nāmam.

Kukkuravatikoti samādinna kukkuravato, sabbaṃ sunakhakiriyaṃ karoti. Ubhopenē sahapamsukīlikā sahāyakā. **Kukkurova palikujjivāti** sunakho nāma sāmikassa santike nisīdanto dvīhi pādehi bhūmiyaṃ vilekhitvā kukkurakūjitaṃ kūjanto nisīdati, ayampi “kukkurakiriyaṃ karissāmi”ti bhagavatā saddhiṃ sammoditvā dvīhi hatthehi bhūmiyaṃ vilekhitvā sīsaṃ vidhunanto ‘bhū bhū’ti katvā hatthapāde samīñjitvā sunakho viya nisīdi. **Chamānikkhittanti** bhūmiyaṃ ṭhapitaṃ. **Samattaṃ samādinnaṃ** paripuṇṇaṃ katvā gahitaṃ. **Kā gatīti** kā nipphatti. **Ko abhisamparāyoti** abhisamparāyamhi kattha nibbatti. **Alanti** tassa appiyaṃ bhavissatīti yāvatatiyaṃ paṭibāhati. **Kukkuravatanti** kukkuravatasamādānaṃ.

79. Bhāvetīti vaḍḍheti. **Paripuṇṇanti** anūnaṃ. **Abbokiṇṇanti** nirantaraṃ. **Kukkurasīlanti** kukkurācāraṃ. **Kukkuracittanti** “ajja paṭṭhāya kukkurehi kātappaṃ karissāmi”ti evaṃ uppannacittaṃ. **Kukkurākappanti** kukkurānaṃ gamaṇākāro atthi, tiṭṭhanākāro atthi, nisīdanākāro atthi, sayanākāro atthi, uccārapassāvakaṇākāro atthi, aññe kukkure disvā dante vivaritvā gamaṇākāro atthi, ayaṃ kukkurākappo nāma, taṃ bhāvetīti attho. **Imināhaṃ sīlenāti**ādīsu ahaṃ iminā ācārena vā vatasamādānena vā dukkaratapacāraṇena vā methunaviratibrahmacariyena vāti attho. **Devoti** sakkasuyāmādīsu aññataro. **Devaññataroti** tesamā dutiyatatiyaṭṭhānādīsu aññataradevo. **Micchādīṭṭhīti** adeva lokagāmimaggameva deva lokagāmimaggoti gahetvā uppannatāya sā assa micchādīṭṭhīti nāma hoti. **Aññataraṃ gatiṃ vadāmīti** tassa hi nirayato vā tiracchānayanito vā aññā gati natthi, tasmā evamāha. **Sampajjamānanti** diṭṭhiyā asammissaṃ hutvā nipajjamānaṃ.

Nāhaṃ, bhante, etaṃ rodāmi, yaṃ maṃ bhagavā evamāhāti yaṃ maṃ, bhante, bhagavā evamāha, ahametaṃ bhagavato byākaraṇaṃ na rodāmi na paridevāmi, na anuttunāmīti attho. Evaṃ sakammakavasenettha attho veditabbo, na assumuñcanamattena.

“Mataṃ vā amma rodanti, yo vā jīvaṃ na dissati;
Jīvantaṃ amma passantī, kasmā maṃ amma rodasī”ti. (saṃ. ni. 1.239) –

Ayañcetta payogo. **Apica me idaṃ, bhanteti** apica kho me idaṃ, bhante, kukkuravataṃ dīgharattaṃ samādinnaṃ, tasmīṃ sampajjantepi vuddhi natthi, vipajjantepi. Iti “ettakaṃ kālaṃ mayā katakammaṃ moghaṃ jāta”nti attano vipattiṃ paccavekkhamāno rodāmi, bhanteti.

80. Govatantiādīni kukkuravatādīsu vuttanayeneva veditabbāni. **Gavākappanti** goākappaṃ. Sesamā kukkurākappe vuttasadisameva. Yathā pana tattha aññe kukkure disvā dante vivaritvā gamaṇākāro, evamidha aññe gāvo disvā kaṇṇe ukkhipitvā gamaṇākāro veditabbo. Sesamā tādisameva.

81. Cattārimāni puṇṇa kammānīti kasmā imaṃ desanaṃ ārabhi? Ayañhi desanā ekaccakammakiriya vasena āgatā, imasmiñca kammacatukke kathite imesaṃ kiriya pākāṭā bhavissatīti imaṃ desanaṃ ārabhi. Apica imaṃ kammacatukkameva desiyamānaṃ ime sañjānissanti, tato eko saraṇaṃ gamissati, eko pabbajitvā arahattaṃ pāpuñissatīti ayameva etesaṃ sappāyāti ñatvāpi imaṃ desanaṃ ārabhi.

Tattha **kaṇhanti** kāḷakaṃ dasaakusalakammappaṭhakaṃ. **Kaṇhavipākanti** apāye nibbattanato kāḷakavipākaṃ. **Sukkanti** paṇḍaraṃ dasakusalakammappaṭhakaṃ. **Sukkavipākanti** sagge nibbattanato paṇḍaravipākaṃ. **Kaṇhasukkanti** vomissakakammaṃ. **Kaṇhasukkavipākanti** sukhadukkhavipākaṃ. Missakakammañhi katvā akusalena tiracchānayanīyaṃ maṅgalahatthiṭṭhānādīsu uppanno kusalena pavatte sukhaṃ vediyati. Kusalena rājakulepi nibbatta akusalena pavatte dukkhaṃ vediyati. **Akaṇhaṃ asukkanti** kammakkhayakaraṃ catumaggacetanākammaṃ adhippettaṃ. Tañhi yadi kaṇhaṃ bhavēyya, kaṇhavipākaṃ dadeyya. Yadi sukkaṃ bhavēyya, sukkavipākaṃ dadeyya. Ubhayavipākassa pana adānato akaṇhāsukkavipākattā “akaṇhaṃ asukka”nti vuttaṃ. Ayaṃ tāva uddese attho.

Niddese pana **sabyābajjhanti** sadukkhaṃ. Kāyasaṅkhārādīsu kāyadvāre gahaṇādivasena copanappattā dvādasa akusalacetanā **sabyābajjhakāyasaṅkhāro** nāma. Vacīdvāre hanusañcopanavasena vacībhedapavattikā tāyeva dvādasa **vacīsaṅkhāro** nāma. Ubhayacopanaṃ appattā raho cintayantassa manodvāre pavattā **manosaṅkhāro** nāma. Iti tīsupi dvāresu kāyaduccaritādibhedā akusalacetanāva saṅkhārāti veditabbā. Imasmiñhi sutte cetanā dhuraṃ, upālisutte kammaṃ. **Abhisāṅkharitvāti** saṅkaḍḍhitvā, piṇḍaṃ katvāti attho. **Sabyābajjhaṃ lokanti** sadukkhaṃ lokaṃ upapajjanti. **Sabyābajjhā phassā phusantīti** sadukkhaṃ vipākaphassā phusanti. **Ekantadukkhaṃ** nirantaradukkhaṃ. **Bhūtāti** hetvatthe nissakkavacanaṃ, bhūtakkammaṃ bhūtassa sattassa uppatti hoti. Idaṃ vuttaṃ hoti – yathābhūtaṃ kammaṃ sattā karonti, tathābhūtena kammena kammabhāgavasena tesam upapatti hoti. Tenevāha “yaṃ karoti tena upapajjati”ti. Ettha ca **tenāti** kammena viya vuttā, upapatti ca nāma vipākena hoti. Yasmā pana vipākassa kammaṃ hetu, tasmā tena mūlahetubhūtena kammena nibbattatīti ayamettha attho. **Phassā phusantīti** yena kammavipākena nibbatta, taṃkammavipākaphassā phusanti. **Kammadāyādāti** kammadāyajjā kammameva nesaṃ dāyajjaṃ santakanti vadāmi.

Abyābajjhanti niddukkhaṃ. Imasmiṃ vāre kāyadvāre pavattā aṭṭha kāmāvacarakusalacetanā **kāyasaṅkhāro** nāma. Tāyeva vacīdvāre pavattā **vacīsaṅkhāro** nāma. Manodvāre pavattā tāyeva aṭṭha, tisso ca heṭṭhimajjhānacetanā **abyābajjhamanosaṅkhāro** nāma. Jhānacetanā tāva hotu, kāmāvacarā kinti abyābajjhamanosaṅkhāro nāma jātāti. Kasiṇasajjanakāle ca kasiṇāsevanakāle ca labbhanti. Kāmāvacaracetanā paṭhamajjhānacetanāya ghaṭitā, catutthajjhānacetanā tatiyajjhānacetanāya ghaṭitā. Iti tīsupi dvāresu kāyasucaritādibhedā kusulacetanāva saṅkhārāti veditabbo. Tatiyavāro ubhayamissakavasena veditabbā.

Seyyathāpi manussātiādīsu manussānaṃ tāva kālena sukhaṃ kālena dukkhaṃ pākaṭameva, devesu pana bhummadevatānaṃ, vinipātikesu vemānikapetanāṃ kālena sukhaṃ kālena dukkhaṃ hotīti veditabbaṃ. Hatthiādīsu tiracchānesupi labbhatiyeva.

Tatrāti tesu tīsu kammesu. **Tassa pahānāya yā cetanāti** tassa pahānatthāya maggacetanā. Kammaṃ patvāva maggacetanāya añño paṇḍarataro dhammo nāma natthi. Idaṃ pana kammacatukkaṃ patvā dvādasa akusalacetanā kaṇhā nāma, tebhūmakakusalacetanā sukkā nāma, maggacetanā akanhā asukkāti āgatā.

82. “Labheyāhaṃ, bhante”ti idaṃ so “ciraṃ vata me aniyyānikapakkhe yojetvā attā kilamito, ‘sukkhanadītre nhāyissāmī’ti samparivattentena viya thuse koṭtentena viya ca na koci attho nipphādito, handāhaṃ attānaṃ yoge yojemī”ti cintetvā āha. Atha bhagavā yonena khandhake titthiyaparivāso paññatto, yaṃ aññatitthiyapubbo sāmaṇerabhūmiyaṃ ṭhito – “ahaṃ, bhante, itthannāmo aññatitthiyapubbo imasmiṃ dhammavinaye ākaṅkhāmi upasampadaṃ, svāhaṃ, bhante, saṅghaṃ cattāro māse parivāsaṃ yācāmī”tiādīnā (mahāva. 86) nayena samādiyitvā parivasati, taṃ sandhāya “yo kho, seniya, aññatitthiyapubbo”tiādīmāha.

Tattha **pabbajjanti** vacanasiliṭṭhatāvaseneva vuttaṃ. Aparivasitvāyeva hi pabbajjaṃ labhati. Upasampadatthikena pana nātikālena gāmapavesanādīni aṭṭha vattāni pūrentena parivasitabbaṃ. **Āraddhacittāti** aṭṭhavattapūraṇena tuṭṭhacittā. Ayamettha saṅkhepo. Vitthārato panesa titthiyaparivāso **samantapāsādikāya vinayaṭṭhakathāya** pabbajjakhandhakavaṇṇanāyaṃ (mahāva. aṭṭha. 86) vuttanayeneva veditabbo. **Apica metthāti** apica me ettha. **Puggalavemattatā viditāti** puggalanānattaṃ viditaṃ. Ayaṃ puggalo parivāsāraho, ayaṃ na parivāsārahoti idaṃ mayhaṃ pākaṭanti dasseti.

Tato seniyo cintesi – “aho acchariyaṃ buddhasāsaṇaṃ, yattha evaṃ ghaṃsitvā koṭtetvā yuttameva gaṇhanti, ayuttaṃ chaḍḍenti”ti. Tato suṭṭhutaṃ pabbajjāya sañjātussāho **sace, bhanteti**ādīmāha. Atha bhagavā tassa tibbacchandataṃ viditvā na seniyo parivāsaṃ arahaṭīti aññataraṃ bhikkhuṃ āmantesi – “gaccha tvam, bhikkhu, seniyaṃ nhāpetvā pabbājetvā ānehi”ti. So tathā katvā taṃ pabbājetvā

bhagavato santikaṃ ānaya. Bhagavā gaṇe nisīditvā upasampādesi. Tena vuttaṃ – “alattha kho acelo seniyo bhagavato santike pabbajjaṃ alattha upasampada”nti.

Acirūpasampannoti upasampanno hutvā nacirameva. **Vūpakaṭṭhoti** vatthukāmakilesakāmehi kāyena ca cittena ca vūpakaṭṭho. **Appamattoti** kammaṭṭhāne satim avijahanto. **Ātāpīti** kāyikacetasikaṃkhātena vīriyātāpena ātāpī. **Pahitattoti** kāye ca jīvite ca anapekkhatāya pesitatto vissaṭṭhaattabhāvo. **Yassatthāyāti** yassa atthāya. **Kulaputtāti** ācārakulaputtā. **Sammadevāti** hetunāva kāraṇeneva. **Tadanuttaranti** taṃ anuttaraṃ. **Brahmacariyapariyosānanti** maggabrahmacariyapariyosānabhūtaṃ arahattaphalaṃ. Tassa hi atthāya kulaputtā pabbajanti. **Diṭṭheva dhammeti** imasmiṃyeva attabhāve. **Sayaṃ abhiññā sacchikatvāti** attanāyeva paññāya paccakkhaṃ katvā, aparappaccayaṃ ñatvāti attho. **Upasampajja vihāsīti** pāpuṇitvā sampādetvā vihāsi. Evaṃ viharantova **khīṇā jāti...pe... abbhaññāsi**.

Evamassa paccavekkhaṇabhūmiṃ dassetvā arahattanikūṭeneva desanaṃ niṭṭhāpetuṃ “aññataro kho panāyasmā seniyo arahataṃ ahoṣī”ti vuttaṃ. Tattha **aññataroti** eko. **Arahatanti** arahantānaṃ, bhagavato sāvakaṇaṃ arahantānaṃ abbhantaro ahoṣīti ayamevattha adhippāyo. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Kukkuravatikasuttavaṇṇanā niṭṭhitā.

8. Abhayarājakumārasuttavaṇṇanā

83. Evaṃ me sutanti abhayasuttaṃ. Tattha **abhayoti** tassa nāmaṃ. **Rājakumāroti** bimbisārassa orasaputto. **Vādaṃ āropehīti** dosaṃ āropehi. **Nerayikoti** niraye nibbattako. **Kappaṭṭhoti** kappaṭṭhitiko. **Atekicchoti** buddhasahassenāpi tikicchituṃ na sakkā. **Uggilitunti** dve ante mocetvā kathetuṃ asakkonto uggilituṃ bahi nīharituṃ na sakkhīti. **Ogilitunti** pucchāya dosaṃ datvā hāretuṃ asakkonto ogilituṃ anto pavesetuṃ na sakkhīti.

Evaṃ, bhanteti nigaṇṭho kira cintesi – “samaṇo gotamo mayhaṃ sāvake bhinditvā gaṇhāti, handāhaṃ ekaṃ pañhaṃ abhisāṅkharomi, yaṃ puṭṭho samaṇo gotamo ukkuṭiko hutvā nisinno utṭhātuṃ na sakkhissatī”ti. So abhayassa gehā nīhaṭabhatto siniddhabhojanaṃ bhuñjanto bahū pañhe abhisāṅkharitvā – “ettha samaṇo gotamo imaṃ nāma dosaṃ dassessati, ettha imaṃ nāmā”ti sabbe pahāya cātumāsamatthake imaṃ pañhaṃ addasa. Athassa etadahosi – “imassa pañhassa pucchāya vā vissajjane vā na sakkā doso dātuṃ, ovaṭṭikasāro ayaṃ, ko nu kho imaṃ gahetvā samaṇassa gotamassa vādaṃ āropessatī”ti. Tato “abhayo rājakumāro paṇḍito, so sakkhissatīti taṃ uggaṇhāpemi”ti niṭṭhaṃ gantvā uggaṇhāpesi. So vādajjhāsayaṭṭhāya tassa vacanaṃ sampañicchanto “evaṃ, bhante,”ti āha.

84. Akālo kho ajjāti ayaṃ pañho catūhi māsehi abhisāṅkhato, tattha idaṃ gahetvā idaṃ vissajjiyamāne divasabhāgo nappahossatīti maññanto evaṃ cintesi. **So dānīti** sve dāni. **Attacattutthoti** kasmā bahūhi saddhiṃ na nimantesi? Evaṃ kirassa ahoṣi – “bahūsu nisinnessu thokaṃ datvā vadantassa aññaṃ suttaṃ aññaṃ kāraṇaṃ aññaṃ tathārūpaṃ vatthuṃ āharitvā dassessati, evaṃ sante kalaho vā kolāhalameva vā bhavissati. Athāpi ekakaṃyeva nimantessāmi, evampi me garahā uppajjissati ‘yāvamaccharī vāyaṃ abhayo, bhagavantaṃ divase divase bhikkhūnaṃ satenapi sahassenapi saddhiṃ carantaṃ disvāpi ekakaṃyeva nimantesi’”ti. “Evaṃ pana doso na bhavissatī”ti aparehi tīhi saddhiṃ attacattutthaṃ nimantesi.

85. Na khvettha, rājakumāra, ekaṃsenāti na kho, rājakumāra, ettha pañhe ekaṃsena vissajjanaṃ hoti. Evarūpañhi vācaṃ tathāgato bhāseyyāpi na bhāseyyāpi. Bhāsitaṃpaccayena atthaṃ passanto bhāseyya, apassanto na bhāseyyāti attho. Iti bhagavā mahānigaṇṭhena catūhi māsehi abhisāṅkhatam

pañhaṃ asanipātena pabbatakūṭaṃ viya ekavacaneneva saṃcuññesi. **Anassuṃ nigaṇṭhā**ti natṭhā nigaṇṭhā.

86. Añke nisinno hotīti ūrūsu nisinno hoti. Lesavādino hi vādaṃ paṭṭhapentā kiñcideva phalaṃ vā pupphaṃ vā potthakaṃ vā gahetvā nisīdanti. Te attano jaye sati paraṃ ajjhottharanti, parassa jaye sati phalaṃ khādantā viya pupphaṃ ghāyantā viya potthakaṃ vācentā viya vikkhepaṃ dassenti. Ayaṃ pana cintesi – “sammāsambuddho esa osaṭasaṅgāmo paravādamaddano. Sace me jayo bhavissati, iccetamaṃ kusalaṃ. No ce bhavissati, dāraṃ vijjhivā rodāpessāmi. Tato passatha, bho, ayaṃ dāraṃ rodati, utṭhahatha tāva, pacchāpi jānissāmā”ti tasmā dāraṃ gahetvā nisīdi. Bhagavā pana rājakumārato sahasagaṇeṇapi satahasagaṇeṇapi vādīvarataro, “imamevassa dāraṃ upamaṃ katvā vādaṃ bhindissāmī”ti cintetvā “taṃ kiṃ maññasi rājakumārā”tiādimāha.

Tattha **mukhe āhareyyā**ti mukhe ṭhapeyya. **Āhareyyassā**hanti apaneyyaṃ assa ahaṃ. **Ādikenevā**ti paṭhamapayogeneva. **Abhūtanti** abhūtatthaṃ. **Atacchanti** na tacchaṃ. **Anatthasamhitanti** na atthasamhitamaṃ na vaḍḍhinissitamaṃ. **Appiyā amanāpā**ti neva piyā na manāpā. Iminā nayeneva sabbattha attho daṭṭhabbo.

Tattha appiyapakke **paṭhamavācā** acoraṃyeva coroti, adāsaṃyeva dāsoti, aduppayuttaṃyeva duppayuttoti pavattā. Na taṃ tathāgato bhāsati. **Dutiyavācā** coraṃyeva coro ayantiādivasena pavattā. Tampi tathāgato na bhāsati. **Tatiyavācā** “idāni akatapuññatāya duggato dubbaṇṇo appesakkho, idha ṭhatvāpi puna puññaṃ na karosi, dutiyacittavāre kathaṃ catūhi apāyehi na muccissasi”ti evaṃ mahājanassa atthapurekkhārena dhammapurekkhārena anusāsanīpurekkhārena ca vattabbavācā. **Tatra kālaññū tathāgatoti** tasmimṃ tatiyabyākaraṇe tassā vācāya byākaraṇatthāya tathāgato kālaññū hoti, mahājanassa ādānakālaṃ gahaṇakālaṃ jānitvāva byākarotīti attho.

Piyapakke paṭhamavācā aṭṭhāniyakathā nāma. Sā evaṃ veditabbā – evaṃ kira gāmaṃvāsīmahallakaṃ nagaraṃ āgantvā pānāgāre pivantaṃ vañcetukāmā sambahulā dhuttā pītaṭṭhāne ṭhatvā tena saddhiṃ suraṃ pivantā “imassa nivāsanapāvuraṇampi hatthe bhaṇḍakampi sabbamaṃ gaṇhissāmā”ti cintetvā katikaṃ akaṃsu – “eekaṃ attapaccakkhakaṃ kathaṃ kathaṃ, yo ‘abhūta’nti kathesi, kathitaṃ vā na saddahati, taṃ dāsaṃ katvā gaṇhissāmā”ti. Tampi mahallakaṃ pucchimsu “tumahākaṃ pi tāta rucati”ti. Evaṃ hotu tātāti.

Eko dhutto āha – mayhaṃ, bho mātu, mayi kucchigate kapiṭṭhaphaladohalo aho. Sā aññaṃ kapiṭṭhahāraṃ alabbhamānā maṃyeva pesesi. Ahaṃ gantvā rukkaṃ abhiruhituṃ asakkonto attānāva attānaṃ pāde gahetvā muggaraṃ viya rukkhassa upari khipiṃ; atha sākhato sākhaṃ vicaranto phalāni gahetvā otarituṃ asakkonto gharaṃ gantvā nisseṇiṃ āharitvā oruyha mātu santikaṃ gantvā phalāni mātuyā adāsiṃ; tāni pana mahantāni honti cāṭippamañāni. Tato me mātaraṃ ekāsane nisinnāya samasaṭṭhiphalāni khādītāni. Mayā ekucchaṅgena ānītapalesu sesakāni kulasantake gāme khuddakamahallakānaṃ ahesuṃ. Amhākaṃ gharaṃ soḷasahatthaṃ, sesaparikkhārabhaṇḍakaṃ apanetvā kapiṭṭhaphaleheva yāva chadanaṃ pūritaṃ. Tato atirekāni gahetvā gehadvāre rāsiṃ akaṃsu. So asītiatthubbedho pabbato viya aho. Kiṃ idisaṃ, bho sakkā, saddahituntī?

Gāmikamahallako tuñhī nisīditvā sabbesaṃ kathāpariyosāne pucchito āha – “evaṃ bhavissati tātā, mahantaṃ raṭṭhaṃ, raṭṭhamahantatāya sakkā saddahitu”nti. Yathā ca tena, evaṃ sesehipi tathārūpāsu nikkāraṇakathāsu kathitāsu āha – mayhampi tātā suñātha, na tumhākaṃyeva kulāni, amhākaṃyeva kulaṃ mahākulaṃ, amhākaṃ pana avasesakhettehī kappāsakhettaṃ mahantataraṃ. Tassa anekakarīsasatassa kappāsakhettaṃ majjhe eko kappāsaruṃkko mahā asītiatthubbedho aho. Tassa pañca sākhā, tāsu avasesasākhā phalaṃ na gaṇhiṃsu, pācīnasākhāya ekameva mahācāṭimattaṃ phalaṃ aho. Tassa cha aṃsiyo, chasu aṃsīsu cha kappāsapiṇḍiyo pupphitā. Ahaṃ massuṃ kāretvā nhātavilitto khettaṃ gantvā tā kappāsapiṇḍiyo pupphitā disvā ṭhitakova hatthaṃ pasāretvā gaṇhiṃ. Tā kappāsapiṇḍiyo thāmasampannā cha dāsā ahesuṃ. Te sabbe maṃ ekakaṃ ohāya palātā. Etake addhāne te na passāmi,

ajja diṭṭhā, tumhe te cha janā. Tvaṃ nando nāma, tvaṃ puṇṇo nāma, tvaṃ vaḍḍhamāno nāma, tvaṃ citto nāma tvaṃ maṅgalo nāma, tvaṃ poṭṭhiyo nāmāti vatvā uṭṭhāya nisinnakeyeva cūḷasu gahetvā aṭṭhāsi. Te “na mayaṃ dāsā”tipi vattum nāsakkhimsu. Atha ne kaḍḍhanto vinicchayaṃ netvā lakkhaṇaṃ āropetvā yāvajīvaṃ dāse katvā paribhuñji. Evarūpiṃ kathaṃ tathāgato na bhāsati.

Dutiyavācā āmisahetucāṭukamyatādivasena nānappakārā paresaṃ thomanavācā ceva, corakathaṃ rājakathanti ādinayappavattā tiracchānakathā ca. Tampi tathāgato na bhāsati. **Tatīyavācā** ariyasaccasannissitakathā, yaṃ vassasatampi suṇantā paṇḍitā neva tittim gacchanti. Iti tathāgato neva sabbampi appiyavācaṃ bhāsati na piyavācaṃ. Tatiyaṃ tatiyameva pana bhāsitabbakālaṃ anatikkamitvā bhāsati. Tattha tatiyaṃ appiyavācaṃ sandhāya heṭṭhā daharakumāraupamā āgatāti veditabbaṃ.

87. Udāhu ṭhānasovetanti udāhu ṭhānuppattikañāṇena taṅkhaṇaṃyeva taṃ tathāgatassa upaṭṭhātīti pucchati. **Saññātōti** ñāto paññāto pākaṭo. **Dhammadhātūti** dhammasabhāvo. Sabbaññutaññāṇassetam adhivacanaṃ. Taṃ bhagavatā suppaṭividdhaṃ, hatthagataṃ bhagavato. Tasmā so yaṃ yaṃ icchati, taṃ taṃ sabbam ṭhānaso va paṭibhātīti. Sesam sabbattha uttānameva. Ayaṃ pana dhammadesanā neyyapuggalavasena pariniṭṭhitāti.

Papañcasūdaniyā majjhimanikāyaṭṭhakathāya

Abhayaṛājakumārasuttavaṇṇanā niṭṭhitā.

9. Bahuedanīyasuttavaṇṇanā

88. Evaṃ me sutanti bahuedanīyasuttaṃ. Tattha **pañcakaṅgo thapatīti** pañcakaṅgoti tassa nāmaṃ. Vāsipharasunikhādanadaṇḍamuggarakālasuttanālisaṅkhātehi vā aṅgehi samannāgatattā so pañcaṅgoti paññāto. **Thapatīti** vaḍḍhakijetṭhako. **Udāyīti** paṇḍitaudāyitthero.

89. Pariyāyanti kāraṇaṃ. **Dvepānandāti** dvepi, ānanda. **Pariyāyenāti** kāraṇena. Ettha ca kāyikacetāsikavasena **dve** veditabbā. Sukhādivasena **tisso**, indriyavasena sukhindriyādikā **pañca**, dvāravasena cakkhusamphassaṇādikā **cha**, upavicāravasena “cakkhunā rūpaṃ disvā somanassaṭṭhāniyaṃ rūpaṃ upavicarati”tiādikā **aṭṭhārasa**, cha gehassitāni somanassāni, cha nekkhammasitāni somanassāni, cha gehassitāni domanassāni, cha nekkhammasitāni domanassāni, cha gehassitā upekkhā, cha nekkhammasitāti evaṃ **chattimsa**, tā atīte chattimsa, anāgate chattimsa, paccuppanne chattimsāti evaṃ **aṭṭhavedanāsataṃ** veditabbaṃ.

90. Pañca kho ime, ānanda, kāmaguṇāti ayaṃ paṇḍiekkō anusandhi. Na kevalampi dve ādiṃ katvā vedanā bhagavatā paññattā, pariyāyena ekāpi vedanā kathitā. Taṃ dassento pañcakaṅgassa thapatino vādaṃ upatthambhetuṃ imaṃ desanaṃ ārabhi.

Abhikkantataranti sundarataraṃ. **Paṇītataranti** atappakataraṃ. Ettha ca catutthajjhānato paṭṭhāya adukkhamasukhā vedanā, sāpi santatṭhena paṇītattṭhena ca sukhanti vuttā. Cha gehassitāni sukhanti vuttāni. Nirodho avedayitasukhavasena sukhaṃ nāma jāto. Pañcakāmaguṇavasena hi aṭṭhasamāpattivasena ca uppannaṃ vedayitasukhaṃ nāma. Nirodho avedayitasukhaṃ nāma. Iti vedayitasukhaṃ vā hotu avedayitasukhaṃ vā, taṃ niddukkhabhāvasaṅkhātena sukhatṭhena ekantasukhameva jātaṃ.

91. Yattha yatthāti yasmim yasmim ṭhāne. **Sukhaṃ upalabbhatīti** vedayitasukhaṃ vā avedayitasukhaṃ vā upalabbhati. **Taṃ taṃ tathāgato sukhasmim paññāpetīti** taṃ sabbam tathāgato niddukkhabhāvaṃ sukhasmiṃyeva paññāpetīti. Idha bhagavā nirodhasamāpattim sīsaṃ katvā neyyapuggalavasena arahattanikūṭeneva desanaṃ niṭṭhāpesīti.

Papañcasūdanīyā majjhimanikāyaṭṭhakathāya

Bahavedanīyasuttavaṇṇanā niṭṭhitā.

10. Apañṇakasuttavaṇṇanā

92. **Evam me sutanti** apañṇakasuttaṃ. Tattha **cārikanti** aturita-cārikaṃ.

93. **Atthi pana vo gahapatayoti** kasmā āha? So kira gāmo aṭavidvāre niviṭṭho. Nānāvidhā samaṇabrāhmaṇā divasaṃ maggaṃ gantvā sāyaṃ taṃ gāmaṃ vāsathāya upenti, tesam te manussā mañcapīṭhāni pattharivā pāde dhovivā pāde makkhetvā kappiyapānakāni datvā punadivase nimantevā dānaṃ denti. Te pasannacittā tehi saddhiṃ sammantayamānā evaṃ vadanti “atthi pana vo gahapatayo kiñci dassanaṃ gahita’nti? Natthi, bhanteti. “Gahapatayo vinā dassanena loko na niyyāti, ekaṃ dassanaṃ ruccivā khamāpetvā gahetuṃ vaṭṭati, ‘sassato loko’ti dassanaṃ gaṇhathā’ti vatvā pakkantā. Aparadivase aññe āgatā. Tepi tatheva pucchimsu. Te tesam “āma, bhante, purimesu divasesu tumhādisā samaṇabrāhmaṇā āgantvā ‘sassato loko’ti amhe idaṃ dassanaṃ gāhāpetvā gatā’ti ārocesuṃ. “Te bālā kiṃ jānanti? ‘Ucchijjati ayaṃ loko’ti ucchedadassanaṃ gaṇhathā’ti evaṃ tepi ucchedadassanaṃ gaṇhāpetvā pakkantā. Etenupāyena aññe ekaccasassataṃ, aññe antānantam, aññe amarāvikkhepanti evaṃ dvāsaṭṭhi diṭṭhiyo uggaṇhāpesuṃ. Te pana ekadiṭṭhiyampi patiṭṭhātuṃ nāsakkhimsu. Sabbapacchā bhagavā agamāsi. So tesam hitathāya pucchanto “atthi pana vo gahapatayo’tiādīmāha. Tattha **ākāravatīti** kāraṇavatī sahetukā. **Apañṇakoti** aviraddho advejjhagāmī ekaṃsagāhiko.

94. **Natthi dinnantiādi** dasavatthukā micchādiṭṭhi heṭṭhā sāleyyakasutte vitthāritā. Tathā tabbipaccanīkabhūtā sammādiṭṭhi.

95. **Nekkhamme ānisaṃsanti** yo nesam akusalato nikkhantabhāve ānisaṃso, yo ca vodānapakkho visuddhipakkho, taṃ na passantīti attho. **Asaddhammasaññattīti** abhūtadhammasaññāpanā. **Attānukkamaṃsetīti** ṭhapetvā maṃ ko añño attano dassanaṃ pare gaṇhāpetuṃ sakkotīti attānaṃ ukkhipati. **Paraṃ vambhetīti** ettakesu janesu ekopi attano dassanaṃ pare gaṇhāpetuṃ na sakkotīti evaṃ paraṃ heṭṭhā khipati. **Pubbeva kho panāti** pubbe micchādassanaṃ gaṇhantasseva susīlyaṃ pahīnaṃ hoti, dussīlabhāvo paccupaṭṭhito. **Evamassimeti** evaṃ assa ime micchādiṭṭhiādayo satta. Aparāparaṃ uppajjanavasena pana teyeva micchādiṭṭhipaccayā aneke pāpakā akusalā dhammā uppajjanti nāma.

Tatrāti tāsu tesam samaṇabrāhmaṇānaṃ laddhīsu. **Kaliggahoti** parājayaggāho. **Dussamatto samādinnoti** duggahito dupparāmaṭṭho. **Ekaṃsam pharivā tiṭṭhatīti** ekantaṃ ekakoṭṭhāsaṃ sakavādameva pharivā adhimuccivā tiṭṭhati, “sace kho natthi paro loko’ti evaṃ santeyeva sotthibhāvāvaho hoti. **Riñcatīti** vajjeti.

96. **Saddhammasaññattīti** bhūtadhammasaññāpanā.

Kaṭaggahoti jayaggāho. **Susamatto samādinnoti** suggahito suparāmaṭṭho. **Ubhayamsam pharivā tiṭṭhatīti** ubhayantaṃ ubhayakoṭṭhāsaṃ sakavādaṃ paravādañca pharivā adhimuccivā tiṭṭhati “sace kho atthi paro loko’ti evaṃ santepi “sace kho natthi paro loko’ti evaṃ santepi sotthibhāvāvaho hoti. Paratopi ekaṃsaubhayamsesu imināva nayena attho veditabbo.

97. **Karototi** sahatthā karontassa. **Kārayatoti** āṇattiyā kārentassa. **Chindatoti** paresam hatthādīni chindantassa. **Pacatototi** daṇḍena pīlentassa vā tajjentassa vā. **Socayatoti** parassa bhaṇḍaharaṇādīhi sokaṃ sayam karontassapi parehi kārentassapi. **Kilamatoti** āhārūpaccheda-bandhanāgārappavesanādīhi sayam kilamantassāpi parehi kilamāpentassāpi. **Phandato phandāpayatoti** paraṃ phandantaṃ phandanakāle sayampi phandato paraṃ pi phandāpayato. **Pānamatipātayatoti** pāṇaṃ hanantassapi hanāpentassapi.

Evam sabbattha karaṇakārāpanavaseneva attho veditabbo.

Sandhinti gharasandhiṃ. **Nillopanti** mahāviloṇaṃ. **Ekāgārikanti** ekameva gharaṃ parivāretvā vilumpanaṃ. **Paripantheti** tiṭṭhatoti āgatāgatānaṃ acchindanattamaṃ magge tiṭṭhato. **Karoto na kariyati pāpanti** yaṃkiñci pāpaṃ karomīti saññāya karotopi pāpaṃ na kariyati, natthi pāpaṃ. Sattā pana karomāti evaṃsaññino hontīti attho. **Khurapariyantena** khuraneminā, khuradhārasadisapariyantena vā. **Ekaṃ maṃsakhalanti** ekaṃ maṃsarāsīṃ. **Puñjanti** tasseva vevacanaṃ. **Tatonidānanti** ekamaṃsakhalakaraṇanidānaṃ. Dakkhiṇatīre manussā kakkhaḷā dāruṇā, te sandhāya **hanantoti** vuttaṃ. Uttaratīre saddhā honti pasannā buddhamāmakā dhammāmakā saṅghamāmakā, te sandhāya **dadantoti** vuttaṃ.

Tattha **yajantoti** mahāyāgaṃ karonto. **Damenāti** indriyadamaṇa uposathakammaṇa. **Samyamenāti** sīlasamyamaṇa. **Saccavajjenāti** saccavacanaṇa. **Āgamoti** āgamaṇaṃ, pavattīti attho. Sabbathāpi pāpapuññānaṃ kiriyaṃeva paṭikkhipanti. Sukkapakkhopi vuttanayeneva veditabbo. Sesamettha purimavāre vuttasadisameva.

100. Natthi hetu natthi paccayoti ettha paccayo hetuvevacanaṃ. Ubhayenāpi vijjamaṇakameva kāyaduccarītādisaṃkilesapaccayaṃ kāyasucarītādivisuddhipaccayaṃ paṭikkhipanti. **Natthi balaṃ, natthi vīriyaṃ, natthi purisathāmo, natthi purisaparakkamoti** sattānaṃ saṃkilesitūṃ vā visujjhītūṃ vā balaṃ vā vīriyaṃ vā purisena kātabbo nāma purisathāmo vā purisaparakkamo vā natthi.

Sabbe sattāti oṭṭhagonagadrabhādayo anavasese nidassenti. **Sabbe pāṇāti** ekindriyo pāṇo dvindriyo pāṇoti ādivasena vadanti. **Sabbe bhūtāti** aṇḍakosavatthikosesu bhūte sandhāya vadanti. **Sabbe jīvāti** sāliyavagodhumādayo sandhāya vadanti. Tesu hete viruhanabhāvena jīvasaññino. **Avasā abalā avīriyāti** tesam attano vaso vā balaṃ vā vīriyaṃ vā natthi. **Niyatisaṅgatibhāvaparīṇatāti** ettha **niyatīti** niyatatā. **Saṅgatīti** channaṃ abhijātīnaṃ tattha tattha gamaṇaṃ. **Bhāvoti** sabhāvoyeva. Evaṃ niyatīyā ca saṅgatīyā ca bhāvena ca parīṇatā nānappakāratam pattaṃ. Yena hi yathā bhavitabbaṃ, so tatheva bhavati. Yena no bhavitabbaṃ, so na bhavattīti dassenti. **Chasvevābhijātīsūti** chasu eva abhijātīsūti ṭhatvā sukhañca dukkhañca paṭisaṃvedenti, aññā sukhadukkhabhūmi natthīti dassenti.

Tattha cha abhijātīyo nāma kaṇḍābhijātī nīlābhijātī lohitābhijātī haliddābhijātī sukkābhijātī paramasukkābhijātīti. Tattha sākuṇiko sūkariko luddo macchaghātako coro coraghātako, ye vā panaññepi keci kurūrakammaṇā, ayaṃ kaṇḍābhijātī nāma. Bhikkhū nīlābhijātīti vadanti. Te kira catūsū paccayesu kaṇṭake pakkhipitvā khādanti. “Bhikkhū ca kaṇṭakavuttino”ti ayañhi nesam pāḷiyeva. Atha vā kaṇṭakavuttikā evaṃ nāma eke pabbajitāti vadanti. “Samaṇakaṇṭakavuttikā”tipi hi nesam pāḷi. Lohitābhijātī nāma nigaṇṭhā ekasātakāti vadanti. Ime kira purimehi dvīhi paṇḍaratarā. Gihī acelakasāvakā haliddābhijātīti vadanti. Iti attano paccayadāyake nigaṇṭhehipi jeṭṭhakatare karonti. Nando, vaccho, saṅkicco, ayaṃ sukkābhijātīti vadanti. Te kira purimehi catūhi paṇḍaratarā. Ājīvake pana paramasukkābhijātīti vadanti. Te kira sabbehi paṇḍaratarā.

Tattha sabbe sattā paṭhamaṃ sākuṇikādayova hontī, tato visujjhamānā sakyasamaṇā hontī, tato visujjhamānā nigaṇṭhā, tato ājīvakasāvakā, tato nandādayo, tato ājīvakāti ayametesam laddhi. Sukkapakkho vuttapaccanīkena veditabbo. Sesamidhāpi purimavāre vuttasadisameva.

Imāsu pana tīsu diṭṭhīsu natthikadiṭṭhi vipākaṃ paṭibāhati, akiriyadiṭṭhi kammaṃ paṭibāhati, ahētukadiṭṭhi ubhayampi paṭibāhati. Tattha kammaṃ paṭibāhantenāpi vipāko paṭibāhito hoti, vipākaṃ paṭibāhantenāpi kammaṃ paṭibāhitam. Iti sabbepe te atthato ubhayapaṭibāhakā natthikavādā ceva ahētukavādā akiriyavādā ca hontī. Ye pana tesam laddhiṃ gahetvā rattitṭhāne divāṭṭhāne nisinnā sajjhāyanti vīmaṃsanti, tesam – “natthi dīnaṃ natthi yitṭhaṃ, karoto na kariyati pāpaṃ, natthi hetu natthi paccayo”ti tasmīṃ ārammaṇe micchāsati santiṭṭhati, cittaṃ ekaggaṃ hoti, javanāni javanti, paṭhamajavane satekicchā hontī, tathā dutiyādīsū. Sattame buddhānampi atekicchā anivattino

arittḥakaṅṭakasadisā.

Tattha koci ekaṃ dassanaṃ okkamati, koci dve, koci tīṇipi, ekasmiṃ okkantepi dvīsu tīsu okkantesupi niyatamicchādittḥikova hoti, patto saggamaggāvaraṇaṅgeva mokkhamaggāvaraṇaṅca, abhabbo tassa attabhāvassa anantaraṃ saggampi gantaṃ, pageva mokkhaṃ. Vaṭṭakhāṇu nāmesa satto pathavīgopako. Kiṃ panesa ekasmiṃyeva attabhāve niyato hoti, udāhu aññasmimpīti? Ekasmiññeva niyato, āsevanavasena pana bhavantarepi taṃ taṃ dīṭṭhiṃ rocetiyeva. Evarūpassa hi yebhuyyena bhavato vuṭṭhānaṃ nāma natthi.

Tasmā akalyāṇajanaṃ, āsīvisamivoragaṃ;
Ārakā parivajjeyya, bhūtikāmo vicakkhaṇoti.

103. Natthi sabbaso āruppāti arūpabrahmaloko nāma sabbākārena natthi. **Manomayāti** jhānacittamayā. **Saññāmayāti** arūpajjhānasaññāya saññāmayā. **Rūpānaṃyeva nibbidāya virāgāya nirodhāya paṭipanno hotīti** ayaṃ lābhī vā hoti takkī vā. Lābhī nāma rūpāvacaṇarajjhānalābhī. Tassa rūpāvacaṇa kaṅkhā natthi, arūpāvacaṇaloke atthi. So – “ahaṃ āruppā atthīti vadantānampi natthīti vadantānampi suṇāmi, atthi natthīti pana na jānāmi. Catutthajjhānaṃ padaṭṭhānaṃ katvā arūpāvacaṇarajjhānaṃ nibbattessāmi. Sace āruppā atthi, tattha nibbattissāmi, sace natthi, rūpāvacaṇabrahmaloke nibbattissāmi. Evaṃ me apaṇṇako dhammo apaṇṇakova aviraddhova bhavissatī” ti tathā paṭipajjati. Takkī pana appaṭiladdhajjhāno, tassāpi rūpajjhāne kaṅkhā natthi, arūpaloke pana atthi. So – “ahaṃ āruppā atthīti vadantānampi natthīti vadantānampi suṇāmi, atthi natthīti pana na jānāmi. Kasiṇaparikammaṃ katvā catutthajjhānaṃ nibbattetvā taṃ padaṭṭhānaṃ katvā arūpāvacaṇarajjhānaṃ nibbattessāmi. Sace āruppā atthi, tattha nibbattissāmi. Sace natthi, rūpāvacaṇabrahmaloke nibbattissāmi. Evaṃ me apaṇṇako dhammo apaṇṇakova aviraddhova bhavissatī” ti tathā paṭipajjati.

104. Bhavanirodhoti nibbānaṃ. Sārāgāya santiketī rāgavasena vaṭṭe rajjanassa santike. **Samyogāyāti** taṇhāvasena samyojanatthāya. **Abhinandanāyāti** taṇhādīṭṭhivasena abhinandanāya. **Paṭipanno hotīti** ayampi lābhī vā hoti takkī vā. Lābhī nāma aṭṭhasamāpattilābhī. Tassa āruppe kaṅkhā natthi, nibbāne atthi. So – “ahaṃ nirodho atthītipi natthītipi suṇāmi, sayam na jānāmi. Samāpattiṃ pādakaṃ katvā vipassanaṃ vaḍḍhessāmi. Sace nirodho bhavissati, arahattaṃ patvā parinibbāyissāmi. No ce bhavissati, āruppe nibbattissāmī” ti evaṃ paṭipajjati. Takkī pana ekasamāpattiyāpi na lābhī, āruppe panassa kaṅkhā natthi, bhavanirodhe atthi. So – “ahaṃ nirodho atthītipi natthītipi suṇāmi, sayam na jānāmi, kasiṇaparikammaṃ katvā aṭṭhasamāpattiyō nibbattetvā samāpattipadaṭṭhānaṃ vipassanaṃ vaḍḍhessāmi. Sace nirodho bhavissati, arahattaṃ patvā parinibbāyissāmi. No ce bhavissati, āruppe nibbattissāmī” ti evaṃ paṭipajjati. Etthāha – “atthi dinnantiādīni tāva apaṇṇakāni bhavantu, natthi dinnantiādīni pana kathaṃ apaṇṇakānī” ti. Gahaṇavasena. Tāni hi apaṇṇakaṃ apaṇṇakanti evaṃ gahitattā apaṇṇakāni nāma jātāni.

105. Cattārometi ayaṃ pāṭiekkō anusandhi. Natthikavādo, ahetukavādo akiriyavādo, āruppā natthi nirodho natthīti evaṃvādino ca dveti ime pañca puggalā heṭṭhā tayo puggalāva honti. Atthikavādādayo pañca eko catutthapuggalova hoti. Etamatthaṃ dassetaṃ bhagavā imaṃ desanaṃ ārabhi. Tattha sabbam atthato uttānamevāti.

Papañcasūdaniyā majjhimanikāyaṭṭhakathāya

Apaṇṇakasuttavaṇṇanā niṭṭhitā.

Paṭhamavaggavaṇṇanā niṭṭhitā.

2. Bhikkhuvaggo

1. Ambalaṭṭhikarāhulovādasuttavaṇṇanā

107. Evaṃ me sutanti ambalaṭṭhikarāhulovādasuttaṃ. Tattha **ambalaṭṭhikāyaṃ viharatīti** veḷuvanavihārassa paccante padhānagharasaṅkhepe vivekakāmānaṃ vasanattāya kate ambalaṭṭhikāti evaṃnāmake pāsāde pavivekaṃ brūhayanto viharati. Kaṇṭako nāma jātakālato paṭṭhāya tikhiṇova hoti, evamevaṃ ayampi āyasmā sattavassikasāmaṇerakāleyeva pavivekaṃ brūhayamāno tattha vihāsi. **Paṭisallānā vuṭṭhitoti** phalasaṃpattito vuṭṭhāya. **Āsananti** pakatipaṇṇattamevettha āsanaṃ atthi, taṃ papphoṭevā ṭhapesi. **Udakādhāneti** udakabhājane. “Udakaṭṭhāne”tipi pāṭho.

Āyasmantaṃ rāhulaṃ āmantesīti ovādadānatthaṃ āmantesi. Bhagavatā hi rāhulattherassa sambahulā dhammadeśanā katā. Sāmaṇerapaṇhaṃ therasseva vuttaṃ. Tathā rāhulasamṃyuttaṃ mahārāhulovādasuttaṃ cūḷarāhulovādasuttamidaṃ ambalaṭṭhikarāhulovādasuttanti.

Ayañhi āyasmā sattavassikakāle bhagavantaṃ cīvarakaṇṇe gahetvā “dāyajjaṃ me samaṇa dehī”ti dāyajjaṃ yācamāno bhagavatā dhammasenāpatisāriputtattherassa niyyādetvā pabbājito. Atha bhagavā daharakumārā nāma yuttāyuttaṃ kathaṃ kathenti, ovādamassa demīti rāhulakumāraṃ āmantetvā “sāmaṇerena nāma, rāhula, tiracchānakathaṃ kathetuṃ na vaṭṭati, tvaṃ kathayamāno evarūpaṃ kathaṃ katheyyāsi”ti sabbabuddhehi avijahitaṃ dasapucchaṃ pañcapanṇāsavissajjanaṃ – “eko pañho eko uddeso ekaṃ veyyākaraṇaṃ dve pañhā...pe... dasa pañhā dasa uddesā dasa veyyākaraṇāti. Ekaṃ nāma kiṃ? Sabbe sattā āhāraṭṭhitikā...pe... dasa nāma kiṃ? Dasahaṅgehi samannāgato arahāti vuccatī”ti (khu. pā. 4.10) imaṃ sāmaṇerapaṇhaṃ kathesi. Puna cintesi “daharakumārā nāma piyamusāvādā honti, adiṭṭhameva diṭṭhaṃ amhehi, diṭṭhameva na diṭṭhaṃ amhehīti vadanti ovādamassa demī”ti akkhīhi oloketvāpi sukhasañjānanatthaṃ paṭhamameva catasso udakādhānūpamāyo, tato dve hatthiupamāyo ekaṃ ādāsūpamañca dassetvā imaṃ suttaṃ kathesi. Catūsu pana paccayesu taṇhāvivaṭṭanaṃ pañcasu kāmaguṇesu chandarāgappahānaṃ kalyāṇamittupanissayassa mahantabhāvañca dassetvā **rāhulasuttaṃ** (su. ni. rāhulasutta) kathesi. Āgatāgataṭṭhāne bhavesu chandarāgo na kattabboti dassetuṃ **rāhulasamṃyuttaṃ** (saṃ. ni. 2.188 ādayo) kathesi. “Ahaṃ sobhāmi, mama vaṇṇāyatanam pasanna”nti attabhāvaṃ nissāya gehassitachandarāgo na kattabboti **mahārāhulovādasuttaṃ** kathesi.

Tattha rāhulasuttaṃ imasmiṃ nāma kāle vuttanti na vattabbaṃ. Tañhi abhiṇhovādasena vuttaṃ. Rāhulasamṃyuttaṃ sattavassikakālato paṭṭhāya yāva avassikabhikkhukālā vuttaṃ. Mahārāhulovādasuttaṃ aṭṭhārasa vassasāmaṇerakāle vuttaṃ. Cūḷarāhulovādasuttaṃ avassikabhikkhukāle vuttaṃ. Kumārakapaṇhañca idañca ambalaṭṭhikarāhulovādasuttaṃ sattavassikasāmaṇerakāle vuttaṃ. Tesu rāhulasuttaṃ abhiṇhovādatthaṃ, rāhulasamṃyuttaṃ, therassa vipassanāgabbhagahaṇatthaṃ, mahārāhulovādaṃ gehassitachandarāgavinodanattaṃ, cūḷarāhulovādaṃ therassa pañcadasa-vimuttipariṇāyana-dhammapariṇāyana-kāle arahattagāhāpanatthaṃ vuttaṃ. Idañca pana sandhāya rāhulatthero bhikkhusaṅghamajjhe tathāgatassa guṇaṃ kathento idamāha –

“Kikīva bījaṃ rakkheyya, cāmarī vālamuttamaṃ;
Nīpako sīlasampanno, mamaṃ rakkhi tathāgato”ti. (apa. 1.2.83);

Sāmaṇerapaṇhaṃ ayuttavacanapahānatthaṃ, idaṃ ambalaṭṭhikarāhulovādasuttaṃ sampajānamusāvādassa akaraṇatthaṃ vuttaṃ.

Tattha **passasi noti** passasi nu. **Parittanti** thokaṃ. **Sāmaññanti** samaṇadhammo. **Nikkujjivāti** adhomukhaṃ katvā. **Ukkujjivāti** uttānaṃ katvā.

108. Seyyathāpi, rāhula, rañño nāgoti ayaṃ upamā sampajānamusāvāde saṃvararahitassa

opammadassanattam vuttā. Tattha **isānantoti** rathīsāsadisadanto. **Uruḥhavāti** abhivaḍḍhito ārohasampanno. **Abhijātoti** sujāto jātisampanno. **Saṅgāmāvacaroti** saṅgāmaṃ otiṇṇapubbo. **Kammaṃ karotīti** āgatāgate pavatṭento ghāteti. Puratthimakāyādīsu pana puratthimakāyena tāva paṭisenāya phalakakoṭṭhakamuṇḍapākārādayo pāteti, tathā pacchimakāyena. Sīsena kammaṃ nāma niyametvā etaṃ padesaṃ maddissāmīti nivattitvā oloketi, ettakena satampi sahasampi dvedhā bhijjati. Kaṇṇehi kammaṃ nāma āgatāgate sare kaṇṇehi paharivā pātanam. Dantehi kammaṃ nāma paṭihattiassahatthārohaassārohapadādīnaṃ vijjhanam. Naṅguṭṭhena kammaṃ nāma naṅguṭṭhe bandhāya dīghāsilaṭṭhiyā vā ayamusalena vā chedanabhedanam. **Rakkhateva soṇḍanti** soṇḍam pana mukhe pakkhipitvā rakkhati.

Tatthāti tasmim tassa hatthino karaṇe. **Apariccattanti** anissatṭham, paresaṃ jayaṃ amhākañca parājayaṃ passīti maññati. **Soṇḍāyapi kammaṃ karotīti** ayamuggaram vā khadiramusalam vā gahetvā samantā aṭṭhārasahatthāṭṭhānaṃ maddati. **Pariccattanti** vissatṭham, idāni hatthiyodhādīsu na kutoci bhāyati, amhākaṃ jayaṃ paresaṃ parājayaṃ passīti maññati. **Nāham tassa kiñci pāpanti** tassa dukkaṭādiāpattivītikame vā mātughātakādikammesu vā kiñci pāpaṃ akattabbaṃ nāma natthi. **Tasmā tiha teti** yasmā sampajānamusāvādino akattabbaṃ pāpaṃ nāma natthi, tasmā tayā hasāyapi davakamyatāyapi musā na bhaṇissāmīti sikkhitabbaṃ. **Paccavekkhaṇatthoti** olokanattho, yaṃ mukhe vajjaṃ hoti, tassa dassanattoti vuttam hoti. **Paccavekkhitvā paccavekkhitvāti** oloketvā oloketvā.

109. Sasakkaṃ na karaṇīyanti ekamseneva na kātabbaṃ. **Paṭisaṃhareyyāsīti** nivatteyyāsī mā kareyyāsī. **Anupadajjeyyāsīti** anupadeyyāsī upatthambheyyāsī punappunam kareyyāsī. **Ahorattānusikkhīti** rattiñca divaṇca sikkhamāno.

111. Aṭṭiyitabbanti aṭṭena pīḷitena bhavitabbaṃ. **Harāyitabbanti** lajjitabbaṃ. **Jigucchitabbanti** gūtham disvā viya jigucchā uppādetabbā. Manokammassa pana adesaṇāvatthukattā idha desetabbanti na vuttam. Kittake pana ṭhāne kāyakammavacīkammāni sodhetabbāni, kittake manokammanti. Kāyakammavacīkammāni tāva ekasmim purebhatteyeva sodhetabbāni. Bhattakiccaṃ katvā divāṭṭhāne nisinnena hi paccavekkhitabbaṃ “aruṇuggamanato paṭṭhāya yāva imasmim ṭhāne nisajjā atthi nu kho me imasmim antare paresaṃ appiyaṃ kāyakammaṃ vā vacīkammaṃ vā”ti. Sace atthīti jānāti, desanāyuttam desetabbam, āvikaraṇayuttam āvikātabbam. Sace natthi, teneva pītipāmojjena vihātabbam. Manokammaṃ pana etasmim piṇḍapātapariyesanaṭṭhāne sodhetabbam. Katham? “Atthi nu kho me aṭṭa piṇḍapātapariyesanaṭṭhāne rūpādīsu chando vā rāgo vā paṭigham vā”ti? Sace atthi, “puna na evam karissāmī”ti citteneva adhiṭṭhātabbam. Sace natthi, teneva pītipāmojjena vihātabbam.

112. Samaṇā vā brāhmaṇā vāti buddhā vā paccakabuddhā vā tathāgatasāvaka vā. **Tasmātihi** tasmā atītepi evam parisodhesum, anāgatepi parisodhessanti, etarahipi parisodhenti, tasmā tumhehipi tesam anusikkhantehi evam sikkhitabbanti attho. Sesam sabbattha uttānameva. Imaṃ pana desanam bhagavā yāva bhavaggā ussitassa ratanarāsino yojaniyamaṇikkhandhena kūṭam gaṇhanto viya neyyapuggalavasena pariniṭṭhāpesīti.

Papañcasūdaniyā majjhimanikāyaṭṭhakathāya

Ambalaṭṭhikarāhulovādasuttavaṇṇanā niṭṭhitā.

2. Mahārāhulovādasuttavaṇṇanā

113. Evaṃ me sutanti mahārāhulovādasuttam. Tattha **piṭṭhito piṭṭhito anubandhīti** dassanam avijahitvā gamanam abbochinam katvā pacchato pacchato iriyāpathānubandhanena anubandhi. Tadhā hi bhagavā pade padaṃ nikkhipanto vilāsitagamanena purato purato gacchati, rāhulatthero dasabalassa padānupadiko hutvā pacchato pacchato.

Tattha bhagavā supupphitasālavanamajjhagato subhūmiotaraṇatthāya nikkhantamattavaravāraṇo viya virocittha, rāhulabhaddo ca varavāraṇassa pacchato nikkhantagajapotako viya. Bhagavā sāyanhasamaye maṇiguhato nikkhamitvā gocaraṃ paṭipanno kesarasīho viya, rāhulabhaddo ca sihamigarājānaṃ anubandhanto nikkhantasīhapotako viya. Bhagavā maṇipabbatasassirikavanasanaḍato dāṭhabalo mahābyaggho viya, rāhulabhaddo ca byaggharājānaṃ anubandhabyagghapotako viya. Bhagavā simbalidāyato nikkhantasupaṇṇarājā viya, rāhulabhaddo ca supaṇṇarājassa pacchato nikkhantasupaṇṇapotako viya. Bhagavā cittakūṭapabbatato gaganatalaṃ pakkhandasuvaṇṇahaṃsarājā viya, rāhulabhaddo ca haṃsādhipatiṃ anupakkhandahaṃsapotako viya. Bhagavā mahāsaraṃ ajjhogāḷhā suvaṇṇamahānāvā viya, rāhulabhaddo ca suvaṇṇanāvamaṃ pacchā anubandhanāvāpotako viya. Bhagavā cakkaratanānubhāvena gaganatale sampayātacakkavattirājā viya, rāhulabhaddo ca rājānaṃ anusampayātapariṇāyakarataṇaṃ viya. Bhagavā vigatavalāhakaṃ nabhaṃ paṭipannatārarājā viya, rāhulabhaddo ca tārakādhipatino anumaggapaṭipannā parisuddhaosadhitārakā viya.

Bhagavāpi mahāsammatapeṇiyaṃ okkākarājavamse jāto, rāhulabhaddopi. Bhagavāpi saṅkhe pakkhittakhīrasadiso suparisuddhajātikhattiyakule jāto, rāhulabhaddopi. Bhagavāpi rajjaṃ pahāya pabbajito, rāhulabhaddopi. Bhagavatopi sarīraṃ dvattiṃsamahāpurisalakkhaṇapaṭimaṇḍitaṃ devanagaresu samussitaratanoraṇaṃ viya sabbapāliphullo pāricchattako viya ca atimanoharaṇaṃ, rāhulabhaddassāpi. Iti dvepi abhinīhārasampannā, dvepi rājapabbajitā, dvepi khattiyasukhumālā, dvepi suvaṇṇavaṇṇā, dvepi lakkhaṇasampannā ekamaggamaṃ paṭipannā paṭipāṭiyā gacchantānaṃ dvinnaṃ candamaṇḍalānaṃ dvinnaṃ sūriyamaṇḍalānaṃ dvinnaṃ sakkasuyāmasantusitasunimmitavasavattimahābrahmādīnaṃ siriyaṃ siriṃ abhibhavamānā viya virocimsu.

Tatrāyasmā rāhulo bhagavato piṭṭhito piṭṭhito gacchantova pādatalato yāva upari kesantā tathāgataṃ ālokesi. So bhagavato buddhavesavilāsaṃ disvā “sobhati bhagavā dvattiṃsamahāpurisalakkhaṇavicittasārīro byāmapabhāparikkhattatāya vippaniṇṇasuvaṇṇacuṇṇamajjhagato viya, vijjulatāparikkhitto kanakapabbato viya, yantasuttasamākaḍḍhitaratanavicittaṃ suvaṇṇaagghikaṃ viya, rattapaṃsukūlacīvarapaṭicchannopi rattakambalaparikkhittakanakapabbato viya, pavāḷalatāpaṭimaṇḍitaṃ suvaṇṇaagghikaṃ viya, cīnapiṭṭhacuṇṇapūjitaṃ suvaṇṇacetiyaṃ viya, lākhārasānūlitto kanakayūpo viya, rattavalāhakaratarato taṅkhaṇabbhuggatapūṇṇacando viya, aho samatiṃsapāramitānubhāvasajjitassa attabhāvassa sirīsampattī”ti cintesi. Tato attānampi oloketvā – “ahampi sobhāmi. Sace bhagavā catūsu mahādīpesu cakkavattirajjaṃ akarissā, mayhaṃ pariṇāyakaṭṭhānantaraṃ adassā. Evaṃ sante ativiya jambudīpatalaṃ asobhissā”ti attabhāvaṃ nissāya gehassitaṃ chandarāgaṃ uppādesi.

Bhagavāpi purato gacchantova cintesi – “paripuṇṇacchavimaṃsalohito dāni rāhulassa attabhāvo. Rajanīyesu rūpārammaṇādīsū hi cittassa pakkhandanakālo jāto, kiṃ bahulatāya nu kho rāhulo vītīnāmetī”ti. Atha sahāvajjaneneva pasannaudake macchaṃ viya, parisuddhe ādāsamaṇḍale mukhanimittaṃ viya ca tassa taṃ cittuppādaṃ addasa. Disvāva – “ayaṃ rāhulo mayhaṃ atrajo hutvā mama pacchato āgacchanto ‘ahaṃ sobhāmi, mayhaṃ vaṇṇāyatanāṃ pasanna’nti attabhāvaṃ nissāya gehassitachandarāgaṃ uppādeti, atitthe pakkhando uppathaṃ paṭipanno agocare carati, disāmūḷhaaddhiko viya agantabbamaṃ disaṃ gacchati. Ayaṃ kho panassa kilesa abbhantare vaḍḍhanto attatthampi yathābhūtaṃ passituṃ na dassati, paratthampi, ubhayatthampi. Tato nirayepi paṭisandhiṃ gaṇhāpessati, tiracchānayanoniyampi, pettivisayepi, asurakāyepi, sambādhepi mātukucchisminti anamatagge saṃsāraṇaṃ paripātessati. Ayañhi –

Anatthajanano lobho, lobho cittappakopano;
Bhayamantarato jātaṃ, taṃ jano nāvabujjhati.

Luddho atthaṃ na jānāti, luddho dhammaṃ na passati;
Andhatamaṃ tadā hoti, yaṃ lobho sahate naraṃ. (itivu. 88) –

Yathā kho pana anekaratanapūrā mahānāvā bhinnaphalakantarena udakaṃ ādiyamānā muhuttampi na ajjuhekkhitabbā hoti, vegenassā vivaraṃ pidahituṃ vaṭṭati, evamevaṃ ayampi na ajjuhekkhitabbo. Yāvassa ayaṃ kilesa abbhantare sīlathanādīni na vināseti, tāvadeva naṃ niggaṇhissāmi”ti ajjhāsayaṃakāsi. Evarūpesu pana ṭhānesu buddhānaṃ nāgavilokanaṃ nāma hoti. Tasmā yantena parivattitasuvaṇṇapaṭimā viya sakalakāyeneva parivattetvā ṭhito rāhulabhaddaṃ āmantesi. Taṃ sandhāya “atha kho bhagavā apaloketvā”tiādi vuttaṃ.

Tattha **yaṃkiñci rūpantiādīni sabbākārena visuddhimagge** khandhaniddese vitthāritāni. **Netam mamātiādīni mahāhatthipadopame vuttāni. Rūpameva nu kho bhagavāti** kasmā pucchati? Tassa kira – “sabbam rūpaṃ netam mama, nesohamasmi na meso attā”ti sutvā – “bhagavā sabbam rūpaṃ vipassanāpaññāya evaṃ daṭṭhabbanti vadati, vedanādīsu nu kho kathaṃ paṭipajjitabba”nti nayo udapādi. Tasmā tasmim naye ṭhito pucchati. Nayakusalo hesa āyasmā rāhulo, idaṃ na kattabbanti vutte idampi na kattabbaṃ idampi na kattabbamevāti nayasatenapi nayasahassenapi paṭivijjhati. Idaṃ kattabbanti vuttepi eseva nayo.

Sikkhākāmo hi ayaṃ āyasmā, pātova gandhakuṭipariveṇe patthamattaṃ vālikaṃ okirati – “ajja sammāsambuddhassa santikā mayhaṃ upajjhāyassa santikā ettakaṃ ovādaṃ ettakaṃ paribhāsaṃ labhāmi”ti. Sammāsambuddhopi naṃ etadagge ṭhapento – “etadaggaṃ, bhikkhave, mama sāvakaṇaṃ bhikkhūnaṃ sikkhākāmānaṃ yadidaṃ rāhulo”ti (a. ni. 1.209) sikkhāyameva aggaṃ katvā ṭhapesi. Sopi āyasmā bhikkhusaṅghamajje tameva sīhanādaṃ nadi –

“Sabbametam abhiññāya, dhammarājā pitā mama;
Sammukhā bhikkhusaṅghassa, etadagge ṭhapesi maṃ.

Sikkhākāmānaṃ aggo, dhammarājena thomito;
Saddhāpabbajitānaṃ, sahāyo pavaro mama.

Dhammarājā pitā mayhaṃ, dhammārakkho ca pettiyo;
Sāriputto upajjhāyo, sabbam me jinasāsana”nti.

Athassa bhagavā yasmā na kevalaṃ rūpameva, vedanādayopi evaṃ daṭṭhabbā, tasmā **rūpampi rāhulātiādīmāha. Ko najjāti** ko nu ajja. Therassa kira etadahosi “sammāsambuddho mayhaṃ attabhāvanissitaṃ chandarāgaṃ ñatvā ‘samaṇena nāma evarūpo vitakko na vitakkitabbo’ti neva pariyāyena kathaṃ kathesi, gaccha bhikkhu rāhulaṃ vadehi ‘mā puna evarūpaṃ vitakkaṃ vitakkesi’ti na dūtaṃ pesesi. Maṃ sammukkhe ṭhatvāyeva pana sabhaṇḍakaṃ coraṃ cūḷāya gaṇhanto viya sammukhā sugatovādaṃ adāsi. Sugatovādo ca nāma asaṅkheyyehipi kappehi dullabho. Evarūpassa buddhassa sammukhā ovādaṃ labhitvā ko nu viññū paṇḍitajātiko ajja gāmaṃ piṇḍāya pavisissati”ti. Athesa āyasmā āhāraḱcamaṃ pahāya yasmim nisinnatṭhāne ṭhitena ovādo laddho, tatova paṭinivattetvā aññatarasmim rukkhamaḷe nisīdi. Bhagavāpi taṃ āyasmantaṃ nivattamānaṃ disvā na evamāha – “mā nivatta tāva, rāhula, bhikkhācāraḱālo te”ti. Kasmā? Evaṃ kirassa ahosi – “ajja tāva kāyagatāsatiamatthoḱanaṃ bhuñjati”ti.

Addasā kho āyasmā sāriputtoti bhagavati gate pacchā gacchanto addasa. Etassa kirāyasmato ekakassa viharato aññaṃ vattaṃ, bhagavatā saddhim viharato aññaṃ. Yadā hi dve aggasāvaka ekākino vasanti, tadā pātova senāsaṇaṃ sammajjitvā sarīrapaṭijagganaṃ katvā samāpattiṃ appetvā sannisinnā attano cittaruciyaṃ bhikkhācāraṃ gacchanti. Bhagavatā saddhim viharantā pana therā evaṃ na karonti. Tadā hi bhagavā bhikkhusaṅghaparivāro paṭhamaṃ bhikkhācāraṃ gacchati. Tasmim gate thero attano senāsaṇā nikkhamitvā – “bahūnaṃ vasanaṭṭhāne nāma sabbeva pāsādikaṃ kātuṃ sakkonti vā, na vā sakkonti”ti tattha tattha gantvā asammaṭṭhaṃ ṭhānaṃ sammajjati. Sace kacavaro achaddito hoti, taṃ chaddeti. Pānīyattṭhapetabbaṭṭhānaṃhi pānīyakūṭe asati pānīyaghaṭaṃ ṭhapeti. Gilānaṇaṃ santikaṃ gantvā, “āvuso, tumhākaṃ kiṃ āharāmi, kiṃ vo icchitabba”nti? Pucchati. Avassikadahaṇaṇaṃ

santikam gantvā – “abhiramatha, āvuso, mā ukkaṅṭhittha, paṭipattisārakam buddhasāsana”nti ovadati. Evaṃ katvā sabbapacchā bhikkhācāram gacchati. Yathā hi cakkavatti kuhiñci gantukāmo senāya parivārito paṭhamam nikkhamati, pariṇāyakaratanam senāngāni saṃvidhāya pacchā nikkhamati, evaṃ saddhammacakkavatti bhagavā bhikkhusaṅghaparivāro paṭhamam nikkhamati, tassa bhagavato pariṇāyakaratanabhūto dhammasenāpati imaṃ kiccam katvā sabbapacchā nikkhamati. So evaṃ nikkhanto tasmim divase aññatarasmim rukkhamūle nisinnam rāhulabhaddam addasa. Tena vuttam “pacchā gacchanto addasā”ti.

Atha kasmā ānāpānassatiyam niyojesi? Nisajjānucchavikattā. Thero kira “etassa bhagavatā rūpakammaṭṭhānam kathita”nti anāvajjivāva yenākārena ayam acalo anobaddho hutvā nisinnō, idamassa etissā nisajjāya kammaṭṭhānam anucchavikanti cintevā evamāha. Tattha **ānāpānassatinti** assāsapassāse pariggahetvā tattha catukkapañcakajjhānam nibbattetvā vipassanam vaḍḍhetvā arahattam gaṇhāhīti dasseti.

Mahapphalā hotīti kīvamahapphalā hoti? Idha bhikkhu ānāpānassatiṃ anuyutto ekāsane nisinnova sabbāsave khepetvā arahattam pāpuṇāti, tathā asakkonto maraṇakāle samasīsī hoti, tathā asakkonto devaloke nibbattitvā dhammakathikadevaputtassa dhammam sutvā arahattam pāpuṇāti, tato viraddho anuppanne buddhuppāde paccekabodhim sacchikaroti, tam asacchikaronto buddhānam sammukhībhave bāhiyattherādayo viya khippābhiñño hoti, evaṃ mahapphalā. **Mahānisamsāti** tasveva vevacanam. Vuttampi cetam –

“Ānāpānassati yassa, paripuṇṇā subhāvitā;
Anupubbam paricitā, yathā buddhena desitā;
Somam lokam pabhāseti, abbhā muttova candimā”ti. (theragā. 548; paṭi. ma. 1.1.60) –

Imam mahapphalataṃ sampassamāno thero saddhivihārikam tattha niyojeti.

Iti bhagavā rūpakammaṭṭhānam, thero ānāpānassatinti ubhopi kammaṭṭhānam ācikkhitvā gatā, rāhulabhaddo vihāreyeva ohīno. Bhagavā tassa ohīnabhāvam jānantopi neva attanā khādanīyam bhojanīyam gahetvā agamāsī, na ānandattherassa hatthe pesesi, na pasenadimahārājaanāthapiṇḍikādīnam saññam adāsī. Saññamattakañhi labhitvā te kājabhattam abhicareyyum. Yathā ca bhagavā, evaṃ sārīputtattheropi na kiñci akāsī. Rāhulatthero nirāhāro chinnabhatto ahoṣi. Tassa panāyasmato – “bhagavā maṃ vihāre ohīnam jānantopi attanā laddhapiṇḍapātam nāpi sayam gahetvā āgato, na aññassa hatthe paṇiṇi, na manussānam saññam adāsī, upajjhāyopi me ohīnabhāvam jānanto tatheva na kiñci akāsī”ti cittampi na uppannam, kuto tappaccayā omānam vā atimānam vā janessati. Bhagavatā pana ācikkhitakammaṭṭhānameva purebhattampi pacchābhattampi – “itipi rūpam aniccam, itipi dukkham, itipi asubham, itipi anattā”ti aggim abhimatthento viya nirantram manasikatvā sāyanhasamaye cintesi – “aham upajjhāyena ānāpānassatiṃ bhāvehīti vutto, tassa vacanam na karissāmi. Ācariyupajjhāyānañhi vacanam akaronto dubbaco nāma hoti. ‘Dubbaco rāhulo, upajjhāyassapi vacanam na karoti’ti ca garahuppattito kakkhaḷatarā pīlā nāma natthi”ti bhāvanāvidhānam pucchitukāmo bhagavato santikam agamāsī. Tam dassetuṃ **atha kho āyasmā rāhulotiādi** vuttam.

114. Tattha **paṭisallānāti** ekībhāvato. **Yamkiñci rāhulāti** kasmā? Bhagavā ānāpānassatiṃ puṭṭho rūpakammaṭṭhānam kathetīti. Rūpe chandarāgappahānattham. Evaṃ kirassa ahoṣi – “rāhulassa attabhāvam nissāya chandarāgo uppanno, heṭṭhā cassa saṅkhepena rūpakammaṭṭhānam kathitam. Idānissāpi dvicattālīsāya ākārehi attabhāvam virājetvā visaṅkharitvā tamnissitam chandarāgam anuppattidhammataṃ apādessāmī”ti. Atha ākāsadhātuṃ kasmā vitthāresīti? Upādārūpadassanattham. Heṭṭhā hi cattāri mahābhūtāneva kathitāni, na upādārūpam. Tasmā iminā mukhena tam dassetuṃ ākāsadhātuṃ vitthāresi. Apica ajjhattikena ākāseṇa paricchinnarūpampi pākataṃ hoti.

Ākāseṇa paricchinnam, rūpam yāti vibhūtataṃ;

Tassevaṃ āvibhāvattamaṃ, taṃ pakāsesi nāyako.

Ettha pana purimāsu tāva catūsu dhātūsu yaṃ vattabbaṃ, taṃ mahāhatthipadopame vuttameva.

118. Ākāsadhātuyamaṃ **ākāsagatanti** ākāsabhāvaṃ gatamaṃ. **Upādinnanti** ādinnamaṃ gahitaṃ parāmaṭṭhamaṃ, sarīraṭṭhakanti attho. **Kaṇṇacchiddanti** maṃsalohitādīhi asamphuṭṭhakaṇṇavivaramaṃ. Nāsacchiddādīsupi eseva nayo. **Yena cāti** yena chiddena. **Ajjhoharatīti** anto paveseti, jivhābandhanato hi yāva udarapaṭalā manussānaṃ vidatthacaturaṅgulaṃ chiddaṭṭhānaṃ hoti. Taṃ sandhāyetaṃ vuttaṃ. **Yattha cāti** yasmiṃ okāse. **Santiṭṭhatīti** patiṭṭhāti. Manussānañhi mahantaṃ paṭaparissāvanamattañca udarapaṭalaṃ nāma hoti. Taṃ sandhāyetaṃ vuttaṃ. **Adhobhāgaṃ nikkhamatīti** yena hetṭhā nikkhamati. Dvattiṃsahattamattaṃ ekavīsatiyā ṭhānesu vaṅkaṃ antaṃ nāma hoti. Taṃ sandhāyetaṃ vuttaṃ. **Yaṃ vā panaññampīti** iminā sukhumasukhumaṃ cammamaṃsādiantaragatañceva lomakūpabhāvena ca ṭhitaṃ ākāsaṃ dasseti. Sesametthāpi pathavīdhātuādīsū vuttanayeneva veditabbaṃ.

119. Idānissa tādibhāvalakkhaṇamaṃ ācikkhanto **pathavīsamanti** ādimāha. Itṭhāniṭṭhesu hi arajjanto adussanto tādī nāma hoti. **Manāpāmanāpāti** ettha aṭṭha lobhasahagatacittasampayuttā manāpā nāma, dve domanassacittasampayuttā amanāpā nāma. **Cittaṃ na pariyādāya ṭhassantīti** ete phassā uppajjitvā tava cittaṃ antomuṭṭhigataṃ karonto viya pariyādāya gahetvā ṭhātuṃ na sakkhissanti “ahaṃ sobhāmi, mayhaṃ vaṇṇāyatanamaṃ pasanna”nti puna attabhāvaṃ nissāya chandarāgo nuppajjissati. **Gūthagatanti** ādīsū gūthameva gūthagataṃ. Evaṃ sabbattha.

Na **katthaci patiṭṭhitoti** pathavīpabbatarukkhādīsū ekasmimpi na patiṭṭhito, yadi hi pathaviyamaṃ patiṭṭhito bhaveyya, pathaviyā bhijjamānāya saheva bhijjeyya, pabbate patamāne saheva pateyya, rukkhe chijjamāne saheva chijjeyya.

120. **Mettaṃ rāhulāti** kasmā ārabhi? Tādibhāvassa kāraṇadassanatthamaṃ. Hetṭhā hi tādibhāvalakkhaṇamaṃ dassitaṃ, na ca sakkā ahaṃ tādī homīti akāraṇā bhavituṃ, napi “ahaṃ uccākulappasuto bahussuto lābhī, maṃ rājarājamahāmattādayo bhajanti, ahaṃ tādī homī”ti imehi kāraṇehi koci tādī nāma hoti, mettādibhāvanāya pana hotīti tādibhāvassa kāraṇadassanatthamaṃ imaṃ desanaṃ ārabhi.

Tattha **bhāvayatoti** upacāraṃ vā appanaṃ vā pāpentassa. **Yo byāpādoti** yo satte kopo, so pahīyissati. **Vihesāti** pāṇiādīhi sattānaṃ vihiṃsanaṃ. **Aratīti** pantasenānesu ceva adhikusaladhammesu ca ukkaṇṭhitatā. **Paṭighoti** yattha katthaci sattesu saṅkhāresu ca paṭihaññanakilesa. **Asubhanti** uddhumātakādīsū upacārappanaṃ. Uddhumātakādīsū asubhabhāvanā ca nāmesā vitthārato **visuddhimagge** kathitāva. **Rāgoti** pañcakāmaguṇikarāgo. **Aniccasaññanti** aniccānupassanāya sahaṅgatasaññaṃ. Vipassanā eva vā esā asaññāpi saññāsīsena saññāti vuttā. **Asmimānoti** rūpādīsū asmīti māno.

121. Idāni therena pucchitaṃ pañhaṃ vitthārento **ānāpānassatinti** ādimāha. Tattha idaṃ kammatṭhānañca kammatṭhānabhāvanā ca pāḷiattho ca saddhiṃ ānisaṃsakathāya sabbo sabbākārena **visuddhimagge** anussatiniddese vitthāritoyeva. Imaṃ desanaṃ bhagavā neyyapuggalavaseneva pariniṭṭhapesīti.

Papañcasūdaniyā majjhimanikāyatṭhakathāya

Māhārāhulovādasuttavaṇṇanā niṭṭhitā.

3. Cūḷamālukyasuttavaṇṇanā

122. Evaṃ me sutanti mālukyāsuttaṃ. Tatha **mālukyaputtassāti** evaṃnāmakassa therassa. **Ṭhapitāni paṭikkhittānīti** diṭṭhigatāni nāma na byākātabbānīti evaṃ ṭhapitāni ceva paṭikkhittāni ca. **Tathāgatoti** satto. **Taṃ me na ruccatīti** taṃ abyākaraṇaṃ mayhaṃ na ruccati. **Sikkhaṃ paccakkhāyāti** sikkhaṃ paṭikkhipivā.

125. Ko santo kaṃ paccācikkhasīti yācako vā hi yācitakaṃ paccācikkheyya, yācitako vā yācakaṃ. Tvaṃ neva yācako na yācitako, so dāni tvaṃ ko santo kaṃ paccācikkhasīti attho.

126. Viddho assāti parasenāya ṭhitena viddho bhaveyya. **Gāḷhapalepanenāti** bahalalepanena. **Bhisakkanti** vejjam. **Sallakattanti** sallakantaṃ sallakantiyasuttavācakaṃ. **Akkassāti** akkavāke gahetvā jiyam karonti. Tena vuttaṃ “akkassā”ti. **Sanhassāti** veṇuvilīvassa. Maruvākhīrapaṇṇānampi vākehiyeva karonti. Tena vuttaṃ **yadi vā maruvāya yadi vā khīrapaṇṇinoti**. **Gacchanti** pabbatagacchanadīgacchādīsu jātaṃ. **Ropimanti** ropetvā vaḍḍhitaṃ saravanato saram gahetvā kataṃ. **Sithilahanunoti** evaṃnāmakassa pakkhino. **Bheravassāti** kāḷasīhassa. **Semhārassāti** makkaṭassa. **Evaṃ noti** etāya diṭṭhiyā sati na hotīti attho.

127. Attheva jātīti etāya diṭṭhiyā sati brahmacariyavāsova natthi, jāti pana atthiyeva. Tathā jarāmarāṇādīnīti dasseti. **Yesāhanti** yesam aham. **Nighātanti** upaghātaṃ vināsam. Mama sāvakā hi etesu nibbinā idheva nibbānaṃ pāpuṇantīti adhippāyo.

128. Tasmātihāti yasmā abyākatametam, catusaccameva mayā byākataṃ, tasmāti attho. **Na hetam mālukyaputta atthasamhitanti** etaṃ diṭṭhigataṃ vā etaṃ byākaraṇaṃ vā kāraṇanissitaṃ na hoti. **Na ādibrahmacariyakanti** brahmacariyassa ādimattampi pubbhāgasīlamattampi na hoti. **Na nibbidāyāti**ādīsu vaṭṭe nibbindanattāya vā virajjhanattāya vā vaṭṭanirodhāya vā rāgādivūpasamanattāya vā abhiññeeye dhamme abhijānanattāya vā catumaggasaṅkhātasambodhattāya vā asaṅkhatanibbānasacchikiriyyattāya vā na hoti. **Etaṃ hīti** etaṃ catusaccabyākaraṇaṃ. **Ādibrahmacariyakanti** brahmacariyassa ādibhūtaṃ pubbapadaṭṭhānaṃ. Sesam vuttapaṭivipakkhanayena veditabbaṃ. Imampi desanaṃ bhagavā neyyapuggalavasena niṭṭhapesīti.

Papañcasūdaniyā majjhimanikāyaṭṭhakathāya

Cūḷamālukyāsuttavaṇṇanā niṭṭhitā.

4. Mahāmālukyāsuttavaṇṇanā

129. Evaṃ me sutanti mahāmālukyāsuttaṃ. Tatha **orambhāgiyānīti** heṭṭhā koṭṭhāsikāni kāmabhava nibbattisaṃvattanikāni. **Samyojanānīti** bandhanāni. **Kassa kho nāmāti** kassa devassa vā manussassa vā desitāni dhāresi, kiṃ tvameveko assosi, na añño kocīti? **Anusetīti** appahīnatāya anuseti. Anusayamāno samyojanaṃ nāma hoti.

Ettha ca bhagavatā samyojanaṃ pucchitaṃ, therenapi samyojanameva byākataṃ. Evaṃ santepi tassa vāde bhagavatā doso āropito. So kasmāti ce? Therassa tathā laddhikattā. Ayañhi tassa laddhi “samudācārakkhaṇeyeva kilesehi samyutto nāma hoti, itarasmim khāṇe asamyutto”ti. Tenassa bhagavatā doso āropito. Athāyasmā ānando cintesi – “bhagavatā bhikkhusaṅghassa dhammaṃ desessāmīti attano dhammatāyeva ayaṃ dhammadesanā āraddhā, sā iminā apaṇḍitena bhikkhunā viśamvādītā. Handāhaṃ bhagavantaṃ yācitvā bhikkhūnaṃ dhammaṃ desessāmī”ti. So evamakāsi. Taṃ dassetuṃ “evaṃ vutte āyasmā ānando”tiādi vuttaṃ.

Tatha **sakkāyadiṭṭhipariyuṭṭhitenāti** sakkāyadiṭṭhiyā gahitena abhibhūtena. **Sakkāyadiṭṭhiparetenāti** sakkāyadiṭṭhiyā anugatena. **Nissaraṇanti** diṭṭhinissaraṇaṃ nāma nibbānaṃ,

taṃ yathābhūtaṃ nappajānāti. **Appaṭiviniṭāti** avinoditā añṭhaṭā. **Orambhāgiyaṃ saṃyojananti** heṭṭhābhāgiyasamyojanaṃ nāma hoti. Sesapadesupi eseva nayo. Sukkapakkho uttānatthoyeva. “Sānusayā pahīyati”ti vacanato panettha ekacce “aññaṃ saṃyojanaṃ añña anusayo”ti vadanti. “Yathā hi sabyañjanaṃ bhatta”nti vutte bhattato aññaṃ byañjanaṃ hoti, evaṃ “sānusayā”ti vacanato pariyuṭṭhānasakkāyaditṭhito aññaena anusayena bhavitabbanti tesam laddhi. Te “sasīsam pārupitvā”tiādīhi paṭikkhipitabbā. Na hi sīsato añña puriso atthi. Athāpi siyā – “yadi tadeva saṃyojanaṃ so anusayo, evaṃ sante bhagavatā therassa taruṇūpamo upārambho duāropito hoti”ti. Na duāropito, kasmā? Evaṃladdhikattāti vitthāritametaṃ. Tasmā soyeva kilesa bandhanaṭṭhena saṃyojanaṃ, appahīnaṭṭhena anusayoti imamatthaṃ sandhāya bhagavatā “sānusayā pahīyati”ti evaṃ vuttanti veditabbam.

132. Tacam chetvātiādīsu idam opammasaṃsandanaṃ – tacacchedo viya hi samāpatti daṭṭhabbā, pheggucchedo viya vipassanā, sāraccchedo viya maggo. Paṭipadā pana lokiyalokuttaramissakāva vaṭṭati. **Evamete daṭṭhabbāti** evarūpā puggalā evaṃ daṭṭhabbā.

133. Upadhivivekāti upadhivivekena. Iminā pañcakāmaguṇaviveko kathito. **Akusalānaṃ dhammānaṃ pahānāti** iminā nīvaraṇappahānaṃ kathitaṃ. **Kāyaduṭṭhullānaṃ paṭippassaddhiyāti** iminā kāyālasīyapaṭippassaddhi kathitā. **Viviceva kāmeḥīti** upadhivivekena kāmehi vinā hutvā. **Vivicca akusaleḥīti** akusalānaṃ dhammānaṃ pahānena kāyaduṭṭhullānaṃ paṭippassaddhiyā ca akusalehi vinā hutvā. **Yadeva tattha hotīti** yaṃ tattha antosamāpattikkhaṇeyeva samāpattisamutṭhitaṇca rūpādīdhammajātaṃ hoti. **Te dhammeti** te rūpagatantiādīnā nayena vutte rūpādayo dhamme. **Aniccatoti** na niccato. **Dukkhatoti** na sukhato. **Rogatotiādīsu** ābādhaṭṭhena rogato, antodosatṭhena **gaṇḍato**, anupavidhaṭṭhena dukkhajanaṭṭhena ca **sallato**, dukkhaṭṭhena **aghatō**, rogaṭṭhena **ābādhatō**, asakaṭṭhena **parato**, palujjanaṭṭhena **palokato**, nissattaṭṭhena **suññato**, na attatṭhena **anattato**. Tattha aniccato, palokatoti dvīhi padehi aniccalakkhaṇaṃ kathitaṃ, dukkhatotiādīhi chahi dukkhalakkhaṇaṃ, parato suññato anattatoti tīhi anattalakkhaṇaṃ.

So tehi dhammeḥīti so tehi evaṃ tilakkhaṇaṃ āropetvā diṭṭhehi antosamāpattiyam pañcakkhandhadhammehi. **Cittam paṭivāpetīti** cittam paṭisaṃharati moceti apaneti. **Upasaṃharatīti** vipassanācittam tāva savanavasena thutivasena pariyattivāsena paññattivāsena ca etaṃ santaṃ nibbānanti evaṃ asaṅkhatāya amatāya dhātuyā upasaṃharati. Maggacittam nibbānaṃ ārammaṇakaraṇavaseneva etaṃ santametaṃ paṇīnti na evaṃ vadati, iminā pana ākārena taṃ paṭivijjhanto tattha cittam upasaṃharatīti attho. **So tattha ṭhitoti** tāya tilakkhaṇārammaṇāya vipassanāya ṭhito. **Āsavānaṃ khayam pāpuṇātīti** anukkamena cattāro magge bhāvetvā pāpuṇāti. **Teneva dhammarāgenāti** samathavipassanāddhamme chandarāgena. Samathavipassanāsu hi sabbaso chandarāgaṃ pariyādātuṃ sakkonto arahattaṃ pāpuṇāti, asakkonto anāgāmī hoti.

Yadeva tattha hoti vedanāgatanti idha pana rūpaṃ na gahitaṃ. Kasmā? Samatikkantattā. Ayañhi heṭṭhā rūpāvacarajjhānaṃ samāpajjitvā rūpaṃ atikkamitvā arūpāvacarasamāpattim samāpannoti samathavasena pinena rūpaṃ atikkantaṃ, heṭṭhā rūpaṃ sammadeva sammasitvā taṃ atikkamma idāni arūpaṃ sammasatīti vipassanāvasena pinena rūpaṃ atikkantaṃ. Arūpe pana sabbasopi rūpaṃ natthīti taṃ sandhāyapi idha rūpaṃ na gahitaṃ.

Atha kiñcarahīti kiṃ pucchāmīti pucchati? Samathavasena gacchato cittekaggatā dhuraṃ hoti, so cetovimutto nāma. Vipassanāvasena gacchato paññā dhuraṃ hoti, so paññāvimutto nāmāti ettha therassa kañkhā natthi. Ayaṃ sabhāvadhammoyeva, samathavaseneva pana gacchantesu eko cetovimutto nāma hoti, eko paññāvimutto. Vipassanāvasena gacchantesupi eko paññāvimutto nāma hoti, eko cetovimuttoti ettha kiṃ karaṇanti pucchati.

Indriyavemattataṃ vadāmīti indriyanānattataṃ vadāmi. Idam vuttaṃ hoti, na tvam, ānanda, dasa pāramiyo pūretvā sabbaññutaṃ paṭivijjhi, tena te etaṃ apākaṭam. Aham pana paṭivijjhim, tena me etaṃ

pākaṭaṃ. Ettha hi indriyanānattatā kāraṇaṃ. Samathavaseneva hi gacchantesu ekassa bhikkhuno cित्तेkaggatā dhuraṃ hoti, so cetovimutto nāma hoti. Ekassa paññā dhuraṃ hoti, so paññāvimutto nāma hoti. Vipassanāvaseneva ca gacchantesu ekassa paññā dhuraṃ hoti, so paññāvimutto nāma hoti. Ekassa cित्तेkaggatā dhuraṃ hoti, so cetovimutto nāma hoti. Dve aggasāvaka samathavipassanādhurena arahattaṃ pattā. Tesu dhammasenāpati paññāvimutto jāto, mahāmoggallānatthero cetovimutto. Iti indriyavemattamettha kāraṇanti veditabbaṃ. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Mahāmālukyasuttavaṇṇanā niṭṭhitā.

5. Bhaddālisuttavaṇṇanā

134. Evaṃ me sutanti bhaddālisuttaṃ. Tattha ekāsanabhojananti ekasmiṃ purebhatte asanabhojanaṃ, bhuñjitabbhattanti attho. **Appābādhatanti**ādīni kakacopame vitthāritāni. **Na ussahāmīti** na sakkomi. **Siyā kukkuccaṃ siyā vippaṭisāroti** evaṃ bhuñjanto yāvajīvaṃ brahmacariyaṃ caritvaṃ sakkhissāmi nu kho, na nu khoti iti me vippaṭisārukukkuccaṃ bhavēyyāti attho. **Ekadesaṃ bhuñjivāti** porāṇakattherā kira patte bhattaṃ pakkhipitvā sappimhi dinne sappinā uṇhameva thokaṃ bhuñjitvā hatthe dhovitvā avasesaṃ bahi nīharitvā chāyūdakaphāsuke ṭhāne nisīditvā bhuñjanti. Etaṃ sandhāya satthā āha. Bhaddāli, pana cintesi – “sace sakiṃ pattaṃ pūretvā dinnam bhattaṃ bhuñjitvā puna pattaṃ dhovitvā odanassa pūretvā laddhaṃ bahi nīharitvā chāyūdakaphāsuke ṭhāne bhuñjeyya, iti evaṃ vaṭṭeyya, itarathā ko sakkoti”ti. Tasmā **evampi kho ahaṃ, bhante, na ussahāmīti** āha. Ayaṃ kira atīte anantarāya jātiyā kākayoniyaṃ nibbatti. Kākā ca nāma mahāchātakā honti. Tasmā chātakatthero nāma ahosi. Tassa pana viravantasseva bhagavā taṃ madditvā ajjhottharivā – “yo pana bhikkhu vikāle khādanīyaṃ vā bhojanīyaṃ vā khādeyya vā bhuñjeyya vā pācittiya”nti (pāci. 248) sikkhāpadaṃ paññapesi. Tena vuttaṃ **atha kho āyasmā, bhaddāli, ...pe... anussāhaṃ pavedesīti.**

Yathā tanti yathā aññopi sikkhāya na paripūrakārī ekavihārepi vasanto satthu sammukhībhāvaṃ na dadeyya, tatheva na adāsīti attho. Neva bhagavato upaṭṭhānaṃ agamāsi, na dhammadesanaṭṭhānaṃ na vitakkamālaṃ, na ekaṃ bhikkhācāramaggaṃ paṭipajji. Yasmiṃ kule bhagavā nisīdati, tassa dvārepi na aṭṭhāsi. Sacassa vanaṭṭhānaṃ bhagavā gacchati, so puretameva ṇatvā aññattha gacchati. Saddhāpabbajito kiresa kulaputto parisuddhasīlo. Tenassa na añño vitakko ahosi, – “mayā nāma udarakāraṇā bhagavato sikkhāpadapaññāpanaṃ paṭibāhitaṃ, ananucchavikaṃ me kata”nti ayameva vitakko ahosi. Tasmā ekavihāre vasantopi lajjāya satthu sammukhībhāvaṃ nādāsi.

135. Cīvarakammaṃ karontīti manussā bhagavato cīvarasāṭakaṃ adamsu, taṃ gahetvā cīvaraṃ karonti. **Etaṃ dosakanti** etaṃ okāsametaṃ aparādhaṃ, satthu sikkhāpadaṃ paññapentassa paṭibāhitakāraṇaṃ sādhuṃ manasi karohīti attho. **Dukkarataranti** vassañhi vasitvā disāpakkante bhikkhū kuhiṃ vasitthāti pucchanti, tehi jetavane vasimhāti vutte, “āvuso, bhagavā imasmiṃ antovasse kataraṃ jātaṃ kathesi, kataraṃ suttantaṃ, kataraṃ sikkhāpadaṃ paññapesi”ti pucchitāro honti. Tato “vikālabhojanasikkhāpadaṃ paññapesi, bhaddāli, nāma naṃ eko thero paṭibāhi”ti vakkhanti. Taṃ sutvā bhikkhū – “bhagavatopi nāma sikkhāpadaṃ paññapentassa paṭibāhitaṃ ayuttaṃ akāraṇa”nti vadanti. Evaṃ te ayaṃ doso mahājanantare pākaṭo hutvā duppaṭikārataṃ āpajjissatīti maññamānā evamāhaṃsu. Apica aññepi bhikkhū pavāretvā satthu santikaṃ āgamissanti. Atha tvaṃ “ethāvuso, mama sathāraṃ khamāpentassa sahāyā hothā”ti saṅghaṃ sannipātesasi. Tattha āgantukā pucchissanti, “āvuso, kiṃ imināpi bhikkhunā kata”nti. Tato etamatthaṃ sutvā “bhāriyaṃ kataṃ bhikkhunā, dasabalaṃ nāma paṭibāhissatīti ayuttameta”nti vakkhanti. Evampi te ayaṃ aparādho mahājanantare pākaṭo hutvā duppaṭikārataṃ āpajjissatīti maññamānāpi evamāhaṃsu. Atha vā bhagavā pavāretvā cārikaṃ pakkamissati, atha tvaṃ gatagataṭṭhāne bhagavato khamāpanatthāya saṅghaṃ sannipātesasi. Tatra disāvāsino bhikkhū pucchissanti, “āvuso, kiṃ iminā bhikkhunā kata”nti...pe... duppaṭikārataṃ

āpajjissatīti maññamānāpi evamāhamsu.

Etadavocāti appatirūpaṃ mayā kataṃ, bhagavā pana mahantepi aguṇe alaggitvā mayhaṃ accayaṃ paṭiggaṇhissatīti maññamāno etaṃ “accayo maṃ, bhante,” tiādivacanaṃ avoca. Tattha **accayoti** aparādho. **Maṃ accagamāti** maṃ atikkamma abhibhavivā pavatto. **Paṭiggaṇhātūti** khamatu. **Āyatim saṃvarāyāti** anāgate saṃvaraṇatthāya, puna evarūpassa aparādhassa dosassa khalitassa akaraṇatthāya. **Tagghāti** ekaṃsena. **Samayopi kho te, bhaddālīti**, bhaddālī, tayā paṭivijjhittabbayuttakaṃ ekaṃ kāraṇaṃ atthi, tampi te na paṭividdhaṃ na sallakkhitanti dasseti.

136. Ubhatobhāgavimuttotitiādīsū dhammānusārī, saddhānusārīti dve ekacittakkhaṇikā maggasaṃgipuggalā. Ete pana sattapi ariyapuggale bhagavatāpi evaṃ āṇāpetuṃ na yuttaṃ, bhagavatā āṇatte tesampi evaṃ kātuṃ na yuttaṃ. Aṭṭhānaparikappavasena pana ariyapuggalānaṃ suvacabhāvadassanathāṃ bhaddālītherassa ca dubbacabhāvadassanathāmetāṃ vuttaṃ.

Api nu tvam tasmim samaye ubhatobhāgavimuttoti desanaṃ kasmā ārabhi? Bhaddālissa niggaṇhatthāṃ. Ayañhettha adhippāyo – bhaddālī, ime satta ariyapuggalā loke dakkhiṇeyyā mama sāsane sāmīno, mayi sikkhāpadaṃ paññapente paṭibāhitabbayutte kāraṇe sati etesaṃ paṭibāhituṃ yuttaṃ. Tvam pana mama sāsanaṃ bāhirako, mayi sikkhāpadaṃ paññapente tuyhaṃ paṭibāhituṃ na yuttanti.

Ritto tucchoti anto ariyaguṇānaṃ abhāvena rittako tucchako, issaravacane kiñci na hoti. **Yathādhammaṃ paṭikarosi**ti yathā dhammo tthito, tatheva karosi, khamāpesīti vuttaṃ hoti. **Tam te mayam paṭiggaṇhāmāti** tam tava aparādhaṃ mayam khamāma. **Vuḍḍhi hesā, bhaddālī, ariyassa vinayeti** esā, bhaddālī, ariyassa vinaye buddhassa bhagavato sāsane vuḍḍhi nāma. Katamā? Accayaṃ accayato disvā yathādhammaṃ paṭikarivā āyatim saṃvarāpajjanā. Desanaṃ pana puggalādhiṭṭhānaṃ karonto “yo accayaṃ accayato disvā yathādhammaṃ paṭikaroti, āyatim saṃvaraṃ āpajjati” ti āha.

137. Sathāpi upavadatīti “asukavihāravāsī asukassa therassa saddhivihāriko asukassa antevāsiko itthannāmo nāma bhikkhu lokuttaradhammaṃ nibbattetuṃ araññaṃ pavittu”ti sutvā – “kiṃ tassa araññāvāsena, yo mayhaṃ pana sāsane sikkhāya aparipūrakārī”ti evaṃ upavadati, sesapadesupi eseva nayo, apicettha devatā na kevalaṃ upavadanti, bheravārammaṇaṃ dassetvā palāyanākāraṃpi karonti. **Attanāpi attānanti** silāṃ āvajjantassa saṃkiliṭṭhatṭhānaṃ pākaṭaṃ hoti, cittaṃ vidhāvati, na kammaṭṭhānaṃ allīyati. So “kiṃ mādisassa araññāvāsena”ti vippaṭisārī utṭhāya pakkamati. **Attāpi attānaṃ upavaditoti** attānāpi attā upavadito, ayameva vā pāṭho. Sukkapakkho vuttapaccanīkanayena veditabbo. **So vīciveva kāmehitī**tiādī evaṃ sacchikarotīti dassanathāṃ vuttaṃ.

140. Pasayha pasayha kāraṇaṃ karontīti appamattakepi dose niggaṇhetvā punappunaṃ kārenti. **No tathāti** mahantepi aparādhe yathā itaraṃ, evaṃ pasayha na kārenti. So kira, “āvuso, bhaddālī, mā cintayittha, evarūpaṃ nāma hoti, ehi sathāraṃ khamāpehī”ti bhikkhusaṅghatopi, kañci bhikkhuṃ pesetvā attano santikaṃ pakkosāpetvā, “bhaddālī, mā cintayittha, evarūpaṃ nāma hoti”ti evaṃ sathasantikāpi anuggahaṃ paccāsīsati. Tato “bhikkhusaṅghenāpi na samassāsito, sathārāpī”ti cintetvā evamāha.

Atha bhagavā bhikkhusaṅghopi sathāpi ovaditabbayuttameva ovadati, na itaranti dassetuṃ **idha, bhaddālī, ekaccoti**tiādīmāha. Tattha **aññenāññanti**tiādīni anumānasutte vitthāritāni. **Na sammā vattatīti** sammā vattampi na vattati. **Na lomam pātetīti** anulomavatte na vattati, vilomameva gaṇhāti. **Na nitthāraṃ vattatīti** nitthāraṇakavattamhi na vattati, āpattivuṭṭhānatthāṃ turitaturito chandajāto na hoti. **Tatrāti** tasmim tassa dubbacakarāṇe. **Abhiñhāpattikoti** nirantarāpattiko. **Āpattibahuloti** sāpattikakālovassa bahu, suddho nirāpattikakālo appoti attho. **Na khippameva vūpasammatīti** khippaṃ na vūpasammati, dīghasuttaṃ hoti. Vinayadharā pādadhovanakāle āgataṃ “gacchāvuso, vattavelā”ti vadanti. Puna kālaṃ maññitvā āgataṃ “gacchāvuso, tuyhaṃ vihāavelā, gacchāvuso, sāmaṇerādīnaṃ

uddesadānavelā, amhākaṃ nhānavelā, therūpaṭṭhānavelā, mukhadhovanavelā”tiādīni vatvā divasabhāgepi rattibhāgepi āgataṃ uyyojentiyeva. “Kāya velāya, bhante, okāso bhavissatī”ti vuttepi “gacchāvuso, tvaṃ imameva ṭhānaṃ jānāsi, asuko nāma vinayadharatthero sinehapānaṃ pivati, asuko virecanaṃ kāreti, kasmā turitosī”tiādīni vatvā dīghasuttameva karonti.

141. Khippameva vūpasammatīti lahuṃ vūpasammati, na dīghasuttaṃ hoti. Ussukkāpannā bhikkhū – “āvuso, ayaṃ subbaco bhikkhu, janapadavāsino nāma gāmantasenāsane vasanaṭṭhānanisajjanādīni na phāsukāni honti, bhikkhācāropi dukkho hoti, sīghamassa adhikaraṇaṃ vūpasamemā”ti sannipattitvā āpattito vuṭṭhāpetvā suddhante patiṭṭhāpentī.

142. Adhiccāpattikoti kadāci kadāci āpattiṃ āpajjati. So kiñcāpi lajjī hoti pakatatto, dubbacattā panassa bhikkhū tatheva paṭipajjanti.

144. Saddhāmattakena vahati pemamattakenāti ācariyupajjhāyesu appamattikāya gehassitasaddhāya appamattakena gehassitapemena yāpeti. Paṭisandhiggahaṇasadisā hi ayaṃ pabbajjā nāma, navapabbajito pabbajjāya guṇaṃ ajānanto ācariyupajjhāyesu pemamattena yāpeti, tasmā evarūpā saṅgaṇhitabbā. Appamattakampi hi saṅghaṃ labhitvā pabbajjāya ṭhitā abhiññāpattā mahāsamaṇā bhavissanti. Ettakena kathāmaggena “ovaditabbayuttakaṃ ovadanti, na itara”nti imameva bhagavatā dassitaṃ.

145. Aññāya saṅghahimsūti arahatte patiṭṭhahimsu. **Sattesu hāyamānesūti** paṭipattiyā hāyamānāya sattā hāyanti nāma. **Saddhamme antaradhāyamāneti** paṭipattisaddhamme antaradhāyamāne. Paṭipattisaddhammopi hi paṭipattipūrakesu sattu asati antaradhāyati nāma. **Āsavaṭṭhānīyāti** āsavā tiṭṭhanti etesūti āsavaṭṭhānīyā. Yesu diṭṭhadhammikasamparāyikā parūpavādavipparisāravadhābandhanādayo ceva apāyadukkhavisesabhūtā ca āsavā tiṭṭhantiyeva. Yasmā nesam te kāraṇaṃ hontīti attho. Te āsavaṭṭhānīyā vītikkamadhammā yāva na saṅghe pātubhavanti, na tāva satthā sāvakaṇaṃ sikkhāpadaṃ paññāpetīti ayamettha yojanā.

Evam akālaṃ dassetvā puna kālaṃ dassetuṃ **yato ca kho, bhaddālīti**ādīmāha. Tattha **yatoti** yadā, yasmim kāleti vuttaṃ hoti. Sesam vuttānusāreneva veditabbaṃ. Ayaṃ vā ettha saṅkhepattho – yasmim kāle āsavaṭṭhānīyā dhammāti saṅkhaṃ gatā vītikkamadosā saṅghe pātubhavanti, tadā satthā sāvakaṇaṃ sikkhāpadaṃ paññāpeti. Kasmā? Tesamyeva āsavaṭṭhānīyadhammasaṅkhātānaṃ vītikkamadosānaṃ paṭighātāya.

Evam āsavaṭṭhānīyānaṃ dhammānaṃ anuppattiṃ sikkhāpadapaññattiyā akālaṃ, uppattiñca kālanti vatvā idāni tesam dhammānaṃ anuppattikālañca uppattikālañca dassetuṃ “**na tāva, bhaddāli, idhekacce**”tiādīmāha. Tattha **mahattanti** mahantabhāvaṃ. Saṅgho hi yāva na theranavamaṃjjhimānaṃ vasena mahattaṃ patto hoti, tāva senāsanāni pahonti, sāsane ekacce āsavaṭṭhānīyā dhammā na uppajjanti. Mahattaṃ patte pana te uppajjanti, atha satthā sikkhāpadaṃ paññāpeti. Tattha mahattaṃ patte saṅghe paññattasikkhāpadāni –

“Yo pana bhikkhu anupasampannena uttaridvirattatirattaṃ sahaseyyaṃ kappeyya pācittiyam (pāci. 51). Yā pana bhikkhunī anuvassaṃ vuṭṭhāpeyya pācittiyam (pāci. 1171). Yā pana bhikkhunī ekavassaṃ dve vuṭṭhāpeyya pācittiya”nti (pāci. 1175).

Iminā nayena veditabbāni.

Lābhagganti lābhassa aggaṃ. Saṅgho hi yāva na lābhaggapatto hoti, na tāva lābhaṃ paṭicca āsavaṭṭhānīyā dhammā uppajjanti. Patte pana uppajjanti, atha satthā sikkhāpadaṃ paññāpeti –

“Yo pana bhikkhu acelakassa vā paribbājakassa vā paribbājikāya vā sahatthā khādānīyaṃ vā

bhojanīyaṃ vā dadeyya pācittiya’nti (pāci. 270).

Idaṅhi lābhaggaṭṭe saṅghe sikkhāpadaṃ paññattaṃ.

Yasagganti yasassa aggaṃ. Saṅgho hi yāva na yasaggaṭṭo hoti, na tāva yaṣaṃ paṭicca āsavaṭṭhānīyā dhammā uppajjanti. Patte pana uppajjanti, atha satthā sikkhāpadaṃ paññāpeti “surāmerayapāne pācittiya’nti (pāci. 327). Idaṅhi yasaggaṭṭe saṅghe sikkhāpadaṃ paññattaṃ.

Bāhusaccanti bahussutabhāvaṃ. Saṅgho hi yāva na bāhusaccaggaṭṭo hoti, na tāva āsavaṭṭhānīyā dhammā uppajjanti. Bāhusaccaggaṭṭe pana yasmā ekaṃ nikāyaṃ dve nikāye pañcapi nikāye uggahetvā ayoniso ummujjamānā puggalā rasena yaṣaṃ saṃsandetvā uddhammaṃ ubbinayaṃ satthu sāsanaṃ dīpentī, atha satthā – “yo pana bhikkhu evaṃ vadeyya tathāhaṃ bhagavatā dhammaṃ desitaṃ ājānāmi (pāci. 418)...pe... samaṇuddesopi ce evaṃ vadeyyā’ntiādīnā (pāci. 429) nayena sikkhāpadaṃ paññāpeti.

Rattaññutaṃ pattoti ettha rattiyo jānantīti rattaññū. Attano pabbajitadivasato paṭṭhāya bahū rattiyo jānantī, cīrapabbajitāti vuttaṃ hoti. Rattaññūnaṃ bhāvaṃ rattaññutaṃ. Tatra rattaññutaṃ patte saṅghe upasenaṃ vaṅgantaputtaṃ ārabba sikkhāpadaṃ paññattanti veditabbaṃ. So hāyasmā ūnadasavasse bhikkhū upasampādeṇa disvā ekavasso saddhivihārikaṃ upasampādesi. Atha bhagavā sikkhāpadaṃ paññāpeti – “na, bhikkhave, ūnadasavassena upasampādetabbo, yo upasampādeyya āpatti dukkaṭṭassa’nti (mahāva. 75). Evaṃ paññatte sikkhāpade puna bhikkhū “dasavassamhā dasavassamhā’nti bālā abyattā upasampādeṇa. Atha bhagavā aparampi sikkhāpadaṃ paññāpeti – “na, bhikkhave, bālāna abyattena upasampādetabbo, yo upasampādeyya, āpatti dukkaṭṭassa. Anujānāmi, bhikkhave, byattena bhikkhunā paṭibālāna dasavassena vā atirekadasavassena vā upasampādetu’nti. Iti rattaññutaṃ pattakāle dve sikkhāpadāni paññattāni.

146. Ājānīyasusūpamaṃ dhammapariyāyaṃ desesinti taruṇājānīyaupamaṃ katvā dhammaṃ desayīṃ. **Tatrāti** tasmīṃ asaraṇe. **Na kho, bhaddāli, eseva hetūti** na esa sikkhāya aparipūrakārībhāvoyeva eko hetu.

147. Mukhādhāne kāraṇaṃ kāretīti khalīnabandhādīhi mukhaṭṭhapane sādhuṃ gīvaṃ paggaṇhāpetuṃ kāraṇaṃ kāreti. **Visūkāyitānīti**ādīhi visevanācāraṃ kathesi. Sabbāneva hetāni aññamaññavevacanāni. **Tasmīṃ ṭhāneti** tasmīṃ visevanācāre. **Parinibbāyatīti** nibbisevano hoti, taṃ visevanaṃ jahatīti attho. **Yugādhāneti** yugaṭṭhapane yugassa sādhuṃ gahaṇatthaṃ.

Anukkameti cattāropi pāde ekappahāreṇeva ukkhipane ca nikkhipane ca. Parasenāya hi āvāṭe ṭhatvā asīṃ gahetvā āgacchantassa assassa pāde chindanti. Tasmīṃ samaye esa ekappahāreṇeva cattāropi pāde ukkhipissatīti rajjubandhanavidhānena etaṃ kāraṇaṃ karonti. **Maṇḍaleti** yathā asse nisinnoyeva bhūmiyaṃ patitaṃ āvudhaṃ gahetuṃ sakkoti, evaṃ karaṇatthaṃ maṇḍale kāraṇaṃ kāreti. **Khurakāseti** aggaṅgakhurehi pathavīkamane. Rattiṃ okkantakaraṇasmiñhi yathā padasaddo na suyyati, tadatthaṃ ekasmiṃ ṭhāne saññaṃ datvā aggaṅgakhurehiyeva gamaṇaṃ sikkhāpentī. Taṃ sandhāyetaṃ vuttaṃ. **Javeti** sīghavāhane. “Dhāve’nti pāṭho. Attano parājaye sati palāyanatthaṃ, paraṃ palāyantaṃ anubandhitvā gahaṇatthaṃ etaṃ kāraṇaṃ kāreti. **Davatteti** davattāya, yuddhakālasmiñhi hatthīsu vā koñcanādaṃ karontesu assesu vā hasantesu rathesu vā nighosantesu yodhesu vā ukkuṭṭhiṃ karontesu tassa ravassa abhāyitvā parasenapavesanatthaṃ ayaṃ kāraṇā kariyati.

Rājagūṇeti rañña jānitabbagūṇe. Kūṭakaṇṇarañño kira guḷavaṇṇo nāma asso ahoṣi. Rājā pācīnadvāreṇa nikkhamitvā cetiyapabbataṃ gamissāmīti kalambanadīraṃ sampatto. Asso tīre ṭhatvā udakaṃ otarituṃ na icchati, rājā assācariyaṃ āmantetvā – “aho tayā asso sikkhāpito udakaṃ otarituṃ na icchati’nti āha. Ācariyo – “susikkhāpito deva asso, evamassa hi cittaṃ ‘sacāhaṃ udakaṃ otarissāmi, vālaṃ temissati, vāle tinte rañño aṅge udakaṃ pāteyyā’nti evaṃ tumhākaṃ sarīre udakapātanabhayena na otarati, vālaṃ gaṇhāpethā’nti āha. Rājā tathā kāresi. Asso vegena otaritvā paraṃ gato. Etadatthaṃ ayaṃ

kāraṇā karīyati. **Rājavamseti** assarājavamse. Vamso ceso assarājānaṃ, tathārūpena pahārena chinnabhinnasarīrāpi assārohaṃ parasenāya apātetvā bahi nīharantiyeva. Etadatthaṃ kāraṇaṃ kāretīti attho.

Uttame javeti jvasampattiyam, yathā uttamajavo hoti, evaṃ kāraṇaṃ kāretīti attho. **Uttame hayeti** uttamahayabhāve, yathā uttamahayo hoti, evaṃ kāraṇaṃ kāretīti attho. Tattha pakatiyā uttamahayova uttamahayakāraṇaṃ arahati, na añño. Uttamahayakāraṇāya eva ca hayo uttamajavam paṭipajjati, na aññoti.

Tatridaṃ vatthu – eko kira rājā ekaṃ sindhavapotakaṃ labhitvā sindhavabhāvaṃ ajānitvāva imaṃ sikkhāpehīti ācariyassa adāsi. Ācariyopi tassa sindhavabhāvaṃ ajānanto taṃ māsakhādakaghoṭakānaṃ kāraṇāsu upaneti. So attano ananucchavikattā kāraṇaṃ na paṭipajjati. So taṃ dametuṃ asakkonto “kūṭasso ayaṃ mahārājā” ti vissajjāpesi.

Athekadivasam eko assācariyapubbako daharo upajjhāyassa bhaṇḍakaṃ gahetvā gacchanto taṃ parikhāpiṭṭhe carantaṃ disvā – “anaggho, bhante, sindhavapotako” ti upajjhāyassa kathesi. Sace rājā jāneyya, maṅgalassaṃ naṃ kareyyāti. Thero āha – “micchādīṭṭhiko, tāta, rājā appeva nāma buddhasāsane pasīdeyya rañño kathehī” ti. So gantvā, – “mahārāja, anaggho sindhavapotako atthī” ti kathesi. Tayā diṭṭho, tātāti? Āma, mahārājāti. Kim laddhuṃ vaṭṭatīti? Tumhākaṃ bhuñjanakasuvanṇathāle tumhākaṃ bhuñjanakabhataṃ tumhākaṃ pivanakaraso tumhākaṃ gandhā tumhākaṃ mālāti. Rājā sabbaṃ dāpesi. Daharo gāhāpetvā agamāsi.

Asso gandham ghāyitvāva “mayham guṇajānanakaācariyo atthi maññe” ti sīsam ukkhipitvā olokeno aṭṭhāsi. Daharo gantvā “bhataṃ bhuñjā” ti accharam pahari. Asso āgantvā suvaṇṇathāle bhataṃ bhuñji, rasam pivi. Atha naṃ gandhehi vilimpitvā rājapīlandhanam pīlandhitvā “purato purato gacchā” ti accharam pahari. So daharassa purato purato gantvā maṅgalassaṭṭhāne aṭṭhāsi. Daharo – “ayaṃ te, mahārāja, anaggho sindhavapotako, imināva naṃ niyāmena katipāham paṭijaggāpehī” ti vatvā nikkhami.

Atha katipāhassa accayena āgantvā assassa ānubhāvaṃ passissasi, mahārājāti. Sādhu ācariya kuhiṃ ṭhatvā passāmāti? Uyyānaṃ gaccha, mahārājāti. Rājā assam gāhāpetvā agamāsi. Daharo accharam paharivā “etaṃ rukkham anupariyāhī” ti assassa saññaṃ adāsi. Asso pakkhanditvā rukkham anuparigantvā āgato. Rājā neva gacchantaṃ na āgacchantaṃ addasa. Diṭṭho te, mahārājāti? Na diṭṭho, tātāti. Valaṅjakadaṇḍam etaṃ rukkham nissāya ṭhapethāti vatvā accharam pahari “valaṅjakadaṇḍam gahetvā ehī” ti. Asso pakkhanditvā mukhena gahetvā āgato. Diṭṭham, mahārājāti. Diṭṭham, tātāti.

Puna accharam pahari “uyyānassa pākāramatthakena caritvā ehī” ti. Asso tathā akāsi. Diṭṭho, mahārājāti. Na diṭṭho, tātāti. Rattakambalam āharāpetvā assassa pāde bandhāpetvā tatheva saññaṃ adāsi. Asso ullaṅghitvā pākāramatthakena anupariyāyi. Balavatā purisena āviñchanaalātaggisikhā viya uyyānapākāramatthake paññāyittha. Asso gantvā samīpe ṭhito. Diṭṭham, mahārājāti. Diṭṭham, tātāti. Maṅgalapokkharanipākāramatthake anupariyāhīti saññaṃ adāsi.

Puna “pokkharaniṃ otarivā padumapattesu cārikaṃ carāhī” ti saññaṃ adāsi. Pokkharaniṃ otarivā sabbapadumapatte caritvā agamāsi, ekaṃ pattampi anakkantaṃ vā phālitaṃ vā chinditaṃ vā khaṇḍitaṃ vā nāhosi. Diṭṭham, mahārājāti. Diṭṭham, tātāti. Accharam paharivā taṃ hatthatalam upanāmesi. Dhātūpatthaddho laṅghitvā hatthatale aṭṭhāsi. Diṭṭham, mahārājāti? Diṭṭham, tātāti. Evaṃ uttamahayo eva uttamakāraṇāya uttamajavam paṭipajjati.

Uttame sākhalyeti muduvācāya. Muduvācāya hi, “tāta, tvaṃ mā cintayi, rañño maṅgalasso bhavissasi, rājabhojanādīni labhissasī” ti uttamahayakāraṇaṃ kāretabbo. Tena vuttaṃ “uttame sākhalye” ti. **Rājabhoggoti** rañño upabhogo. **Rañño aṅganteva saṅkham gacchatīti** yattha katthaci

gacchantena hattham viya pādam viya anohāyeva gantabbaṃ hoti. Tasmā aṅganti saṅkhaṃ gacchati, catūsu vā senaṅgesu ekaṃ aṅgaṃ hoti.

Asekhāya sammādiṭṭhiyāti arahattaphalasammādiṭṭhiyā. Sammāsaṅkappādayopi taṃsampayuttāva. **Sammāññaṃ** pubbe vuttasammādiṭṭhiyeva. Ṭhapetvā pana aṭṭha phalaṅgāni sesā dhammā **vimuttī**ti veditabbā. Sesam sabbattha uttānameva. Ayaṃ pana desanā ugghaṭitaññūpuggalassa vasena arahattanikūṭaṃ gahetvā niṭṭhāpitāti.

Papañcasūdaniyā majjhimanikāyaṭṭhakathāya

Bhaddālisuttavaṇṇanā niṭṭhitā.

6. Laṭukikopamasuttavaṇṇanā

148. Evaṃ me sutanti laṭukikopamasuttaṃ. Tattha **yena so vanasaṅḍoti** ayampi mahāudāyitthero bhagavatā saddhiṃyeva piṇḍāya pavisitvā saddhiṃ paṭikkami. Tasmā yena so bhagavatā upasaṅkamanto vanasaṅḍo tenupasaṅkamāti veditabbo. **Apahattāti** apahārako. **Upahattāti** upahārako. **Paṭisallānā vuṭṭhitoti** phalasaṃpattito vuṭṭhito.

149. Yaṃ bhagavāti yasmim samaye bhagavā. **Iṅhāti** aṇattiyam nipāto. **Aññathattanti** cittassa aññathattaṃ. Tañca kho na bhagavantaṃ paṭicca, evarūpaṃ pana paṇītabhojanaṃ alabhantā kathaṃ yāpessāmāti evaṃ paṇītabhojanaṃ paṭicca ahoṣīti veditabbaṃ. **Bhūtapubbanti** iminā rattibhojanassa paṇītabhāvaṃ dasseti. **Sūpeyyanti** sūpena upanetabbaṃ macchamaṃsakaḷirādi. **Samaggā bhuñjissāmāti** ekato bhuñjissāma. **Saṅkhatiyoti** abhisāṅkhārikakhādanīyāni. **Sabbā tā rattinti** sabbā tā saṅkhatiyō rattimyeva honti, divā pana appā parittā thokikā hontīti. Manussā hi divā yāgukañjīyādīhi yāpetvāpi rattim yathāsatti yathāpaṇītameva bhuñjanti.

Puna **bhūtapubbanti** iminā ratti vikālabhojane ādīnavaṃ dasseti. Tattha **andhakāratimisāyanti** bahalandhakāre. **Mānavehīti** corehi. **Katakammehīti** katacorakammehi. Corā kira katakammā yaṃ nesam devataṃ āyācitvā kammaṃ nipphannaṃ, tassa upahāratthāya manusse māretvā galalohitādīni gaṇhanti. Te aññesu manussesu māriyamānesu kolāhalā uppajjissanti, pabbajitaṃ pariyesanto nāma natthīti maññamānā bhikkhū gahetvā mārenti. Taṃ sandhāyetaṃ vuttaṃ. **Akatakammehīti** aṭavito gāmaṃ āgamanakāle kammanipphannaṭṭhaṃ puretaraṃ balikammaṃ kātukāmehi. **Asaddhammena nimantetīti** “ehi bhikkhu ajjekarattim idheva bhuñjitvā idha vasitvā sampattim anubhavitvā sve gamissasī”ti methunadhammena nimanteti.

Puna **bhūtapubbanti** iminā attanā diṭṭhakāraṇaṃ katheti. **Vijjantarikāyāti** vijjuvijjotanakkhaṇe. **Vissaramakāsīti** mahāsaddamakāsī. **Abhummeti** bhū’ti vaḍḍhi, abhū’ti avaḍḍhi, vināso mayhanti attho. **Pisāco vata manti** pisāco maṃ khādītuṃ āgato vata. **Ātumārī mātumārīti** ettha **ātūti** pitā, **mātūti** mātā. Idaṃ vuttaṃ hoti – yassa pitā vā mātā vā atthi, taṃ mātāpitaro amhākaṃ puttakoti yathā tathā vā uppādetvā yaṃkiñci khādanīyabhojanīyaṃ datvā ekasmim ṭhāne sayāpentī. So evaṃ rattim piṇḍāya na carati. Tuyhaṃ pana mātāpitaro matā maññe, tena evaṃ carasīti.

150. Evamevāti evameva kiñci ānisaṃsaṃ apassantā nikkāraṇeneva. Evamāhaṃsūti garahanto āha. Tattha **āhaṃsūti** vadanti. **Kim panimassāti** imassa appamattakassa hetu kiṃ vattabbaṃ nāma, nanu apassantena viya asuṇantena viya bhavitabbanti. **Oramattakassāti** parittamattakassa. **Adhisallikhatevāyanti** ayaṃ samaṇo navaṇītaṃ pisanto viya padumañālasuttaṃ kakacena okkantanto viya atisallekhati, ativāyāmaṃ karoti. **Sikkhākāmāti** sārīputtamoggallānādayo viya sikkhākāmā, tesu ca appaccayaṃ upaṭṭhapenti. Tesañhi evaṃ hoti “sace ete ‘appamattakametaṃ, haratha bhagavā’ti vadeyyuṃ, kiṃ satthā na hareyya. Evaṃ pana avatvā bhagavantaṃ parivāretvā nisinnā ‘evaṃ bhagavā, sādhu bhagavā, paññapetha bhagavā’ti atirekataraṃ ussāhaṃ paṭilabhanti”ti. Tasmā tesu appaccayaṃ

upaṭṭhapenti.

Tesanti tesam ekaccānaṃ moghapurisānaṃ. **Tanti** taṃ appamattakaṃ pahātabbaṃ. **Thūlo kaliṅgaroti** gale baddhaṃ mahākaṭṭhaṃ viya hoti. **Laṭukikā sakuṇikā**ti cātakasakuṇikā. Sā kira ravasataṃ ravitvā naccasataṃ naccitvā sakim gocarāṃ gaṇhāti. Ākāsato bhūmiyaṃ patiṭṭhitaṃ pana naṃ disvā vacchapālakādayo kīlanatthaṃ pūtilatāya bandhanti. Taṃ sandhāyetam vuttaṃ. **Āgametī**ti upeti. **Taṅhi tassāti** taṃ pūtilatābandhanaṃ tassā appasarīratāya ceva appathāmatāya ca balavabandhanaṃ nāma, mahantaṃ nāḷikerarajju viya ducchijjaṃ hoti. **Tesanti** tesam moghapurisānaṃ saddhāmandatāya ca paññāmandatāya ca balavaṃ bandhanaṃ nāma, dukkaṭavattumattakampi mahantaṃ pārājikavatthu viya duppajahaṃ hoti.

151. Sukkapakkhe **pahātabbassāti** kiṃ imassa appamattakassa pahātabbassa hetu bhagavatā vattabbaṃ atthi, yassa no bhagavā pahānamāha. Nanu evaṃ bhagavato adhippāyaṃ ñatvāpi pahātabbamevāti attho. **Appossukkāti** anussukkā. **Pannalomāti** patitalomā, na tassa pahātabbabhayena uddhaggalomā. **Paradattavuttāti** parehi dinnavuttino, parato laddhena yāpentāti attho. **Migabhūtena cetasā viharanti**ti apaccāsīsanapakke ṭhitā hutvā viharanti. Migo hi pahāraṃ labhitvā manussāvāsaṃ gantvā bhesajjaṃ vā vaṇatelaṃ vā labhissāmīti ajjhāsayaṃ akatvā pahāraṃ labhitvāva agāmakāṃ araṅṅaṃ pavisitvā pahaṭṭhānaṃ heṭṭhā katvā nipatitvā phāsuhūtakāle utṭhāya gacchati. Evaṃ migā apaccāsīsanapakke ṭhitā. Idaṃ sandhāya vuttaṃ “migabhūtena cetasā viharanti”ti. **Taṅhi tassāti** taṃ varattabandhanaṃ tassa hatthināgassa mahāsarīratāya ceva mahāthāmatāya ca dubbalabandhanaṃ nāma. Pūtilatā viya suchijjaṃ hoti. **Tesam tanti** tesam taṃ kulaputtānaṃ saddhāmahantatāya ca paññāmahantatāya ca mahantaṃ pārājikavattupi dukkaṭavattumattakaṃ viya suppajahaṃ hoti.

152. **Daliddoti** dāliddiyena samannāgato. **Assakoti** nissako. **Anāḷhiyoti** anaḍḍho. **Agārakanti** khuddakagehaṃ. **Ologgavilugganti** yassa gehayaṭṭhiyo piṭṭhivaṃsato muccitvā maṇḍale laggā, maṇḍalato muccitvā bhūmiyaṃ laggā. **Kākātidāyinti** yattha kiñcīdeva bhuñjissāmīti anto nisinnakāle visuṃ dvārakiccaṃ nāma natthi, tato tato kākā pavisitvā parivārenti. Sūrakākā hi palāyanakāle ca yathāsammukhaṭṭhānena nikkhamitvā palāyanti. **Naparamarūpanti** na puññavantānaṃ gehaṃ viya uttamarūpaṃ. **Khaṭopikāti** vilivamañcako. **Ologgaviluggāti** oṇatunṇatā. **Dhaññasamavāpakanti** dhaññañca samavāpakañca. Tattha **dhaññaṃ** nāma kudrūsako. **Samavāpakanti** lābubījakumbhaṇḍabījakādi bījajātaṃ. **Naparamarūpanti** yathā puññavantānaṃ gandhasālibījādi parisuddhaṃ bījaṃ, na evarūpaṃ. **Jāyikāti** kapaṇajāyā. **Naparamarūpāti** pacchisīsā lambatthanī mahodarā pisācā viya bībhacchā. **Sāmaññanti** samaṇabhāvo. **So vatassaṃ, yohanti** so vatāhaṃ puriso nāma assaṃ, yo kesamassaṃ ohāretvā pabbajeyyanti.

So na sakuṇeyyāti so evaṃ cintetvāpi gehaṃ gantvā – “pabbajjā nāma lābhagarukā dukkarā durāsadā, sattapi aṭṭhapi gāme piṇḍāya caritvā yathāhoteneva pattena āgantabbampi hoti, evaṃ yāpetuṃ asakkontassa me puna āgatassa vasanaṭṭhānaṃ icchitabbaṃ, tiṇavallidabbasambhārā nāma dussamodhāniyā, kinti karomī”ti vīmaṃsati. Athassa taṃ agāraṃ vejayantapāsādo viya upaṭṭhāti. Athassa khaṭopikaṃ oloketvā – “mayi gate imaṃ visaṅkharitvā uddhanālātaṃ karissanti, puna aṭṭanipādavilīvadīni laddhabbāni honti, kinti karissāmī”ti cinteti. Athassa sā sirisayanaṃ viya upaṭṭhāti. Tato dhaññakumbhiṃ oloketvā – “mayi gate ayaṃ gharaṇī imaṃ dhaññaṃ tena tena saddhiṃ bhuñjissati. Puna āgatena jīvitavutti nāma laddhabbā hoti, kinti karissāmī”ti cinteti. Athassa sā aḍḍhateḷasāni koṭṭhāgārasatāni viya upaṭṭhāti. Tato māṭugāmaṃ oloketvā – “mayi gate imaṃ hatthigopako vā assagopako vā yo koci palobhessati, puna āgatena bhattapācīkā nāma laddhabbā hoti, kinti karissāmī”ti cinteti. Athassa sā rūpinī devī viya upaṭṭhāti. Idaṃ sandhāya “so na sakuṇeyyā”tiādi vuttaṃ.

153. **Nikkhagaṇānanti** suvaṇṇanikkhasatānaṃ. **Cayoti** santānato katasannicayo. **Dhaññaḡaṇānanti** dhaññasakaṭasatānaṃ.

154. Cattārome, udāyi, puggalāti idha kiṃ dasseti? Heṭṭhā “te tañceva pajahanti, te tañceva nappajahanti”’ti pajahanakā ca appajahanakā ca rāsivasena dassitā, na pāṭiyekkaṃ vibhattā. Idāni yathā nāma dabbasambhāratthaṃ gato puriso paṭipāṭiyā rukkhe chinditvā puna nivattitvā vaṅkañca pahāya kamme upanetabbayuttakameva gaṇhāti, evameva appajahanake chaḍḍetvā abbohārike katvā pajahanakapuggalā cattāro hontīti dassetuṃ imaṃ desanaṃ ārabhi.

Upadhipahānāyāti khandhupadhikilesupadhiabhisāṅkhārūpadhikāmaguṇūpadhīti imesaṃ upadhīnaṃ pahānāya. **Upadhipaṭisaṃyuttāti** upadhianudhāvanakā. **Sarasaṅkappāti** ettha saranti dhāvantīti sarā. Saṅkappentīti saṅkappā. Padadvayenapī vitakkāyeva vuttā. **Samudācarantīti** abhibhavanti ajjhottharivā vattanti. **Samyuttoti** kilesehi saṃyutto. **Indriyavemattatāti** indriyanānattatā. **Kadāci karahacīti** bahukālaṃ vītivattetvā. **Satisammosāti** satisammosena. **Nipātoti** ayokaṭāhamhi patanaṃ. Ettāvata “nappajahati, pajahati, khippaṃ pajahati”’ti tayo rāsayo dassitā. Tesu cattāro janā nappajahanti nāma, cattāro pajahanti nāma, cattāro khippaṃ pajahanti nāma.

Tattha puthujjano sotāpanno sakadāgāmī anāgāmīti ime cattāro janā nappajahanti nāma. Puthujjanādayo tāva mā pajahantu, anāgāmī kathaṃ na pajahatīti? Sopi hi yāvadevassa bhavalobho atthi, tāva ahosukhaṃ ahosukhanti abhinandati. Tasmā nappajahati nāma. Eteyeva pana cattāro janā pajahanti nāma. Sotāpannādayo tāva pajahantu, puthujjano kathaṃ pajahatīti? Āraddhavipassako hi satisammosena sahasā kilese uppanne “mādisassa nāma bhikkhuno kilesa uppanno”’ti saṃvegaṃ katvā vīriyaṃ paggayha vipassanaṃ vaḍḍhetvā maggena kilese samuggahātetī. Iti so pajahati nāma. Teyeva cattāro khippaṃ pajahanti nāma. Tattha imasmiṃ sutte, mahāhatthipadopame (ma. ni. 1.288 ādayo), indriyabhāvanetī (ma. ni. 3.453 ādayo) imesu suttesu kiñcāpi tatiyavāro gahito, pañho pana dutiyavārenea kathitoti veditabbo.

Upadhi dukkhassa mūlanti ettha pañca khandhā upadhi nāma. Taṃ dukkhassa mūlanti iti viditvā kilesupadhinaṃ nirupadhi hoti, niggahaṇo nitaṇhoti attho. **Upadhisaṅkhaye vimuttoti** taṇhakkhaye nibbāne ārammaṇato vimutto.

155. Evaṃ cattāro puggale vitthāretvā idāni ye pajahanti, te “ime nāma ettake kilese pajahanti”. Ye nappajahanti, tepi “ime nāma ettake kilese nappajahanti”’ti dassetuṃ **pañca kho ime udāyi kāmaguṇāti**ādīmāha. Tattha **mīḷhasukhanti** asucisukhaṃ. **Anariyasukhanti** anariyehi sevitāsukhaṃ. **Bhāyitabbanti** etassa sukhassa paṭilābhatopi vipākatopi bhāyitabbaṃ. **Nekkhammasukhanti** kāmato nikkhantasukhaṃ. **Pavivekasukhanti** gaṇatopi kilesatopi pavivittāsukhaṃ. **Upasamasukhanti** rāgādivūpasamatthāya sukhāṃ. **Sambodhasukhanti** maggasaṅkhātassa sambodhassa nibbattanatthāya sukhāṃ. **Na bhāyitabbanti** etassa sukhassa paṭilābhatopi vipākatopi na bhāyitabbaṃ, bhāvetabbamevetāṃ.

156. Iñjitasmiṃ vadāmīti iñjanaṃ calanaṃ phandananti vadāmi. **Kiñca tattha iñjitasminti** kiñca tattha iñjitaṃ. **Idaṃ tattha iñjitasminti** ye ete aniruddhā vitakkavicārā, idaṃ tattha iñjitaṃ. Dutiyatatiyājjhānesupi eseva nayo. **Aniñjitasmiṃ vadāmīti** idaṃ catutthājjhānaṃ aniñjanaṃ acalanaṃ nipphanananti vadāmi.

Analanti vadāmīti akattabbaālayanti vadāmi, taṇhālayo ettha na uppādetabboti dasseti. Atha vā analaṃ apariyattaṃ, na ettāvata alametanti sanniṭṭhānaṃ kātabbanti vadāmi. **Nevasaṅgānāsāṅgāyanassāpīti** evarūpāyapī santāya samāpattiyā pahānameva vadāmi. **Aṇuṃ vā thūlaṃ vāti** khuddakaṃ vā mahantaṃ vā appasāvajjaṃ vā mahāsāvajjaṃ vā. Sesāṃ sabbattha uttānameva. Desanā pana neyyapuggalassa vasena arahattanikūṭeneva niṭṭhāpitāti.

Papañcasūdaniyā majjhimanikāyaṭṭhakathāya

Laṭukikopamasuttavaṇṇanā niṭṭhitā.

7. Cātumasuttavaṇṇanā

157. Evaṃ me sutanti cātumasuttaṃ. Tattha **cātumāyanti** evaṃnāmake gāme. **Pañcamattāni bhikkhusatānī** adhunā pabbajitānaṃ bhikkhūnaṃ pañca satāni. Therā kira cintesuṃ – “ime kulaputtā dasabalaṃ adisvāva pabbajitā, etesaṃ bhagavantaṃ dassessāma, bhagavato santike dhammaṃ sutvā attano attano yathāupanissayena patiṭṭhahissanti”’ti. Tasmā te bhikkhū gahetvā āgatā. **Paṭisammodamānāti** “kaccāvuso, khamaṇīya”’ntiādiṃ paṭisanthārakathaṃ kurumānā. **Senāsanāni paññāpayamānāti** attano attano ācariyupajjhāyānaṃ vasanaṭṭhānāni pucchitvā dvāravātapānāni vivaritvā mañcapīṭhakaṭasārakādīni nīharitvā papphoṭetvā yathāṭṭhāne saṅṭhāpayamānā. **Pattacīvarāni paṭisāmayamānāti**, bhante, idaṃ me pattaṃ ṭhapetha, idaṃ cīvaraṃ, idaṃ thālakam, idaṃ udakatumbaṃ, imaṃ kattarayaṭṭhinti evaṃ samaṇaparikkhāre saṅgopayamānā.

Uccāsaddā mahāsaddāti uddham uggaṭattā uccaṃ, patthaṭattā mahantaṃ avinibbhogasaddaṃ karontā. **Kevaṭṭā maññe macchavilopeti** kevaṭṭānaṃ macchapacchiṭhapitaṭṭhāne mahājano sannipatitvā – “idha aññaṃ ekaṃ macchaṃ dehi, ekaṃ macchaphālaṃ dehi, etassa te mahā dinno, mayhaṃ khuddako”’ti evaṃ uccāsaddaṃ mahāsaddaṃ karonti. Taṃ sandhāyetaṃ vuttaṃ. Macchagahaṇatthaṃ jāle pakkhittepi tasmīṃ ṭhāne kevaṭṭā ceva añña ca “paviṭṭho na paviṭṭho, gahito na gahito”’ti mahāsaddaṃ karonti. Tampi sandhāyetaṃ vuttaṃ. **Paṇāmemīti** nīharāmi. **Na vo mama santike vatthabbanti** tumhe mādisassa buddhassa vasanaṭṭhānaṃ āgantvā evaṃ mahāsaddaṃ karoṭha, attano dhammatāya vasantā kiṃ nāma sārappaṃ karissatha, tumhādisānaṃ mama santike vasanakiccaṃ natthīti dīpeti. Tesu ekabhikkhupi “bhagavā tumhe mahāsaddamattakena amhe paṇāmethā”’ti vā aññaṃ vā kiñci vattuṃ nāsakkhi, sabbe bhagavato vacanaṃ sampaṭicchanta “evaṃ, bhante,”’ti vatvā nikkhamiṃsu. Evaṃ pana tesam ahoṣi “mayaṃ satthāraṃ passissāma, dhammakathaṃ sossāma, satthu santike vasissāmāti āgatā. Evarūpassa pana garuno satthu santikaṃ āgantvā mahāsaddaṃ karimhā, amhākameva dosoyaṃ, paṇāmitamhā, na no laddhaṃ bhagavato santike vatthum, na suvaṇṇavaṇṇasarīraṃ oloketum, na madhurassarena dhammaṃ sotu”’nti. Te balavadomanassajātā hutvā pakkamiṃsu.

158. Tenupasaṅkamimṣūti te kira sakyā āgamanasamayepi te bhikkhū tattheva nisinnā passiṃsu. Atha nesam etadahosi – “kiṃ nu kho ete bhikkhū pavisitvāva paṭinivattā, jānissāma taṃ kāraṇa”’nti cintetvā yena te bhikkhū tenupasaṅkamimṣu. **Handāti** vavassaggaṭthe nipāto. **Kahaṃ pana tumheti** tumhe idāneva āgantvā kahaṃ gacchatha, kiṃ tumhākaṃ koci upaddavo, udāhu dasabalassāti? Tesam pana bhikkhūnaṃ, – “āvuso, mayaṃ bhagavantaṃ dassanāya āgatā, diṭṭho no bhagavā, idāni attano vasanaṭṭhānaṃ gacchāmā”’ti kiñcāpi evaṃ vacanaparihāro atthi, evarūpaṃ pana lesakappaṃ akatvā yathābhūtameva ārocetvā **bhagavatā kho, āvuso, bhikkhusaṅgho paṇāmitoti** āhaṃsu. Te pana rājāno sāsane dhuravahā, tasmā cintesuṃ – “dvīhi aggasāvakehi saddhiṃ pañcasu bhikkhusatesu gacchantesu bhagavato pādāmūlaṃ vigacchissati, imesaṃ nivattanākāraṃ karissāmā”’ti. Evaṃ cintetvā **tena hāyasmantoti** ādimāhaṃsu. Tesupi bhikkhūsu “mayaṃ mahāsaddamattakena paṇāmitā, na mayaṃ jīvitum asakkontā pabbajitā”’ti ekabhikkhupi paṭippharito nāma nāhoṣi, sabbe pana samakamyeva, “evamāvuso,”’ti sampaṭicchimṣu.

159. Abhinandatūti bhikkhusaṅghassa āgamaṃ icchanta abhinandatu. **Abhivadatūti** etu bhikkhusaṅghoti evaṃ cittaṃ uppādentu abhivadatu. **Anuggahitoti** āmisānuggahena ca dhammānuggahena ca anuggahito. **Aññathattanti** dasabalassa dassanaṃ na labhāmāti pasādaññathattaṃ bhaveyya. **Vipariṇāmoti** pasādaññathattena vibbhamantānaṃ vipariṇāmaññathattaṃ bhaveyya. **Bījānaṃ taruṇānanti** taruṇasassānaṃ. **Siyā aññathattanti** udakavāraṅkāle udakaṃ alabhantānaṃ milātabhāvena aññathattaṃ bhaveyya, sussitvā milātabhāvaṃ āpajjanena vipariṇāmo bhaveyya. Vacchakassa pana khīrapipāsāya sussanaṃ aññathattaṃ nāma, sussitvā kālakiriyaṃ vipariṇāmo nāma.

160. Pasādito bhagavāti thero kira tattha nisinnova dibbacakkhunā brahmānaṃ āgataṃ addasa, dibbāya sotadhātuyā ca āyācanasaddaṃ suṇi, cetopariyaññaṇena bhagavato pasannabhāvaṃ aññāsi.

Tasmā – “kañci bhikkhuṃ pesetvā pakkosiyamānānaṃ gamaṇaṃ nāma na phāsukaṃ, yāva satthā na peseti, tāvadeva gamissāmā”ti maññamāno evamāha. **Appossukkoti** aññesu kicesu anussukko hutvā. **Diṭṭhadhammasukhavihāraṇti** phalasaṃpattivihāraṃ anuyutto maññe bhagavā viharitukāmo, so idāni yathāruciyā viharissatīti evaṃ me ahoṣīti vadati. **Mayampi dānīti** mayaṃ paraṃ ovadamānā vihārato nikkacchitā, kiṃ amhākaṃ parovādena. Idāni mayampi diṭṭhadhammasukhavihārenea viharissāmāti dīpeti. Thero imasmiṃ ṭhāne viraddho attano bhārabhāvaṃ na aññāsi. Ayañhi bhikkhusaṅgho dvinnampi mahātherānaṃ bhāro, tena naṃ paṭisedhento bhagavā **āgamehīti**ādimāha. Mahāmogallānatthero pana attano bhārabhāvaṃ aññāsi. Tenassa bhagavā sādhuṅkaṃ adāsi.

161. Cattārimāni, bhikkhaviti kasmā ārabhi? Imasmiṃ sāsane cattāri bhayāni. Yo tāni abhīto hoti, so imasmiṃ sāsane paṭiṭṭhātuṃ sakkoti. Itaro pana na sakkotiṭi dassetuṃ imaṃ desanaṃ ārabhi. Tattha **udakorohanti** udakaṃ orohante puggale. **Kumbhīlabhayanti** suṃsumārabhayaṃ. **Susukābhayanti** caṇḍamacchabhayaṃ.

162. Kodhupāyāsassetam **adhivacananti** yathā hi bāhiraṃ udakaṃ otiṇṇo ūmīso osīditvā marati, evaṃ imasmiṃ sāsane kodhupāyāse osīditvā vibbhamati. Tasmā kodhupāyāso “ūmibhaya”nti vutto.

163. Odarikattassetam **adhivacananti** yathā hi bāhiraṃ udakaṃ otiṇṇo kumbhīlena khādito marati, evaṃ imasmiṃ sāsane odarikattena khādito vibbhamati. Tasmā odarikattaṃ “kumbhīlabhaya”nti vuttaṃ.

164. Arakkhiteneva kāyenāti sīsappacālakādikaraṇena arakkhitakāyo hutvā. **Arakkhitāya vācāyāti** duṭṭhullabhāsanādivasena arakkhitavāco hutvā. **Anupaṭṭhitāya satiyāti** kāyagatāsatiṃ anupaṭṭhāpetvā. **Asaṃvutehīti** apihitehi. **Pañcannetaṃ kāmagaṇānaṃ** **adhivacananti** yathā hi bāhiraṃ udakaṃ otiṇṇo āvaṭṭe nimujjitvā marati, evaṃ imasmiṃ sāsane pabbajito pañcakāmagaṇāvaṭṭe nimujjitvā vibbhamati. Tasmā pañca kāmagaṇā “āvaṭṭabhaya”nti vuttā.

165. Anuddhamsetīti kilameti milāpeti. **Rāgānuddhamsenāti** rāgānuddhamsitena. **Mātugāmassetaṃ** **adhivacananti** yathā hi bāhiraṃ udakaṃ otiṇṇo caṇḍamacchaṃ āgamma laddhappahāro marati, evaṃ imasmiṃ sāsane mātugāmaṃ āgamma uppannakāmarāgo vibbhamati. Tasmā mātugāmo “susukābhaya”nti vutto.

Imāni pana cattāri bhayāni bhāyitvā yathā udakaṃ anorohantassa udakaṃ nissāya ānisaṃso natthi, udakapipāsāya pipāsito ca hoti rajojallena kiliṭṭhasarīro ca, evamevaṃ imāni cattāri bhayāni bhāyitvā sāsane apabbajantassāpi imaṃ sāsanaṃ nissāya ānisaṃso natthi, taṇhāpipāsāya pipāsito ca hoti kilesarajena saṃkiliṭṭhacitto ca. Yathā pana imāni cattāri bhayāni abhāyitvā udakaṃ orohantassa vuttappakāro ānisaṃso hoti, evaṃ imāni abhāyitvā sāsane pabbajitassāpi vuttappakāro ānisaṃso hoti. Thero panāha – “cattāri bhayāni bhāyitvā udakaṃ anotaranto sotam chinditvā paratīraṃ pāpuṇituṃ na sakkoti, abhāyitvā otaranto sakkoti, evamevaṃ bhāyitvā sāsane apabbajantopi taṇhāsotaṃ chinditvā nibbānapāraṃ daṭṭhuṃ na sakkoti, abhāyitvā pabbajanto pana sakkoti”ti. Sesam sabbattha uttānameva. Ayaṃ pana desanā neyyapuggalassa vasena niṭṭhāpitāti.

Papañcasūdaniyā majjhimanikāyaṭṭhakathāya

Cātumasuttavaṇṇanā niṭṭhitā.

8. Naḷakapānasuttavaṇṇanā

166. Evaṃ me sutanti naḷakapānasuttaṃ. Tattha **naḷakapāneti** evaṃnāmake gāme. Pubbe kira amhākaṃ bodhisatto vānarayoniyaṃ nibbato, mahākāyo kapirājā anekavānarasahassaparivuto pabbatapāde vicarati. Paññavā kho pana hoti mahāpuñño. So parisam evaṃ ovadati – “imasmiṃ

pabbatapāde tātā, visaphalāni nāma honti, amanussapariggahitā pokkharāṇiyo nāma honti, tumhe pubbe khāditapubbāneva phalāni khādatha, pītapubbāneva pānīyāni ca pivatha, ettha vo maṃ paṭipucchitabbakiccaṃ natthi, akhāditapubbāni pana phalāni apītapubbāni ca pānīyāni maṃ apucchitvā mā khādittha mā pivitthā”ti.

Te ekadivasam caramānā aññaṃ pabbatapādam gantvā gocaram gahetvā pānīyam oloketā ekam amanussapariggahitam pokkharāṇim disvā sahasā apivivā samantā parivāretvā mahāsattassa āgamanam olokayamānā nisīdimṣu. Mahāsatto āgantvā “kiṃ tātā pānīyam na pivathā”ti āha. Tumhākaṃ āgamanam olokemāti. Sādhu tātāti samantā padam pariyesamāno otiṇṇapadamyeva addasa, na uttiṇṇapadam, disvā saparissayāti aññāsi. Tāvadeva ca tattha abhinibbattaamanusso udakam dvedhā katvā utthāsi setamukho nilakucchi rattahatthapādo mahādāṭhiko vaṅkadāṭho virūpo bībhaccho udakarakkhaso. So evamāha – “kasmā pānīyam na pivatha, madhuram udakam pivatha, kiṃ tumhe etassa vacanam suṇāthā”ti? Mahāsatto āha – “tvam idha adhivattho amanusso”ti? Āmāhanti. Tvam idha otiṇṇe labhasīti? Āma labhāmi, tumhe pana sabbe khādissāmīti. Na sakkhissasi, yakkhāti. Pānīyam pana pivissathāti? Āma pivissāmīti. Evam sante ekopi vo na mucchissatīti. Pānīyaṅca pivissāma, na ca te vasam gamissāmīti ekanālam āharāpetvā koṭiyam gahetvā dhami, sabbo ekacchiddo ahosi, tīre nisīditvāva pānīyam pivi, sesavānarānam pāṭiyekke naḷe āharāpetvā dhamitvā adāsi. Sabbe yakkhassa passantasseva pānīyam pivimṣu. Vuttampi cetam –

“Disvā padamanuttiṇṇam, disvāno’ taritam padam;
Naḷena vārim pissāma, neva maṃ tvam vadhissasi”ti. (jā. 1.1.20);

Tato paṭṭhāya yāva ajjadivasā tasmim thāne naḷe ekacchiddāva honti. Iminā hi saddhim imasmim kappe **cattāri kappatthiyapāṭihāriyāni** nāma – cande sasabimbam, vaṭṭakajātakamhi saccakiriyaṭṭhāne aggissa gamanupacchedo, ghaṭikārakumbhakārassa mātāpītūnam vasanaṭṭhāne devassa avassanam, tassā pokkharāṇiyā tīre naḷanam ekacchiddabhāvoti. Iti sā pokkharāṇi naḷena pānīyassa pītattā **naḷakapānāti** nāmam labhi. Aparabhāge tam pokkharāṇim nissāya gāmo paṭiṭṭhāsi, tassāpi **naḷakapānanteva** nāmam jātam. Tam sandhāya vuttam “naḷakapāne”ti. **Palāsavaneti** kiṃsukavane.

167. Taggha mayam, bhanteti ekamseneva mayam, bhante, abhiratā. Aññepi ye tumhākaṃ sāsane abhramanti, te amhehi sadisāva hutvā abhramantīti dīpenti.

Neva rājābhinītātiādīsu eko rañño aparādham katvā palāyati. Rājā kuhiṃ, bho, asukoti? Palāto devāti. Palātaṭṭhānepi me na mucchissati, sace pana pabbajeyya, mucceyyāti vadati. Tassa kocideva suhado gantvā tam pavattim ārocetvā tvam sace jīvitumicchasi, pabbajāhīti. So pabbajitvā jīvitam rakkhamāno carati. Ayam **rājābhinīto** nāma.

Eko pana corānam mūlam chindanto carati. Corā sutvā “purisānam atthikabhāvam na jānāti, jānāpessāma na”nti vadanti. So tam pavattim sutvā palāyati. Corā palātoti sutvā “palātaṭṭhānepi no na mucchissati, sace pana pabbajeyya, mucceyyā”ti vadanti. So tam pavattim sutvā pabbajati. Ayam **corābhinīto** nāma.

Eko pana bahum iṇam khādītvā tena iṇena aṭṭo pīlito tamhā gāmā palāyati. Iṇasāmikā sutvā “palātaṭṭhānepi no na mucchissati, sace pana pabbajeyya, mucceyyā”ti vadanti. So tam pavattim sutvā pabbajati. Ayam **iṇaṭṭo** nāma.

Rājābhayādīnam pana aññatarena bhayena bhīto aṭṭo āturo hutvā nikkhamma pabbajito **bhayaṭṭo** nāma. Dubbhikkhādīsu jīvitum asakkonto pabbajito **ājīvikāpakato** nāma, ājīvikāya pakato abhibhūtoti attho. Imesu pana ekopi imehi kāraṇehi pabbajito nāma natthi, tasmā “neva rājābhinīto”tiādīmāha.

Vivekanti vivicca vivitto hutvā. Idaṃ vuttam hoti – yam kāmehi ca akusaladhammehi ca vivittena

paṭhamadutiyajjhānasaṅkhātaṃ pītisukhaṃ adhigantabbaṃ, sace taṃ vivicca kāmehi vivicca akusalehi dhammehi pītisukhaṃ nādhigacchati, aññaṃ vā upari dvinnaṃ jhānaṃ catunnaṅca maggānaṃ vasena santataraṃ sukhaṃ nādhigacchati, tassa ime abhijjhādayo cittaṃ pariyādāya tiṭṭhanti. Tattha **aratīti** adhikusalesu dhammesu ukkaṅṭhitatā. **Tandīti** ālasiyabhāvo. Evaṃ yo pabbajitvā pabbajitakiccaṃ kātuṃ na sakkoti, tassa ime satta pāpadhammā uppajjitvā cittaṃ pariyādiyanti dassetvā idāni yassa te dhammā cittaṃ pariyādāya tiṭṭhanti, soyeva samaṇakiccampi kātuṃ na sakkotīti puna **vivekaṃ anuruddhā...pe... aññaṃ vā tato santataranti** āha.

Evaṃ kaṇhapakkaṃ dassetvā idāni teneva nayena sukkaṇṇakkaṃ dassetuṃ puna **vivekanti**ādīmāha. Tassattho vuttanayeneva vedītabbo.

168. Saṅkhāyāti jānitvā. **Ekanti** ekaccaṃ. **Paṭisevatīti** sevītabbayuttakaṃ sevati. Sesapadesupi eseva nayo. **Upapattīsu byākarotīti** sappāṭisandhike tāva byākarotu, appāṭisandhike kathaṃ byākarotīti. Appāṭisandhikassa puna bhava paṭisandhi natthīti vadanto upapattīsu byākaroti nāma.

Janakuhanatthanti janavimhāpanatthaṃ. **Janalapanatthanti** mahājanassa upalāpanatthaṃ. **Na itī mam jano jānātūti** evaṃ maṃ mahājano jānissati, evaṃ me mahājanassa antare kittisaddo uggacchissatīti imināpi kāraṇena na byākarotīti attho. **Uḷāravēdāti** mahantatuṭṭhino.

169. So kho panassa āyasmāti so parinibbuto āyasmā imassa ṭhitassa āyasmato. **Evaṃsiloti**ādīsu lokiyalokuttaramissakāva silādayo vedītabbo. **Evaṃdhammoti** ettha pana samādhīpakkaṃ dhammā dhammāti adhippetā. **Phāsuvihāro hotīti** tena bhikkhunā pūritapaṭipattīṃ pūrentassa arahattaphalaṃ sacchikatvā phalasaṃpattivihārena phāsuvihāro hoti, arahattaṃ pattumasakkontassa paṭipattīṃ pūrayamānassa caratopi phāsuvihāroyeva nāma hoti. Iminā nayena sabbavāresu attho vedītabboti.

Papañcasūdaniyā majjhimanikāyaṭṭhakathāya

Naḷakapānasuttavaṇṇanā niṭṭhitā.

9. Goliyānisuttavaṇṇanā

173. Evaṃ me sutanti goliyānisuttaṃ. Tattha **padasamācāroti** dubbalasamācāro oḷārikācāro, paccayesu sāpekkho mahārakkhitatthero viya. Taṃ kira upaṭṭhākakule nisinnaṃ upaṭṭhāko āha “asukattherassa me, bhante, cīvaram dinna”nti. Sādhū te kataṃ taṃyeva takketvā viharantassa cīvaram dentenāti. Tumhākampi, bhante, dassāmīti. Sādhū karissasi taṃyeva takkentassāti āha. Ayampi evarūpo oḷārikācāro ahoṣi. **Sappatissenāti** sajeṭṭhakena, na attānaṃ jeṭṭhakaṃ katvā viharitabbaṃ. **Serivihārenāti** sacchandavihārena niraṅkusavihārena.

Nānūpakhajjāti na anupakhajja na anupavisitvā. Tattha yo dvīsu mahātheresu ubhato nisennesu te anāpucchitvāva cīvarena vā jāṇunā vā ghaṭṭento nisīdati, ayaṃ anupakhajja nisīdati nāma. Evaṃ akatvā pana attano pattaāsanasantike ṭhatvā nisīdāvusoti vutte nisīditabbaṃ. Sace na vadanti, nisīdāmi, bhanteti āpucchitvā nisīditabbaṃ āpucchitakālato paṭṭhāya nisīdati vuttepi avuttepi nisīdituṃ vaṭṭatiyeva. **Na paṭibāhissāmīti** ettha yo attano pattāsaṇaṃ atikkamitvā navakānaṃ pāpuṇanaṭṭhāne nisīdati, ayaṃ nave bhikkhū āsanena paṭibāhati nāma. Tasmīṅhi tathā nisinne navā bhikkhū “amhākaṃ nisīdituṃ na detī”ti ujjhāyantā tiṭṭhanti vā āsaṇaṃ vā pariyesantā āhiṇḍanti. Tasmā attano pattāsaneyeva nisīditabbaṃ. Evaṃ na paṭibāhati nāma.

Ābhisamācārikampi dhammanti abhisamācārikaṃ vattapaṭipattimattampi. **Nātikālenāti** na atipāto pavisitabbaṃ, na atidivā paṭikkamitabbaṃ, bhikkhusaṅghena saddhiṃyeva pavisitabbaṅca nikkhamitabbaṅca. Atipāto pavisitvā atidivā nikkhamantassa hi cetiyaṅgaṇabodhiyaṅgaṇavattādīni pariḥāyanti. Kālasseva mukhaṃ dhovivā makkaṭakasuttāni chindantena ussāvabindū nipātentena

gāmaṃ pavisitvā yāguṃ pariyesitvā yāva bhikkhākālā antogāmeyeva nānappakāraṃ tiracchānakathaṃ kathentena nisīditvā bhattakiccaṃ katvā divā nikkhamma bhikkhūnaṃ pādadhovanavelāya vihāraṃ paccāgantabbaṃ hoti. **Na purebhattaṃ pacchābhattaṃ kulesu cārittaṃ āpajjitabbanti** ‘‘yo pana bhikkhu nimantito sabhatto samāno santaṃ bhikkhuṃ anāpucchā purebhattaṃ vā pacchābhattaṃ vā kulesu cārittaṃ āpajjeyya, aññatra samayā pācittiya’’nti (pāci. 299) imaṃ sikkhāpadaṃ rakkhantena tassa vibhaṅge vuttaṃ purebhattañca pacchābhattañca cārittaṃ na āpajjitabbaṃ. **Uddhato hoti capaloti** uddhaccapakatiko ceva hoti cīvaramaṇḍana-pattamaṇḍana-senāsanamaṇḍanā imassa vā pūtikāyassa kelāyanā maṇḍanāti evaṃ vuttena ca taruṇadārakāvācāpalyena samannāgato.

Paññavatā bhavitabbanti cīvarakammādīsu itikattabbesu upāyapaññāya samannāgatena bhavitabbaṃ. **Abhidhamme abhivinayeti** abhidhammapīṭake ceva vinayapīṭake ca pāḷivasena ceva aṭṭhakathāvasena ca yogo karaṇīyo. Sabbantimena hi paricchena abhidhamme dukatikamātikāhi saddhiṃ dhammahadayavibhaṅgaṃ vinā na vaṭṭati. Vinaye pana kammākammavinicchayena saddhiṃ suvinicchitāni dve pātimokkhāni vinā na vaṭṭati.

Āruppāti ettāvatā aṭṭhapi samāpattiyo vuttā honti. Tā pana sabbena sabbaṃ asakkontena sattasupi yogo karaṇīyo, chasupi...pe... pañcasupi. Sabbantimena paricchena ekaṃ kasiṇe parikkammaṃkaṃmaṭṭhānaṃ paguṇaṃ katvā ādāya vicaritabbaṃ, ettakaṃ vinā na vaṭṭati. **Uttarimanussadhammeti** iminā sabbepi lokuttaradhamme dasseti. Tasmā arahantena hutvā vihātabbaṃ, arahattaṃ anabhisambhuṇantena anāgāmiphale sakadāgāmiphale sotāpattiphale vā patiṭṭhātabbaṃ. Sabbantimena pariyāyena ekaṃ vipassanāmukhaṃ yāva arahattā paguṇaṃ katvā ādāya vicaritabbaṃ. Sesam sabbattha uttānameva. Imaṃ pana desanaṃ āyasmā sārīputto neyyapuggalassa vasena ābhisamācārikavattato paṭṭhāya anupubbena arahattaṃ pāpetvā niṭṭhāpesīti.

Papañcasūdaniyā majjhimanikāyaṭṭhakathāya

Goliyānisuttavaṇṇanā niṭṭhitā.

10. Kīṭāgirisuttavaṇṇanā

174. Evaṃ me sutanti kīṭāgirisuttaṃ. Tattha **kāsīsūti** evaṃnāmake janapade. **Etha tumhepi, bhikkhavi** etha tumhepi, bhikkhave, ime pañca ānisaṃse sampassamānā aññatreva rattibhojanā bhuñjatha. Iti bhagavā rattim vikālabhojanaṃ, divā vikālabhojananti imāni dve bhojanāni ekappahārena ajahāpetvā ekasmiṃ samaye divā vikālabhojanameva jahāpesi, puna kālaṃ atināmetvā rattim vikālabhojanaṃ jahāpento evamāha. Kasmā? Imāni hi dve bhojanāni vattamānāni vaṭṭe āciṇṇāni samāciṇṇāni nadiṃ otiṇṇaudakaṃ viya anupakkhandāni, nivātesu ca gharesu subhojanāni bhuñjitvā vaḍḍhitā sukhumāla kulaputtā dve bhojanāni ekappahārena pajahantā kilamanti. Tasmā ekappahārena ajahāpetvā bhaddālisutte divā vikālabhojanaṃ jahāpesi, idha rattim vikālabhojanaṃ. Jahāpento pana na tajjitvā vā niggaṇhitvā vā, tesam pahānapaccayā pana appābādhatāñca sañjānissathāti evaṃ ānisaṃsam dassetvāva jahāpesi. **Kīṭāgiriti** tassa nigamassa nāmaṃ.

175. Assajipunabbasukāti assaji ca punabbasuko ca chasu chabbaggiyesu dve gaṇācariyā. Paṇḍuko lohītako mettiyo bhummajako assaji punabbasukoti ime cha janā **chabbaggiyā** nāma. Tesu paṇḍukalohitakā attano parisam gahetvā sāvattihyaṃ vasanti, mettiyabhummajakā rājagahe, ime dve janā kīṭāgirisimim āvāsikā honti. **Āvāsikāti** nibaddhavāsino, taṃnibandhā akataṃ senāsanam karonti, jīṇam paṭisaṅkharonti, kate issarā honti. **Kālikanti** anāgate kāle pattabbaṃ ānisaṃsam.

178. Mayā cetam, bhikkhavi idha kiṃ dasseti? Bhikkhave, divasassa tayo vāre bhuñjitvā sukhavedanaṃyeva uppādentō na imasmiṃ sāsane kiccakārī nāma hoti, ettakā pana vedanā sevitabbā, ettakā na sevitabbāti etamattham dassetuṃ imaṃ desanaṃ ārabhi. **Evarūpaṃ sukhavedanaṃ**

pajahathāti idañca gehassitasomanassavasena vuttaṃ, **upasampajja viharathā**ti idañca nekkhammasitasomanassavasena. Ito paresupi dvīsu vāresu gehassitanekkkhammasitānaṃyeva domanassānañca upekkhānañca vasena attho veditabbo.

181. Evaṃ sevitabbāsevitabbavedanaṃ dassetvā idāni yesaṃ appamādena kiccaṃ kattabbaṃ, yesañca na kattabbaṃ, te dassetuṃ **nāhaṃ, bhikkhave, sabbesaṃyevā**tiādīmāha. Tattha **kataṃ tesam appamādenā**ti tesam yaṃ appamādena kattabbaṃ, taṃ kataṃ. **Anulomikānī**ti paṭipattianulomāni kammaṭṭhānasappāyāni, yattha vasantena sakkā hontī maggaphalāni pāpuṇiṭuṃ. **Indriyāni samannāyamaṇā**ti saddhādīni indriyāni samānaṃ kurumānā.

182. Sattime, bhikkhave, puggalāti idha kiṃ dasseti? Yesaṃ appamādena karaṇīyaṃ natthi, te dve hontī. Yesaṃ atthi, te pañcāti evaṃ sabbepi ime satta puggalā hontīti imamattaṃ dasseti.

Tattha **ubhatobhāgavimuttoti** dvīhi bhāgehi vimutto. Arūpasamāpattiyā rūpakāyato vimutto, maggena nāmakāyato. So catunnaṃ arūpasamāpattīnaṃ ekekato vuṭṭhāya saṅkhāre sammasitvā arahattaṃ pattānaṃ catunnaṃ, nirodhā vuṭṭhāya arahattaṃ pattaanāgāmino ca vasena pañcavidho hoti. Pāli panettha – “katamo ca puggalo ubhatobhāgavimutto, idhekacco puggalo aṭṭha vimokkhe kāyena phusitvā viharati, paññāya cassa disvā āsavā parikkhīṇā hontī”ti (pu. pa. 208) evaṃ abhidhamme aṭṭhavimokkhalābhino vasena āgatā.

Paññāvimuttoti paññāya vimutto. So sukkhavipassako, catūhi jhānehi vuṭṭhāya arahattaṃ pattā cattāro cāti imesaṃ vasena pañcavidhova hoti. Pāli panettha aṭṭhavimokkhapaṭikkhepavaseneva āgatā. Yathāha – “na heva kho aṭṭha vimokkhe kāyena phusitvā viharati, paññāya cassa disvā āsavā parikkhīṇā hontī. Ayaṃ vuccati puggalo paññāvimutto”ti.

Phuṭṭhantaṃ sacchikarotīti **kāyasakkhī**. Yo jhānaphassaṃ paṭhamam phusati, pacchā nirodham nibbānaṃ sacchikaroti, so sotāpattiphalatṭhaṃ ādiṃ katvā yāva arahattamaggaṭṭhā chabbidho hontīti veditabbo. Tenevāha – “idhekacco puggalo aṭṭha vimokkhe kāyena phusitvā viharati, paññāya cassa disvā ekacce āsavā parikkhīṇā hontī. Ayaṃ vuccati puggalo kāyasakkhī”ti.

Diṭṭhantaṃ pattoti **diṭṭhippato**. Tatridaṃ saṅkhepalakkhaṇaṃ – dukkhā saṅkhārā, sukho nirodhoti nātaṃ hoti diṭṭhaṃ veditaṃ sacchikataṃ phusitaṃ paññāyāti diṭṭhippato. Vitthārato panesopi kāyasakkhi viya chabbidho hoti. Tenevāha – “idhekacco puggalo idaṃ dukkhanti yathābhūtaṃ pajānāti...pe... ayaṃ dukkhanirodhagāminī paṭipadāti yathābhūtaṃ pajānāti, tathāgatappaveditā cassa dhammā paññāya vodiṭṭhā hontī vocarītā...pe... ayaṃ vuccati puggalo diṭṭhippato”ti (pu. pa. 208).

Saddhāvimuttoti saddhāya vimutto. Sopi vuttanayeneva chabbidho hoti. Tenevāha – “idhekacco puggalo idaṃ dukkhanti – yathābhūtaṃ pajānāti...pe... ayaṃ dukkhanirodhagāminī paṭipadāti yathābhūtaṃ pajānāti. Tathāgatappaveditā cassa dhammā paññāya vodiṭṭhā hontī vocarītā...pe... no ca kho yathā diṭṭhippattassa. Ayaṃ vuccati puggalo saddhāvimutto”ti (pu. pa. 208). Etesu hi saddhāvimuttassa pubbabhāgamaggakkhaṇe saddahantassa viya okappentassa viya adhimuccantassa viya ca kilesakkhaya hoti, diṭṭhippattassa pubbabhāgamaggakkhaṇe kilesacchedakaññaṃ adandham tikhiṇaṃ sūraṃ hutvā vahati. Tasmā yathā nāma nātītikhiṇena asinā kadaliṃ chindantassa chinnaṭṭhānaṃ na maṭṭhaṃ hoti, asi na sīghaṃ vahati, saddo suyati, balavataro vāyāmo katabbo hoti, evarūpā saddhāvimuttassa pubbabhāgamaggabhāvanā. Yathā pana nisitaasinā kadaliṃ chindantassa chinnaṭṭhānaṃ maṭṭhaṃ hoti, asi sīghaṃ vahati, saddo na suyati, balavavāyāmakiccaṃ na hoti, evarūpā paññāvimuttassa pubbabhāgamaggabhāvanā veditabbā.

Dhammaṃ anussaratīti **dhammānusārī**. Dhammoti paññā, paññāpubbaṅgamaṃ maggaṃ bhāvetīti attho. **Saddhānusārimhi** ca eseva nayo. Ubho panete sotāpattimaggaṭṭhāyeva. Vuttampi cetam – “yassa puggalassa sotāpattiphalasacchikiriyāya paṭipannassa paññindriyaṃ adhimattaṃ hoti, paññāvāhim

paññāpubbaṅgamaṃ ariyamaggaṃ bhāveti. Ayaṃ vuccati puggalo dhammānusārī”ti (pu. pa. 208). Tathā – “yassa puggalassa sotāpattiphalasacchikiriyāya paṭipannassa saddhindriyaṃ adhimattaṃ hoti, saddhāvāhiṃ saddhāpubbaṅgamaṃ ariyamaggaṃ bhāveti. Ayaṃ vuccati puggalo saddhānusārī”ti. Ayamettha saṅkhepo. Vitthārato panesā ubhatobhāgavimuttādīkathā **visuddhimagge** paññābhāvanādhikāre vuttā. Tasmā tattha vuttanayeneva veditabbā. Yā panesā etesaṃ vibhāgadassanattaṃ idha pāli āgatā, tattha yasmā rūpasamāpattiyā vinā arūpasamāpattiyō nāma natthi, tasmā āruppāti vuttepi attha vimokkhā vuttāva hontīti veditabbā.

Kāyena phusitvāti sahaḷātanāmakāyena phusitvā. **Paññāya cassa disvāti** paññāya ca etassa ariyasaccadhamme disvā. **Ekacce āsavāti** paṭhamamaggādīhi pahātabbā ekadesaāsavā. **Tathāgatappaveditāti** tathāgatena paveditā catusaccadhammā. **Paññāya vodiṭṭhā hontīti** imasmim ṭhāne sīlaṃ kathitaṃ, imasmim samādhi, imasmim vipassanā, imasmim maggo, imasmim phalanti evaṃ atthena atthe kāraṇena kāraṇe ciṅṅacariṭtā maggapaññāya sudiṭṭhā hontī. **Vocaritāti** vicaritā. **Saddhā nivīṭṭhā hotīti** okappanasaddhā patiṭṭhitā hoti. **Mattaso nijjhānaṃ khamantīti** mattāya olokanāṃ khamanti. **Saddhāmattanti** saddhāyeva, itaraṃ tasseva vevacanaṃ

Iti imesu appamādena karaṇīyesu puggalesu tayo paṭividdhamaggaphalā sekhā. Tesu anulomasenāsaṇaṃ sevamānā kalyāṇamitte bhajamānā indriyāni samannāyamaṇā anupubbena arahattaṃ gaṇhanti. Tasmā tesam yathāṭṭhitova pāḷiattho. Avasāne pana dve sotāpattimaggasamaṅgino. Tehi tassa maggassa anulomasenāsaṇaṃ sevitaṃ, kalyāṇamittā bhajitā, indriyāni samannānīṭāni. Upari pana tiṅṅaṃ maggānaṃ atthāya sevamānā bhajamānā samannāyamaṇā anupubbena arahattaṃ pāpuṇissantīti ayamettha pāḷiattho.

Vitaṇḍavādī pana imameva pāḷim gahetvā – “lokuttaramaggo na ekacittakkhaṇiko, bahucittakkhaṇiko”ti vadati. So vattabbo – “yadi aññaena cittaena senāsaṇaṃ paṭisevati, aññaena kalyāṇamitte bhajati, aññaena indriyāni samannāneti, aññaṃ maggacittanti sandhāya tvaṃ ‘na ekacittakkhaṇiko maggo, bahucittakkhaṇiko’ti vadasi, evaṃ sante senāsaṇaṃ sevamaṇo nīlobhāsaṃ pabbataṃ passati, vanaṃ passati, migapakkhīnaṃ saddaṃ suṇāti, pupphaphalānaṃ gandhaṃ ghāyati, pāṇīyaṃ pivanto rasaṃ sāyati, nisīdanto nipajjanto phassaṃ phusati. Evaṃ te pañcaviññāṇasamaṅgīpi lokuttaradhammasamaṅgīyeva bhavissati. Sace panetaṃ sampaṭicchasi, satthārā saddhiṃ paṭivirujjhasi. Satthārā hi pañcaviññāṇakāyā ekantaṃ abyākatāva vuttā, taṃsamaṅgissa kusalākusalaṃ paṭikkhittaṃ, lokuttaramaggo ca ekantakusalo. Tasmā pajahetaṃ vāda”nti paññāpetabbo. Sace paññattim na upagacchati, “gaccha pātova vihāraṃ pavisitvā yāguṃ pivāhī”ti uyyojetabbo.

183. Nāhaṃ, bhikkhave, ādikenevāti ahaṃ, bhikkhave, paṭhamameva maṇḍūkassa uppatitvā gamaṇaṃ viya aññārādhanāṃ arahatte patiṭṭhānaṃ na vadāmi. **Anupubbāsikkhāti** karaṇatthe paccattavacanaṃ. Parato padadvayepi eseva nayo. **Saddhājātoti** okappaniyasaddhāya jātasaddho. **Upasaṅkamatīti** garūnaṃ samīpaṃ gacchati. **Payirupāsati** santike nisīdati. **Dhāretīti** sādhukaṃ katvā dhāreti. **Chando jāyatīti** kattukamyatākusalacchando jāyati. **Ussahati** vīriyaṃ karoti. **Tuletīti** aniccaṃ dukkhaṃ anattāti tulayati. **Tulayitvā padahati** evaṃ tīraṇavipassanāya tulayanto maggapadhānaṃ padahati. **Pahitattoti** pesitacitto. **Kāyena ceva paramasaccanti** nāmakāyena nibbānasaccaṃ sacchikaroti. **Paññāya cāti** nāmakāyasampayuttāya maggapaññāya paṭivijjhati passati.

Idāni yasmā te satthu āgamaṇaṃ sutvā paccuggamaṇamattampi na akaṃsu, tasmā tesam cariyaṃ garahanto **sāpi nāma, bhikkhave, saddhā nāhosīti**ādīmāha. Tattha **kīvadūrevimeti** kittakaṃ dūre ṭhāne. Yojanasatampi yojanasahassampi apakkantāti vattum vaṭṭati, na pana kiñci āha. **Catuppadaṃ veyyākaraṇanti** catusaccabyākaraṇaṃ sandhāya vuttaṃ.

184. Yassuddiṭṭhassāti yassa uddiṭṭhassa. **Yopi so, bhikkhave, satthāti** bāhirakasatthāraṃ dasseti. **Evarūpīti** evaṃjātikā. **Paṇopaṇaviyāti** paṇaviyā ca opaṇaviyā ca. **Na upeti** na hoti. Kayavikkayakāle viya agghavaḍḍhanahāpanaṃ na hotīti attho. Ayaṃ goṇo kiṃ agghati, vīsati agghatīti bhaṇanto paṇati

nāma. Na vīsati agghati, dasa agghatīti bhaṇanto opanāti nāma. Idaṃ paṭisedhento āha “paṇopānaviyā na upeti”ti. Idāni taṃ paṇopānaviyaṃ dassetuṃ evaṅca no assa, atha naṃ kareyyāma, na ca no evamassa, na naṃ kareyyāmāti āha.

Kim pana, bhikkhveti, bhikkhave, yaṃ tathāgato sabbaso āmisehi viṣaṃsaṭṭho viharati, evaṃ viṣaṃsaṭṭhassa satthuno evarūpā paṇopānaviyā kiṃ yujjissati? **Pariyogāhiya vattatoti** pariyogāhitvā ukkhipitvā gahetvā vattantassa. **Ayamanudhammoti** ayaṃ sabbhāvo. **Jānāti bhagavā, nāhaṃ jānāmīti** bhagavā ekāsanabhojane āniṣaṃsaṃ jānāti, ahaṃ na jānāmīti mayi saddhāya divasassa tayo vāre bhojanaṃ pahāya ekāsanabhojanaṃ bhuñjati. **Ruḷahanīyanti** rohanīyaṃ. **Ojavantanti** sinehavantaṃ. **Kāmaṃ taco cāti** iminā caturaṅgavīriyaṃ dasseti. Ettha hi taco ekaṃ aṅgaṃ, nhāru ekaṃ, aṭṭhi ekaṃ, maṃsalohitaṃ ekanti evaṃ caturaṅgasamannāgataṃ vīriyaṃ adhiṭṭhahitvā arahattaṃ appatvā na vuṭṭhahissāmīti evaṃ paṭipajjatīti dasseti. Sesam sabbattha uttānameva. Desanaṃ pana bhagavā neyyapuggalassa vasena arahattanikūṭena niṭṭhāpesīti.

Papañcasūdaniyā majjhimanikāyaṭṭhakathāya

Kīṭāgirisuttavaṇṇanā niṭṭhitā.

Dutiyavaggavaṇṇanā niṭṭhitā.

3. Paribbājakavaggo

1. Tevijjavacchasuttavaṇṇanā

185. Evaṃ me sutanti tevijjavacchasuttaṃ. Tattha **ekapuṇḍarīketi** puṇḍarīko vuccati setambarukkho, so tasmiṃ ārāme eko puṇḍarīko atthīti ekapuṇḍarīko. **Etadahosīti** tattha pavisitukāmatāya ahoṣi. **Cirassaṃ kho, bhanteti** pakatiyā āgatapubbataṃ upādāya. **Dhammassa cānudhammanti** idha sabbaññutaññāṇaṃ dhammo nāma, mahājanassa byākaraṇaṃ anudhammo nāma. Sesam jīvakasutte (ma. ni. 2.51 ādayo) vuttanayameva. **Na me teti** ananuññāya ṭhatvā anuññampi paṭikkhipati. “Sabbaññū sabbadassāvī aparisesaṃ ñāṇadassanaṃ paṭijānātī”ti hi idaṃ anujānitabbaṃ siyā, – “carato ca me...pe... paccupaṭṭhita”nti idaṃ pana nānujānitabbaṃ. Sabbaññutaññāṇena hi āvajjitvā pajānāti. Tasmā ananuññāya ṭhatvā anuññampi paṭikkhipanto evamāha.

186. Āsavānaṃ khayāti ettha sakiṃ khīṇānaṃ āsavānaṃ puna khepetabbābhāvā yāvadevāti na vuttaṃ. Pubbenivāsaññāṇena cettha bhagavā atītajānanaguṇaṃ dasseti, dibbacakkuṇṇāṇena paccuppannājanaguṇaṃ, āsavakkhayaññāṇena lokuttaraguṇanti. Iti imāhi tīhi vijjāhi sakalabuddhaguṇaṃ saṃkhipitvā kathesi.

Gihisaṃyojananti ghibandhanaṃ gihiparikkhāresu nikantiṃ. **Natthi kho vacchāti** gihisaṃyojanaṃ appahāya dukkhassantakaro nāma natthi. Yepi hi santatimahāmatto uggaseno seṭṭhiputto vītasokadārakoti gihiliṅge ṭhitāva arahattaṃ pattā, tepi maggena sabbasaṅkhāresu nikantiṃ sukkhāpetvā pattā. Taṃ patvā pana na tena liṅgena aṭṭhaṃsu, gihiliṅgaṃ nāmetaṃ hīnaṃ, uttamaguṇaṃ dhāretuṃ na sakkoti. Tasmā tattha ṭhito arahattaṃ patvā taṃdivasameva pabbajati vā parinibbāti vā. Bhūmadevatā pana tiṭṭhanti. Kasmā? Nilīyanokāsassa atthitāya. Sesakāmabhave manussesu sotāpannādayo tayo tiṭṭhanti, kāmāvacaradevesu sotāpannā sakadāgāmino ca, anāgāmikhīṇāsavā panettha na tiṭṭhanti. Kasmā? Tañhi ṭhānaṃ laṭitajanassa āvāso, natthi tattha tesam pavivekārahaṃ paṭicchannaṭṭhānaṅca. Iti tattha khīṇāsavo parinibbāti, anāgāmī cavitvā suddhāvāse nibbattati. Kāmāvacaradevato upari pana cattāropi ariyā tiṭṭhanti.

Sopāsi kammavādīti sopi kammavādī ahoṣi, kiriyaṃpi na paṭibāhittha. Tañhi

ekonavutikappamatthake attānaṃyeva gahetvā katheti. Tadā kira mahāsatto pāsaṇḍapariggaṇhanatthaṃ pabbajito tassapi pāsaṇḍassa nipphalabhāvaṃ jānitvā vīriyaṃ na hāpesi, kiriyavādī hutvā sagge nibbattati. Tasmā evamāha. Sesāṃ sabbattha uttānamevāti.

Papañcasūdaniyā majjhimanikāyaṭṭhakathāya

Tevijjavacchasuttavaṇṇanā niṭṭhitā.

2. Aggivacchasuttavaṇṇanā

187. Evaṃ me sutanti aggivacchasuttaṃ. Tattha **na kho ahanti** paṭhamavāre nāhaṃ sassatadiṭṭhikoti vadati, dutiye nāhaṃ ucchedadiṭṭhikoti. Evaṃ antānantikādivasena sabbavāresu paṭikkhepo veditabbo. **Hoti ca na ca hotīti** ayaṃ panettha ekaccasassatavādo. **Neva hoti na na hotīti** ayaṃ amarāvikkhepoti veditabbo.

189. Sadukkhanti kilesadukkhena ceva vipākadukkhena ca sadukkhaṃ. **Savighātanti** tesāṃyeva dvinnāṃ vasena saupaghātaṃ. **Saupāyāsanti** tesāṃyeva vasena saupāyāsaṃ. **Sapariḷāhanti** tesāṃyeva vasena sapariḷāhaṃ.

Kiñci diṭṭhigatanti kāci ekā diṭṭhipi ruccitvā khamāpetvā gahitā atthīti pucchati. **Apanīti** nīhaṃ apaviddhaṃ. **Diṭṭhanti** paññāya diṭṭhaṃ. **Tasmāti** yasmā pañcannaṃ khandhānaṃ udayavayaṃ addasa, tasmā. **Sabbamaññitānanti** sabbesaṃ tiṇṇampi taṇhādiṭṭhimānāmaññitānaṃ. **Mathitānanti** tesāṃyeva vevacanaṃ. Idāni tāni vibhajitvā dassento **sabbaahaṃkāra-mamaṃkāra-mānānusayānanti** āha. Ettha hi ahaṃkāro diṭṭhi, mamaṃkāro taṇhā, mānānusayo māno. **Anupādā vimuttoti** catūhi upādānehi kañci dhammaṃ anupādiyitvā vimutto.

190. Na upetīti na yujjati. Ettha ca “na upapajjati”ti idaṃ anujānitabbaṃ siyā. Yasmā pana evaṃ vutte so paribbājako ucchedaṃ gaṇheyya, upapajjati pana sassatameva, upapajjati ca na ca upapajjati ekaccasassataṃ, neva upapajjati na na upapajjati amarāvikkhepaṃ, tasmā bhagavā – “ayaṃ appatiṭṭho anālambo hotu, sukhapavesanaṭṭhānaṃ mā labhatū”ti ananuññāya ṭhatvā anuññampi paṭikkhipi. **Alanti** samatthaṃ pariyattaṃ. **Dhammoti** paccayākāradhammo. **Aññatrayogenāti** aññattha payogena. **Aññatrācariyakenāti** paccayākāraṃ ajānantānaṃ aññesaṃ ācariyānaṃ santike vasantena.

191. Tena hi vacchāti yasmā tvaṃ sammohamāpādinti vadasi, tasmā taṃyevettha paṭipucchissāmi. **Anāhāro nibbutoti** appaccayo nibbuto.

192. Yena rūpenāti yena rūpena sattasaṅkhātaṃ tathāgataṃ rūpīti paññāpeyya. **Gambhīroti** guṇagambhīro. **Appameyyoti** pamāṇaṃ gaṇhituṃ na sakkuṇheyyo. **Duppariyogāḷhoti** duogāho dujjāno. **Seyyathāpi mahāsamuddoti** yathā mahāsamuddo gambhīro appameyyo dujjāno, evameva khīṇāsavopi. Taṃ ārabha upapajjatiādi sabbāṃ na yujjati. Kathaṃ? Yathā parinibbutaṃ aggim ārabha puratthimaṃ disaṃ gatotiādi sabbāṃ na yujjati, evaṃ.

Aniccatāti aniccatāya. **Sāre patiṭṭhitanti** lokuttaradhammasāre patiṭṭhitaṃ. Sesāṃ sabbattha uttānamevāti.

Papañcasūdaniyā majjhimanikāyaṭṭhakathāya

Aggivacchasuttavaṇṇanā niṭṭhitā.

3. Mahāvacchasuttavaṇṇanā

193. Evaṃ me sutanti mahāvaccasuttaṃ. Tattha **sahakathīti** saddhiṃvādo, bahuṃ mayā tumhehi saddhiṃ kathitapubbanti katham sāreti mettiṃ ghaṭeti. Purimāni hi dve sutāni etasseva kathitāni, saṃyuttake abyākatasamṃyuttaṃ (saṃ. ni. 4.416 ādayo) nāma etasseva kathitaṃ – “kiṃ nu kho, bho gotama, sassato loko idameva saccaṃ moghamaññanti abyākatameta”nti evaṃ ekuttaranikāyepi iminā saddhiṃ kathitaṃ atthiyeva. Tasmā evamāha. Sammāsambuddhopi tassa āgatāgatassa saṅgahaṃ katvā okāsamakāsiyeva. Kasmā? Ayañhi sassatadiṭṭhiko, sassatadiṭṭhikā ca sīghaṃ laddhiṃ na vissajjenti, vasātelamakkhitaṃpiṭikā viya cirena sujjhanti. Passati ca bhagavā – “ayaṃ paribbājako kāle gacchante gacchante laddhiṃ vissajjetvā mama santike pabbajitvā cha abhiññāyo sacchikatvā abhiññātasāvako bhavissati”ti. Tasmā tassa āgatāgatassa saṅgahaṃ katvā okāsamakāsiyeva. Idaṃ panassa pacchimagamaṇaṃ. So hi imasmiṃ sutte taraṇaṃ vā hotu ataraṇaṃ vā, yaṭṭhiṃ otarivā udae patamāno viya samaṇassa gotamassa santikaṃ gantvā pabbajissāmīti sanniṭṭhānaṃ katvā āgato. Tasmā dhammadesanaṃ yācanto **sādhū me bhavaṃ gotamoti**ādīmāha. Tassa bhagavā mūlavasena saṃkhittadesanaṃ, kammaṃpathavasena vitthāradesanaṃ desesi. Mūlavasena cettha atisaṃkhittā desanā, kammaṃpathavasena saṃkhittā vitthārasadisā. Buddhānaṃ pana nippariyāyena vitthāradesanā nāma natthi. Catuvīsatisamantapaṭṭhānampi hi sattapakaraṇe abhidhammapiṭake ca sabbaṃ saṃkhittameva. Tasmā mūlavasenāpi kammaṃpathavasenāpi saṃkhittameva desesīti veditabbo.

194. Tattha **pāṇātipātā veramaṇī kusalanti**ādīsu paṭipāṭiyā sattadhammā kāmāvacarā, anabhijjhādayo tayo catubhūmikāpi vaṭṭanti.

Yato kho, vaccha, bhikkhunoti kiñcāpi aniyamtvā vuttaṃ, yathā pana jīvakaṃ sutte ca caṅkīsutte ca, evaṃ imasmiṃ sutte ca attānameva sandhāyetaṃ bhagavatā vuttanti veditabbaṃ.

195. Atthi panāti kiṃ pucchāmīti pucchati? Ayaṃ kirassa laddhi – “tasmiṃ tasmiṃ sāsane satthāva arahā hoti, sāvako pana arahattaṃ pattuṃ samattho natthi. Samaṇo ca gotamo ‘yato kho, vaccha, bhikkhuno’ti ekaṃ bhikkhuṃ kathento viya katheti, atthi nu kho samaṇassa gotamassa sāvako arahattappatto”ti. Etamatthaṃ pucchissāmīti pucchati. Tattha **tiṭṭhatūti** bhavaṃ tāva gotamo tiṭṭhatu, bhavañhi loke pākaṭo arahāti attho. Tasmiṃ byākate uttari bhikkhuniādīnaṃ vasena pañhaṃ pucchi, bhagavāpissa byākāsi.

196. Ārādhakoti sampādako paripūrako.

197. Sekhāya vijjāya pattabbanti heṭṭhimaphalattayaṃ pattabbaṃ. Taṃ sabbaṃ mayā anuppattanti vadati. Vītaṇḍavādī panāha – “katame dhammā sekkhā? Cattāro maggā apariyāpannā heṭṭhimāni ca tīṇi sāmāññaphalāni”ti (dha. sa. 1023) vacanato arahattamaggopi anena pattoyeva. Phalaṃ pana apattaṃ, tassa pattiyā uttari yogaṃ kathāpetīti. So evaṃ saññāpetabbo –

“Yo ve kilesāni pahāya pañca,
Paripuṇṇasekho aparihānadhammo;
Cetovasippatto samāhitindriyo,
Sa ve ṭhitattoti naro pavuccatī”ti. (a. ni. 4.5);

Anāgāmipuggalo hi ekantaparipuṇṇasekho. Taṃ sandhāya “sekhāya vijjāya pattabba”nti āha. Maggassa pana ekacittakkhaṇikattā tattha ṭhitassa pucchā nāma natthi. Iminā suttena maggopi bahucittakkhaṇiko hotūti ce. Etaṃ na buddhavacanaṃ, vuttagāthāya ca attho virujjhati. Tasmā anāgāmiphale ṭhatvā arahattamaggassa vipassanaṃ kathāpetīti veditabbo. Yasmā panassa na kevalaṃ suddhaarahattasseva upanissayo, channampi abhiññānaṃ upanissayo atthi, tasmā bhagavā – “evamayaṃ samathe kammaṃ katvā pañca abhiññā nibbattessati, vipassanāya kammaṃ katvā arahattaṃ pāpuṇissati. Evaṃ chaḷabhiññā mahāsāvako bhavissati”ti vipassanāmatthaṃ akathetvā samathavipassanā ācikkhi.

198. Sati satiāyataneti sati satikāraṇe. Kiñcetha kāraṇaṃ? Abhiññā vā abhiññāpādakajjhānaṃ vā avasāne pana arahattaṃ vā kāraṇaṃ arahattassa vipassanā vāti vedittabbaṃ.

200. Paricīṇṇo me bhagavāti satta hi sekhā bhagavantaṃ paricaranti nāma, khīṇāsavena bhagavā paricīṇṇo hoti. Iti saṅkhepena arahattaṃ byākaronto thero evamāha. Te pana bhikkhū tamatthaṃ na jānimsu, ajānantāva tassa vacanaṃ sampañcchitvā. Bhagavato ārocesuṃ. **Devatāti** tesam guṇānaṃ lābhi devatā. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Mahāvaccasuttavaṇṇanā niṭṭhitā.

4. Dīghanakhasuttavaṇṇanā

201. Evaṃ me sutanti dīghanakhasuttaṃ. Tattha **sūkarakhatāyanti** sūkarakhatāti evaṃnāmake leṇe. Kassapabuddhakāle kira taṃ leṇaṃ ekasmiṃ buddhantare pathaviyā vaḍḍhamānāya antobhūmigataṃ jātaṃ. Atheadivasam eko sūkaro tassa chadanapariyantasaṃpe paṃsuṃ khaṇi. Deve vuṭṭe paṃsudhoto chadanapariyanto pākaṭo ahosi. Eko vanacarako disvā – “pubbe sīlavantehi paribhuttaleṇena bhavitabbaṃ, paṭijaggissāmi na” nti samantato paṃsuṃ apanetvā leṇaṃ sodhetvā kuṭṭaparikkhepaṃ katvā dvāravātapānaṃ yojetvā supariniṭṭhita-sudhākammacittakammarajatapaṭṭasadisāya vālukāya santhatapariveṇaṃ leṇaṃ katvā mañcapīṭhaṃ paññāpetvā bhagavato vasanattāya adāsī. Leṇaṃ gambhīraṃ ahosi otarivā abhiruhitabbaṃ. Taṃ sandhāyetaṃ vuttaṃ.

Dīghanakhoti tassa paribbājakassa nāmaṃ. **Upasaṅkamīti** kasmā upasaṅkami? So kira there aḍḍhamāsapabbajite cintesi – “mayhaṃ mātulo aññaṃ pāsaṇḍaṃ gantvā na ciraṃ tiṭṭhati, idāni panassa samaṇassa gotamassa santikaṃ gatassa aḍḍhamāso jāto. Pavattimpissa na suṇāmi, ojavantaṃ nu kho sāsanaṃ, jānissāmi na” nti gantukāmo jāto. Tasmā upasaṅkami. **Ekamantaṃ ṭhitoti** tasmīṃ kira samaye thero bhagavantaṃ bījayaṃno ṭhito hoti, paribbājako mātule hirottappena ṭhitakova pañhaṃ pucchi. Tena vuttaṃ “ekamantaṃ ṭhito” ti.

Sabbaṃ me nakkhamatīti sabbā me upapattiyo nakkhamanti, paṭisandhiyo nakkhamantīti adhippāyena vadati. Ettāvātānena “ucchedavādohamasmi” ti dīpitaṃ hoti. Bhagavā panassa adhippāyaṃ muñcitvā akkhare tāva dosaṃ dassento **yāpi kho tetiādīmāha**. Tattha **esāpi te diṭṭhi nakkhamatīti** esāpi te paṭhamaṃ ruccitvā khamāpetvā gahitadiṭṭhi nakkhamatīti. **Esā ce me, bho gotama, diṭṭhi khameyyāti** mayhañhi sabbaṃ nakkhamatīti diṭṭhi, tassa mayhaṃ yā esā sabbaṃ me nakkhamatīti diṭṭhi, esā me khameyya. Yaṃ taṃ “sabbaṃ me nakkhamatī” ti vuttaṃ, tampissa tādisameva. Yathā sabbagahaṇena gahitāpi ayaṃ diṭṭhi khamati, evamevaṃ tampi khameyya. Evaṃ attano vāde āropitaṃ dosaṃ ñatvā taṃ pariharāmīti saññāya vadati, atthato panassa “esā diṭṭhi na me khamatī” ti āpajjati. Yassa panesā na khamati na ruccati, tassāyaṃ tāya diṭṭhiyā sabbaṃ me na khamatīti diṭṭhi rucitaṃ. Tena hi diṭṭhiakkhamena arucitena bhavitabbanti sabbaṃ khamatīti ruccatīti āpajjati. Na panesa taṃ sampañcchati, kevalaṃ tassāpi ucchedadiṭṭhiyā ucchedameva gaṇhāti. Tenāha bhagavā **ato kho te, aggivessana,...pe... aññaṃca diṭṭhiṃ upādiyantīti**. Tattha **atoti** pajahanakesu nissakkaṃ, ye pajahanti, tehi ye nappajahantīti vucciyanti, teva bahutarāti attho. **Bahū hi bahutarāti** ettha hikāro nipātamattaṃ, bahū bahutarāti attho. Parato **tanū hi tanutarāti** padepi eseva nayo. **Ye evamāhamsūti** ye evaṃ vadanti. **Tañceva diṭṭhiṃ nappajahanti, aññaṃca diṭṭhiṃ upādiyantīti** mūladassanaṃ nappajahanti, aparadassanaṃ upādiyanti.

Ettha ca sassataṃ gahetvā tampi appahāya ucchedaṃ vā ekaccasassataṃ vā gahetuṃ na sakkā, ucchedampi gahetvā taṃ appahāya sassataṃ vā ekaccasassataṃ vā na sakkā gahetuṃ, ekaccasassatampi gahetvā taṃ appahāya sassataṃ vā ucchedaṃ vā na sakkā gahetuṃ. Mūlasassataṃ pana appahāya

aññaṃ sassatameva sakkā gahetuṃ. Kathaṃ? Ekasmiñhi samaye “rūpaṃ sassata”nti gahetvā aparasmim̐ samaye “na suddharūpameva sassataṃ, vedanāpi sassatā, viññānampi sassata”nti gaṇhāti. Uccchedepi ekaccasassatepi eseva nayo. Yathā ca khandhesu, evaṃ āyatanesupi yojetabbaṃ. Idaṃ sandhāya vuttaṃ – “tañceva diṭṭhiṃ nappajahanti, aññañca diṭṭhiṃ upādiyanti”ti.

Dutiyavāre **atoti** appajahanakesu nissakkaṃ, ye nappajahanti, tehi, ye pajahantīti vucciyanti, teva tanutarā appatarāti attho. **Tañceva diṭṭhiṃ pajahanti, aññañca diṭṭhiṃ na upādiyanti**ti tañca mūladassanaṃ pajahanti, aññañca dassanaṃ na gaṇhanti. Kathaṃ? Ekasmiñhi samaye “rūpaṃ sassata”nti gahetvā aparasmim̐ samaye tattha ādīnavaṃ disvā “oḷārikameṭaṃ mayhaṃ dassana”nti pajahati “na kevalañca rūpaṃ sassatanti dassanameva oḷārikaṃ, vedanāpi sassatā...pe... viññānampi sassatanti dassanaṃ oḷārikamevā”ti vissajjeti. Uccchedepi ekaccasassatepi eseva nayo. Yathā ca khandhesu, evaṃ āyatanesupi yojetabbaṃ. Evaṃ tañca mūladassanaṃ pajahanti, aññañca dassanaṃ na gaṇhanti.

Santaggivessanāti kasmā ārabhi? Ayaṃ uccedaladdhiko attano laddhiṃ nigūhati, tassā pana laddhiyā vaṇṇe vuccamāne attano laddhiṃ pātukarissatīti tisso laddhiyo ekato dassetvā vibhajituṃ imaṃ desanaṃ ārabhi.

Sārāgāya santiketiādīsu rāgavasena vaṭṭe rajjanassa āsannā taṇhādiṭṭhisamyojanena vaṭṭasamyojanassa santike. **Abhinandanāyā**ti taṇhādiṭṭhivaseneva gilitvā pariyādiyanassa gahaṇassa ca āsannāti attho. **Asārāgāya santiketi**ādīsu vaṭṭe arajjanassa āsannātiadinā nayena attho vedītabbo.

Ettha ca sassatadassanaṃ appasāvajjaṃ dandhavirāgaṃ, ucchedadassanaṃ mahāsāvajjaṃ khippavirāgaṃ. Kathaṃ? Sassatavādī hi idhalokaṃ paralokañca atthīti jānāti, sukatadukkaṭānaṃ phalaṃ atthīti jānāti, kusalaṃ karoti, akusalaṃ karonto bhāyati, vaṭṭaṃ assādeti, abhinandati. Buddhānaṃ vā buddhasāvakaṇaṃ vā sammukhībhūto sīghaṃ laddhiṃ jahituṃ na sakkoti. Tasmā taṃ sassatadassanaṃ appasāvajjaṃ dandhavirāganti vuccati. Ucchedavādī pana idhalokaparalokaṃ atthīti jānāti, sukatadukkaṭānaṃ phalaṃ atthīti jānāti, kusalaṃ na karoti, akusalaṃ karonto na bhāyati, vaṭṭaṃ na assādeti, nābhinandati, buddhānaṃ vā buddhasāvakaṇaṃ vā sammukhībhāve sīghaṃ dassanaṃ pajahati. Pāramiyo pūretuṃ sakkonto buddho hutvā, asakkonto abhinīhāraṃ katvā sāvako hutvā parinibbāyati. Tasmā ucchedadassanaṃ mahāsāvajjaṃ khippavirāganti vuccati.

202. So pana paribbājako etamatthaṃ asallakkhetvā – “mayhaṃ dassanaṃ samvaṇṇeti pasamsati, addhā me sundaraṃ dassana”nti sallakkhetvā **ukkamaṃseti me bhavanti**ādīmāha.

Idāni yasmā ayaṃ paribbājako kañjiyeneva tittakālābu, ucchedadassaneneva pūrito, so yathā kañjiyaṃ appahāya na sakkā lābumhi telaphāṇitādīni pakkhipituṃ, pakkhittānīpi na gaṇhāti, evamevaṃ taṃ laddhiṃ appahāya abhabbo maggaphalānaṃ lābhāya, tasmā laddhiṃ jahāpanatthaṃ **tatraggivessanā**tiādi āradhamaṃ. **Viggahoti** kalaho. **Evametāsaṃ diṭṭhīnaṃ pahānaṃ hotīti** evaṃ viggahādiādinavaṃ disvā tāsamaṃ diṭṭhīnaṃ pahānaṃ hoti. So hi paribbājako “kiṃ me iminā viggahādinā”ti taṃ ucchedadassanaṃ pajahati.

205. Athassa bhagavā vamtakañjiye lābumhi sappiphāṇitādīni pakkhipanto viya hadaye amatosadhaṃ pūressāmīti vipassanaṃ ācikkhanto **ayaṃ kho pana, aggivessana, kāyoti**ādīmāha. Tassattho vammikasutte vutto. **Aniccatoti**ādīnīpi heṭṭhā vitthāritāneva. **Yo kāyasmim̐ kāyachandoti** yā kāyasmim̐ taṇhā. **Snehoti** taṇhāsnehova. **Kāyanvayatā**ti kāyānugamanabhāvo, kāyaṃ anugacchanakakilesoti attho.

Evaṃ rūpakammaṭṭhānaṃ dassetvā idāni arūpakammaṭṭhānaṃ dassento **tisso khoti**ādīmāha. Puna tāsamaṃveva vedanānaṃ asammissabhāvaṃ dassento **yasmim̐, aggivessana, samayeti**ādīmāha. Tatrāyaṃ saṅkhepattho – yasmim̐ samaye sukhādīsu ekaṃ vedanaṃ vedayati, tasmim̐ samaye aññā vedanā attano

vāraṃ vā okāsaṃ vā olokayamānā nisinnā nāma natthi, atha kho anuppannāva honti bhinnaudakapupphulā viya ca antarahitā vā. **Sukhāpi khotiādi** tāsāṃ vedanānaṃ cuṇṇavicuṇṇabhāvadassanattamaṃ vuttaṃ.

Na kenaci samvadatīti tassataṃ gahetvā “sassatavādī aha”nti ucchedavādināpi saddhiṃ na samvadati, tameva gahetvā “sassatavādī aha”nti ekaccasassatavādinā saddhiṃ na vivadati. Evaṃ tayopi vādā parivattetvā yojetabbā. **Yañca loke vuttanti** yaṃ loke kathitaṃ voharitaṃ, tena voharati aparāmasanto kiñci dhammaṃ parāmāsaggāhena aggaṇhanto. Vuttampi cetamaṃ –

“Yo hoti bhikkhu arahamaṃ katāvī,
Khīṇāsavo antimadehadhārī;
Ahaṃ vadāmītipi so vadeyya,
Mamaṃ vadantītipi so vadeyya;
Loke samaññaṃ kusalo veditvā,
Vohāramattena so vohareyyā”ti. (sam. ni. 1.25);

Aparampi vuttaṃ – “imā kho citta lokasamañña lokaniruttiyo lokavohārā lokapaññattiyo, yāhi tathāgato voharati aparāmasa”nti (dī. ni. 1.440).

206. Abhiññāpahānamāhāti sassatādīsu tesāṃ tesāṃ dhammānaṃ sassataṃ abhiññāya jānitvā sassatassa pahānamāha, ucchedaṃ, ekaccasassataṃ abhiññāya ekaccasassatassa pahānaṃ vadati. Rūpaṃ abhiññāya rūpassa pahānaṃ vadatītiādinā nayanettha attho veditabbo.

Paṭisañcikkhatoti paccavekkhantassa. **Anupādāya āsavehi cittaṃ vimuccīti** anupādanirodhena niruddhehi āsavehi aggahetvāva cittaṃ vimucci. Ettāvata cesa parassa vaḍḍhitaṃ bhattaṃ bhuñjitvā khudaṃ vinodento viya parassa āraddhāya dhammadesanāya ñāṇaṃ pesetvā vipassanaṃ vaḍḍhetvā arahattañceva patto, sāvakaṃ parāmāññāssa ca matthakaṃ, soḷasa ca paññaṃ paṭivijjhitaṃ titho. Dīghanakho pana sotāpattiphalamaṃ patvā saraṇesu patiṭṭhito.

Bhagavā pana imaṃ desanaṃ sūriye dharamāneyeva niṭṭhāpetvā gijjhakūṭā oruyha veḷuvanaṃ gantvā sāvakasannipātamakāsi, caturaṅgasamannāgato sannipāto ahoṣi. Tattrimāni aṅgāni – māghanakkhattena yutto puṇṇamauposathadivaso, kenaci anāmantitāni hutvā attanoyeva dhammatāya sannipatitāni aḍḍhatelasāni bhikkhusatāni, tesu ekopi puthujjano vā sotāpanna-sakadāgāmi-anāgāmi-sukkhavipassaka-arahantesu vā aññataro natthi, sabbe chaḷabhiññāva, ekopi cettha satthakena kese chinditvā pabbajito nāma natthi, sabbe ehibhikkhunoyevāti.

Papañcasūdaniyā majjhimanikāyatṭhakathāya

Dīghanakhasuttavaṇṇanā niṭṭhitā.

5. Māgaṇḍiyasuttavaṇṇanā

207. Evaṃ me sutanti māgaṇḍiyasuttaṃ. Tattha **agyāgāreti** agghomasālayaṃ. **Tiṇasanthāra**keti dve māgaṇḍiyā mātulo ca bhāgineyyo ca. Tesu mātulo pabbajitvā arahattaṃ patto, bhāgineyyopi saupanissayo nacirasseva pabbajitvā arahattaṃ pāpuṇissati. Athassa bhagavā upanissayaṃ disvā ramaṇīyaṃ devagabbhasadisāṃ gandhakuṭiṃ pahāya tattha chārikatiṇakacavarādīhi uklāpe agyāgāre tiṇasanthāraṃ paññāpetvā parasaṅgahakaraṇattamaṃ katipāhaṃ vasittha. Taṃ sandhāyetaṃ vuttaṃ. **Tenupasaṅkamīti** na kevalaṃ taṃdivasameva, yasmā pana taṃ agyāgāraṃ gāmūpacāre dāraḍḍārikāhi okiṇṇaṃ avivittaṃ, tasmā bhagavā niccakālampi divasabhāgaṃ tasmīṃ vanasaṅḍe vītināmetvā sāyaṃ vāsattāya tattha upagacchati.

Addasā kho...pe... tiṇasanthārakam paññattanti bhagavā aññesu divasesu tiṇasanthārakam saṅgharivā saññānaṃ katvā gacchati, tamdivasaṃ pana paññapetvāva agamāsi. Kasmā? Tadā hi paccūsasamaye lokam oloketvāva addasa – “ajja māgaṇḍiyo idhāgantvā imaṃ tiṇasanthārakam disvā bhāradvājena saddhiṃ tiṇasanthārakam ārabba kathāsallāpaṃ karissati, athāhaṃ āgantvā dhammaṃ desessāmi, so dhammaṃ sutvā mama santike pabbajitvā arahattaṃ pāpuṇissati. Paresaṃ saṅgahakaraṇatthameva hi mayā pāramiyo pūritā”ti tiṇasanthārakam paññapetvāva agamāsi.

Samaṇaseyyānurūpaṃ maññeti imaṃ tiṇasanthārakam “samaṇassa anucchavikā seyyā”ti maññāmi. Na ca asaññatasamaṇassa nivutthaṭṭhānametaṃ. Tathāhettha hatthena ākaḍḍhitattāhānaṃ vā pādena ākaḍḍhitattāhānaṃ vā sīsenā pahaṭṭattāhānaṃ vā na paññāyati, anākulō anākiṇṇo abhinno chekena cittakārena tūlikāya paricchinditvā paññatto viya. Saññatasamaṇassa vasitattāhānaṃ, kassa bho vasitattāhānanti pucchati. **Bhūnahunoti** hatavaḍḍhino mariyādakārakassa. Kasmā evamāha? Chasu dvāresu vaḍḍhipaññāpanaladdhikattā. Ayañhi tassa laddhi – cakkhu brūhetabbaṃ vaḍḍhetabbaṃ, adiṭṭhaṃ dakkhitabbaṃ, diṭṭhaṃ samatikkamitabbaṃ. Sotaṃ brūhetabbaṃ vaḍḍhetabbaṃ, asutaṃ sotabbaṃ, sutaṃ samatikkamitabbaṃ. Ghānaṃ brūhetabbaṃ vaḍḍhetabbaṃ, aghāyitaṃ ghāyitabbaṃ, ghāyitaṃ samatikkamitabbaṃ. Jivhā brūhetabbā vaḍḍhetabbā, assāyitaṃ sāyitabbaṃ, sāyitaṃ samatikkamitabbaṃ. Kāyo brūhetabbo vaḍḍhetabbo, aphutṭhaṃ phusitabbaṃ, phutṭhaṃ samatikkamitabbaṃ. Mano brūhetabbo vaḍḍhetabbo, aviññātaṃ vijānitabbaṃ, viññātaṃ samatikkamitabbaṃ. Evaṃ so chasu dvāresu vaḍḍhiṃ paññapeti. Bhagavā pana –

“Cakkhunā saṃvaro sādhu, sādhu sotena saṃvaro;
Ghānena saṃvaro sādhu, sādhu jivhāya saṃvaro.

Kāyena saṃvaro sādhu, sādhu vācāya saṃvaro;
Manasā saṃvaro sādhu, sādhu sabbattha saṃvaro;
Sabbattha saṃvuto bhikkhu, sabbadukkhā pamuccati”ti. (dha. pa. 360-361) –

Chasu dvāresu saṃvaram paññapeti. Tasmā so “vaḍḍhihato samaṇo gotamo mariyādakāra”ti maññamāno “bhūnahuno”ti āha.

Ariye nāye dhamme kusaleti parisuddhe kāraṇadhamme anavajje. Iminā kiṃ dasseti? Evarūpassa nāma uggatassa paññātassa yasassino upari vācaṃ bhāsamānena vīmaṃsitvā upadhāretvā mukhe ārakkhaṃ ṭhapetvā bhāsitaṃ hoti. Tasmā mā sahasā abhāsi, mukhe ārakkhaṃ ṭhapehīti dasseti. **Evañhi no sutte ocaratīti** yasmā amhākaṃ sutte evaṃ āgacchati, na mayaṃ mukhāruḷhicchāmatṭaṃ vadāma, sutte ca nāma āgataṃ vadamānā kassa bhāyeyyāma, tasmā sammukhāpi naṃ vadeyyāmāti attho. **Appossukoti** mama rakkhanatthāya anussukko avāvaṭṭo hutvāti attho. **Vuttova naṃ vadeyyāti** mayā vuttova hutvā apucchitova kathaṃ samutṭhāpetvā ambajambūādīni gahetvā viya apūrayamāno mayā kathitaniyāmena bhavaṃ bhāradvājo vadeyya, vadassūti attho.

208. Assosi khoti sathhā ālokaṃ vaḍḍhetvā dibbacakkhunā māgaṇḍiyaṃ tattha āgataṃ addasa, dvinnaṃ janānaṃ bhāsamānānaṃ dibbasotena saddampi assosi. **Paṭisallānā vuṭṭhitoti** phalasaṃpattiyā vuṭṭhito. **Samviggoti** pītisaṃvegena saṃviggo calito kampito. Tassa kira etadahosi – “neva māgaṇḍiyena samaṇassa gotamassa ārocitaṃ, na mayā. Amhe muñcitvā añño ettha tatiyopi natthi, suto bhavissati amhākaṃ saddo tikhiṇasotena purisenā”ti. Athassa abbhantare pīti uppajjitvā navanavutilomakūpasahassāni uddhaggāni akāsi. Tena vuttaṃ “saṃviggo lomahatṭhājāto”ti. **Atha kho māgaṇḍiyo paribbājakoti** paribbājakassa pabhinnamukhaṃ viya bījaṃ paripākagataṃ ṇānaṃ, tasmā sannisīdituṃ asakkonto āhiṇḍamāno puna satthu santikaṃ āgantvā ekamantaṃ nisīdi. Taṃ dassetuṃ “atha kho māgaṇḍiyo”tiādi vuttaṃ.

209. Sathhā – “evaṃ kira tvam, māgaṇḍiya, mam avacā”ti avatvāva **cakkhuṃ kho, māgaṇḍiyāti** paribbājakassa dhammadesanaṃ ārabhi. Tattha vasaṇatṭhānaṭṭhena rūpaṃ cakkhussa ārāmoti cakkhu

rūpārāmaṃ. Rūpe ratanti **rūparataṃ.** Rūpena cakkhu āmoditaṃ pamoditanti **rūpasamuditaṃ.** Dantanti nibbisevanaṃ. **Guttanti** gopitaṃ. **Rakkhitanti** ṭhapitarakkhaṃ. **Samvutanti** pihitaṃ. **Samvarāyāti** pidhānatthāya.

210. Paricāritapubboti abhiramitapubbo. **Rūpapariḷāhanti** rūpaṃ ārabba uppajjanapariḷāhaṃ. **Imassa pana te, māgaṇḍiya, kimassa vacanīyanti** imassa rūpaṃ pariggaṇhitvā arahattappattassa khīṇāsavassa tayā kiṃ vacanaṃ vattabbaṃ assa, vuḍḍhihato mariyādakāraḷakoti idaṃ vattabbaṃ, na vattabbanti pucchatī. **Na kiñci, bho gotamāti,** bho gotama, kiñci vattabbaṃ natthi. Sesadvāresupi eseva nayo.

211. Idāni yasmā tayā pañcakkhandhe pariggahetvā arahattappattassa khīṇāsavassa kiñci vattabbaṃ natthi, ahañca pañcakkhandhe pariggahetvā sabbaññutaṃ patto, tasmā ahampi te na kiñci vattabboti dassetuṃ **ahaṃ kho panāti**ādīmāha. **Tassa mayhaṃ māgaṇḍiyāti** gihikāle attano sampattiṃ dassento āha. Tattha **vassikoti**ādīsu yattha sukhaṃ hoti vassakāle vasituṃ, ayaṃ vassiko. Itaresupi eseva nayo. Ayaṃ panettha vacanatto – vassaṃ vāso vassaṃ, vassaṃ arahatīti **vassiko.** Itaresupi eseva nayo.

Tattha vassiko pāsādo nātiucco hoti nātinīco, dvāravātapānānipissa nātitanūni nātibahūni, bhūmattharaṇapaccattharaṇakhajjabhojjānipettha missakāneva vaṭṭanti. Hemantike thambhāpi bhittiyopi nīcā honti, dvāravātapānāni tanukāni sukhumacchiddāni. Uṇhapavesanattāya bhittiniyūhāni nīharīyanti. Bhūmattharaṇapaccattharaṇanivāsanapārūpanāni panettha uṇhavīriyāni kambalādīni vaṭṭanti. Khajjabhojjaṃ siniddhaṃ kaṭukasannissitañca. Gīmhike thambhāpi bhittiyopi uccā honti. Dvāravātapānāni panettha bahūni vipulajālāni bhavanti. Bhūmattharaṇādīni dukūlamayāni vaṭṭanti, khajjabhojjāni madhurarasasītavīriyāni. Vātapānasamīpesu cettha nava cāṭiyo ṭhapetvā udakassa pūretvā nīluppālādīhi sañchādenti. Tesu tesu padesesu udakayantāni karonti, yehi deve vassante viya udakadhārā nikkhamanti.

Bodhisattassa pana aṭṭhasatasuvaṇṇaghaṭe ca rajataghaṭe ca gandhodakassa pūretvā nīluppalaḡacchake katvā sayanaṃ parivāretvā ṭhapayīmsu. Mahantesu lohakaṭāhesu gandhakalalaṃ pūretvā nīluppalapadumaṃpuṇḍarīkāni ropetvā utuggahaṇattāya tattha tattha ṭhapesuṃ. Sūriyasmīhi pupphāni pupphanti. Nānāvidhā bhamaragaṇā pāsādaṃ pavisitvā pupphesu rasaṃ gaṇhantā vicaranti. Pāsādo atisugandho hoti. Yamakabhittiyā antare lohanāḷiṃ ṭhapetvā navabhūmikapāsādassa upari ākāsaṅgaṇe ratanaṃaṇḍapamatthake sukhumacchiddakaṃ jālaṃ baddhaṃ ahoṣi. Ekasmīṃ ṭhāne sukkhamahiṃsacammaṃ pasāreti. Bodhisattassa udakakīḷanavelāya mahīmsacamme pāsāṇaḡule khipanti, meghathanitasaddo viya hoti. Heṭṭhā yantaṃ parivattenti, udakaṃ abhiruhitvā jālamattthake patati, vassapatanasalilaṃ viya hoti. Tadā bodhisatto nīlapaṭaṃ nivāseti, nīlapaṭaṃ pārūpati, nīlapasādhanāṃ pasādheti. Parivārāpissa cattālīsanāṭakasahassāni nīlavattthābharaṇāneva nīlavilepanāni hutvā mahāpurisaṃ parivāretvā ratanaṃaṇḍapaṃ gaṇchanti. Divasabhāgaṃ udakakīḷaṃ kīḷanto sīlalaṃ utusukhaṃ anubhoti.

Pāsādassa catūsu disāsu cattāro sarā honti. Divākāle nānāvāṇṇasakuṇagaṇā pācīnasarato vuṭṭhāya viravamānā pāsādamattthakena pacchimasaraṃ gaṇchanti. Pacchimasarato vuṭṭhāya pācīnasaraṃ, uttarasarato dakkhiṇasaraṃ, dakkhiṇasarato uttarasaraṃ gaṇchanti, antaravassasamayo viya hoti. Hemantikapāsādo pana pañcabhūmiko ahoṣi, vassikapāsādo sattabhūmiko.

Nippurisehīti purisavirahitehi. Na kevalaṇcetta tūriyāneva nippurisāni, sabbaṭṭhānānipi nippurisāneva. Dovārikāpi itthiyova, nhāpanādīparikkammakarāpi itthiyova. Rājā kira – “tathārūpaṃ issariyasukhasampattiṃ anubhavamānassa purisaṃ disvā parisāṅkā uppajjati, sā me puttassa mā ahoṣi”ti sabbakiccesu itthiyova ṭhapesi. **Tāya ratiyā ramamānoti** idaṃ catutthajjhānikaphalasaṃpattiratiṃ sandhāya vuttaṃ.

212. Gahapati vā gahapatiputto vāti ettha yasmā khattiyānaṃ setacchattasmīyeva patthanā hoti,

mahā ca nesam papañco, brāhmaṇā mantehi atittā mante gavesantā vicaranti, gahapatino pana muddāgaṇanamattam ugghitakālato paṭṭhāya sampattiṃyeva anubhavanti, tasmā khattiyabrāhmaṇe aggahetvā “gahapati vā gahapatiputto vā”ti āha. **Āvaṭṭeyyāti** mānusakakāmahetu āvaṭṭo bhaveyyāti attho. **Abhikkantatarāti** visiṭṭhatarā. **Paṇīatarāti** atappakatarā. Vuttampi cetam –

“Kusaggenudakamādāya, samudde udakam mine;
Evam mānusakā kāmā, dibbakāmāna santike”ti. (jā. 2.21.389) –

Samadhigayha tiṭṭhātī dibbasukham gaṇhitvā tato visiṭṭhatarā hutvā tiṭṭhati.

Opammasaṃsandanam panettha evam veditabbam – gahapatissa pañcahi kāmaguṇehi samaṅgībhūtakālo viya bodhisattassa tīsu pāsādesu cattālīsasahassaitthimajjhe modanakālo, tassa sucaritam pūretvā sagge nibbattakālo viya bodhisattassa abhinikkhamanam katvā bodhipallaṅke sabbaññutam paṭividdhakālo, tassa nandanavane sampattiṃ anubhavanakālo viya tathāgatassa catutthajjhānikaphalasangāhāpattiratiyā vītivattanakālo, tassa mānusakānam pañcannam kāmaguṇānam apatthanakālo viya tathāgatassa catutthajjhānikaphalasangāhāpattiratiyā vītināmentassa hīnajanasukhassa apatthanakāloti.

213. Sukhīti paṭhamam dukkhito pacchā sukhito assa. **Serīti** paṭhamam vejjadutiyako pacchā serī ekako bhaveyya. **Sayaṃvasīti** paṭhamam vejjassa vase vattamāno vejjena nisīdāti vutte nisīdi, nipajjāti vutte nipajji, bhuñjāti vutte bhuñji, pivāti vutte pivi, pacchā sayaṃvasī jāto. **Yena kāmam gamoti** paṭhamam icchitichitaṭṭhānam gantum nālattha, pacchā roge vūpasante vanadassana-giridassana-pabbatadassanādīsipi yenakāmam gamo jāto, yatha yattheva gantum icchati, tattha tattheva gaccheyya.

Etthāpi idam opammasaṃsandanam – purisassa kuṭṭhikālo viya hi bodhisattassa agāramajjhe vasanakālo, aṅgārapallam viya ekaṃ kāmavattu, dve kapallāni viya dve vatthūni, sakkassa pana devaraṅgāni aḍḍhateyyakoṭiyāni aṅgārapallāni viya aḍḍhatiyanāṭakakoṭiyō, nakhehi vaṇamukhāni tacchetvā aṅgārapalle paritāpanam viya vatthupaṭisevanam, bhesajjam āgamma arogakālo viya kāmesu ādīnavam nekkhamme ca ānisaṃsam disvā nikkhamma buddhabhūtakāle catutthajjhānikaphalasangāhāpattiratiyā vītivattanakālo, aññam kuṭṭhipurisam disvā apatthanakālo viya tāya ratiyā vītināmentassa hīnajanaratiyā apatthanakāloti.

214. Upahatindriyoti kimirakuṭṭhena nāma upahatakāyappasādo. **Upahatindriyāti** upahatapaññindriyā. Te yathā so upahatakāyindriyo kuṭṭhī dukkhasamphassasmimyeva aggismim sukhamiti viparītasaññam paccalattha, evam paññindriyassa upahatattā dukkhasamphassesveva kāmesu sukhamiti viparītasaññam paccalattham.

215. Asucitarāni cevātiādīsū pakatiyāva tāni asucīni ca duggandhāni ca pūtīni ca, idāni pana asucitarāni ceva duggandhatarāni ca pūtitarāni ca hontī. **Kācīti** tassa hi paritāpentassa ca kaṇḍūvantassa ca pānakā anto pavisanti, duṭṭhalohitaduṭṭhapubbā paggharanti. Evamassa kācī assādamattā hoti.

Ārogyaparamāti gāthāya ye keci dhanalābhā vā yasalābhā vā puttalābhā vā atthi, ārogyam tesam paramam uttamam, natthi tato uttaritaro lābhoti, ārogyaparamā lābhā. Yamkiñci jhānasukham vā maggasukham vā phalasukham vā atthi, nibbānam tattha paramam, natthi tato uttaritaram sukhamti nibbānam paramam sukham. **Aṭṭhaṅgiko maggānanti** pubbhāgamaggānam pubbhāgagamaneneva amatagāmīnam aṭṭhaṅgiko khemo, natthi tato khemataro añño maggo. Atha vā **khemaṃ amatagāmīnanti** ettha khemantipi amatantipi nibbānasveva nāmam. Yāvata puthusamaṇabrāhmaṇā parappavādā khemagāmīno ca amatagāmīno cāti laddhivasena gahitā, sabbesam tesam khemaamatagāmīnam maggānam aṭṭhaṅgiko paramo uttamoti ayamettha attho.

216. Ācariyapācariyānanti ācariyānañceva ācariyācariyānañca. **Sametīti** ekanāliyā mitam viya

ekatulāya tulitaṃ viya sadisaṃ hoti ninnānākaraṇaṃ. **Anomajjatīti** paṇiṃ heṭṭhā otārento majjati – “idaṃ taṃ, bho gotama, ārogyaṃ, idaṃ taṃ nibbāna”nti kālena sīsaṃ kālena uraṃ parimajjanto evamāha.

217. Chekanti sampannaṃ. **Sāhuḷicīrenāti** kāḷakehi eḷakalomehi katathūlacīrena.

Saṅkāracoḷakenātipi vadanti. **Vācaṃ nicchāreyyāti** kālena dasāya kālena ante kālena majjhe parimajjanto nicchāreyya, vadeyyāti attho. **Pubbakehesāti** pubbakehi esā. Vipassīpi hi bhagavā...pe... kassapopi bhagavā catuparisamajjhe nisinno imaṃ gāthaṃ abhāsi, “atthanissitagāthā”ti mahājano uggaṇhi. Satthari parinibbute aparabhāge paribbājakānaṃ antaraṃ pavittihā. Te potthakagataṃ katvā padadvayameva rakkhitaṃ sakkhimsu. Tenāha – **sā etarahi anupubbena puthujjanagāthāti**.

218. Rogova bhūtoti **rogabhūto**. Sesapadesupi eseva nayo. **Ariyaṃ cakkhūti** parisuddhaṃ vipassanāñāṇaṇceva maggañāṇaṇca. **Pahotīti** samattho. **Bhesajjaṃ kareyyāti** uddhaṃvirecanaṃ adhovirecanaṃ añjanañcāti bhesajjaṃ kareyya.

219. Na cakkhūni uppādeyyāti yassa hi antarā pittasemhādīpaliveṭhena cakkhupasādo upahato hoti, so chekaṃ vejjaṃ āgamma sappāyabhesajjaṃ sevanto cakkhūni uppādeti nāma. Jaccandhassa pana mātukucchiyaṃyeva vinaṭṭhāni, tasmā so na labhati. Tena vuttaṃ “na cakkhūni uppādeyyā”ti.

220. Dutiyavāre **jaccandhoti** jātakālato paṭṭhāya pittādīpaliveṭhena andho. **Amusmīti** tasmīṃ pubbe vutte. **Amittatopi daheyyāti** amitto me ayanti evaṃ amittato ṭhapeyya. Dutiyapadepi eseva nayo. **Iminā cittenāti** vaṭṭe anugatacittena. **Tassa me upādānapaccayāti** ekasandhi dvisāṅkhepo paccayākāro kathito, vaṭṭaṃ vibhāvitaṃ.

221. Dhammānudhammanti dhammassa anudhammaṃ anucchavikaṃ paṭipadaṃ. **Ime rogā gaṇḍā sallāti** pañcakkhandhe dasseti. **Upādānanirodhāti** vivaṭṭaṃ dassento āha. Sesāṃ sabbattha uttānamevāti.

Papañcasūdaniyā majjhimanikāyaṭṭhakathāya

Māgaṇḍiyasuttavaṇṇanā niṭṭhitā.

6. Sandakasuttavaṇṇanā

223. Evaṃ me sutanti sandakasuttaṃ. Tattha **pilakkhaguhāyanti** tassā guhāya dvāre pilakkharukkho ahoṣi, tasmā pilakkhaguhātveva saṅkhaṃ gatā. **Paṭisallānā vuṭṭhitoti** vivekato vuṭṭhito. **Devakatasobbhōti** vassodakeneva tinnatṭhāne jāto mahāudakarahado. **Guhādassanāyāti** ettha **guhāti** paṃsuguhā. Sā unname udakamuttatṭhāne ahoṣi, ekato umaṅgaṃ katvā khāṇuke ca paṃsuñca nīharitvā anto thambhe ussāpetvā matthake padaracchannagehasāṅkhepena katā, tattha te paribbājakā vasanti. Sā vassāne udakapuṇṇā tiṭṭhati, nidāghe tattha vasanti. Taṃ sandhāya “guhādassanāyā”ti āha. Vihāradassanattahāhi anamataggiyaṃ paccavekkhitvā samuddapabbatadassanattaṃ vāpi gantaṃ vaṭṭatīti.

Unnādinīyāti uccaṃ nadamānāya. Evaṃ nadamānāya cassā uddhaṅgamanavasena ucco, disāsu patthaṭavasena mahāsaddoti uccāsaddamahāsaddo, tāya **uccāsaddamahāsaddāya**. Tesāṃ paribbājakānaṃ pātova uṭṭhāya kattabbaṃ nāma cetiyavattaṃ vā bodhivattaṃ vā ācariyupajjhāyavattaṃ vā yonisomanasikāro vā natthi. Tena te pātova uṭṭhāya bālātape nisinnā, sāyaṃ vā kathāya phāsukatthāya sannipatitā “imassa hattho sobhaṇo imassa pādo”ti evaṃ aññamaññassa hatthapādādīni vā ārabha itthipurisadāraḍārikāvaṇṇe vā aññaṃ vā kāmassādabhavassādādivatthūṃ ārabha kathaṃ paṭṭhapetvā anupubbena rājakathādiānekavidhaṃ tiracchānakathaṃ kathenti. Sā hi anīyānikatā saggamokkhamaggānaṃ tiracchānabhūtā kathāti **tiracchānakathā**. Tattha rājānaṃ ārabha

“mahāsammatō mandhātā dhammāsoko evaṃmahānubhāvo”tiādinā nayena pavattā kathā **rājakathā**. Esa nayo **corakathādīsu**.

Tesu “asuko rājā abhirūpo dassanīyo”tiādinā nayena gehassitakathāva tiracchānakathā hoti. “Sopi nāma evaṃ mahānubhāvo khayam gato”ti evaṃ pavattā pana kammaṭṭhānabhāve tiṭṭhati. Coresupi “mūladevo evaṃmahānubhāvo, meghamālo evaṃmahānubhāvo”ti tesam kammaṃ paṭicca aho sūrāti gehassitakathāva tiracchānakathā. Yuddhepi bhāratayuddhādīsu “asukena asuko evaṃ mārīto evaṃ viddho”ti kāmāsādavaseneva kathā tiracchānakathā. “Tepi nāma khayam gatā”ti evaṃ pavattā pana sabbattha kathā kammaṭṭhānameva hoti. Apica annādīsu “evaṃ vaṇṇavantaṃ gandhavantaṃ rasavantaṃ phassasampannaṃ khādimha bhuñjīma pivimha paribhuñjīmā”ti kāmāsādavasena kathetum na vaṭṭati, sātthakaṃ pana katvā – “pubbe evaṃ vaṇṇādisampannaṃ annaṃ pānaṃ vatthaṃ sayanaṃ mālaṃ gandhaṃ silavantānaṃ adama, cetiye pūjaṃ akarimhā”ti kathetum vaṭṭati.

Ñātikathādīsūpi “amhākaṃ ñātakā sūrā samatthā”ti vā “pubbe mayam evaṃ vicitrehi yānehi carimhā”ti vā assādavasena vattum na vaṭṭati, sātthakaṃ pana katvā “tepi no ñātakā khayam gatā”ti vā “pubbe mayam evarūpā upāhanā saṅghassa adama”ti vā kathetabbā. **Gāmakathāpi** suniviṭṭhadunniviṭṭhasubhikkhadubbhikkhādivasena vā “asukagāmaṃvāsino sūrā samatthā”ti vā evaṃ assādavasena na vaṭṭati, sātthakaṃ pana katvā saddhā pasannāti vā khayavayaṃ gatāti vā vattum vaṭṭati. **Nigamanagarajanapadakathāsūpi** eseva nayo. **Itthikathāpi** vaṇṇasaṅṭhānādīni paṭicca assādavasena na vaṭṭati, saddhā pasannā khayam gatāti evameva vaṭṭati. **Sūrakathāpi** nandimitto nāma yodho sūro ahoṣīti assādavaseneva na vaṭṭati, saddho pasanno ahoṣi khayam gatoti evameva vaṭṭati. **Visikhākathāpi** asukā visikhā suniviṭṭhā dunniviṭṭhā sūrā samatthāti assādavaseneva na vaṭṭati, saddhā pasannā khayam gatā iccevaṃ vaṭṭati.

Kumbhaṭṭhānakathāti kumbhaṭṭhānaudakatitthakathā vā vuccati kumbhadāsikathā vā. Sāpi “pāsādikā naccitum gāyitum chekā”ti assādavasena na vaṭṭati, saddhā pasannātiādinā nayeneva vaṭṭati. **Pubbapetakathāti** atītañātikathā. Tattha vattamānañātikathāsadisova vinicchayo.

Nānattakathāti purimapakchimakathāvimuttā avasesā nānāsabhāvā niratthakakathā. **Lokakkhāyikāti** ayaṃ loko kena nimmito, asukena nāma nimmito, kākā setā aṭṭhīnaṃ setattā, bakā rattā lohitaṃ rattattāti evamādikā lokāyatavitaṇḍasallāpakathā.

Samuddakkhāyikā nāma kasmā samuddo sāgaro, sāgaradevena khaṇitattā sāgaro, khato meti hatthamuddāya niveditattā samuddoti evamādikā niratthakā samuddakkhāyikakathā. Iti bhavo, iti abhavoti yaṃ vā taṃ vā niratthakakāraṇaṃ vatvā pavattitakathā **itibhavābhavakathā**. Ettha ca bhavoti sassataṃ, abhavoti ucchedaṃ. Bhavoti vaḍḍhi, abhavoti hāni. Bhavoti kāmasukhaṃ, abhavoti attakilamatho. Iti imāya chabbidhāya itibhavābhavakathāya saddhiṃ bāttimsatiracchānakathā nāma hoti. Evarūpiṃ tiracchānakathaṃ kathentiyaṃ nisinna hoti.

Tato sandako paribbājako te paribbājake oloketvā – “ime paribbājakā ativiya aññamaññaṃ agāravā appatissā, mayaṅca samaṇassa gotamassa pātubhāvato paṭṭhāya sūriyuggamane khajjopanakūpamā jātā, lābhasakkāropi no parihīno. Sace pana imaṃ ṭhānaṃ samaṇo gotamo gotamasāvako vā gihiupaṭṭhākopi vāssa āgaccheyya, ativiya lajjanīyaṃ bhavissati. Parisadoso kho pana parisajetthakasseva upari ārohati”ti ito cito ca vilokento theram addasa. Tena vuttaṃ **addasā kho sandako paribbājako...pe... tuṅhī ahesunti**.

Tattha **saṅṭhapesīti** sikkhāpesi, vajjamassā paṭicchādesi. Yathā suṭṭhapitā hoti, tathā naṃ ṭhapesi. Yathā nāma parisamajjhaṃ pavisanto puriso vajjapaṭicchādanatthaṃ nivāsanaṃ saṅṭhapeti, pārūpanaṃ saṅṭhapeti, rajokīṇṇaṭṭhānaṃ puñchati, evamassā vajjapaṭicchādanatthaṃ “appasaddā bhonto”ti sikkhāpento yathā suṭṭhapitā hoti, tathā naṃ ṭhapesīti attho. **Appasaddakāmāti** appasaddaṃ icchanti, ekakā nisīdanti, ekakā tiṭṭhanti, na gaṇasaṅgaṇikāya yāpenti. **Appasaddavinītāti** appasaddena niravena

buddhena vinītā. **Appasaddassa vaṇṇavādinoti** yaṃ ṭhānaṃ appasaddaṃ nissaddaṃ. Tassa vaṇṇavādinō. **Upasaṅkamtibbaṃ maññeyyāti** idhāgantabbaṃ maññeyya.

Kasmā pana therassa upasaṅkamaṇaṃ paccāsīsatīti. Attano vuddhiṃ patthayamāno. Paribbājakā kira buddhesu vā buddhasāvakesu vā attano santikaṃ āgatesu – “ajja amhākaṃ santikaṃ samaṇo gotamo āgato, sārīputto āgato, na kho panete yassa vā tassa vā santikaṃ gacchanti, passatha amhākaṃ uttamabhāva”nti attano upaṭṭhākānaṃ santike attānaṃ ukkhipanti uce ṭhāne ṭhapenti. Bhagavatopi upaṭṭhāke gaṇhituṃ vāyamanti. Te kira bhagavato upaṭṭhāke disvā evaṃ vadanti – “tumahākaṃ satthā bhavaṃ gotamopi gotamassa sāvakāpi amhākaṃ santikaṃ āgacchanti, mayaṃ aññamaññaṃ samaggā. Tumhe pana amhe akkhīhi passituṃ na icchatha, sāmīcikkammaṃ na karotha, kiṃ vo amhehi aparaddha”nti. Appekacce manussā – “buddhāpi etesaṃ santikaṃ gacchanti, kiṃ amhāka”nti tato paṭṭhāya te disvā nappamajjanti. **Tuṇhī ahesunti** sandakaṃ parivāretvā nissaddā nisīdiṃsu.

224. Svāgataṃ bhoto ānandassāti suāgamaṇaṃ bhoto ānandassa. Bhavante hi no āgate ānando hoti, gate sokoti dīpeti. **Cirassaṃ khoti** piyasamudācāravacanametam. Thero pana kālena kālaṃ paribbājakārāmaṃ cārikatthāya gacchatīti purimagamaṇaṃ gahetvā evamāha. Evañca pana vatvā na mānathaddho hutvā nisīdi, attano pana āsanā vuṭṭhāya taṃ āsanaṃ papphoṭetvā theram āsana nimantento **nisīdatu bhavaṃ ānando, idamāsaṇaṃ paññattanti** āha.

Antarākathā vipakatāti nisinnānaṃ vo ārambhato paṭṭhāya yāva mamāgamaṇaṃ etasmiṃ antare kā nāma kathā vipakatā, mamāgamaṇapaccayā katamā kathā pariyantaṃ na gatāti pucchati.

Atha paribbājako “niratthakakathāva esā nissārā vaṭṭasannissitā, na tumhākaṃ purato vattabbaṃ arahatī”ti dīpento **tiṭṭhatesā, bhoti**ādīmāha. **Nesā bhoti** sace bhavaṃ sotukāmo bhavissati, pacchāpesā kathā na dullabhā bhavissati, amhākaṃ panimāya attho natthi. Bhoto pana āgamaṇaṃ labhitvā aññadeva sukāraṇaṃ kathaṃ sotukāmaṃhāti dīpeti. Tato dhammadesanaṃ yācanto **sādhu vata bhavantaṃ ye vāti**ādīmāha. Tattha **ācariyake**ti ācariyasamaye. **Anassāsikānīti** assāsavirahitāni. **Sasakkanti** ekaṃsatthe nipāto, viññū puriso ekaṃseneva na vaseyyāti attho. **Vasanto ca nārādheyyāti** na sampādeyya, na paripūreyyāti vuttaṃ hoti. **Ñayaṃ dhammaṃ kusalanti** kāraṇabhūtaṃ anavajjaṭṭhena kusalaṃ dhammaṃ.

225. Idhāti imasmiṃ loke. **Natthi dinnanti**ādīni sāleyyakasutte (ma. ni. 1.440) vuttāni. **Cātumahābhūtikoti** cātumahābhūtamayo. **Pathavī pathavīkāyanti** ajjhattikā pathavīdhātu bāhirapathavīdhātuṃ. **Anupetīti** anuyāti. **Anupagacchatīti** tasseva vevacanaṃ, anugacchatītipi attho, ubhayenāpi upeti upagacchatīti dasseti. Āpādīsipi eseva nayo. **Indriyānīti** manacchaṭṭhāni indriyāni ākāsaṃ pakkhandanti. **Āsandipaṇcamāti** nipannamañcena pañcamā, mañco ceva, cattāro mañcapāde gahetvā ṭhitā cattāro purisā cāti attho. **Yāvālāhanāti** yāva susānā. **Padānīti** ayaṃ evaṃ sīlavā ahoṣi, evaṃ dussīlotiādīnā nayena pavattāni guṇapadāni. Sarīrameva vā ettha padānīti adhippetam. **Kāpotakānīti** kapotakavaṇṇāni, pārāvatapakkhavaṇṇānīti attho.

Bhassantāti bhasmantā, ayameva vā pāli. **Āhutiyo**ti yaṃ paheṇakasakkārādibhedam dinnadānaṃ, sabbam taṃ chārikāvasānameva hoti, na tato paraṃ phaladāyakaṃ hutvā gacchatīti attho. **Dattupaññattanti** dattūhi bālamanussehi paññattaṃ. Idaṃ vuttaṃ hoti – bālehi abuddhīhi paññattamidaṃ dānaṃ, na paṇḍitehi. Bālā denti, paṇḍitā gaṇhantīti dasseti. **Atthikavādanti** atthi dinnam dinnaphalanti imaṃ atthikavādameva vadanti tesam tuccham vacanaṃ musāvīlāpo. **Bāle ca paṇḍite cāti** bālā ca paṇḍitā ca.

Akatena me ettha katanti mayhaṃ akateneva samaṇakammaṇa ettha etassa samaye kammaṃ kataṃ nāma hoti, avusiteneva brahmacariyena vusitaṃ nāma hoti. **Etthāti** etasmiṃ samaṇadhamme. **Samasamāti** ativiya samā, samena vā guṇena samā. **Sāmaññaṃ pattāti** samānabhāvaṃ pattā.

226. Karatotiādīni apanṇakasutte vuttāni. **Tathā natthi hetūtiādīni.**

228. Catutthabrahmacariyavāse **akaṭāti** akatā. **Akaṭavidhāti** akatavidhānā, evaṃ karohīti kenaci kārāpitā na hontīti attho. **Animmitāti** iddhiyāpi na nimmitā. **Animmātāti** animmāpitā. Keci animmitabbāti padaṃ vadanti, taṃ neva pāḷiyam, na aṭṭhakathāyaṃ sandissati. **Vañjhāti** vañjhapasuvañjhatalādayo viya aphaḷā, kassaci ajanakāti attho. Etena pathavīkāyādīnaṃ rūpādījanakabhāvaṃ paṭikkhipati. Pabbatakūṭā viya ṭhitāti **kūṭaṭṭhā**. **Īsikaṭṭhāyīṭṭhitāti** muñje īsikā viya ṭhitā. Tatrāyamadhippāyo – yamidaṃ jāyatīti vuccati, taṃ muñjato īsikā viya vijjamānameva nikkhamatīti. “Esikaṭṭhāyīṭṭhitā”tipi pāṭho, sunikhāto esikatthambho niccalo tiṭṭhati, evaṃ ṭhitāti attho. Ubhayenapi tesam vināsābhāvaṃ dīpeti. **Na iñjantīti** esikatthambho viya ṭhitattā na calanti. **Na vipariṇāmentīti** pakatiṃ na jahanti. **Na aññamaññaṃ byābādhentīti** aññamaññaṃ na upahananti. **Nālanti** na samatthā.

Pathavīkāyotiādīsu pathavīyeva pathavīkāyo, pathavīsamūho vā. **Tatthāti** tesu jīvasattamesu kāyesu. **Natthi hantā vāti** hantaṃ vā ghātetuṃ vā sotuṃ vā sāvetuṃ vā jānituṃ vā jānāpetuṃ vā samattho nāma natthīti dīpeti. **Sattannaṃtveva kāyānanti** yathā muggarāsīādīsu pahaṭaṃ satthaṃ muggarāsīādīnaṃ antarena pavisati, evaṃ sattannaṃ kāyānaṃ antarena chiddena vivarena satthaṃ pavisati. Tattha “ahaṃ imaṃ jīvitā voropemi”ti kevalaṃ saññāmatameva hotīti dasseti. **Yonipamukhasatasahassānīti** pamukhayaonīnaṃ uttamayonīnaṃ cuddasatasahassāni aññāni ca saṭṭhisatāni aññāni ca chasatāni. **Pañca ca kammuno satānīti** pañca kammāsātāni ca, kevalaṃ takkamattakena niratthakaṃ dīṭṭhiṃ dīpeti. **Pañca ca kammāni tīpi ca kammānīti**ādīsupi eseva nayo. Keci panāhu **pañca kammānīti** pañcindriyavasena bhaṇāti. **Tīpīti** kāyakammādivasenāti. **Kamme ca aḍḍhakamme cāti** ettha panassa kāyakammañca vacīkammañca kammanti laddhi, manokammaṃ upaḍḍhakammanti. **Dvaṭṭhipaṭipadāti** dvāsatti paṭipadāti vadati. **Dvaṭṭhantarakappāti** ekasmiṃ kappe catusatti antarakappā nāma honti, ayaṃ pana aññe dve ajānanto evamāha. **Chalābhijātiyo** apanṇakasutte vitthārītā.

Aṭṭha purisabhūmiyoti mandabhūmi khiḍḍābhūmi vīmaṃsakabhūmi ujugatabhūmi sekkhabhūmi samaṇabhūmi jinabhūmi pannabhūmīti imā aṭṭha purisabhūmiyoti vadati. Tattha jātaḍḍhasato paṭṭhāya sattadivase sambādhaṭṭhānato nikkhantattā sattā mandā honti momūhā. Ayaṃ mandabhūmīti vadati. Ye pana duggatito āgatā honti, te abhiṇṇaṃ rodanti ceva viravanti ca. Sugatito āgatā taṃ anussarivā anussarivā hasanti. Ayaṃ khiḍḍābhūmi nāma. Mātāpitūnaṃ hatthaṃ vā pādaṃ vā mañcaṃ vā pīṭhaṃ vā gahetvā bhūmiyaṃ padanikkhipanaṃ vīmaṃsakabhūmi nāma. Padasāva gantuṃ samatthakālo ujugatabhūmi nāma. Sippānaṃ sikkhanakālo sekkhabhūmi nāma. Gharā nikkhamma pabbajanakālo samaṇabhūmi nāma. Ācariyaṃ sevivā jānanakālo jinabhūmi nāma. Bhikkhu ca pannako jino na kiñci āhāti evaṃ alābhīṃ samaṇaṃ pannabhūmīti vadati.

Ekūnapaññāsa ājīvasateti ekūnapaññāsa ājīvavuttisatāni. **Paribbājakasateti** paribbājakapabbajjasatāni. **Nāgāvāsasateti** nāgamaṇḍalasatāni. **Vīse indriyasateti** vīsa indriyasatāni. **Tiṃse nirayasateti** tiṃsa nirayasatāni. **Rajodhātuyoti** rajaokiraṇaṭṭhānāni. Hatthapiṭṭhipādapiṭṭhādīni sandhāya vadati. **Satta saññīgabbhāti** oṭṭhagoṇagadrabhaajapasumigamahimse sandhāya vadati. **Asaññīgabbhāti** sāliyavagodhumamuggakaṅguvarakakudrūsake sandhāya vadati. **Nigaṇṭhīgabbhāti** nigaṇṭhimhi jātagabbhā, ucchuveḷunaḷādayo sandhāya vadati. **Satta devāti** bahū devā, so pana sattāti vadati. Mānusāpi anantā, so sattāti vadati. **Satta pisācāti** pisācā mahantā, sattāti vadati.

Sarāti mahāsarā. Kaṇṇamuṇḍa-rathakāra-anotatta-sīhapapātakulīra-mucalinda-kuṇāladahe gahetvā vadati. **Pavuṭāti** gaṇṭhikā. **Papātāti** mahāpapātā. **Papātasatānīti** khuddakapapātasatāni. **Supināti** mahāsupinā. **Supinasatānīti** khuddakasupinasatāni. **Mahākappinoti** mahākappānaṃ. Ettha ekamhā sarā vassasate vassasate kusaggena ekaṃ udakabinduṃ nīharivā nīharivā sattakkhattuṃ tamhi sare nirudake kate eko mahākappoti vadati. Evarūpānaṃ mahākappānaṃ caturāsītisatasahassāni khepetvā bālā ca paṇḍitā ca dukkhassantaṃ karontīti ayamassa laddhi. Paṇḍitopi kira antarā sujjhituṃ na sakkoti, bālopi

tato uddham na gacchati.

Sīlenāti acelakasīlena vā aññena vā yena kenaci. **Vatenāti** tādīsena vatena. **Tapenāti** tapokammena. Aparipakkaṃ paripāceti nāma yo “ahaṃ paṇḍito”ti antarā visujjhati. Paripakkaṃ phussa phussa byantiṃ karoti nāma yo “ahaṃ bālo”ti vuttaparimāṇaṃ kālaṃ atikkamivā yāti. **Hevaṃ natthīti** evaṃ natthi. Tañhi ubhayampi na sakkā kātunti dīpeti. **Doṇamiteti** doṇena mitaṃ viya. **Sukhadukkheti** sukhadukkhaṃ. **Pariyantakateti** vuttaparimāṇena kālena katapariyanto. **Natthi hāyanavaḍḍhaneti** natthi hāyanavaḍḍhanāni. Na saṃsāro paṇḍitassa hāyati, na bālassa vaḍḍhatīti attho. **Ukkaṃsāvakaṃseti** ukkaṃsāvakaṃsā, hāpanavaḍḍhanānamevetaṃ vevacanaṃ. Idāni tamatthaṃ upamāya sādiento **seyyathāpi nāmāti**ādīmāha. Tattha **suttaḡuḷeti** veḥetvā katasuttaḡuḷaṃ. **Nibbeḥhiyamānameva paletīti** pabbate vā rukkhaḡe vā ṭhatvā khittaṃ suttapamaṇena nibbeḥhiyamānaṃ gacchati, sutte khīṇe tattha tiṭṭhati na gacchati. Evamevaṃ vuttakālato uddham na gacchatīti dasseti.

229. Kimidanti kimidaṃ tava aññāṇaṃ, kiṃ sabbaññu nāma tvanti evaṃ puṭṭho samāno niyatīvāde pakkhipanto **suññaṃ me agāranti**ādīmāha.

230. Anussaviko hotīti anussavanissito hoti. **Anussavasaccoti** savanaṃ saccato gahetvā ṭhito. **Piṭakasampadāyāti** vaggapaṇṇāsakāya piṭakaganthasampattiyā.

232. Mandoti mandapañño. **Momūhoti** atimūḷho. **Vācāvikkhepaṃ āpajjatīti** vācāya vikkhepaṃ āpajjati. Kīdisaṃ? Amarāvikkhepaṃ, apariyantavikkhepanti attho. Atha vā amarā nāma macchajāti. Sā ummuḡjananimmuḡjanādivasena udake sandhāvamānā gahetuṃ na sakkāti evameva ayampi vādo ito cito ca sandhāvati, gāhaṃ na upagacchatīti amarāvikkhepoti vuccati. Taṃ amarāvikkhepaṃ.

Evantipi me notiādīsu idaṃ kusalanti puṭṭho “evantipi me no”ti vadati, tato kiṃ akusalanti vutte “tathātipi me no”ti vadati, kiṃ ubhayato aññathāti vutte “aññathātipi me no”ti vadati, tato tividhenāpi na hotīti te laddhīti vutte “notipi me no”ti vadati, tato kiṃ no noti te laddhīti vutte “no notipi me no”ti vikkhepaṃāpajjati, ekasmimpī pakkhe na tiṭṭhati. **Nibbijja pakkamatīti** attanopi esa satthā avassayo bhavituṃ na sakkoti, mayhaṃ kiṃ sakkhissatīti nibbinditvā pakkamati. Purimesupi anassāsikesu eseva nayo.

234. Sannidhikāraṃ kāme paribhuñjanti yathā pubbe gihbhūto sannidhiṃ katvā vatthukāme paribhuñjati, evaṃ tilataṇḍulasappinavanitādīni sannidhiṃ katvā idāni paribhuñjituṃ abhabboti attho. Nanu ca khīṇāsavassa vasanaṭṭhāne tilataṇḍulādayo paññāyantīti. No na paññāyanti, na panesa te attano atthāya ṭhapeti, aphaṃsupapabbajitādīnaṃ atthāya ṭhapeti. Anāgāmissa kathanti. Tassāpi pañca kāmaguṇā sabbasova pahīnā, dhammena pana laddhaṃ vicāretvā paribhuñjati.

236. Puttamatāya puttāti so kira imaṃ dhammaṃ sutvā ājīvakā matā nāmāti saññī hutvā evamāha. Ayañhettha attho – ājīvakā matā nāma, tesam mātā puttamatā hoti, iti ājīvakā puttamatāya puttā nāma honti. **Samaṇe gotameti** samaṇe gotame brahmacariyavāso atthi, aññattha natthīti dīpeti. Sesam sabbattha uttānamevāti.

Papañcasūdaniyā majjhimanikāyatṭhakathāya

Sandakasuttavaṇṇanā niṭṭhitā.

7. Mahāsakuludāyisuttavaṇṇanā

237. Evaṃ me sutanti mahāsakuludāyisuttaṃ. Tattha **moraniṅvāpeti** tasmim ṭhāne morānaṃ abhayaṃ ghoṣetvā bhojanaṃ adamsu. Tasmā taṃ ṭhānaṃ **moraniṅvāpoti** saṅkhaṃ gataṃ. **Annabhāroti**

ekassa paribbājakassa nāmaṃ. Tathā **varadharoti**. **Aññe cāti** na kevalaṃ ime tayo, aññepi abhiññātā bahū paribbājakā. **Appasaddassa vaṇṇavādīti** idha appasaddavinītoti avatvāva idaṃ vuttaṃ. Kasmā? Na hi bhagavā aññena vinītoti.

238. Purimānīti hiyyodivasam upādāya purimāni nāma honti, tato paraṃ purimatarāni. **Kutūhalasālāyanti** kutūhalasālā nāma paccekasālā natthi, yattha pana nānātitthiyā samaṇabrāhmaṇā nānāvidhaṃ kathaṃ pavattenti, sā bahūnaṃ – “ayaṃ kiṃ vadati, ayaṃ kiṃ vadati”’ti kutūhaluppattiṭṭhānato “kutūhalasālā”’ti vuccati. “Kotūhalasālā”’tipi pāṭho. **Lābhāti** ye evarūpe samaṇabrāhmaṇe daṭṭhaṃ pañhaṃ pucchitaṃ dhammakathaṃ vā nesam sotaṃ labhanti, tesam āngamagadhānaṃ ime lābhāti attho.

Saṅghinotiādīsu pabbajitasamūhasaṅkhāto saṅgho etesaṃ atthīti **saṅghino**. Sveva gaṇo etesaṃ atthīti **gaṇino**. Ācārasikkhāpanavasena tassa gaṇassa ācariyāti **gaṇācariyā**. **Nātāti** paññātā pākaṭā. Yathābhuccagaṇehi ceva ayathābhūtagaṇehi ca samuggato yaso etesaṃ atthīti **yasassino**. Pūraṇādīnañhi “appiccho santuṭṭho, appicchatāya vatthampi na nivāseti”’tiādīnā nayena yaso samuggato, tathāgatassa “itipi so bhagavā”’tiādīhi yathābhūtagaṇehi. **Titthakarāti** laddhikarā. **Sādhusammataṭi** ime sādhuṃ suṇḍarā sappurisāti evaṃ sammataṭi. **Bahujanassāti** assutavato ceva andhabālaputhujjanassa vibhāvino ca paṇḍitajanassa. Tattha titthiyā bālayanassa evaṃ sammataṭi, tathāgato paṇḍitajanassa. Iminā nayena **pūraṇo kassapo saṅghīti**ādīsu attho veditabbo. Bhagavā pana yasmā aṭṭhatimṣa ārammaṇāni vibhajanto bahūni nibbānaotarānatitthāni akāsi, tasmā “titthakaro”’ti vattum vaṭṭati.

Kasmā panete sabbepe tattha oṣaṭi? Upaṭṭhākarakkhaṇatthañceva lābhasakkāratthañca. Tesañhi evaṃ hoti – “amhākaṃ upaṭṭhākā samaṇaṃ gotamaṃ saraṇaṃ gaccheyyumaṃ, te ca rakkhissāma. Samaṇassa ca gotamassa upaṭṭhāke sakkāraṃ karonte disvā amhākampi upaṭṭhākā amhākaṃ sakkāraṃ karissanti”’ti. Tasmā yattha yattha bhagavā osarati, tattha tattha sabbe osaranti.

239. Vādaṃ āropetvāti vāde dosaṃ āropetvā. **Apakkantāti**, apagatā, keci dīsaṃ pakkantā, keci gihibhāvaṃ pattā, keci imaṃ sāsanaṃ āgatā. **Sahitaṃ meti** mayhaṃ vacanaṃ sahitaṃ siliṭṭhaṃ, atthayuttaṃ kāraṇayuttanti attho. **Asahitaṃ teti** tuyhaṃ vacanaṃ asahitaṃ. **Adhiciṇṇaṃ te viparāvattanti** yaṃ tuyhaṃ dīgharattāciṇṇavasena suppaṇaṃ, taṃ mayhaṃ ekavacaneneva viparāvattaṃ viparivattitvā ṭhitaṃ, na kiñci jātanti attho. **Āropito te vādoti** mayā tava vāde doso āropito. **Cara vādappamokkhāyāti** dosamocanattaṃ cara vicara, tattha tattha gantvā sikkhāti attho. **Nibbeṭhehi vā sace pahosīti** atha sayam pahosi, idāneva nibbeṭhehi. **Dhammakosenāti** sabhāvakkosena.

240. Taṃ no sossāmāti taṃ amhākaṃ desitaṃ dhammaṃ suṇissāma. **Khuddamadhunti** khuddakamakkhikāhi kataṃ daṇḍakamadhuṃ. **Anelakanti** niddosaṃ apagatamacchikaṇḍakaṃ. **Pīḷeyyāti** dadeyya. **Paccāsīsamānarūpoti** pūretvā nu kho no bhojanaṃ dassatīti bhājanahattho paccāsīsamāno paccupaṭṭhito assa. **Sampayojetvāti** appamattakaṃ vivādaṃ katvā.

241. Itarītarenāti lāmakalāmakena. **Pavivittoti** idaṃ paribbājako kāyavivekamattaṃ sandhāya vadati, bhagavā pana tīhi vivekehi vivittova.

242. Kosakāhārāpīti dānapatīnaṃ ghare aggabhikkhāṭṭhapanattaṃ khuddakasarāvā honti, dānapatino aggabhattaṃ vā tattha ṭhapetvā bhujjanti, pabbajite sampatte taṃ bhattaṃ tassa denti. Taṃ sarāvakaṃ kosakoti vuccati. Tasmā ye ca ekeneva bhattakosakena yāpentī, te kosakāhārāti. **Beluvāhārāti** beluvamattabhattāhārā. **Samatittikanti** oṭṭhavaṭṭiyā heṭṭhimalekhāsamaṃ. **Iminā dhammenāti** iminā appāhāratādhammena. Ettha pana sabbākāreneva bhagavā anappāhāroti na vattabbo. Padhānabhūmiyaṃ chabbassāni appāhārova ahosi, verañjāyaṃ tayo māse patthodaneneva yāpesi pālīleyyakavanasāṇḍe tayo māse bhisamuḷāleheva yāpesi. Idha pana etamattaṃ dasseti – “ahaṃ ekasmiṃ kāle appāhāro ahosiṃ, mayhaṃ pana sāvakaṃ dhutaṅgasamādānato paṭṭhāya yāvajīvaṃ

dhutaṅgaṃ na bhindantī’ ti. Tasmā yadi te iminā dhammena sakkareyyuṃ, mayā hi te visesatarā. Añño ceva pana dhammo atthi, yena maṃ te sakkarontīti dasseti. Iminā nayena sabbavāresu yojanā veditabbā.

Pamsukūlikāti samādinnaṃ pamsukūlikaṅgā. **Lūkhacīvaradharāti** satthasuttalūkhāni cīvarāni dhārayamānā. **Nantakānīti** antavirahitāni vatthakhaṇḍāni, yadi hi nesam anto bhaveyya, pilotikāti saṅkhaṃ gaccheyyuṃ. **Uccinitvāti** phāletvā dubbalaṭṭhānaṃ pahāya thiraṭṭhānameva gahetvā. **Alābulomasānīti** alābulomasadisuttāni sukhumānīti dīpeti. Ettāvata ca satthā cīvarasantosena asantuṭṭhoti na vattabbo. Atimuttakasasānato hissa puṇṇadāsīyā pārūpitvā pātitasānapamsukūlaṃ gahaṇadivase udakapariyantam katvā mahāpathavī akampī. Idha pana etamattham dasseti – “ahaṃ ekasmiṃyeva kāle pamsukūlam gaṇhiṃ, mayham pana sāvakā dhutaṅgasamādānato paṭṭhāya yāvajīvaṃ dhutaṅgaṃ na bhindantī’ ti.

Piṇḍapātīkāti atirekalābham paṭikkhipitvā samādinnaṃ piṇḍapātīkaṅgā. **Sapadānacārinoti** loluppacāram paṭikkhipitvā samādinnaṃ sapadānacārā. **Uñchāsake vate ratāti** uñchācariyasankhāte bhikkhūnaṃ pakativate ratā, uccanīcagharadvāraṭṭhāyino hutvā kabaramissakaṃ bhattam saṃharitvā paribhuñjantīti attho. **Antaragharanti** brahmāyusutte ummārato paṭṭhāya antaragharam, idha indakhīlato paṭṭhāya adhippetam. Ettāvata ca satthā piṇḍapātasantosa asantuṭṭhoti na vattabbo, appāhāratāya vuttaniyāmeneva pana sabbam vitthāretabbam. Idha pana etamattham dasseti – “ahaṃ ekasmiṃyeva kāle nimantaṇam na sādāyīṃ, mayham pana sāvakā dhutaṅgasamādānato paṭṭhāya yāvajīvaṃ dhutaṅgaṃ na bhindantī’ ti.

Rukkhamūlikāti channaṃ paṭikkhipitvā samādinnaṃ rukkhamūlikaṅgā. **Abbhokāsīkāti** channañca rukkhamūlañca paṭikkhipitvā samādinnaṃ abbhokāsīkaṅgā. **Aṭṭhamāseti** hemantagimhike māse. Antovasse pana cīvarānuggahattham channaṃ pavisanti. Ettāvata ca satthā senāsanasantosa asantuṭṭhoti na vattabbo, senāsanasantosa panassa chabbassikamahāpadhānena ca pālīleyyakavanasāṇḍena ca dīpetabbo. Idha pana etamattham dasseti – “ahaṃ ekasmiṃyeva kāle channaṃ na pāvīsiṃ, mayham pana sāvakā dhutaṅgasamādānato paṭṭhāya yāvajīvaṃ dhutaṅgaṃ na bhindantī’ ti.

Āraññīkāti gāmantasenāsaṇam paṭikkhipitvā samādinnaṃ āraññīkaṅgā. **Saṅghamajjhe osarantīti** abaddhasīmāya kathitam, baddhasīmāyam pana vasantā attano vasanaṭṭhāneyeva uposatham karonti. Ettāvata ca satthā no pavivittoti na vattabbo, “icchāmaṃ, bhikkhave, aḍḍhamāsaṃ paṭisalliyitu’ nti (pārā. 162; 565) evañhissa paviveko paññāyati. Idha pana etamattham dasseti “ahaṃ ekasmiṃyeva tathārūpe kāle paṭisalliyīṃ, mayham pana sāvakā dhutaṅgasamādānato paṭṭhāya yāvajīvaṃ dhutaṅgaṃ na bhindantī’ ti. **Mamaṃ sāvakāti** maṃ sāvakā.

244. Sanidānanti sappaccayaṃ. Kiṃ pana appaccayaṃ nibbānaṃ na desetīti. No na deseti, sahetukaṃ pana taṃ desanaṃ katvā desetīti, no ahetukanti. **Sappāṭihāriyanti** purimassevetam vevacanaṃ, sakāraṇanti attho. **Taṃ vatāti** ettha **vatāti** nipātamattam.

245. Anāgataṃ vādapathanti ajja ṭhapetvā sve vā punadivase vā aḍḍhamāse vā māse vā saṃvacchare vā tassa tassa pañhassa upari āgamanavādapatham. **Na dakkhatīti** yathā saccako nigaṇṭho attano niggahaṇattham āgatakāraṇam viresetvā vadanto na addasa, evaṃ na dakkhatīti netam ṭhānaṃ vijjati. **Sahadhammenāti** sakāraṇena. **Antarantarā katham opāteyyunti** mama kathāvāram pacchinditvā antarantare attano katham paveseyyunti attho. **Na kho panāham, udāyīti**, udāyī, aham ambaṭṭhasoṇadaṇḍakūṭadantasaccakanigaṇṭhādīhi saddhiṃ mahāvāde vattamānēpi – “aho vata me ekasāvākopi upamaṃ vā kāraṇam vā āharitvā dadeyyā’ ti evaṃ sāvakesu anusāsaṇiṃ na paccāsīsaṃ. **Mamayevāti** evarūpesu ṭhānesu sāvakā mamayeveva anusāsaṇiṃ ovādam paccāsīsanti.

246. Tesāham cittaṃ ārādhemīti tesam aham tassa pañhassa veyyākaraṇena cittaṃ gaṇhāmi

sampāдеми paripūremi, aññaṃ puṭṭho aññaṃ na byākaromi, ambaṃ puṭṭho labujam viya labujam vā puṭṭho ambaṃ viya. Ettha ca “adhisīle sambhāventī”ti vuttaṭṭhāne buddhasīlam nāma kathitam, “abhikkante ñānadassane sambhāventī”ti vuttaṭṭhāne sabbaññūtaññāṇaṃ, “adhipaññāya sambhāventī”ti vuttaṭṭhāne ṭhānuppattikapaññā, “yena dukkhenā”ti vuttaṭṭhāne saccabyākaraṇapaññā. Tattha sabbaññūtaññāṇaṃ saccabyākaraṇapaññāṇaṃ ṭhapetvā avasesā paññā adhipaññaṃ bhajati.

247. Idāni tesam tesam visesādhigamānaṃ paṭipadaṃ ācikkhanto **puna caparaṃ udāyīti**ādīmāha. Tattha **abhiññāvosānapāramippattā**ti abhiññāvosānasāṅkhātaṇceva abhiññāpāramīsaṅkhātaṇca arahattaṃ pattā.

Sammappadhāneti upāyapadhāne. **Chandaṃ janetī**ti kattukamyatākusalacchandaṃ janeti. **Vāyamatī**ti vāyāmaṃ karoti. **Vīriyaṃ ārabhatī**ti vīriyaṃ pavatteti. **Cittaṃ paggaṇhātī**ti cittaṃ ukkhipati. **Padahatī**ti upāyapadhānaṃ karoti. **Bhāvanāya pāripūriyāti** vaḍḍhiyā paripūraṇatthaṃ. Apicettha – “yā ṭhiti, so asamoso...pe... yaṃ vepullaṃ, sā bhāvanāpāripūri”ti (vibha. 406) evaṃ purimaṃ purimassa pacchimaṃ pacchimassa atthotipi veditabbaṃ.

Imehi pana sammappadhānehi kiṃ kathitaṃ? Kassapasamṃyuttapariyāyena sāvakassa pubbhāgapaṭipadā kathitā. Vuttañhetam tattha –

“Cattārome, āvuso, sammappadhānā. Katame cattāro? Idhāvuso, bhikkhu, anuppannā me pāpakā akusalā dhammā uppajjamānā anattāya saṃvatteyyunti ātappaṃ karoti. Uppannā me pāpakā akusalā dhammā appahīyamānā anattāya saṃvatteyyunti ātappaṃ karoti. Anuppannā me kusalā dhammā anuppajjamānā anattāya saṃvatteyyunti ātappaṃ karoti. Uppannā me kusalā dhammā nirujjhamānā anattāya saṃvatteyyunti ātappaṃ karoti”ti (saṃ. ni. 2.145).

Ettha ca pāpakā akusalāti lobhādayo veditabbā. Anuppannā kusalā dhammāti samathavipassanā ceva maggo ca, uppannā kusalā nāma samathavipassanāva. Maggo pana sakiṃ uppajjivā nirujjhamāno anattāya saṃvattanako nāma natthi. So hi phalassa paccayaṃ datvāva nirujjhati. Purimasmimpi vā samathavipassanāva gahetabbāti vuttaṃ, taṃ pana na yuttaṃ.

Tattha “uppannā samathavipassanā nirujjhamānā anattāya saṃvattantī”ti atthassa āvibhāvattamidaṃ vatthu – eko kira khīṇāsavattothero “mahācetiyaṇca mahābodhiṇca vandissāmī”ti samāpattilābhinaṃ bhaṇḍagāhakaśāmaṇerena saddhiṃ janapadato mahāvihāraṃ āgantvā vihārapariveṇaṃ pāvīsi. Sāyanhasamaye mahābhikkhusaṅghe cetiyaṃ vandamāne cetiyaṃ vandanattāya na nikkhami. Kasmā? Khīṇāsavānañhi tīsu ratanesu mahantaṃ gāraṃ hoti. Tasmā bhikkhusaṅghe vanditvā paṭikkamante manussānaṃ sāyamāsabhuttavelāyaṃ sāmaṇerampi ajānāpetvā “cetiyaṃ vandissāmī”ti ekakova nikkhami. Sāmaṇero – “kiṃ nu kho thero avelāya ekakova gacchati, jānissāmī”ti upajjhāyassa padānupadiko nikkhami. Thero anāvajjanena tassa āgamaṇaṃ ajānanto dakkhiṇadvārena cetiyaṅgaṇaṃ āruhi. Sāmaṇeropi anupadaṃyeva āruḷho.

Mahāthero mahācetiyaṃ ulloketvā buddhārammaṇaṃ pītiṃ gahetvā sabbaṃ cetaso samannāharitvā haṭṭhapahaṭṭho cetiyaṃ vandati. Sāmaṇero therassa vandanākāraṃ disvā “upajjhāyo me ativiya pasannacitto vandati, kiṃ nu kho pupphāni labhitvā pūjaṃ kareyyā”ti cintesi. Thero vanditvā utṭhāya sirasi añjaliṃ ṭhapetvā mahācetiyaṃ ulloketvā ṭhito. Sāmaṇero ukkāsitvā attano āgatabhāvaṃ jānāpesi. Thero parivattetvā olokento “kadā āgatosī”ti pucchi. Tumhākaṃ cetiyaṃ vandanakāle, bhante. Ativiya pasannā cetiyaṃ vandittha kiṃ nu kho pupphāni labhitvā pūjeyyāthāti? Āma sāmaṇera imasmiṃ cetiye viya aññatra ettakaṃ dhātūnaṃ nidhānaṃ nāma natthi, evarūpaṃ asadisam mahāthūpaṃ pupphāni labhitvā ko na pūjeyyāti. Tena hi, bhante, adhvāsetha, āharissāmīti tāvadeva jhānaṃ samāpajjivā iddhiyā himavantaṃ gantvā vaṇṇagandhasampannapupphāni parissāvanaṃ pūretvā mahāthere dakkhiṇamukhato pacchimaṃ mukhaṃ asampatteyeva āgantvā pupphaparissāvanaṃ hatthe ṭhapetvā “pūjetha, bhante,”ti āha. Thero “atimandāni no sāmaṇera pupphāni”ti āha. Gacchatha, bhante,

bhagavato guṇe āvajjitvā pūjethāti.

Thero pacchimamukhanissitena sopāṇena āruyha kucchivedikābhūmiyaṃ pupphapūjaṃ kātuṃ āradhho. Vedikābhūmiyaṃ paripuṇṇāni pupphāni patitvā dutiyabhūmiyaṃ jaṇṇupamāṇena odhinā pūrayiṃsu. Tato otaritvā pādapiṭṭhikapantiṃ pūjesi. Sāpi paripūri. Paripuṇṇabhāvaṃ ñatvā heṭṭhimatale vikiranto agamāsi. Sabbam cetiyāṅgaṇaṃ paripūri. Tasmim paripuṇṇe “sāmaṇera pupphāni na khīyanti”ti āha. Parissāvanaṃ, bhante, adhomukhaṃ karothāti. Adhomukhaṃ katvā cālesi, tadā pupphāni khīṇāni. Parissāvanaṃ sāmaṇerassa datvā saddhiṃ hatthipākārena cetiyaṃ tikkhattuṃ padakkhiṇaṃ katvā catūsu thānesu vanditvā pariveṇaṃ gacchanto cintesi – “yāva mahiddhiko vatāyaṃ sāmaṇero, sakkhissati nu kho imaṃ iddhānubhāvaṃ rakkhitu”nti. Tato “na sakkhissati”ti disvā sāmaṇeramāha – “sāmaṇera tvaṃ idāni mahiddhiko, evarūpaṃ pana iddhiṃ nāsetvā pacchimakāle kāṇapesakāriyā hatthena madditakañjiyaṃ pivissasi”ti. Daharakabhāvaṃ nāmesa dosoyaṃ, so upajjhāyassa kathāyaṃ saṃvijjivā – “kammaṭṭhānaṃ me, bhante, ācikkhathā”ti na yāci, amhākaṃ upajjhāyo kiṃ vadatīti taṃ pana asuṇanto viya agamāsi.

Thero mahācetiyañca mahābodhiñca vanditvā sāmaṇeraṃ pattacīvaraṃ gāhāpetvā anupubbena kuṭṭhitissamahāvihāraṃ agamāsi. Sāmaṇero upajjhāyassa padānupadiko hutvā bhikkhācāraṃ na gacchati, “kataraṃ gāmaṃ pavisatha, bhante,”ti pucchitvā pana “idāni me upajjhāyo gāmadvāraṃ patto bhavissati”ti ñatvā attano ca upajjhāyassa ca pattacīvaraṃ gahetvā ākāseṇa gantvā therassa pattacīvaraṃ datvā piṇḍāya pavisati. Thero sabbakālaṃ ovadati – “sāmaṇera mā evamakāsi, puthujjaniddhi nāma calā anibaddhā, asappāyaṃ rūpādīraṃmaṇaṃ labhitvā appamattakeneva bhijjati, santāya samāpattiyā parihīnāya brahmacariyavāso santhambhituṃ na sakkoti”ti. Sāmaṇero “kiṃ katheti mayhaṃ upajjhāyo”ti sotuṃ na icchati, tatheva karoti. Thero anupubbena cetiyavandanaṃ karonto kammubinduvihāraṃ nāma gato. Tattha vasantepi there sāmaṇero tatheva karoti.

Athekadivasam ekā pesakāradhītā abhirūpā paṭhamavaye thitā kammabindugāmato nikkhamitvā padumassaraṃ oruyha gāyamānā pupphāni bhañjati. Tasmim samaye sāmaṇero padumassaramatthakena gacchati, gacchanto pana silesikāya kāṇamacchikā viya tassā gītasadde bajjhi. Tāvadevassa iddhi antarahitā, chinnapakkhakāko viya ahosi. Santasamāpattibalena pana tattheva udakapiṭṭhe apatitvā simbalitūlaṃ viya patamānaṃ anupubbena padumasaratīre aṭṭhāsi. So vegena gantvā upajjhāyassa pattacīvaraṃ datvā nivatti. Mahāthero “pagevetam mayā diṭṭham, nivāriyamānopi na nivattissati”ti kiñci avatvā piṇḍāya pāvisi.

Sāmaṇero gantvā padumasaratīre aṭṭhāsi tassā paccuttaraṇaṃ āgamayamāno. Sāpi sāmaṇeraṃ ākāseṇa gacchantañca puna āgantvā thitañca disvā “addhā esa maṃ nissāya ukkaṇṭhito”ti ñatvā “paṭikkama sāmaṇerā”ti āha. So paṭikkami. Itarā paccuttarivā sāṭakaṃ nivāsetvā taṃ upasaṅkamitvā “kiṃ, bhante,”ti pucchi. So tamatthaṃ ārocesi. Sā bahūhi kāraṇehi gharāvāse ādīnaṃ brahmacariyavāse ānisaṃsañca dassetvā ovadamānāpi tassa ukkaṇṭhaṃ vinodetuṃ asakkontī – “ayaṃ mama kāraṇā evarūpāya iddhiyā parihīno, na dāni yuttaṃ pariccajitu”nti idheva tiṭṭhāti vatvā gharaṃ gantvā mātāpitūnaṃ taṃ pavattiṃ ārocesi. Tepi āgantvā nānappakāraṃ ovadamānā vacanaṃ aggaṇhantaṃ āhaṃsu – “tvaṃ amhe uccakulāti sallakkhesi, mayaṃ pesakārā. Sakkhissasi pesakārakammaṃ kātu”nti sāmaṇero āha – “upāsaka gihibhūto nāma pesakārakammaṃ vā kareyya naḷakārakammaṃ vā, kiṃ iminā sāṭakamattena lobhaṃ karothā”ti. Pesakāro udare baddhasāṭakaṃ datvā gharaṃ netvā dhīraṃ adāsi.

So pesakārakammaṃ uggaṇhitvā pesakārehi saddhiṃ sālāya kammaṃ karoti. Aññesaṃ itthiyo pātova bhattaṃ sampādetvā āhariṃsu, tassa bhariyā na tāva āgacchati. So itaresu kammaṃ vissajjetvā bhuñjamānesu tasaraṃ vaṭṭento nisīdi. Sā pacchā agamāsi. Atha naṃ so “aticirena āgatāsi”ti tajjesi. Mātugāmo ca nāma api cakkavattirājānaṃ attani paṭibaddhacittaṃ ñatvā dāsaṃ viya sallakkheti. Tasmā sā evamāha – “aññesaṃ ghare dārupaṇṇaloṇādīni sannihitāni, bāhirato āharitvā dāyakaṃ pesanatakārakāpi atthi, ahaṃ pana ekikāva, tvampi mayhaṃ ghare idaṃ atthi idaṃ natthīti na jānāsi.

Sace icchasi, bhuñja, no ce icchasi, mā bhuñjā”ti. So “na kevalañca ussūre bhattaṃ āharasi, vācāyapi maṃ ghaṭṭesi”ti kujjhivā aññaṃ paharaṇaṃ apassanto tameva tasaradaṇḍakaṃ tasarato luñcivā khipi. Sā taṃ āgacchantaṃ disvā īsakaṃ parivatti. Tasaradaṇḍakassa ca koṭi nāma tikhiṇā hoti, sā tassā parivattamānāya akkhikoṭiyaṃ pavisitvā aṭṭhāsi. Sā ubhohi hatthehi vegena akkhiṃ aggahesi, bhinnatṭhānato lohitaṃ paggharati. So tasmim kāle upajjhāyassa vacanaṃ anussari – “idaṃ sandhāya maṃ upajjhāyo ‘anāgate kāle kāṇapesakāriyā hatthehi madditakañjiyaṃ pivissasī”ti āha, idaṃ therena diṭṭhaṃ bhavissati, aho dīghadassī ayyo”ti mahāsaddena rodituṃ ārabhi. Tamenam aññe – “alam, āvuso, mā rodi, akkhi nāma bhinnam na sakkā rodanena paṭipākatikaṃ kātu”nti āhamsu. So “nāhametamatthaṃ rodāmi, apica kho imaṃ sandhāya rodāmi”ti sabbaṃ paṭipāṭiyā kathesi. Evaṃ uppanā samathavipassanā nirujjhamānā anattāya saṃvattanti.

Aparampi vatthu – tiṃsamattā bhikkhū kalyāṇimahācetiyaṃ vanditvā aṭṭvimaggena mahāmaggaṃ otaramānā antarāmagge jhāmakhetta kammaṃ katvā āgacchantaṃ ekaṃ manussaṃ addasaṃsu. Tassa sarīraṃ masimakkhitaṃ viya ahosi. Masimakkhitaṃyeva ekaṃ kāsavaṃ kacchaṃ piṭetvā nivatthaṃ, olokiyamāno jhāmakhāṇuko viya khāyati. So divasabhāge kammaṃ katvā upaḍḍhajjhāyamānānaṃ dārūnaṃ kalāpaṃ ukkhipitvā piṭṭhiyaṃ vippakiṇṇehi kesehi kummaggaṃ āgantvā bhikkhūnaṃ sammukhe aṭṭhāsi. Sāmaṇerā disvā aññamaññaṃ olokayamānā, – “āvuso, tuyhaṃ piṭā tuyhaṃ mahāpitā tuyhaṃ mātulo”ti hasamānā gantvā “konāmo tvaṃ upāsakā”ti nāmaṃ pucchimsu. So nāmaṃ pucchito vipaṭṭisārī hutvā dārūkalāpaṃ chaḍḍetvā vatthaṃ saṃvidhāya nivāsetvā mahāthere vanditvā “tiṭṭhatha tāva, bhante,”ti āha. Mahātherā aṭṭhaṃsu.

Daharasāmaṇerā āgantvā mahātherānaṃ sammukhāpi parihāsaṃ karonti. Upāsako āha – “bhante, tumhe maṃ passitvā parihāsatha, ettakeneva matthakaṃ pattamhāti mā sallakkhetha. Ahampi pubbe tumhādisova samaṇo ahosiṃ. Tumhākaṃ pana cittaḥkaggatāmatthakampi natthi, ahaṃ imasmim sāsane mahiddhiko mahānubhāvo ahosiṃ, ākāsaṃ gahetvā pathaviṃ karomi, pathaviṃ ākāsaṃ. Dūraṃ gaṇhitvā santikaṃ karomi, santikaṃ dūraṃ. Cakkavālasatasahasasaṃ khaṇena vinivijjhāmi. Hatthe me passatha, idāni makkaṭaḥatthasadisā, ahaṃ imeheva hatthehi idha nisinnova candimasūriye parāmasiṃ. Imesaṃyeva pādānaṃ candimasūriye pādakathalikaṃ katvā nisīdiṃ. Evarūpā me iddhi pamādena antarahitā, tumhe mā pamajjittha. Pamādena hi evarūpaṃ byasaṇaṃ pāpuṇanti. Appamattā viharantā jātijarāmarāṇassa antaṃ karonti. Tasmā tumhe maññeva ārammaṇaṃ karitvā appamattā hotha, bhante,”ti tajjetvā ovādamadāsi. Te tassa kathentasseva saṃvegaṃ āpajjitvā vipassamānā tiṃsajanā tattheva arahattaṃ pāpuṇimsūti. Evampi uppanā samathavipassanā nirujjhamānā anattāya saṃvattantīti veditabbā.

Anuppanānaṃ pāpakānanti cettha “anuppanno vā kāmāsavo na uppajjati”tiādīsu vuttanayena attho veditabbo. **Uppannānaṃ pāpakānanti** ettha pana catubbidhaṃ uppannaṃ vattamānuppannaṃ bhutvāvigatuppannaṃ, okāsakatuppannaṃ, bhūmiladdhuppannanti. Tattha ye kilesā vijjamānā uppādādisamaṅgino, idaṃ **vattamānuppannaṃ** nāma. Kamme pana javite ārammaṇarasam anubhavitvā niruddhavipāko bhutvā vigataṃ nāma. Kammaṃ uppajjitvā niruddhaṃ bhavitvā vigataṃ nāma. Tadubhayampi **bhutvāvigatuppannanti** saṅkhaṃ gacchati. Kusalākusalaṃ kammaṃ aññassa kammassa vipākaṃ paṭibāhitvā attano vipākassa okāsaṃ karoti, evaṃ kate okāse vipāko uppajjamāno okāsakaraṇato paṭṭhāya uppannoti saṅkhaṃ gacchati. Idaṃ **okāsakatuppannaṃ** nāma. Pañcakkhandhā pana vipassanāya bhūmi nāma. Te atītādibhedā honti. Tesu anusayitakilesā pana atītā vā anāgatā vā paccuppanā vāti na vattabbā. Atītakhandhesu anusayitāpi hi appahīnāva honti, anāgatakhandhesu, paccuppannakhandhesu anusayitāpi appahīnāva honti. Idaṃ **bhūmiladdhuppannaṃ** nāma. Tenāhu porāṇā – “tāsu tāsu bhūmiṃsu asamugghātitaḥkilesā bhūmiladdhuppannāti saṅkhaṃ gacchantī”ti.

Aparampi catubbidhaṃ uppannaṃ samudācārappannaṃ, ārammaṇādhiḥgahituppannaṃ, avikkhambhituppannaṃ asamugghātītuppannanti. Tattha sampati vattamānaṃyeva **samudācārappannaṃ** nāma. Sakim cakkhūni ummīletvā ārammaṇe nimitte gahite anussaritānussaritaḥkhaṇe kilesā nuppajjissantīti na vattabbā. Kasmā? Ārammaṇassa adhiḥgahitattā.

Yathā kiṃ? Yathā khīrarukkhaṣṣa kuṭṭhāriyā āhatāhataṭṭhāne khīraṃ na nikkhamissatīti na vattabbaṃ, evaṃ. Idaṃ **ārammaṇādhiḡahituppannaṃ** nāma. Samāpattiyā avikkhambhitā kilesā pana imasmiṃ nāma ṭhāne nuppajjissantīti na vattabbā. Kasmā? Avikkhambhitattā. Yathā kiṃ? Yathā sace khīrarukkhe kuṭṭhāriyā āhaneyyūṃ, imasmiṃ nāma ṭhāne khīraṃ na nikkhameyyāti na vattabbaṃ, evaṃ. Idaṃ **avikkhambhituppannaṃ** nāma. Maggena asamugghātitakilesā pana bhavagge nibbattassāpi uppajantīti purimanayeneva vitthāretabbaṃ. Idaṃ **asamugghātituppannaṃ** nāma.

Imesu uppennesu vattamānuppannaṃ bhutvāvīgatuppannaṃ okāsakatuppannaṃ samudācāruppannanti catubbidhaṃ uppannaṃ na maggavajjhaṃ, bhūmiladdhuppannaṃ ārammaṇādhiḡahituppannaṃ avikkhambhituppannaṃ asamugghātituppannanti catubbidhaṃ maggavajjhaṃ. Maggo hi uppajjamāno ete kilese pajahati. So ye kilese pajahati, te atītā vā anāgatā vā paccuppanā vāti na vattabbā. Vuttampi cetam –

“Hañci atīte kilese pajahati, tena hi khīnaṃ khepeti, niruddhaṃ nirodheti, vīgataṃ vīgameti atthaṅgataṃ atthaṅgameti. Atītāṃ yaṃ natthi, taṃ pajahati. Hañci anāgate kilese pajahati, tena hi ajātaṃ pajahati, anibbattaṃ, anuppannaṃ, apātubhūtaṃ pajahati. Anāgataṃ yaṃ natthi, taṃ pajahati, hañci paccuppanne kilese pajahati, tena hi ratto rāgaṃ pajahati, duṭṭho dosaṃ, mūlho mohaṃ, vinibaddho mānaṃ, parāmaṭṭho diṭṭhiṃ, vikkhepagato uddhaccaṃ, anīṭṭhaṅgato vicikicchaṃ, thāmagato anusayaṃ pajahati. Kaṇhasukkadhamaṃ yuganaddhā samameva vattanti. Saṃkilesikā maggabhāvanā hoti...pe... tena hi natthi maggabhāvanā, natthi phalāsacchikiriyā, natthi kilesappahānaṃ, natthi dhammābhisamayoti. Atthi maggabhāvanā...pe... atthi dhammābhisamayoti. Yathā kathaṃ viya, seyyathāpi taruṇo rukkho ajātaṃphalo...pe... apātubhūtāyeva na pātubhavanti’ ti.

Iti pāḷiyaṃ ajātaṃphalarukkho āgato, jātaṃphalarukkheṇa pana dīpetabbaṃ. Yathā hi saphalo taruṇambarukkho, tassa phalāni manussā paribhuñjeyyūṃ, sesāni pātetvā pacchiyo pūreyyūṃ. Athaṅṅo puriso taṃ pharasunā chindeyya, tenassa neva atītāni phalāni nāsītāni honti, na anāgatapaccuppannāni nāsītāni. Atītāni hi manussehi paribhuttāni, anāgatāni anibbattāni, na sakkā nāsetuṃ. Yasmiṃ pana samaye so chinno, tadā phalāniyeva natthīti paccuppannāni anāsītāni. Sace pana rukkho acchinno, athassa pathavīrasaṅca āporasaṅca āgamma yāni phalāni nibbatteyyūṃ, tāni nāsītāni honti. Tāni hi ajātāneva na jāyanti, anibbattāneva na nibbattanti, apātubhūtāneva na pātubhavanti, evameva maggo nāpi atītādibhede kilese pajahati, nāpi na pajahati. Yesaṅhi kilesānaṃ maggena khandhesu aparīññātesu uppatti siyā, maggena uppajjitvā khandhānaṃ pariññātatā te kilesā ajātāva na jāyanti, anibbattāva na nibbattanti, apātubhūtāva na pātubhavanti, taruṇaputtāya itthiyā puna avijāyanatthaṃ, byādhitānaṃ rogavūpasamanatthaṃ pītabhesajjeḡ cāpi ayamattho vibhāvetabbo. Evaṃ maggo ye kilese pajahati, te atītā vā anāgatā vā paccuppanā vāti na vattabbā, na ca maggo kilese na pajahati. Ye pana maggo kilese pajahati, te sandhāya ‘‘uppannānaṃ pāpakāna’’ntiādi vuttam.

Na kevalaṅca maggo kileseyeva pajahati, kilesānaṃ pana appahīnattā ye ca uppajjeyyūṃ upādinnakakkhandhā, tepi pajahatiyeva. Vuttampi cetam – ‘‘sotāpattimaggañāṇena abhisankhāravīññāṇassa nirodhena satta bhavetvā anamatagge saṃsāre ye uppajjeyyūṃ nāmaṅca rūpaṅca, etthete nirujjhanti’’ti (cūḷani. 6) vitthāro. Iti maggo upādinnaanupādinnato vuṭṭhāti. Bhavavasena pana sotāpattimaggo apāyabhavato vuṭṭhāti, sakadāgāmimaggo sugatibhavekadesato, anāgāmimaggo sugatikāmbhavato, arahattamaggo rūpārūpabhavato vuṭṭhāti. Sabbabhavēhi vuṭṭhātiyevātipi vadanti.

Atha maggakkhaṇe kathaṃ anuppannānaṃ uppādāya bhāvanā hoti, kathaṃ vā uppannānaṃ ṭhītiyāti. Maggappavattiyāyeva. Maggo hi pavattamāno pubbe anuppannapubbattā anuppanno nāma vuccati. Anāgatapubbañhi ṭhānaṃ āgantvā ananubhūtapubbaṃ vā ārammaṇaṃ anubhavivā vattāro bhavanti ‘‘anāgataṭṭhānaṃ āgatamhā, ananubhūtaṃ ārammaṇaṃ anubhavāmā’’ti. Yā cassa pavatti, ayameva ṭhīti nāmāti ṭhītiyā bhāvetītipi vattum vaṭṭati.

Iddhipādesu saṅkhepakathā cetokhilasutte (ma. ni. 1.185 ādayo) vuttā. Upasamamānaṃ gacchati, kilesūpasamatthaṃ vā gacchatīti **upasamaḡāmī**. Sambujjhamānā gacchati, maggasambodhatthāya vā gacchatīti **sambodhagāmī**.

Vivekanissitādīni sabbāsavaṣaṃvare vuttāni. Ayamettha saṅkhepo, vitthārato panāyaṃ bodhipakkhiyakathā **visuddhimagge** vuttā.

248. Vimokkhakathāyaṃ **vimokkheti** kenaṭṭhena vimokkhā, adhimuccanaṭṭhena. Ko panāyaṃ adhimuccanaṭṭho nāma? Paccanīkadhammehi ca suṭṭhu muccanaṭṭho, ārammaṇe ca abhirativasena suṭṭhu muccanaṭṭho, pituaṅke vissaṭṭhaṅgapaccaṅgassa dārakassa sayanaṃ viya aniggahitabhāvena nirāsankatāya ārammaṇe pavattīti vuttaṃ hoti. Ayaṃ panattho pacchimavimokkhe natthi, purimesu sabbesu atthi. **Rūpī rūpāni passatīti** ettha ajjhatakesādīsu nīlakasiṇādivasena uppāditaṃ rūpajjhānaṃ rūpaṃ, tadassa atthīti **rūpī**. **Bahiddhā rūpāni passatīti** bahiddhāpi nīlakasiṇādīni rūpāni jhānacakkhunā passati. Iminā ajjhata bahiddhāvattukesu kasiṇesu uppāditaṃ jhānassa puggalassa cattāripi rūpāvacarajjhānāni dassitāni.

Ajjhattaṃ arūpasaññīti ajjhattaṃ na rūpasaññī, attano kesādīsu anuppāditarūpāvacarajjhānoti attho. Iminā bahiddhā parikkammaṃ katvā bahiddhāva uppāditaṃ jhānassa rūpāvacarajjhānāni dassitāni. **Subhanteva adhimutto hotīti** iminā suvisuddhesu nīlādīsu vaṇṇakasiṇesu jhānāni dassitāni. Tattha kiñcāpi antoappanāyaṃ subhanti ābhogo natthi, yo pana suvisuddhaṃ subhakasiṇaṃ ārammaṇaṃ katvā viharati, so yasmā subhanti adhimutto hotīti vattabbaṃ āpajjati, tasmā evaṃ desanā katā. Paṭisambhidāmagge pana “kathaṃ subhanteva adhimutto hotīti vimokkho. Idha bhikkhu mettāsahagatena cetasā ekaṃ disaṃ pharivā viharati...pe... mettāya bhāvitattā sattā appaṭikūlā honti. Karuṇāsahagatena, muditāsahagatena, upekkhāsahagatena cetasā ekaṃ disaṃ pharivā viharati...pe... upekkhāya bhāvitattā sattā appaṭikūlā honti. Evaṃ subhanteva adhimutto hotīti vimokkho”ti (paṭi. ma. 1.212) vuttaṃ.

Sabbaso rūpasaññānantiādīsu yaṃ vattabbaṃ, taṃ sabbaṃ **visuddhimagge** vuttameva. **Ayaṃ aṭṭhāmo vimokkhoti** ayaṃ catunnaṃ khandhānaṃ sabbaso vissaṭṭhattā vimuttattā aṭṭhāmo uttamo vimokkho nāma.

249. Abhibhāyatanakathāyaṃ **abhibhāyatanānīti** abhibhavanakāraṇāni. Kiṃ abhibhavanti? Paccanīkadhammepi ārammaṇāni. Tāni hi paṭipakkhabhāvena paccanīkadhamme abhibhavanti, puggalassa ñāṇuttarītāya ārammaṇāni. **Ajjhattaṃ rūpasaññīti**ādīsu pana ajjhatarūpe parikkammavasena ajjhattaṃ rūpasaññī nāma hoti. Ajjhatañca nīlparikkammaṃ karonto kese vā pitte vā akkhitārakāya vā karoti, pītaparikkammaṃ karonto mede vā chaviyā vā hatthatalapādatalesu vā akkhīnaṃ pītaṭṭhāne vā karoti, lohītaparikkammaṃ karonto maṃse vā lohite vā jivhāya vā akkhīnaṃ rattaṭṭhāne vā karoti, odātaparikkammaṃ karonto aṭṭhimhi vā dante vā nakhe vā akkhīnaṃ setaṭṭhāne vā karoti. Taṃ pana sunīlaṃ supītaṃ sulohitaṃ suodātaṃ na hoti, asuvisuddhameva hoti.

Eko bahiddhā rūpāni passatīti yassettaṃ parikkammaṃ ajjhattaṃ uppannaṃ hoti, nimittaṃ pana bahiddhā, so evaṃ ajjhattaṃ parikkammaṃ bahiddhā ca appanāya vasena – “ajjhattaṃ rūpasaññī eko bahiddhā rūpāni passatī”ti vuccati. **Parittānīti** avaḍḍhitāni. **Suvaṇṇadubbaṇṇānīti** suvaṇṇāni vā hontu dubbaṇṇāni vā, parittavaseneva idamabhibhāyatanāṃ vuttanti vedītabbaṃ. **Tāni abhibhuyyāti** yathā nāma sampannagahaṇiko kaṭacchumattaṃ bhattaṃ labhitvā “kimettha bhuñjītabbaṃ atthī”ti saṅkaḍḍhitvā ekakabalaṃeva karoti, evamevaṃ ñāṇuttariko puggalo visadaññaṃ – “kimettha parittake ārammaṇe samāpajjitabbaṃ atthi, nāyaṃ mama bhāro”ti tāni rūpāni abhibhavītvā samāpajjati, saha nimittuppādenevettha appanaṃ pāpetīti attho. **Jānāmi passāmīti** iminā panassa ābhogo kathito, so ca kho samāpattito vuṭṭhitassa, na antosamāpattiyaṃ. **Evaṃsaññī hotīti** ābhogasaññāyapi jhānasaññāyapi evaṃsaññī hoti. Abhibhavaññā hissa antosamāpattiyaṃ atthi, ābhogasaññā pana samāpattito vuṭṭhitasseva.

Appamāṇānīti vaḍḍhitappamāṇāni, mahantānīti attho. **Abhibhuyyāti** ettha pana yathā mahagghaso puriso ekaṃ bhattavaḍḍhitakaṃ labhitvā “aññāpi hotu, aññāpi hotu, kimesā mayhaṃ karissatī”ti taṃ na mahantato passati, evameva ñāṇuttaro puggalo visadañño “kimettha samāpajjitabbaṃ, nayidaṃ appamāṇaṃ, na mayhaṃ cittekaggatākaraṇe bhāro atthī”ti tāni abhibhavitvā samāpajjati, saha nimittuppādenevettha appanaṃ pāpetīti attho.

Ajjhattaṃ arūpasaññīti alābhitāya vā anattikatāya vā ajjhatarūpe parikammasaññāvirahito. **Eko bahiddhā rūpāni passatī**ti yassa parikammampi nimittampi bahiddhāva uppannaṃ, so evaṃ bahiddhā parikammaṃ ceva appanāya ca vasena – “ajjhattaṃ arūpasaññī eko bahiddhā rūpāni passatī”ti vuccati. Sesamettha catutthābhibhāyatane vuttanayameva. Imesu pana catūsu parittaṃ vitakkacaritavasena āgataṃ, appamāṇaṃ mohacaritavasena, suvaṇṇaṃ dosacaritavasena, dubbaṇṇaṃ rāgacaritavasena. Etesañhi etāni sappāyāni. Sā ca nesam sappāyatā vitthārato **visuddhimagge**carianiddese vuttā.

Pañcamaabhibhāyatanādīsu **nīlānī**ti sabbasaṅgāhikavasena vuttaṃ. **Nīlavaṇṇānī**ti vaṇṇavasena. **Nīlanidassanānī**ti nidassanavasena. Apaññāyamānavivarāni asambhinnavaṇṇāni ekanīlāneva hutvā dissantīti vuttaṃ hoti. **Nīlanibhāsānī**ti idaṃ pana obhāsavasena vuttaṃ, nīlobhāsāni nīlapabhāyuttānīti attho. Etena nesam suvisuddhataṃ dasseti. Visuddhavaṇṇavaseneva hi imāni cattāri abhibhāyatanāni vuttāni. **Umāpupphanti** etañhi pupphaṃ siniddhaṃ muduṃ dissamānampi nīlameva hoti. Girikaṇṇikapupphādīni pana dissamānāni setadhātukāni honti. Tasmā idameva gahitaṃ, na tāni. **Bārāṇaseyyakanti** bārāṇasiyaṃ bhavaṃ. Tattha kira kappāsopi mudu, suttakantikāyopi tantavāyāpi chekā, udakampi suci siniddhaṃ, tasmā vatthaṃ ubhatobhāgavimaṭṭhaṃ hoti, dvīsu passesu maṭṭhaṃ mudu siniddhaṃ khāyati. **Pītānī**tiādīsu imināva nayena attho veditabbo. “Nīlakasiṇaṃ uggaṇhanto nīlasmim nimittaṃ gaṇhāti pupphasmim vā vatthasmim vā vaṇṇadhātuyā vā”tiādikaṃ panettha kasiṇakaraṇaṇceva parikammaṇca appanāvīdhānaṇca sabbam **visuddhimagge** vitthārato vuttameva.

Abhiññāvosānapāramippattāti ito pubbesu satipaṭṭhānādīsu te dhamme bhāvetvā arahattappattāva abhiññāvosānapāramippattā nāma hontī, imesu pana aṭṭhasu abhibhāyatanesu ciṇṇavasibhāvāyeva abhiññāvosānapāramippattā nāma.

250. Kasiṇakathāyaṃ sakalaṭṭhena **kasiṇāni**, tadārammaṇaṃ dhammānaṃ khettaṭṭhena adhiṭṭhānaṭṭhena vā **āyatanāni**. **Uddhanti** upari gaganatalābhimukhaṃ. **Adhoti** hetṭhā bhūmitalābhimukhaṃ. **Tiriyanti** khettaṃaṇḍalamiva samantā paricchinditvā. Ekacco hi uddhameva kasiṇaṃ vaḍḍheti, ekacco adho, ekacco samantato. Tena tena kāraṇena evaṃ pasāreti ālokamiva rūpadassanakāmo. Tena vuttaṃ – “pathavīkasiṇameko sañjānāti uddhaṃadhotiriya”nti. **Advayanti** disāanudisāsu advayaṃ. Idaṃ pana ekassa aññābhāvānupagamanatthaṃ vuttaṃ. Yathā hi udakaṃ pavīṭṭhassa sabbadisāsu udakameva hoti anaññaṃ, evamevaṃ pathavīkasiṇaṃ pathavīkasiṇameva hoti, natthi tassa añño kasiṇasambhedoti. Esa nayo sabbattha. **Appamāṇanti** idaṃ tassa tassa pharaṇaappamāṇavasena vuttaṃ. Tañhi cetasā pharanto sakalameva pharati, ayamassa ādi, idaṃ majjhanti pamāṇaṃ gaṇhātīti. **Viññāṇakasiṇanti** cettha kasiṇugghāṭimākāse pavattaṃ viññāṇaṃ. Tattha kasiṇavasena kasiṇugghāṭimākāse, kasiṇugghāṭimākāsavasena tattha pavattaviññāṇe uddhaṃadhotiriyatā veditabbā. Ayamettha saṅkhepo. Kammatṭhānabhāvanāyena panetāni pathavīkasiṇādīni vitthārato **visuddhimagge** vuttāneva. Idhāpi ciṇṇavasibhāveneva abhiññāvosānapāramippattā hontīti veditabbā. Tathā ito anantaresu catūsu jhānesu. Yaṃ panettha vattabbaṃ, taṃ mahāassapurassutte vuttameva.

252. Vipassanāñāṇe pana rūpītiādīnamattho vuttoyeva. **Ettha sitametta paṭibaddhanti** ettha cātumahābhūṭike kāye nissitaṇca paṭibaddhaṇca. **Subhoti** sundaro. **Jātimāti** suparisuddhaākarasamutṭhito. **Suparikammakatoti** suṭṭhu kataparikammo apanītapāsāṇasakkharo. **Acchoti** tanucchavi. **Vippasannoti** suṭṭhu vippasanno. **Sabbākārasampannoti** dhovana vedhanādīhi sabbehi ākārehi sampanno. **Nīlanti**tiādīhi vaṇṇasampattiṃ dasseti. Tādīsāñhi āvutaṃ pākataṃ hoti.

Evameva khoti ettha evaṃ upamāsaṃsandanaṃ veditabbaṃ – maṇi viya hi karajakāyo.

Āvutasuttaṃ viya vipassanāñāṇaṃ. Cakkhumā puriso viya vipassanālābhī bhikkhu. Hatthe karitvā paccavekkhato “ayaṃ kho maṇī”ti maṇino āvibhūtakālo viya vipassanāñāṇaṃ abhinīharitvā nisinnassa bhikkhuno cātumahābhūtikakāyassa āvibhūtakālo. “Tatridaṃ suttaṃ āvuta”nti suttassa āvibhūtakālo viya vipassanāñāṇaṃ abhinīharitvā nisinnassa bhikkhuno tadārammaṇaṃ phassapañcamakānaṃ vā sabbacittacetāsikānaṃ vā vipassanāñāṇasseva vā āvibhūtakāloti.

Kim panetaṃ ñāṇassa āvibhūtaṃ, puggalassāti. Ñāṇassa, tassa pana āvibhāvattā puggalassa āvibhūtāva honti. Idañca vipassanāñāṇaṃ maggassa anantaraṃ, evaṃ santepi yasmā abhiññāvāre āraddhe etassa antarāvāro natthi, tasmā idheva dassitaṃ. Yasmā ca aniccādivasena akatasammasanassa dibbāya sotadhātuyā bheravasaddaṃ suṇanto pubbenivāsānussatiyā bherave khandhe anussarato dibbena cakkhunā bheravarūpaṃ passato bhayasantāso uppajjati, na aniccādivasena katasammasanassa, tasmā abhiññāpattassa bhayavinodakahetusampādanatthampi idaṃ idheva dassitaṃ. Idhāpi arahattavaseneva abhiññāvosaṇapāramippattatā veditabbā.

253. Manomayiddhiyaṃ ciñṇavasitāya. Tattha **manomayanti** manena nibbattaṃ. **Sabbaṅgapaccaṅginti** sabbehi aṅgehi ca paccāṅgehi ca samannāgataṃ. **Ahīnindriyanti** saṅghānavasena avikalindriyaṃ. Iddhimatā nimmitarūpañhi sace iddhimā odāto, tampi odātaṃ. Sace aviddhakaṇṇo, tampi aviddhakaṇṇanti evaṃ sabbākārehi tena sadisameva hoti. **Muñjamhā īsikanti**ādi upamattayampi taṃ sadisabhāvadassanathameva vuttaṃ. Muñjasadisā eva hi tassa anto īsikā hoti. Kosasadisoyeva asi, vaṭṭāya kosiyā vaṭṭaṃ asimeva pakkhipanti, patthaṭāya patthaṭaṃ.

Karaṇḍāti idampi ahikañcukassa nāmaṃ, na vilīvakaraṇḍakassa. Ahikañcuko hi ahinā sadisova hoti. Tattha kiñcāpi “puriso ahiṃ karaṇḍā uddhareyyā”ti hatthena uddharamāno viya dassito, atha kho cittenevassa uddharaṇaṃ veditabbā. Ayañhi ahi nāma saṅgatiyaṃ ṭhito, kaṭṭhantaraṃ vā rukkhantaraṃ vā nissāya, tacato sarīranikkadḍhanapayogasañkhātena thāmena, sarīraṃ khādamaṇaṃ viya purāṇatacaṃ jigucchantoti imehi catūhi kāraṇehi sayameva kañcukaṃ jahāti, na sakkā tato aññena uddharitum. Tasmā cittena uddharaṇaṃ sandhāya idaṃ vuttanti veditabbā. Iti muñjādisadisā imassa bhikkhuno sarīraṃ, īsikādisadisā nimmitarūpanti idamettha opammasaṃsandanaṃ. Nimmānavidhānaṃ panettha parato ca iddhividhāvipaṇcaabhiññākathā sabbākārena **visuddhimagge** vitthāritāti tattha vuttanayeneva veditabbā. Upamāmatameva hi idha adhikaṃ.

Tattha chekakumbhakārādayo viya iddhividhañāṇalābhī bhikkhu daṭṭhabbo. Suparikammakataṃmattikādayo viya iddhividhañāṇaṃ daṭṭhabbaṃ. Icchiticchitabhājanavikatiādikaraṇaṃ viya tassa bhikkhuno vikubbaṃ daṭṭhabbaṃ. Idhāpi ciñṇavasitāvaseneva abhiññāvosaṇapāramippattatā veditabbā. Tathā ito parāsu catūsu abhiññāsu.

255. Tattha dibbasotadhātuupamāyaṃ **sañkhadhamoti** sañkhadhamako. **Appakasirenevāti** niddukkheneva. **Viññāpeyyāti** jānāpeyya. Tattha evaṃ cātuddisā viññāpente sañkhadhamake “sañkhasaddo aya”nti vavattāpentānaṃ sattānaṃ tassa sañkhasaddassa āvibhūtakālo viya yogino dūrasantikabhedānaṃ dibbānañceva mānusakānañca saddānaṃ āvibhūtakālo daṭṭhabbo.

256. Cetopariyañāṇa-upamāyaṃ **daharoti** taruṇo. **Yuvāti** yobbanena samannāgato. **Maṇḍanakajātikoti** yuvāpi samāno na alasiyo kiliṭṭhavatthasarīro, atha kho maṇḍanakapakatiko, divasassa dve tayo vāre nhāyivā suddhavattha-paridahana-alānkāraṇasīloti attho. **Sakaṇikanti** kāḷatilakavaṅka-mukhadūsiṭṭakādīnaṃ aññatarena sadosaṃ. Tattha yathā tassa mukhanimittaṃ paccavekkhato mukhadoso pākaṭo hoti, evaṃ cetopariyañāṇāya cittaṃ abhinīharitvā nisinnassa bhikkhuno paresaṃ soḷasavidhaṃ cittaṃ pākaṭaṃ hotīti veditabbā. Pubbenivāsaupamādīsu yaṃ vattabbaṃ, taṃ sabbaṃ mahāassapure vuttameva.

259. **Ayaṃ kho udāyi pañcamo dhammoti** ekūnavīsati pabbāni paṭipadāvasena ekaṃ dhammaṃ katvā pañcamo dhammoti vutto. Yathā hi aṭṭhakanāgarasutte (ma. ni. 2.17 ādayo) ekādasa pabbāni

pucchāvasena ekadhammo kato, evamidha ekūnavīsati pabbāni paṭipadāvasena eko dhammo katoti veditabbāni. Imesu ca pana ekūnavīsatiyā pabbesu paṭipāṭiyā aṭṭhasu koṭṭhāsesu vipassanāñāṇe ca āsavakkhayañāṇe ca arahattavasena abhiññāvosānapāramippattatā veditabbā, sesesu ciṅṇavasibhāvavasena. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Mahāsakuludāyisuttavaṇṇanā niṭṭhitā.

8. Samaṇamuṇḍikasuttavaṇṇanā

260. Evaṃ me sutanti samaṇamuṇḍikasuttam. Tattha **uggāhamānoti** tassa paribbājakassa nāmaṃ. **Sumanoti** pakatināmaṃ. Kiñci kiñci pana uggahitum uggāhetum samatthatāya uggāhamānoti naṃ sañjānanti. Samayaṃ pavadanti etthāti **samayappavādakam.** Tasmim kira ṭhāne caṅkītārukkhapokkharasātippabhutayo brāhmaṇā nigaṇṭhācelakaparibbājakādayo ca pabbajitā sannipatīvā attano attano samayaṃ pavadanti kathenti dīpentī, tasmā so āramo samayappavādakoti vuccati. Sveva tindukācīrasaṅkhātāya timbarūsakarukkhapantiyā parikkhattatā **tindukācīram.** Yasmā panettha paṭhamam ekā sālā ahoṣi, pacchā mahāpuññaṃ poṭṭhapādaparibbājakam nissāya bahū sālā katā, tasmā tameva ekam sālā upādāya laddhanāmasena **ekasālakoti** vuccati. Mallikāya pana pasenadirañño deviyā uyyānabhūto so pupphaphalasañchanno āramoti katvā **mallikāya āramoti** saṅkham gato. Tasmim samayappavādake tindukācīre ekasālake mallikāya ārame. **Paṭivasatī** vāsaphāsutāya vasati. **Divā divassatī** divasassa divā nāma majjhanhātikkamo, tasmim divasassapi divābhūte atikkantamatte majjhanhike nikkhamīti attho. **Paṭisallīnoti** tato tato rūpādigocarato cittaṃ paṭisaṃharitvā līno, jhānaratisevanavasena ekībhāvaṃ gato. **Manobhāvanīyānanti** manavaḍḍhanakānaṃ, ye āvajjato manasikaroto cittaṃ vinīvaraṇam hoti unnamati vaḍḍhati. **Yāvatāti** yattakā. **Ayam tesam aññataroti** ayam tesam abbhantaro eko sāvako. **Appeva nāmāti** tassa upasaṅkamaṃ patthayamāno āha. Patthanākāraṇam pana sandakasutte vuttameva.

261. Etadavocāti dandapañño ayam gahapati, dhammakathāya naṃ saṅgaṇhitvā attano sāvakaṃ karissāmīti maññamāno etaṃ “catūhi kho” tiādivacanaṃ avoca. Tattha **paññepemīti** dassemi ṭhapemi. **Sampannakusalanti** paripuṇṇakusalam. **Paramakusalanti** uttamakusalam. **Ayojjhanti** vādayuddhena yujjhivā cāletum asakkuṇeyyam acalam nikkampaṃ thiram. **Na karotīti** akaraṇamattameva vadati, ettha pana saṃvarappahānaṃ vā paṭisevanappahānaṃ vā na vadati. Sesapadesupi eseva nayo.

Neva abhinandīti titthiyā nāma jānitvāpi ajānitvāpi yaṃ vā taṃ vā vadantīti maññamāno nābhinandi. **Na paṭikkosīti** sāsanaṃ anulomaṃ viya pasannākāraṃ viya vadatīti maññamāno na paṭisedheti.

262. Yathā uggāhamānassatī yathā tassa vacanaṃ, evaṃ sante uttānaseyyako kumāro ayojjhasamaṇo thirasamaṇo bhavissati, mayaṃ pana evaṃ na vadāmāti dīpeti. **Kāyotipi na hotīti** sakakāyo parakāyotipi visesaññaṃ na hoti. **Aññatra phanditamattāti** paccattharaṇe valisamphassena vā maṅguladaṭṭhena vā kāyaphandanamattaṃ nāma hoti. Taṃ ṭhapetvā aññaṃ kāyena karaṇakammaṃ nāma natthi. Tampi ca kilesasahagatacitteneva hoti. **Vācātīpi na hotīti** micchāvācā sammāvācātīpi nānattaṃ na hoti. **Roditamattāti** jighacchāpipāsāparetassa pana roditamattaṃ hoti. Tampi kilesasahagatacitteneva. **Saṅkappoti** micchāsaṅkappo sammāsaṅkappotipi nānattaṃ na hoti. **Vikūjitamattāti** vikūjitamattaṃ rodanahasitamattaṃ hoti. Daharakumārakānañhi cittaṃ atītārammaṇam pavattati, nirayato āgatā nirayadukkham saritvā rodanti, devalokato āgatā hasanti, tampi kilesasahagatacitteneva hoti. **Ājivoti** micchājīvo sammājīvotipi nānattaṃ na hoti. **Aññatra mātuthaññāti** thaññaacoradārakā nāma honti, mātari khīraṃ pāyantiyā apivitvā aññavihitakāle piṭṭhipassena āgantvā thaññaṃ pivanti. Ettakaṃ muñcitvā añño micchājīvo natthi. Ayampi kilesasahagatacitteneva hotīti dasseti.

263. Evaṃ paribbājakavādaṃ paṭikkhipitvā idāni sayāṃ sekkhabhūmiyaṃ mātikaṃ ṭhapento **catūhi kho ahantiādimāha**. Tattha **samadhigayha tiṭṭhatī** visesetvā tiṭṭhati. **Na kāyena pāpa kammantiādisu** na kevalaṃ akaraṇamattameva, bhagavā pana ettha saṃvarappahānapaṭisankhā paññapeti. Taṃ sandhāyevamāha. **Na ceva sampannakusalantiādi** pana khīṇāsavaṃ sandhāya vuttaṃ.

Idāni asekkhabhūmiyaṃ mātikaṃ ṭhapento **dasahi kho ahantiādimāha**. Tattha tīṇi padāni nissāya dve paṭhamacatukkā ṭhapitā, ekaṃ padaṃ nissāya dve pacchimacatukkā. Ayaṃ sekkhabhūmiyaṃ mātikā.

264. Idāni taṃ vibhajanto **katame ca thapati akusalasīlā**tiādimāha. Tattha **sarāganti** aṭṭhavidhaṃ lobhasahagatacittaṃ. **Sadosanti** paṭighasampayuttacittadvayaṃ. **Samohanti** vicikicchuddhaccasahagatacittadvayampi vaṭṭati, sabbākusalacittānīpi. Moho sabbākusale uppajjatī hi vuttaṃ. **Itosamuṭṭhānā**ti ito sarāgādicittato samuṭṭhānaṃ uppatti etesanti itosamuṭṭhānā.

Kuhinti katarāṃ ṭhānaṃ pāpuṇitvā aparisesā nirujjhanti. **Ettheteti** sotāpattiphale bhuttaṃ. Pātimokkhasaṃvarasīlāñhi sotāpattiphale paripuṇṇaṃ hoti, taṃ ṭhānaṃ patvā akusalasīlaṃ asesāṃ nirujjhanti. Akusalasīlanti ca dussīlassetaṃ adhivacananti veditabbaṃ.

Akusalānaṃ sīlānaṃ nirodhāya paṭipannoti ettha yāva sotāpattimaggā nirodhāya paṭipanno nāma hoti, phalapatte pana te nirodhitā nāma honti.

265. Vītarāgantiādihi aṭṭhavidhaṃ kāmāvacarakusalacittameva vuttaṃ. Etena hi kusalasīlaṃ samuṭṭhāti.

Sīlavā hotīti sīlasampanno hoti guṇasampanno ca. **No ca sīlamayoti** alamettāvātā, natthi ito kiñci uttari karaṇīyanti evaṃ sīlamayo na hoti. **Yatthassa teti** arahattaphale bhuttaṃ. Arahattaphalañhi patvā akusalasīlaṃ asesāṃ nirujjhanti.

Nirodhāya paṭipannoti ettha yāva arahattamaggā nirodhāya paṭipanno nāma hoti, phalapatte pana te nirodhitā nāma honti.

266. Kāmasaññādīsu kāmasaññā aṭṭhalobhasahagatacittasahajātā, itarā dve domanassasahagatacittadvayena sahajātā.

Paṭhamaṃ jhānanti anāgāmiphalaṭṭhamajjhānaṃ. **Ettheteti** anāgāmiphale bhuttaṃ. Anāgāmiphalañhi patvā akusalasaṅkappā aparisesā nirujjhanti.

Nirodhāya paṭipannoti ettha yāva anāgāmimaggā nirodhāya paṭipanno nāma hoti, phalapatte pana te nirodhitā nāma honti. Nekkhammasaññādayo hi tissopi aṭṭhakāmāvacarakusalasahajātasaññāva.

267. Ettheteti arahattaphale bhuttaṃ. Dutiyajjhānikaṃ arahattaphalañhi pāpuṇitvā kusalasaṅkappā aparisesā nirujjhanti. **Nirodhāya paṭipanno**ti ettha yāva arahattamaggā nirodhāya paṭipanno nāma hoti, phalapatte pana te nirodhitā nāma honti. Sesāṃ sabbattha uttānamevāti.

Papañcasūdaniyā majjhimanikāyattakathāya

Samaṇamuṇḍikasuttavaṇṇanā niṭṭhitā.

9. Cūlasakuludāyisuttavaṇṇanā

270. Evaṃ me sutanti cūlasakuludāyisuttaṃ. Tattha **yadā pana, bhante, bhagavāti** idaṃ paribbājako dhammakathaṃ sotukāmo bhagavato dhammadesanāya sālayabhāvaṃ dassento āha.

271. Taṃyevettha paṭibhātūti sace dhammaṃ sotukāmo, tuyhevettha eko pañho ekaṃ kāraṇaṃ upaṭṭhātu. **Yathā maṃ paṭibhāseyyāti** yena kāraṇena mama dhammadesanā upaṭṭhaheyya, etena hi kāraṇena kathāya samuṭṭhitāya sukhaṃ dhammaṃ desetunti dīpeti. **Tassa mayhaṃ, bhanteti** so kira taṃ disvā – “sace bhagavā idha abhavissā, ayametassa bhāsitaṃ atthoti dīpasahassaṃ viya ujjalāpetvā ajja me pākaṭaṃ akarissā” ti dasabalaṃyeva anussari. Tasmā **tassa mayhaṃ, bhanteti** ādimāha. Tattha **aho nūnāti** anussaraṇatthe nipātaḍvayaṃ. Tena tassa bhagavantaṃ anussarantaṃ etadahosi “aho nūna bhagavā aho nūna sugato” ti. **Yo imesanti** yo imesaṃ dhammānaṃ. **Sukusaloti** suṭṭhu kusalo nipuṇo cheko. So bhagavā aho nūna katheyya, so sugato aho nūna katheyya, tassa hi bhagavato pubbenivāsañāṇassa anekāni kappakoṭisahasāni ekaṅgaṇāni pākaṭānīti, ayamettha adhippāyo.

Tassa vāhaṃ pubbantaṃ ārabbhāti yo hi lābhī hoti, so “pubbe tvaṃ khattiyo ahosi, brāhmaṇo ahosi” ti vutte jānanto sakkaccaṃ sussūsati. Alābhī pana – “evaṃ bhavissati evaṃ bhavissati” ti sīsakampamettameva dasseti. Tasmā evamāha – “tassa vāhaṃ pubbantaṃ ārabbhā pañhassa veyyākaraṇena cittaṃ ārādheyya” nti.

So vā maṃ aparantanti dibbacakkhulābhino hi anāgataṃsañāṇaṃ ijjhati, tasmā evamāha. Itaraṃ pubbe vuttanayameva.

Dhammaṃ te desessāmīti ayaṃ kira atīte desiyamānēpi na bujjhissati, anāgate desiyamānēpi na bujjhissati. Athassa bhagavā saṅhasukhumaṃ paccayākāraṃ desetukāmo evamāha. Kiṃ pana taṃ bujjhissatīti? Etaṃ pageva na bujjhissati, anāgate panassa vāsanāya paccayo bhavissatīti disvā bhagavā evamāha.

Paṃsupisācakanti asuciṭṭhāne nibbattapisācaṃ. So hi ekaṃ mūlaṃ gahetvā adissamānakāyo hoti. Tatridaṃ vatthu – ekā kira yakkhinī dve dārake thūpārāmadvāre nisīdāpetvā āhārapariyesanattaṃ nagaraṃ gatā. Dārakā ekaṃ piṇḍapātikattheraṃ disvā āhaṃsu, – “bhante, amhākaṃ mātā anto nagaraṃ pavīṭṭhā, tassā vadeyyātha ‘yaṃ vā taṃ vā laddhakaṃ, gahetvā sīghaṃ gaccha, dārakā te jighacchitaṃ sandhāretuṃ na sakkontī” ti. Tamahaṃ kathaṃ passissāmīti? Idaṃ, bhante, gaṇhathāti ekaṃ mūlakhaṇḍaṃ adāṃsu. Therassa anekāni yakkhasahasāni paññāyimsu, so dārakehi dinnasaññāṇena taṃ yakkhiniṃ addasa virūpaṃ bībhaccaṃ kevalaṃ vīthiyaṃ gabbhamalaṃ paccāsīsamānaṃ. Disvā tamattaṃ kathesi. Kathaṃ maṃ tvaṃ passasīti vutte mūlakhaṇḍaṃ dassesi, sā acchinditvā gaṇhi. Evaṃ paṃsupisācakā ekaṃ mūlaṃ gahetvā adissamānakāyā honti. Taṃ sandhāyesa “paṃsupisācakampi na passāmī” ti āha. **Na pakkhāyatīti** na dissati na upaṭṭhāti.

272. Dīghāpi kho te esāti udāyi esā tava vācā dīghāpi bhavēyya, evaṃ vadantassa vassasatampi vassasahasampi pavatteyya, na ca atthaṃ dīpeyyāti adhippāyo. **Appāṭihīrakatanti** aniyyānikaṃ amūlakaṃ niratthakaṃ sampajjatīti attho.

Idāni taṃ vaṇṇaṃ dassento **seyyathāpi, bhanteti** ādimāha. Tattha **paṇḍukambale nikkhattoti** visabhāgavaṇṇe rattakambale ṭhapito. **Evaṃvaṇṇo attā hotīti** idaṃ so subhakiṇhadēvaloke nibbattakkhandhe sandhāya – “amhākaṃ matakāle attā subhakiṇhadēvaloke khandhā viya jotetī” ti vadati.

273. Ayaṃ imesaṃ ubhinnanti so kira yasmā maṇissa bahi ābhā na niccharati, khajjopanakassa aṅguladvaṅgulacaturaṅgulamattaṃ niccharati, mahākhaṅgulopanakassa pana khaḷamaṇḍalamattampi niccharatiyeva, tasmā evamāha.

Viddheti ubbidde, meghavigamena dūrībhūteti attho. **Vigatavalāhaket** apagatameghe. **Deveti**

ākāse. **Osadhitarākā**ti sukkatārakā. Sā hi yasmā tassā udayato paṭṭhāya tena saññāpēna osadhāni gaṇhantipi pivantipi, tasmā “osadhitarākā”ti vuccati. **Abhido aḍḍharattasamayanti** abhinne aḍḍharattasamaye. Iminā gaganamajjhe ṭhitacandaṃ dasseti. Abhido majjhanhikepi eseva nayo.

Ato khoti ye anubhonti, tehi bahutarā, bahū ceva bahutarā cāti attho. **Ābhā nānubhontī**ti obhāsaṃ na vaḷañjanti, attano sarīrobhāseneva ālokaṃ pharivā viharanti.

274. Idāni yasmā so “ekantasukhaṃ lokaṃ pucchissāmī”ti nisinno, pucchāmūlho pana jāto, tasmā naṃ bhagavā taṃ pucchāṃ sarāpento **kiṃ pana, udāyi, atthi ekantasukho lokoti**ādīmāha. Tattha **ākāravatī**ti kāraṇavatī. **Aññataraṃ vā pana tapoguṇanti** acelakapāḷiṃ sandhāyāha, surāpānaviratīti attho.

275. Katamā pana sā, bhante, ākāravatī paṭipadā ekantasukhassāti kasmā pucchati? Evaṃ kirassa ahosi – “mayāṃ sattānaṃ ekantasukhaṃ vadāma, paṭipadaṃ pana kālena sukhaṃ kālena dukkhaṃ vadāma. Ekantasukhassa kho pana attano paṭipadāyapi ekantasukhāya bhavitabbaṃ. Amhākaṃ kathā aniyyānikā, satthu kathāva niyyānikā”ti. Idāni sathāraṃyeva pucchitvā jānissāmīti tasmā pucchati.

Ettha mayāṃ anassāmāti etasmiṃ kāraṇe mayāṃ anassāma. Kasmā pana evamāhaṃsu? Te kira pubbe pañcasu dhammesu paṭiṭṭhāya kaṣiṇaparikkammaṃ katvā tatiyajjhānaṃ nibbattetvā aparihīnājjhānā kālaṃ katvā subhakiṇhesu nibbattantīti jānanti, gacchante gacchante pana kāle kaṣiṇaparikkammampi na jāniṃsu, tatiyajjhānampi nibbattetuṃ nāsakkhiṃsu. Pañca pubbabhāgadhamme pana “ākāravatī paṭipadā”ti uggahetvā tatiyajjhānaṃ “ekantasukho loko”ti uggaṇhiṃsu. Tasmā evamāhaṃsu. **Uttaritaranti** ito pañcahi dhammehi uttaritaraṃ paṭipadaṃ vā tatiyajjhānato uttaritaraṃ ekantasukhaṃ lokaṃ vā na jānāmāti vuttaṃ hoti. **Appasadde katvā**ti ekappahārenea mahāsaddaṃ kātuṃ āradde nissadde katvā.

276. Sacchikiriyāhetūti ettha dve sacchikiriyā paṭilābhasacchikiriyā ca paccakkhasacchikiriyā ca. Tattha tatiyajjhānaṃ nibbattetvā aparihīnājjhāno kālaṃ katvā subhakiṇhaloke tesāṃ devānaṃ samānāyuvāṇo hutvā nibbattati, ayaṃ paṭilābhasacchikiriyā nāma. Catutthajjhānaṃ nibbattetvā iddhivikubbanena subhakiṇhalokaṃ gantvā tehi devehi saddhiṃ santiṭṭhati sallapati sākacchaṃ āpajjati, ayaṃ paccakkhasacchikiriyā nāma. Tāsaṃ dvinnampi tatiyajjhānaṃ ākāravatī paṭipadā nāma. Tañhi anuppādetvā neva sakkā subhakiṇhaloke nibbattituṃ, na catutthajjhānaṃ uppādetuṃ. Iti duvidhampetāṃ sacchikiriyāṃ sandhāya – “etassa nūna, bhante, ekantasukhassa lokassa sacchikiriyāhetū”ti āha.

277. Udañcanikoti udakavārako. **Antarāyamakāsī**ti yathā pabbajjaṃ na labhati, evaṃ upaddutamakāsī yathā taṃ upanissayavipannaṃ. Ayaṃ kira kassapabuddhakāle pabbajitvā samaṇadhammakāsī. Athassa eko sahāyako bhikkhu sāsane anabhirato, “āvuso, vibbhamissāmī”ti ārocesi. So tassa pattacīvare lobhaṃ uppādetvā gihibhāvāya vaṇṇaṃ abhāsi. Itaro tassa pattacīvaram datvā vibbhami. Tenassa kammunā idāni bhagavato sammukhā pabbajjāya antarāyo jāto. Bhagavatā panassa purimasuttaṃ atirekabhāṇavāramattaṃ, idaṃ bhāṇavāramattanti ettakāya tantiyā dhammo kathito, ekadesanāyapi maggaphalapaṭivedho na jāto, anāgate panassa paccayo bhavissatīti bhagavā dhammaṃ deseti. Anāgate paccayabhāvañcassa disvā bhagavā dharamāno ekaṃ bhikkhumpi mettāvihārimhi etadagge na ṭhapesi. Passati hi bhagavā – “anāgate ayaṃ mama sāsane pabbajitvā mettāvihāriṇaṃ aggo bhavissatī”ti.

So bhagavati parinibbute dhammāsokarājakāle pāḷaliputte nibbattitvā pabbajitvā arahattappatto **assaguttatthero** nāma hutvā mettāvihāriṇaṃ aggo ahosi. Therassa mettānubhāvena tiracchānagatāpi mettacittaṃ paṭilabhiṃsu, thero sakalajambudīpe bhikkhusaṅghassa ovādācariyo hutvā vattanisenāsane āvasi, tiṃsayojanamattā aṭavī ekaṃ padhānagharaṃ ahosi. Thero ākāse cammakhaṇḍaṃ pattharivā tattha nisinno kammaṭṭhānaṃ kathesi. Gacchante gacchante kāle bhikkhācārampi agantvā vihāre nisinno

kammaṭṭhānaṃ kathesi, manussā vihārameva gantvā dānamadaṃsu. Dhammāsokarājā therassa guṇaṃ sutvā daṭṭhukāmo tikkhattuṃ paṇi. Thero bhikkhusaṅghassa ovādaṃ dammīti ekavārampi na gatoti.

Papañcasūdaniyā majjhimanikāyaṭṭhakathāya

Cūḷasakuludāyisuttavaṇṇanā niṭṭhitā.

10. Vekhanasasuttavaṇṇanā

278. Evaṃ me sutanti vekhanasasuttaṃ. Tattha **vekhanasoti** ayaṃ kira sakuludāyissa ācariyo, so “sakuludāyī paribbājako paramavaṇṇapañhe parājito”ti sutvā “mayā so sādhukaṃ uggahāpito, tenāpi sādhukaṃ uggahitaṃ, kathaṃ nu kho parājito, handāhaṃ sayamaṃ gantvā samaṇaṃ gotamaṃ paramavaṇṇapañhaṃ pucchitvā jānissāmi”ti rājagahato pañcacattālīsayojanaṃ sāvattiṃ gantvā yena bhagavā, tenupasaṅkami, upasaṅkamitvā pana ṭhitakova bhagavato santike udānaṃ udānesi. Tattha purimasadisamaṃ vuttanayeneva vedītabbaṃ.

280. Pañca kho imeti kasmā ārabhi? Agāriyopi ekacco kāmagaruko kāmādhimutto hoti, ekacco nekkhammagaruko nekkhammādhimutto hoti. Pabbajitopi ca ekacco kāmagaruko kāmādhimutto hoti, ekacco nekkhammagaruko nekkhammādhimutto hoti. Ayaṃ pana kāmagaruko kāmādhimutto hoti. So imāya kathāya kathiyamānāya attano kāmādhimuttattaṃ sallakkhessati, evamassāyaṃ desanā sappāyā bhavissatīti imaṃ desanaṃ ārabhi. **Kāmaggasukhanti** nibbānaṃ adhippettaṃ.

281. Pāpito bhavissatīti ajānanabhāvaṃ pāpito bhavissati. **Nāmakāmyeva sampajjati** niratthakavacanamatameva sampajjati. **Tiṭṭhatu pubbanto tiṭṭhatu aparantoti** yasmā tuyhaṃ atītakathāya anucchavikaṃ pubbenivāsaññaṃ natthi, anāgatakathāya anucchavikaṃ dibbacakkuññaṃ natthi, tasmā ubhayampetaṃ tiṭṭhatūti āha. **Suttabandhanehīti** suttamayabandhanehi. Tassa hi ārakkhatthāya hatthapādesu ceva gīvāya ca suttakāni bandhanti. Tāni sandhāyetaṃ vuttaṃ. Mahallakakāle panassa tāni sayamaṃ vā pūtīni hutvā muñcanti, chinditvā vā haranti.

Evameva khoti iminā idaṃ dasseti – daharassa kumārassa suttabandhanānaṃ ajānanakālo viya avijjāya purimāya koṭiyā ajānanaṃ, na hi sakkā avijjāya purimakoti ñātumaṃ, mocanakāle jānanaśadisamaṃ pana arahattamaggena avijjābandhanassa pamokkho jātoti jānanaṃ. Sesaṃ sabbattha uttānamevāti.

Papañcasūdaniyā majjhimanikāyaṭṭhakathāya

Vekhanasasuttavaṇṇanā niṭṭhitā.

Tatīyavaggavaṇṇanā niṭṭhitā.

4. Rājavaggo

1. Ghaṭikārasuttavaṇṇanā

282. Evaṃ me sutanti ghaṭikārasuttaṃ. Tattha **sitaṃ pātvākāsīti** mahāmaggena gacchanto aññataraṃ bhūmippadesaṃ oloketvā – “atthi nu kho mayā cariyaṃ caramānena imasmiṃ ṭhāne nivutthapubba”nti āvajjanto addasa – “kassapabuddhakāle imasmiṃ ṭhāne vegalīṅgaṃ nāma gāmanigamo ahoṣi, ahaṃ tadā **jotipālo** nāma māṇavo ahoṣiṃ, mayhaṃ sahāyo ghaṭikāro nāma kumbhakāro ahoṣi, tena saddhiṃ mayā idha ekaṃ sukāraṇaṃ kataṃ, taṃ bhikkhusaṅghassa apākaṭaṃ paṭicchannaṃ, handa naṃ bhikkhusaṅghassa pākaṭaṃ karomi”ti maggā okkamma aññatarasmiṃ padese

ṭhitakova sitapātukammamakāsi, aggaggadante dassetvā mandahasitaṃ hasi. Yathā hi lokiyamanussā uraṃ paharantā – “kuhaṃ kuha”nti hasanti, na evaṃ buddhā, buddhānaṃ pana hasitaṃ haṭṭhapahaṭṭhākāramattameva hoti.

Hasitañca nāmetaṃ terasahi somanassasahagatacittēhi hoti. Tattha lokiyamahājano akusalato catūhi, kāmvācarakusalato catūhīti aṭṭhahi cittēhi hasati, sekkhā akusalato diṭṭhisampayuttāni dve apanetvā chahi cittēhi hasanti, khīṇāsavā catūhi sahetukakiriyacittēhi ekena ahetukakiriyacittēnāti pañchahi cittēhi hasanti. Tesupi balavārammaṇe āpāthagate dvīhi nīṇasampayuttacittēhi hasanti, dubbalārammaṇe duhetukacittadvayena ca ahetukacittēna cāti tīhi cittēhi hasanti. Imasmiṃ pana ṭhāne kiriyāhetukamanoviññādhātusomanassasahagatacittaṃ bhagavato haṭṭhapahaṭṭhākāramattaṃ hasitaṃ uppādesi.

Taṃ panetaṃ hasitaṃ evaṃ appamattakampi therassa pākātaṃ ahosi. Kathaṃ? Tathārūpe hi kāle tathāgatassa catūhi dāṭhāhi catuddīpikamahāmeghamukhato sateratāvijjulatā viya virocamaṇā mahātālakkhandhapamāṇā rasmivaṭṭiyo uṭṭhahitvā tikkhattuṃ sīsavaṃ padakkhiṇaṃ katvā dāṭhaggesuyeva antaradhāyanti. Tena saññāṇena āyasmā ānando bhagavato pacchato gacchamānopi sitapātubhāvaṃ jānāti.

Bhagavantaṃ etadavocāti – “ettha kira kassapo bhagavā bhikkhusaṅghaṃ ovadī, catusaccappakāsaṇaṃ akāsi, bhagavatopi ettha nisīdituṃ ruciṃ uppādessāmi, evamayā bhūmibhāgo dvīhi buddhehi paribhutto bhavissati, mahājano gandhamālādīhi pūjetvā cetiyatṭhānaṃ katvā paricaranto saggamaggaparāyaṇo bhavissati”ti cintetvā etaṃ “tena hi, bhante,”tiādivacanaṃ avoca.

283. Muṇḍakena samaṇakenāti muṇḍaṃ muṇḍoti, samaṇaṃ vā samaṇoti vattuṃ vaṭṭati, ayaṃ pana aparipakkaññantā brāhmaṇakule uggahitavohāraseneva hīlento evamāha. **Sottisināninti** sinānatthāya katasottim. Sotti nāma kuruvindapāsānacunṇāni lākhāya bandhitvā kataguḷikakalāpakā vuccati, yaṃ sandhāya – “tena kho pana samayena chabbaggiyā bhikkhū kuruvindakasuttiyā nahāyanti”ti (cūḷava. 243) vuttaṃ. Taṃ ubhosu antesu gahetvā sarīraṃ ghaṃsanti. **Evaṃ sammāti** yathā etarahipi manussā “cetiavandanāya gacchāma, dhammassavanatthāya gacchāmā”ti vuttā ussāhaṃ na karonti, “naṭasamajjādīdassanatthāya gacchāmā”ti vuttā pana ekavacaneneva sampaṭicchanti, tatheva sinhāyitunti vutte ekavacanena sampaṭicchanto evamāha.

284. Jotipālaṃ māṇavaṃ āmantesīti ekapasse ariyaparihārena paṭhamataraṃ nhāyitvā paccuttaritvā ṭhito tassa mahantena issariyaparihārena nhāyantassa nhānapariyosānaṃ āgametvā taṃ nivatthanivāsanaṃ kese vodake kurumānaṃ āmantesi. **Ayanti** āsannatā dassento āha. **Ovaṭṭikaṃ vinivaṭṭhetvāti** nāgabalo bodhisatto “apehi sammā”ti īsakaṃ parivattamānova tena gahitagahaṇaṃ vissajjāpetvāti attho. **Kesesu parāmasitvā etadavocāti** so kira cintesi – “ayaṃ jotipālo paññavā, sakim dassanaṃ labhamāno tathāgatassa dassanepi pasīdissati, dhammakathāyapi pasīdissati, pasanno ca pasannākāraṃ kātuṃ sakkhissati, mittā nāma etadatthaṃ honti, yaṃkiñci katvā mama sahāyaṃ gahetvā dasabalassa santikaṃ gamissāmi”ti. Tasmā naṃ kesesu parāmasitvā etadavoca.

Ittarajaccoti aññajātiko, mayā saddhim asamānajātiko, lāmakajātikoti attho. **Na vatidanti** idaṃ amhākaṃ gamaṇaṃ na vata orakaṃ bhavissati na khuddakaṃ, mahantaṃ bhavissati. Ayañhi na attano thāmena gaṇhi, satthu thāmena gaṇhīti gahaṇasmiṃyeva niṭṭhaṃ agamāsi. **Yāvatādohipīti** ettha dokārahikārapikārā nipātā, yāvataparimanti attho. Idaṃ vuttaṃ hoti – “vācāya ālapanāṃ ovaṭṭikāya gahaṇaṇca atikkamitvā yāva kesaggahaṇampi tattha gamaṇatthaṃ payogo kattabbo”ti.

285. Dhammiyā kathāyāti idha satipaṭilābhatthāya pubbenivāsapaṭisaṃyuttā dhammī kathā veditabbā. Tassa hi bhagavā, – “jotipāla, tvaṃ na lāmakatṭhānaṃ otiṇṇasatto, mahābodhipallaṅke pana sabbaññutaññānaṃ patthetvā otiṇṇosi, tādisassa nāma pamādavihāro na yutto”tiādinā nayena satipaṭilābhāya dhammaṃ kathesi. Parasamuddavāsītherā pana vadanti – “jotipāla, yathā ahaṃ

dasapāramiyo pūretvā sabbaññutaññāṇaṃ paṭivijjhivā vīsatisahassabhikkhuparivāro loke vicarāmi, evamevaṃ tvampi dasapāramiyo pūretvā sabbaññutaññāṇaṃ paṭivijjhivā samaṇaṇaparivāro loke vicarissasi. Evarūpena nāma tayā pamādaṃ āpajjitum na yutta’nti yathāssa pabbajjāya cittaṃ namati, evaṃ kāmesu ādīnavaṃ nekkhamme ca ānisaṃsaṃ kathesīti.

286. Alattha kho, ānanda,...pe... pabbajjaṃ alattha upasampadanti pabbajitvā kimakāsi? Yaṃ bodhisattehi kattabbaṃ. Bodhisattā hi buddhānaṃ sammukhe pabbajanti. Pabbajitvā ca pana ittarasattā viya patitasīṅgā na honti, catupārisuddhisīle pana supatiṭṭhāya tepiṭakaṃ buddhavacanaṃ uggaṇhitvā terasa dhutaṅgāni samādāya araññaṃ pavisitvā gatapaccāgatavattaṃ pūrayamānā samaṇadhammaṃ karontā vipassanaṃ vaḍḍhetvā yāva anulomaññaṃ āhacca tiṭṭhanti, maggaphalattaṃ vāyāmaṃ na karonti. Jotipālopi tatheva akāsi.

287. Aḍḍhamāsupasampanneti kuladārakañhi pabbajetvā aḍḍhamāsampi avasitvā gate mātāpitūnaṃ soko na vūpasammati, sopi pattacīvaraggahaṇaṃ na jānāti, daharabhikkhusāmaṇerehi saddhiṃ viśāso na uppajjati, therehi saddhiṃ sineho na patiṭṭhāti, gatagataṭṭhāne anabhirati uppajjati. Ettakaṃ pana kālaṃ nivāse sati mātāpitaro passitum labhanti. Tena tesam soko tanubhāvaṃ gacchati, pattacīvaraggahaṇaṃ jānāti, sāmaṇeradaharabhikkhūhi saddhiṃ viśāso jāyati, therehi saddhiṃ sineho patiṭṭhāti, gatagataṭṭhāne abhiraṃati, na ukkaṇṭhati. Tasmā ettakaṃ vasitum vaṭṭatīti aḍḍhamāsaṃ vasitvā pakkāmi.

Paṇḍupuṭakassa sālinoti puṭake katvā sukkhāpitassa rattasālino. Tassa kira sālino vappakālato paṭṭhāya ayaṃ parihāro – kedārā suparikammakatā honti, tattha bījāni patiṭṭhāpetvā gandhodakena siñciṃsu, vappakāle vitānaṃ viya upari vatthakilañjaṃ bandhitvā paripakkakāle vihisīsāni chinditvā muṭṭhimatte puṭake katvā yottabaddhe vehāsaṃyeva sukkhāpetvā gandhacūṇṇāni attharivā koṭṭhakesu pūretvā tatiye vasse vivariṃsu. Evaṃ tivassaṃ parivutthassa sugandharattasālino apagatakālake suparisuddhe taṇḍule gahetvā khajjakavikatimpi bhattampi paṭiyādiyimṃsu. Taṃ sandhāya vuttaṃ **paṇītaṃ khādanīyaṃ bhojanīyaṃ...pe... kālaṃ ārocāpesīti.**

288. Adhivutṭho meti kiṃ sandhāya vadati? Vegaḷiṅgato nikkhamanakāle ghaṭikāro attano santike vassāvāsaṃ vasanattāya paṭiññaṃ aggahesi, taṃ sandhāya vadati. **Ahudeva aññathattaṃ ahudomanassanti** temāsaṃ dānaṃ dātuṃ, dhammañca sotum, iminā ca niyāmena vīsati bhikkhusahassāni paṭijaggitum nālatthanti alābhaṃ ārabba cittaññathattaṃ cittadomanassaṃ ahoṣi, na tathāgataṃ ārabba. Kasmā? Sotāpannattā. So kira pubbe brāhmaṇabhatto ahoṣi. Athekasmiṃ samaye paccante kupite vūpasamanattaṃ gacchanto uracchadaṃ nāma dhītaramāha – “amma amhākaṃ deve mā pamajji”ti. Brāhmaṇaṃ taṃ rājadhītaram disvā visaññino ahesum. Ke ime cāti vutte tumhākaṃ bhūmidevāti. Bhūmidevā nāma evarūpā hontīti niṭṭhubhitvā pāsādaṃ abhiruhi. Sā ekadivasam vīthim oloketi ṭhitā kassapassa bhagavato aggasāvakaṃ disvā pakkosāpetvā piṇḍapātaṃ datvā anumodanaṃ suṇamānāyeva sotāpannā hutvā “aññepi bhikkhū atthi”ti pucchitvā “sattā vīsatiyā bhikkhusahashehi saddhiṃ isipatane vasati”ti ca sutvā nimantetvā dānaṃ adāsi.

Rājā paccantaṃ vūpasametvā āgato. Atha naṃ paṭhamatarameva brāhmaṇā āgantvā dhītu avaṇṇaṃ vatvā paribhindiṃsu. Rājā pana dhītu jātakāleyeva varam adāsi. Tassā “satta divasāni rajjaṃ dātappa”nti varam gaṇhiṃsu. Athassā rājā satta divasāni rajjaṃ niyyātesī. Sā sattāraṃ bhojayamānā rājānaṃ pakkosāpetvā bahisaṇīyaṃ nisīdāpesī. Rājā satthu anumodanaṃ sutvāva sotāpanno jāto. Sotāpannassa ca nāma tathāgataṃ ārabba āghāto natthi. Tena vuttaṃ – “na tathāgataṃ ārabbhā”ti.

Yaṃ icchati taṃ haratūti so kira bhājanāni pacitvā kayavikkayaṃ na karoti, evaṃ pana vatvā dāruttāya vā mattikatthāya vā palālatthāya vā araññaṃ gacchati. Mahājanā “ghaṭikārena bhājanāni pakkāni”ti sutvā parisuddhataṇḍulaloṇadadhitelaphañitādīni gahetvā āgacchanti. Sace bhājanaṃ mahaggaṃ hoti, mūlaṃ appaṃ, yaṃ vā taṃ vā datvā gaṇhāmāti taṃ na gaṇhanti. Dhammiko vāṇijo mātāpitaro paṭijaggati, sammāsambuddhaṃ upaṭṭhahati, bahu no akusalaṃ bhavissatīti puna gantvā

mūlaṃ āharanti. Sace pana bhājanam appaggham hoti, ābhatam mūlaṃ bahu, dhammiko vāṇijo, amhākaṃ puññaṃ bhavissatīti yathābhatam gharasāmikā viya sādhuṃkaṃ paṭisāmetvā gacchanti. Evaṃguṇo pana kasmā na pabbajātīti. Rañño vacanapatham pacchindanto andhe jīṇṇe mātāpitaro poseṭīti āha.

289. Ko nu khoti kuhiṃ nu kho. **Kumbhiyāti** ukkhalito. **Pariyogāti** sūpabhājanato. **Paribhuñjāti** bhuñja. Kasmā panete evaṃ vadanti? Ghaṭikāro kira bhatam pacitvā sūpaṃ sampādetvā mātāpitaro bhojetvā sayampi bhuñjitvā bhagavato vaḍḍhamānakaṃ bhattasūpaṃ paṭṭhapetvā āsanam paññāpetvā ādhāraṃ upaṭṭhapetvā udakaṃ paccupaṭṭhapetvā mātāpitūnam saññaṃ datvā araññaṃ gacchati. Tasmā evaṃ vadanti. **Abhivissatthoti** ativissattho. **Pītisukham na vijahatīti** na nirantaram vijahati, atha kho rattibhāge vā divasabhāge vā gāme vā araññe vā yasmiṃ yasmiṃ khaṇe – “sadevake nāma loke aggapuggalo mayham geham pavisitvā sahatthena āmisam gahetvā paribhuñjati, lābhā vata me”ti anussarati, tasmim tasmim khaṇe pañcavaṇṇā pīti uppajjati. Tam sandhāya evaṃ vuttam.

290. Kaḷopiyāti pacchito. Kiṃ pana bhagavā evamakāsīti. Paccayo dhammiko, bhikkhūnam patte bhattasadiso, tasmā evamakāsi. Sikkhāpadapaññattipi ca sāvakānaṃyeva hoti, buddhānam sikkhāpadavelā nāma natthi. Yathā hi rañño uyyāne pupphaphalāni honti, aññesaṃ tāni gaṇhantānam niggaḥam karonti, rājā yathāruciya paribhuñjati, evaṃsampaḍametaṃ. Parasamuddavāsītherā pana “devatā kira paṭiggahetvā adamsū”ti vadanti.

291. Haratha, bhante, haratha bhadramukhāti amhākaṃ putto “kuhiṃ gatosī”ti vutte – “dasabalassa santika”nti vadati, kuhiṃ nu kho gacchati, satthu vasanaṭṭhānassa ovassakabhāvampi na jānātīti putte aparādhasaññino gahaṇe tuṭṭhacittā evamāhaṃsu.

Temāsam ākāsacchadanam aṭṭhāsīti bhagavā kira catunnam vassikānam māsānam ekam māsam atikkamitvā tiṇam āharāpesi, tasmā evamāha. Ayaṃ panettha padattho – ākāsam chadanamassāti **ākāsacchadanam. Na devotivassīti** kevalam nātivassi, yathā panettha pakatiyā ca nibbakosassa udakapātaṭṭhānabbhantare ekampi udakabindu nātivassi, evaṃ ghanachadanagebbhantare viya na vātātapāpi ābādham akamsu, pakatiyā utpharaṇameva ahosi. Aparabhāge tasmim nigame chaḍḍitepi tam ṭhānam anovassakameva ahosi. Manussā kammaṃ karontā deve vassante tattha sātake ṭhapetvā kammaṃ karonti. Yāva kappuṭṭhānā tam ṭhānam tādisameva bhavissati. Tañca kho pana na tathāgatassa iddhānubhāvena, tesamyeva pana guṇasampattiyā. Tesañhi – “sammāsambuddho kattha na labheyya, amhākaṃ nāma dvinnam andhakānam nivesanam uttiṇam kāresi”ti na tappaccayā domanassam udapādi – “sadevake loke aggapuggalo amhākaṃ nivesanā tiṇam āharāpetvā gandhakuṭim chādāpesi”ti pana tesam anappakam balavasomanassam udapādi. Iti tesamyeva guṇasampattiyā idam pāṭihāriyam jātanti veditabbam.

292. Taṇḍulavāhasatānīti ettha dve sakaṭāni eko vāhoti veditabbo. **Tadupiyañca sūpeyyanti** sūpatthāya tadanurūpaṃ telaphañitādiṃ. Vīsati bhikkhusahassassa temāsatthāya bhatam bhavissatīti kira saññāya rājā ettakaṃ pesesi. **Alam me rañño hotūti** kasmā paṭikkhipi? Adhigataappicchatāya. Evaṃ kirassa ahosi – “nāham rañña diṭṭhapubbo, katham nu kho pesesi”ti. Tato cintesi – “satthā bārāṇasim gato, addhā so rañño vassāvāsam yāciyamāno mayham paṭiññātabhāvam ārocetvā mama guṇakatham kathesi, guṇakathāya laddhalābho pana naṭena naccitvā laddham viya gāyakena gāyitvā laddham viya ca hoti. Kiṃ mayham iminā, kammaṃ katvā uppanna mātāpitūnampi sammāsambuddhassapi upaṭṭhānam sakkā kātu”nti. Sesam sabbattha uttānamevāti.

Papañcasūdaniyā majjhimanikāyattakathāya

Ghaṭikārasuttavaṇṇanā niṭṭhitā.

2. Raṭṭhapālasuttavaṇṇanā

293. Evaṃ me sutanti raṭṭhapālasuttaṃ. Tattha **thullakoṭṭhikanti** thullakoṭṭhaṃ paripuṇṇakoṭṭhāgāraṃ. So kira janapado niccasasso sadā bījabhaṇḍaṃ nikkhamati, khalabhaṇḍaṃ pavisati. Tena tasmīṃ nigame koṭṭhā niccapūrāva honti. Tasmā so thullakoṭṭhikanteva saṅkhaṃ gato.

294. Raṭṭhapāloti kasmā raṭṭhapālo? Bhinnaṃ raṭṭhaṃ sandhāretuṃ pāletuṃ samatthoti raṭṭhapālo. Kadā panassetāṃ nāmaṃ uppannanti. Padumuttarasammāsambuddhakāle. Ito hi pubbe sataśahassakappamatthake vassasatasahassāyukesu manussesu padumuttaro nāma satthā uppajjitvā bhikkhusatasahassaparivāro lokahitāya cārikaṃ cari, yaṃ sandhāya vuttaṃ –

“Nāgaram haṃsavatī nāma, ānando nāma khattiyo;
Sujātā nāma janikā, padumuttarassa satthuno”ti. (bu. vaṃ. 12.19);

Padumuttare pana anuppanne eva haṃsavatiyā dve kuṭumbikā saddhā pasannā kapaṇaddhikayācakādīnaṃ dānaṃ paṭṭhapayīṃsu. Tadā pabbatavāsino pañcasatā tāpasā haṃsavatiṃ anuppattā. Te dvepi janā tāpasagaṇaṃ majjhe bhinditvā upaṭṭhahīṃsu. Tāpasā kiñcikālaṃ vasitvā pabbatapādameva gatā. Dve saṅghattherā ohīyīṃsu. Tadā tesāṃ te yāvajīvaṃ upaṭṭhānaṃ akaṃsu. Tāpasesu bhuñjitvā anumodanaṃ karontesu eko sakkabhavanassa vaṇṇaṃ kathesi, eko bhūmindharanāgarājabhavanassa.

Kuṭumbikesu eko sakkabhavanaṃ patthanaṃ katvā sakko hutvā nibbato, eko nāgabhavane pālitanāgarājā nāma. Taṃ sakko attano upaṭṭhānaṃ āgataṃ disvā nāgayoniyā abhiramasīti pucchi. So nābhīramāmīti āha. Tena hi padumuttarassa bhagavato dānaṃ datvā imasmīṃ ṭhāne patthanaṃ karohi, ubho sukhaṃ vasissāmāti. Nāgarājā satthāraṃ nimantetvā bhikkhusatasahassaparivārassa bhagavato sattāhaṃ mahādānaṃ dadamāno padumuttarassa dasabalassa puttaṃ uparevataṃ nāma sāmaṇeraṃ disvā sattame divase buddhappamukhassa saṅghassa dibbavatthāni datvā sāmaṇerassa ṭhānantaraṃ patthesi. Bhagavā anāgataṃ oloketvā – “anāgate gotamassa nāma buddhassa putto rāhulakumāro bhavissati”ti disvā “samijjhissati te patthanā”ti kathesi. Nāgarājā tamatthaṃ sakkassa kathesi. Sakko tassa vacanaṃ sutvā tatheva sattāhaṃ dānaṃ datvā bhinnaṃ raṭṭhaṃ sandhāretuṃ pāletuṃ samatthakule nibbattitvā saddhāpabbajitaṃ raṭṭhapālaṃ nāma kulaputtaṃ disvā – “ahampi anāgate lokasmīṃ tumhādise buddhe uppanne bhinnaṃ raṭṭhaṃ sandhāretuṃ pāletuṃ samatthakule nibbattitvā ayaṃ kulaputto viya saddhāpabbajito raṭṭhapālo nāma bhaveyya”nti patthanamakāsi. Satthā samijjhanakabhāvaṃ ṇatvā imaṃ gāthamāha –

“Sarājikaṃ cātuvaṇṇaṃ, posetuṃ yaṃ pahossati;
Raṭṭhapālakulaṃ nāma, tattha jāyissate aya”nti. –

Evaṃ padumuttarasammāsambuddhakāle tassetāṃ nāmaṃ uppannanti veditabbaṃ.

Etadahosīti kiṃ ahosi? **Yathā yathā khotiādi.** Tatrāyaṃ saṅkhepakathā – ahaṃ kho yena yena kāraṇena bhagavatā dhammaṃ desitaṃ ājānāmi, tena tena me upaparikkhato evaṃ hoti – “yadetaṃ sikkhattayabrahmacariyaṃ ekadivasampi akhaṇḍaṃ katvā carimakacittaṃ pāpetabbatāya ekantaparipuṇṇaṃ caritabbaṃ, ekadivasampi ca kilesamalena amalīnaṃ katvā carimakacittaṃ pāpetabbatāya ekantaparisuddhaṃ, saṅkhalikhitaṃ vilikhitasāṅkhasadisāṃ dhotasāṅkhasappaṭibhāgaṃ katvā caritabbaṃ, nayidaṃ sukaraṃ agāraṃ ajjhāvasatā agāramajjhe vasantena ekantaparipuṇṇaṃ... pe... carituṃ, yaṃnūnāhaṃ kesaṅca massuṅca ohāretvā kāsāyarasapītātāya kāsāyāni brahmacariyaṃ carantānaṃ anucchavikāni vatthāni acchādetvā agārasmā nikkhamitvā anagāriyaṃ pabbajeyya”nti.

Acirapakkantesu thullakoṭṭhikesu brāhmaṇagahapatikesu yena bhagavā tenupasaṅkamīti raṭṭhapālo anuṭṭhitesu tesu na bhagavantaṃ pabbajjaṃ yāci. Kasmā? Tattassa bahū ṇātisālohitā mittāmaccā santi, te – “tvaṃ mātāpitūnaṃ ekaputtako, na labbhā tayā pabbajitu”nti bāhāyampi gahetvā ākaḍḍheyyuṃ, tato pabbajjāya antarāyo bhavissatīti saheva parisāya utṭhahitvā thokaṃ gantvā puna

kenaci sarīrakiccalesena nivattitvā bhagavantam upasaṅkamma pabbajjam yāci. Tena vuttam – “atha kho raṭṭhapālo kulaputto acirapakkantesu thullakoṭṭhikesu...pe... pabbājetu maṃ bhagavā”’ti. Bhagavā pana yasmā rāhulakumārassa pabbajitato pabhuti mātāpitūhi ananuññātam puttam na pabbājeti, tasmā nam pucchi **anuññātosī pana tvam, raṭṭhapāla, mātāpitūhi...pe... pabbajjāyāti**.

295. Ammatātāti ettha **ammāti** mātaram ālapati, **tātāti** pitaram. **Ekaputtakoti** ekova puttako, añño koci jeṭṭho vā kaniṭṭho vā natthi. Ettha ca ekaputtoti vattabbe anukampāvasena ekaputtakoti vuttam. **Piyoti** pītijanako. **Manāpoti** manavaḍḍhanako. **Sukhedhitoti** sukkena edhito, sukhasaṃvaḍḍhitoti attho. **Sukhaparibhatoti** sukkena paribhato, jātakālato pabhuti dhātūhi aṅkato aṅkam āharitvā dhāriyamāno assakarathakādīhi bālakīlanakehi kīlayamāno sādurasabhojanam bhojayamāno sukkena parihaṭo. **Na tvam, tāta raṭṭhapāla, kassaci dukkhassa jānāsīti** tvam, tāta raṭṭhapāla appamattakampi kalabhāgam dukkhassa na jānāsī na sarasīti attho. **Maraṇenapi te mayam akāmakā vinā bhavissāmāti** sacepi tava amhesu jīvamānesu maraṇam bhaveyya, tena te maraṇenapi mayam akāmakā anicchakā na attano ruciya vinā bhavissāma, tayā viyogam pāpuṇissāmāti attho. **Kim pana mayam tanti** evam sante kim pana kim nāma tam kāraṇam, yena mayam tam jīvantam anujānissāma. Atha vā **kim pana mayam tanti** kena pana kāraṇena mayam tam jīvantam anujānissāmāti evamettha attho daṭṭhabbo.

296. Tatthevāti yattha nam ṭhitam mātāpitāro nānujāniṃsu, tattheva ṭhāne. **Anantarahitāyāti** kenaci attharaṇena anattatāya. **Paricārehīti** gandhabbaṇaṇāṭakādīni paccupaṭṭhapetvā tattha sahāyakehi saddhiṃ yathāsukham indriyāni cārehi sañcārehi, ito cito ca upanehīti vuttam hoti. Atha vā **paricārehīti** gandhabbaṇaṇāṭakādīni paccupaṭṭhapetvā sahāyakehi saddhiṃ laḷa upalaḷa rama, kīlassūtipi vuttam hoti. **Kāme paribhuñjantoti** attano puttadārehi saddhiṃ bhoge bhuñjanto. **Puññāni karontoti** buddhañca dhammañca saṅghañca ārabba dānappadānādīni sugatimaggasaṃsodhakāni kusalakammāni karonto. **Tuñhī ahoṣīti** kathānuppabandhavicchedanattam nirālāpasallāpo ahoṣi.

Athassa mātāpitāro tikkhattum vatvā paṭivacanampi alabhamānā sahāyake pakkosāpetvā “esa vo sahāyako pabbajitukāmo, nivāretha na”’nti āhaṃsu. Tepi tam upasaṅkamitvā tikkhattum avocum, tesampi tuñhī ahoṣi. Tena vuttam – **atha kho raṭṭhapālassa kulaputtassa sahāyakā...pe... tuñhī ahoṣīti**. Athassa sahāyakānam tikkhattum vatvā etadahosi – “sace ayam pabbajjam alabhamāno marissati, na koci guṇo labbhati. Pabbajitam pana nam mātāpitāropi kālena kālam passissanti, mayampi passissāma, pabbajjāpi ca nāmesā bhāriyā, divase divase mattikāpattam gahetvā piṇḍāya caritabbam, ekaseyyam ekabhattam brahmacariyam atidukkaram, ayañca sukhumālo nāgarikajātiyo, so tam caritum asakkonto puna idheva āgamissati, handassa mātāpitāro anujānāpessāmā”’ti. Te tathā akāṃsu. Mātāpitāropi nam “pabbajitena ca pana te mātāpitāro uddassetabbā”’ti imam katikam katvā anujāniṃsu. Tena vuttam – “atha kho raṭṭhapālassa kulaputtassa sahāyakā yena raṭṭhapālassa kulaputtassa mātāpitāro...pe... anuññātosī mātāpitūhi...pe... uddassetabbā”’ti. Tattha **uddassetabbāti** uddham dassetabbā, yathā tam kālena kālam passanti, evam āgantvā attānam dassetabbā.

299. Balam gahetvāti sappāyabhojanāni bhuñjanto ucchādanādīhi ca kāyam pariharanto kāyabalam janetvā mātāpitāro vanditvā assumukham ṇātiparivaṭṭam pahāya yena bhagavā tenupasaṅkami...pe... pabbājetu maṃ, bhante, bhagavāti. Bhagavā samīpe ṭhitam aññataram bhikkhum āmantesi – “tena hi bhikkhu raṭṭhapālam pabbājehi ceva upasampādehi cā”’ti. Sādhu, bhanteti kho so bhikkhu bhagavato paṭissutvā raṭṭhapālam kulaputtam jinadattiyam saddhivihārikam laddhā pabbājesi ceva upasampādesi ca. Tena vuttam – “alatta kho raṭṭhapālo kulaputto bhagavato santike pabbajjam, alatta upasampada”’nti.

Pahitto viharantoti dvādasa saṃvaccharāni evam viharanto. Neyyapuggalo hi ayamāyasmā, tasmā puññavā abhinīhārasampannopi samāno “ajja ajjeva arahatta”’nti samaṇadhammam karontopi dvādasame vasse arahattam pāpuṇi.

Yena bhagavā tenupasaṅkamīti mayham mātāpitāro pabbajjam anujānamānā – “tayā kālena

kālaṃ āgantvā amhākaṃ dassanaṃ dātabba”nti vatvā anujāniṃsu, dukkarakārikā kho pana mātipitaro, ahañca yenajjhāsayena pabbajito, so me matthakaṃ patto, idāni bhagavantaṃ āpucchitvā attānaṃ mātipitūnaṃ dassessāmīti cintetvā āpucchitukāmo upasaṅkami. **Manasākāsīti** “kiṃ nu kho raṭṭhapāle gate koci upaddavo bhavissatī”ti manasi akāsī. Tato “bhavissatī”ti ñatvā “sakkhissati nu kho raṭṭhapālo taṃ madditu”nti olokeno tassa arahattasampattiṃ disvā “sakkhissatī”ti aññāsī. Tena vuttaṃ – **yathā bhagavā aññāsī...pe... kālaṃ maññasīti.**

Migacīreti evaṃnāmake uyyāne. Tañhi raññā – “akāle sampattapabbajitānaṃ dinnameva idaṃ, yathāsukhaṃ paribhuñjantū”ti evamanuññātaṃ meva ahoṣī, tasmā thero – “mama āgatabhāvaṃ mātipitūnaṃ ārocessāmi, te me pādadhovanaṃ uḍḍakapādamaḅkhanatelādīni pesissanti”ti cittampi anuppādetvā uyyānameva pāvīsī. **Piṇḍāya pāvīsīti** dutiyadivase pāvīsī.

Majjhimāyāti sattadvāraakoṭṭhakassa gharassa majjhime dvāraakoṭṭhake. **Ullikhāpetīti** kappakena kese paharāpeti. **Etadavocāti** – “ime samaṇakā amhākaṃ piyaputtakaṃ pabbājetvā corānaṃ hatthe nikkhipitvā viya ekadivasampi na dassāpentī, evaṃ pharusakārakā ete puna imaṃ ṭhānaṃ upasaṅkamitabbaṃ maññanti, ettoya nikaḅḅhitabbā ete”ti cintetvā etaṃ “imehi muṇḅakehī”tiādivacanaṃ avoca. **Ñātidāsīti** ñātakānaṃ dāsī. **Ābhidosikanti** pārivāsikaṃ ekarattātikantaṃ pūtibhūtaṃ. Tatthāyaṃ padattho – pūtibhāvadosena abhibhūtoti abhidoso, abhidosova ābhidosiko. Ekarattātikantasseva nāmasaññā esā yadidaṃ ābhidosikoti, taṃ **ābhidosikaṃ**. **Kummāsanti** yavakummāsaṃ. **Chaḅḅdetukāmā hotīti** yasmā antamaso dāsakammakārānaṃ gorūpānampi aparibhogārāho, tasmā naṃ kacavaraṃ viya bahi chaḅḅdetukāmā hoti. **Sacetanti** sace etaṃ. **Bhaginīti** ariyavohārena attano dhātīṃ ñātidāsīṃ ālapatī. **Chaḅḅḅanīyadhammanti** chaḅḅḅetabbasabhāvaṃ. Idaṃ vuttaṃ hoti – “bhagini etaṃ sace bahi chaḅḅḅanīyadhammaṃ nissaṭṭṭhapariggahaṃ, idha me patte ākirāhī”ti. Kiṃ pana evaṃ vattumaṃ labbhati, viññatti vā payuttavācā vā na hotīti. Na hoti. Kasmā? Nissaṭṭṭhapariggahattā. Yañhi chaḅḅḅanīyadhammaṃ nissaṭṭṭhapariggahaṃ, yattha sāmikā anālayā honti, taṃ sabbaṃ “detha āharatha ākirathā”ti vattumaṃ vaṭṭati. Teneva hi ayamāyasmā aggaariyavaṃsiko samānopi evamāha.

Hatthānanti bhikkhāgahaṇatthaṃ pattaṃ upanāmayato maṇibandhato pabhuti dvinnampi hatthānaṃ. **Pādānanti** nivāsanaṇtato paṭṭhāya dvinnampi pādānaṃ. **Sarassāti** sace taṃ bhaginīti vācaṃ nicchārayato sarassa ca. **Nimittaṃ aggahesīti** hatthapiṭṭhiādīni olokayamānā – “puttassa me raṭṭhapālassa viya suvaṇṇakacchapapiṭṭhisadisā imā hatthapādapiṭṭhiyo, haritālavatṭhiyo viya suvatṭitā aṅguliyo, madhuro saro”ti gihikāle sallakkhitapubbaṃ ākāraṃ aggahesī sañjāni sallakkhesī. Tassa hāyasmato dvādasavassāni araññāvāsañceva piṇḍiyālopaḅhojanañca paribhuñjantassa aññādiso sarīravaṇṇo ahoṣī, tena naṃ sā ñātidāsī disvāva na sañjāni, nimittaṃ pana aggahesīti.

300. Raṭṭhapālassa mātaraṃ etadavocāti therassa aṅgapaccaṅgāni saṅṭhāpetvā thaññaṃ pāyetvā saṃvaḅḅhitadhātīpi samānā pabbajitvā mahākhiṇṇāsavabhāvappattena sāmiputtana saddhiṃ – “tvamaṃ nu kho, me bhante, putto raṭṭhapālo”tiādivacanaṃ vattumaṃ avisahantī vegena gharaṃ pavisitvā raṭṭhapālassa mātaraṃ etadavoca. **Yaggheti** ārocanatthe nipāto. **Sace je saccanti** ettha jeti ālapane nipāto. Evañhi tasmīṃ dese dāsijanaṃ ālapanti, tasmā “tvañhi, bhoti dāsī, sace saccamaṃ bhaṇasī”ti evamettha attho daṭṭhabbo.

Upasaṅkamīti kasmā upasaṅkami? Mahākule itthiyo bahi nikkhamantā garaḅaṃ pāpuṇanti, idañca accāyikakiccaṃ, seṭṭhissa naṃ ārocessāmīti cinteti. Tasmā upasaṅkami. **Aññataraṃ kuṭṭamūlanti** tasmīṃ kira dese dānapatīnaṃ gharesu sālā honti, āsanāni cettha paññattāni honti, upaṭṭhāpitaṃ udakakañjīyaṃ. Tattha pabbajitā piṇḍāya caritvā nisīditvā bhuñjanti. Sace icchanti, dānapatīnampi santakaṃ gaṇhanti. Tasmā tampi aññatarassa kulassa īdisāya sālāya aññataramaṃ kuṭṭamūlanti veditabbaṃ. Na hi pabbajitā kapaṇamaṇussā viya asāruppe ṭhāne nisīditvā bhuñjantīti.

Atthi nāma tātāti ettha **atthīti** vijjamaṇatthe, **nāmāti** pucchanaṇtthe maññaṇatthe vā nipāto. Idañhi

vuttam hoti – atthi nu kho, tāta raṭṭhapāla, amhākaṃ dhanam, nanu mayaṃ niddhanāti vattabbā, yesaṃ no tvaṃ īdise thāne nisīditvā ābhidosikaṃ kummāsaṃ paribhuñjissasi. Tathā atthi nu kho, tāta raṭṭhapāla, amhākaṃ jīvitaṃ, nanu mayaṃ maṭāti vattabbā, yesaṃ no tvaṃ īdise thāne nisīditvā ābhidosikaṃ kummāsaṃ paribhuñjissasi. Tathā atthi maññe, tāta raṭṭhapāla, tava abbhantare sāsanaṃ nissāya paṭiladdho samaṇaṃ, yaṃ tvaṃ subhojanarasasaṃvaḍḍhitopi imaṃ jigucchaneyyaṃ ābhidosikaṃ kummāsaṃ amatamiva nibbikāro paribhuñjissasīti. So pana gahapati dukkhābhittunnatāya etamatthaṃ paripuṇṇaṃ katvā vattumasakko – “atthi nāma, tāta raṭṭhapāla, ābhidosikaṃ kummāsaṃ paribhuñjissasī”ti ettakameva avaca. Akkharacintakā panettha idaṃ lakkhaṇaṃ vadanti – anokappanāmarisanatthavasenetam atthisadde upapade “paribhuñjissasī”ti anāgatavacanaṃ kataṃ. Tassāyamattho – “atthi nāma...pe... paribhuñjissasi, idaṃ paccakkhampi ahaṃ na saddahāmi na marisayāmi”ti. Idaṃ ettakaṃ vacanaṃ gahapati therassa pattamukhavatṭiyaṃ gahetvā thitakova kathesi. Theropi pitari pattamukhavatṭiyaṃ gahetvā thiteyeva taṃ pūtikummāsaṃ paribhuñji sunakhavantasadisaṃ pūtikukkuṭaṇḍamiva bhinnatṭhāne pūtikaṃ vāyantaṃ. Puthujjanaena kira tathārūpaṃ kummāsaṃ paribhuñjitaṃ na sakkā. Thero pana ariyiddhiyaṃ thatvā dibbojaṃ amatarasaṃ paribhuñjamāno viya paribhuñjivā dhamakaraṇena udakaṃ gahetvā pattañca mukhañca hatthapāde ca dhovivā **kuto no gahapatīti**ādīmāha.

Tattha **kuto noti** kuto nu. **Neva dānanti** deyyadhamavasena neva dānaṃ alatthamha. **Na paccakkhānanti** “kiṃ, tāta raṭṭhapāla, kacci te khamaṇiyaṃ, kaccisi appakilamathena āgato, na tāva tāta gehe bhattaṃ sampādiyati”ti evaṃ paṭisanthārasena paccakkhānampi na alatthamha. Kasmā pana thero evamāha? Pitu anuggahena. Evaṃ kirassa ahosi – “yathā esa maṃ vadati, aññepi pabbajite evaṃ vadati maññe. Buddhasāsane ca pattantare padumaṃ viya bhasmāchanno aggi viya pheggupaṭicchanno candanasāro viya suttikāpaṭicchannaṃ muttaratanaṃ viya valāhakaṭicchanno candimā viya mādisānaṃ paṭicchannaguṇānaṃ bhikkhūnaṃ anto natthi, tesupī na evarūpaṃ vacanaṃ pavattessati, saṃvare thassati”ti anuggahena evamāha.

Ehi tātāti tāta tuyhaṃ gharaṃ mā hotu, ehi gharaṃ gamissāmāti vadati. **Alanti** thero ukkaṭṭhaekāsānikatāya paṭikkhipanto evamāha. **Adhivāsesīti** thero pana pakatiyā ukkaṭṭhasapadānacāriko svātanāyabhikkhaṃ nāma nādhivāseti, mātu anuggahena pana adhivāsesi. Mātu kirassa theram anussaritvā mahāsoko uppajji, rodaneneva pakkakkhi viya jātā, tasmā thero “sacāhaṃ taṃ apassivā gamissāmi, hadayampissā phāleyyā”ti anuggahena adhivāsesi. **Kārāpetvāti** ekaṃ hiraññassa, ekaṃ suvaṇṇassati dve puñje kārāpetvā. Kīvamahantā pana puñjā ahesunti. Yathā orato thito puriso pārato thitaṃ majjhimappamaṇaṃ purisaṃ na passati, evamāhantā.

301. Idaṃ te tātāti kahāpaṇapuñjañca suvaṇṇapuñjañca dassento āha. **Mattikanti** mātito āgataṃ, idaṃ te mātāmahiyā mātu imaṃ gehaṃ āgacchantiyā gandhamālādīnaṃ atthāya dinnam dhananti attho. **Aññaṃ pettikaṃ aññaṃ pitāmahanti** yaṃ pana te pitu ca pitāmahānañca santakaṃ, taṃ aññaṃyeva, nihitañca payuttañca ativiya bahu. Ettha ca “pitāmahā”nti taddhitalopaṃ katvā vuttanti veditabbaṃ. “Petāmahā”nti vā pāṭho. **Sakkā tatonidānanti** dhanahetu dhanapaccayā. Taṃ taṃ dhanam rakkhantassa ca rājādīnaṃ vasena dhanaparikkhayaṃ pāpuṇantassa kassaci uppajjamānasokādayo sandhāya evamāha. Evaṃ vutte seṭṭhi gahapati – “ahaṃ imaṃ uppabbājessāmīti ānesiṃ, so dāni me dhammakathaṃ kātum āradḍho, ayaṃ na me vacanaṃ karissati”ti uṭṭhāya gantvā assa orodhānaṃ dvāraṃ vivarāpetvā – “ayaṃ vo sāmiko, gacchatha yaṃ kiñci katvā naṃ gaṇhitum vāyamathā”ti uyyojesi. Suvaye thitā nāṭakithiyo nikkhamitvā theram parivārayiṃsu, tāsū dve jeṭṭhakithiyo sandhāya **purānadutiyikāti**ādī vuttam. **Paccekaṃ pādesu gahetvāti** ekekamhi pāde naṃ gahetvā.

Kīdisā nāma tā ayyaputta accharāyoti kasmā evamāhaṃsu? Tadā kira sambahule khattiyakumārepi brāhmaṇakumārepi seṭṭhiputtepi mahāsampattiyo pahāya pabbajante disvā pabbajjāguṇaṃ ajānantā kathaṃ samuṭṭhāpentī “kasmā ete pabbajanti”ti. Athaññe vadanti “devaccharādevanāṭakānaṃ kāraṇā”ti. Sā kathā vitthārikā ahosi. Taṃ gahetvā sabbā evamāhaṃsu. Atha thero paṭikkhipanto **na kho mayaṃ bhaginīti**ādīmāha. **Samudācaratīti** voharati vadati. **Tattheva**

mucchitā papatimsūti taṃ bhaginivādena samudācarantaṃ disvā “mayam aḷḷa āgamissati, aḷḷa āgamissati”ti dvādasa vassāni bahi na nikkhantā, etaṃ nissāya no dāraḷḷa na laddhā, yesaṃ ānubhāvena jīveyyāma, ito camhā parihīnā aññato ca. Ayaṃ loko nāma attanova cintesi, tasmā tāpi “idāni mayam anāthā jāta”ti attanova cintayamānā – “anattiko dāni amhehi ayaṃ, so amhe pajāpatiyo samānā attanā saddhiṃ ekamātukucchiyā sayitadārikā viya maññati”ti samuppanabalavasokā hutvā tasmimyeva padese mucchitā papatimsu, patitāti attho.

Mā no viheḷḷhātī mā amhe dhanam dassetvā mātuḷḷāme ca uyyojetvā viheḷḷhayittha, vihesā hesā pabbajitānanti. Kasmā evamāha? Mātāpitūnam anuggahena. So kira seṭṭhi – “pabbajitaliṅgam nāma kiliṭṭham, pabbajjāvesam hāretvā nhāyitvā tayo janā ekato bhuñjissāmā”ti maññamāno therassa bhikkham na deti. Thero – “mādisassa khīṇāsavassa āhārantarāyam katvā ete bahum apuññam pasaveyyu”nti tesam anuggahena evamāha.

302. Gāthā abhāsīti gāthāyo abhāsī. Tattha **passāti** santike ṭhitajanaṃ sandhāya vadati. **Cittanti** cittavicittam. **Bimbanti** attabhāvam. **Arukāyanti** navannaṃ vaṇamukhānam vasena vaṇakāyam. **Samussitanti** tīṇi aṭṭhisatāni navahi nhārusatehi bandhitvā navahi maṃsapesisatehi limpitivā samantato ussitam. **Āturanti** jarāturatāya rogāturatāya kilesāturatāya ca niccāturam. **Bahusaṅkappanti** paresam uppannapatthanāsaṅkappehi bahusaṅkappam. Itthīnāhi kāye purisānam saṅkappā uppajjanti, tesam kāye itthīnam. Susāne chaḍḍitakaḷevarabhūtampi cetam kākakulalādayo patthayantiyevāti bahusaṅkappo nāma hoti. **Yassa natthi dhuvam ṭhitīti** yassa kāyassa māyāmarīcipheṇapiṇḍa udakapupphulādīnam viya ekamseneva ṭhiti nāma natthi, bhijjanadhammatāva niyatā.

Tacena onaddhanti allamanussacamma onaddham. **Saha vatthebhi sobhatīti** gandhādīhi maṇiḷḷakūḷalehi ca cittakatampi rūpam vatthehi saheva sobhati, vinā vatthehi jeguccham hoti anolokanakkhamam.

Alattakakatāti alattakena rañjītā. **Cuṇṇakamakkhanti** sāsapakakkena mukhapīlakādīni nīharitvā loṇamattikāya duṭṭhalohitam vilīyāpetvā tilapiṭṭhena lohitam pasādetvā haliddiyā vaṇṇam sampādetvā cuṇṇakagaṇḍikāya mukham paharanti, tenesa ativiya virocāti. Tam sandhāyetam vuttam.

Aṭṭhāpadakatāti rasodakena makkhitvā nalāṭapariyante āvattanaparivatte katvā aṭṭhāpadakaracanāya racitā. **Añjanīti** añjananāḷikā.

Odahīti ṭhapesi. **Pāsanti** vākarājālam. **Nāsadāti** na ghaṭṭayi. **Nivāpanti** nivāpasutte vuttanivāpatiṇasadisabhojanam. **Kandanteti** viravamāne paridevamāne. Imāya hi gāthāya thero māṭāpitāro migaluddake viya katvā dassesi, avasesaññātake migaluddakaparisaṃ viya, hiraññasuvaṇṇam vākarājālam viya, attanā bhuttabhojanam nivāpatiṇam viya, attānam mahāmigam viya katvā dassesi. Yathā hi mahāmigo yāvadattham nivāpatiṇam khādītva pānīyam pivitvā gīvam ukkhipitvā disam oloketvā “imaṃ nāma ṭhānam gatassa sotthi bhavissati”ti migaluddakānam paridevantānamyeva vākaram aghaṭṭayamānova uppatitvā araññam pavisitvā ghanacchāyassa chattassa viya gumbassa heṭṭhā mandamandena vātena bījayamāno āgatamaggam olovento tiṭṭhati, evameva thero imā gāthā bhāsītva ākāseva gantvā migacīre paccupaṭṭhāsī.

Kasmā pana thero ākāseva gatoti. Pitā kirassa seṭṭhi sattasu dvārakoṭṭhakesu aggaḷam dāpetvā malle āṇāpesi – “sace nikkhamitvā gacchati, hatthapādesu nam gahetvā kāsāyāni haritvā gihivesam gaṇhāpethā”ti. Tasmā thero – “ete mādisam mahākhīṇāsavam hatthe vā pāde vā gahetvā apuññam pasaveyyum, tam nesam mā ahoṣi”ti cintetvā ākāseva agamāsī. Parasamuddavāsithērānam pana – “ṭhitakova imā gāthā bhāsītva vehāsam abbhuggantvā rañño korabyassa migacīre paccupaṭṭhāsī”ti ayaṃ vācanāmaggoeva.

303. Migavoti tassa uyyānapālassa nāmam. **Sodhentoti** uyyānamaggam samam kāretvā antouyyāne

tacchitabbayuttaṭṭhānāni tacchāpento sammajjitabbayuttāni ṭhānāni sammajjāpento vālukāokiraṇa-pupphavikirāṇa-puṇṇaghaṭṭhapana-kadalikkhandhaṭṭhapanādīni ca karontoti attho. **Yena rājā korabyo tenupasaṅkamīti** amhākaṃ rājā sadā imassa kulaputtassa vaṇṇaṃ kathesi, passitukāmo etaṃ, āgatabhāvaṃ panassa na jānāti, mahā kho panāyaṃ paṇṇākāro, gantvā rañño āroccasāmiti cintetvā yena rājā korabyo tenupasaṅkami.

Kittayamāno ahoṣīti so kira rājā therāṃ anussarivā balamajjhēpi nāṭakamajjhēpi – “dukkaraṃ kataṃ kulaputtēna tāva mahantaṃ sampattiṃ pahāya pabbajitvā punanivattitvā anapalokentēnā”ti guṇaṃ kathesi, taṃ gahetvā ayaṃ evamāha. **Vissajjethāti vatvāti** orodhamahāmattabalakāyādīsu yassa yaṃ anucchavikaṃ, tassa taṃ dāpetvāti attho. **Ussaṭāya ussaṭāyāti** ussitāya ussitāya, mahāmattamahāraṭṭhikādīnaṃ vasena uggatuggatameva parisāṃ gahetvā upasaṅkamīti attho. **Idha bhavaṃ raṭṭhapālo hatthathare nisīdatūti** hatthatharo tanuko bahalapupphādiguṇaṃ katvā atthato abhilakkhito hoti, tādise anāpucchitvā nisīdituṃ na yuttanti maññaṃāno evamāha.

304. Pārijuṇṇānīti pārijuṇṇābhāvā parikkhayā. **Jiṇṇoti** jarājiṇṇo. **Vuddhoti** vayovuddho. **Mahallakoti** jātimahallako. **Addhagatoti** addhānaṃ atikkanto. **Vayoanuppattoti** pacchimavayaṃ anuppatto. **Pabbajātīti** dhuravihāraṃ gantvā bhikkhū vanditvā, – “bhante, mayā daharakāle baḥuṃ kusalaṃ kataṃ, idāni mahallakomhi, mahallakassa cesā pabbajjā nāma, cetiyaṅgaṇaṃ sammajjitvā appaharitaṃ katvā jīvissāmi, pabbājetha maṃ, bhante,”ti kāruṇṇaṃ uppādentō yācati, therā anukampāya pabbājenti. Taṃ sandhāyetaṃ vuttaṃ. Dutiyavārepi eseva nayo.

Appābādhoti arogo. **Appātaṅkoti** niddukkho. **Samavepākiniyāti** samavipācaniyā. **Gahaṇiyāti** kammajatejodhātuyā. Tattha yassa bhuttabhutto āhāro jīrati, yassa vā pana puṭabhattaṃ viya tatheva tiṭṭhati, ubhopete na samavepākiniyā gahaṇiyā samannāgatā. Yassa pana bhuttakāle bhattacchando uppajjateva, ayaṃ samavepākiniyā samannāgato. **Nātisītāya naccuṇhāyāti** teneva kāraṇena nātisītāya naccuṇhāya. **Anupubbenāti** rājāno vā harantītiādīnā anukkamena. Dutiyavāre rājabhayacorabhayachātakabhayādīnā anukkamena.

305. Dhammuddesā uddiṭṭhāti dhammaniddesā uddiṭṭhā. **Upaniyyatīti** jarāmarāṇasantikaṃ gacchati, āyukkhayena vā tattha niyyati. **Addhuvoti** dhuvattṭhānavirahito. **Atāṇoti** tāyituṃ samatthēna virahito. **Anabhissaroti** asaraṇo abhisarivā abhigantvā assāsetuṃ samatthēna virahito. **Assakoti** nissako sakabhaṇḍavirahito. **Sabbaṃ pahāya gamanīyanti** sakabhaṇḍanti sallakkhitaṃ sabbaṃ pahāya lokena gantabbāṃ. **Taṇhādāsoti** taṇhāya dāso.

306. Hatthisinti hatthisippe. **Katāvīti** katakaraṇīyo, sikkhitasikkho paṇṇasippoti attho. Esa nayo sabbattha. **Ūrubalīti** ūrubalasampanno. Yassa hi phalakañca āvudhañca gahetvā parasenaṃ pavisitvā abhinnaṃ bhindato bhinnaṃ sandhārayato parahatthagataṃ rajjaṃ āharituṃ ūrubalaṃ atthi, ayaṃ ūrubalī nāma. **Bāhubalīti** bāhubalasampanno. Sesāṃ purimasadisameva. **Alamattoti** samatthaattabhāvo.

Pariyodhāya vattissantīti uppannaṃ uppaddavaṃ odhāya avattharivā vattissantīti sallakkhetvā gahitā.

Samvijjati kho, bho raṭṭhapāla, imasmiṃ rājakule pahūtaṃ hiraññasuvaṇṇanti idaṃ so rājā upari dhammuddesassa kāraṇaṃ āharanto āha.

Athāparaṃ etadavocāti etaṃ “passāmi loke”tiādīnā nayena catunnaṃ dhammuddesānaṃ anugītiṃ avoca.

307. Tattha **bhiyyova kāme abhipatthayantīti** ekaṃ labhitvā dve patthayanti, dve labhitvā cattāroti evaṃ uttaruttari vatthukāmakilesakāme patthayantiyeva.

Pasayhāti sapattagaṇaṃ abhibhavitvā. **Sasāgarantanti** saddhiṃ sāgarantena. **Oraṃ samuddassāti** yaṃ samuddassa orato sakaraṭṭhaṃ, tena atittarūpoti attho. **Na hatthīti** na hi atthi.

Aho vatā noti aho vata nu, ayameva vā pāṭho. **Amarāti cāhūti** amaraṃ iti ca āhu. Idaṃ vuttaṃ hoti – yaṃ mataṃ ñātī parivāretvā kandanti, taṃ – “aho vata amhākaṃ bhātā mato, putto mato” tiādīnipi vadanti.

Phusanti phassanti maraṇaphassaṃ phusanti. **Tatheva phuṭṭhoti** yathā bālo, dhīropi theveva maraṇaphassena phuṭṭho, aphuṭṭho nāma natthi, ayaṃ pana viseso. **Bālo ca bālyā vadhitova setīti** bālo bālābhāvena maraṇaphassaṃ āgamma vadhitova seti abhihatova sayati. Akataṃ vata me kalyāṇantiādivipparāṇasārasena calati vedhati vipphandati. **Dhīro ca na vedhatīti** dhīro sugatinimittaṃ passanto na vedhati na calati.

Yāya vosānaṃ idhādhigacchatīti yāya paññāya imasmiṃ loke sabbakiccavosānaṃ arahattaṃ adhigacchati, sāva dhanato uttamatarā. **Abyositattāti** apariyositattā, arahattapattiyā, abhāvenāti attho. **Bhavābhavesūti** hīnappaṇītesu bhavesu.

Upeti gabbhañca parañca lokanti tesu pāpaṃ karontesu yo koci satto paramparāya saṃsāraṃ āpajjitvā gabbhañca parañca lokaṃ upeti. **Tassappapaññoti** tassa tādīsassa appapaññassa añño appapañño abhisaddahanto.

Sakammunā haññatīti attanā katakammavasena “kasāhipi tāletī” tiādīhi kammakāraṇāhi haññāti. **Pecca paramhi loketi** ito gantvā paramhi apāyaloke.

Virūparūpenāti vividharūpena, nānāsabhāvenāti attho. **Kāmaguṇesūti** diṭṭhadhammikasamparāyikesu sabbakāmaguṇesu ādīnavam disvā. **Daharāti** antamaso kalalamattabhāvaṃ upādāya taruṇā. **Vuddhāti** vassasatātikkantā. **Apaṇṇakaṃ sāmāññameva seyyoti** aviruddhaṃ advajjhagāmiṃ ekantaniyyānikaṃ sāmāññameva “seyyo, uttaritarañca paṇītarañcā” ti upadhāretvā pabbajitosmi mahārājāti. Tasmā yaṃ tvaṃ vadasi – “kiṃ disvā vā sutvā vā” ti, idaṃ disvā ca sutvā ca pabbajitosmīti maṃ dhārehīti desanaṃ niṭṭhāpesīti.

Papañcasūdaniyā majjhimanikāyaṭṭhakathāya

Raṭṭhapālasuttavaṇṇanā niṭṭhitā.

3. Maghadevasuttavaṇṇanā

308. Evaṃ me sutanti maghadevasuttaṃ. Tatha **maghadevaambavaneti** pubbe maghadevo nāma rājā taṃ ambavanaṃ ropesi. Tesu rukkesu palujjamānesu aparabhāge aññepi rājāno ropesumyeva. Taṃ pana paṭhamavohārasena maghadevambavananteva saṅkhaṃ gataṃ. **Sitaṃ pātvākāsīti** sāyanhasamaye vihāracārikaṃ caramāno ramaṇīyaṃ bhūmibhāgaṃ disvā – “vasitapubbaṃ nu kho me imasmiṃ okāse” ti āvajjanto – “pubbe ahaṃ maghadevo nāma rājā hutvā imaṃ ambavanaṃ ropesiṃ, ettheva pabbajitvā cattāro brahmavihāre bhāvetvā brahmaloke nibbattiṃ. Taṃ kho panetaṃ kāraṇaṃ bhikkhusaṅghassa apākaṃ, pākaṃ karissāmi” ti aggaggadante dassento sitaṃ pātu akāsi.

Dhammo assa atthīti **dhammiko**. Dhammena rājā jātoti **dhammarājā**. **Dhamme ṭhitoti** dasakusalakammapathadhamme ṭhito. **Dhammaṃ caratīti** samaṃ carati. Tatra **brāhmaṇagahapatikesūti** yopi so pubbarājūhi brāhmaṇānaṃ dinnaparihāro, taṃ ahāpetvā pakatiniyāmeneva adāsi, tathā gahapatikānaṃ. Taṃ sandhāyetaṃ vuttaṃ. **Pakkhassāti** iminā pāṭihārikapakkhopi saṅgahito. Aṭṭhamūposathassa hi paccuggamanānuggamanavasena sattamiyañca

navamiyañca, cātuddasapannarasānaṃ paccuggamanānuggamanavasena terasiyañca pāṭipade cāti ime divasā **pāṭihārikapakkhāti** veditabbā. Tesupi uposathaṃ upavasi.

309. Devadūtāti devoti maccu, tassa dūtāti devadūtā. Sirasmiñhi palitesu pātubhūtesu maccurājassa santike ṭhito viya hoti, tasmā palitāni maccudevassa dūtāti vuccanti. Devā viya dūtātipi devadūtā. Yathā hi alaṅkatapaṭiyattāya devatāya ākāse ṭhatvā “asukadivase marissatī”ti vutte taṃ tatheva hoti, evaṃ sirasmiṃ palitesu pātubhūtesu devatābyākaraṇasadisameva hoti. Tasmā palitāni devasadisā dūtāti vuccanti. Visuddhidevānaṃ dūtātipi **devadūtā**. Sabbabodhisattā hi jīṇṇabyādhitamatapabbajite disvāva saṃvegamaṃpajjivā nikkhamma pabbajanti. Yathāha –

“Jiṇṇaṅca disvā dukhitañca byādhitaṃ,
Matañca disvā gatamāyusañkhayaṃ;
Kāsāyavatthaṃ pabbajitañca disvā,
Tasmā ahaṃ pabbajitomhi rājā”ti.

Iminā pariyāyena palitāni visuddhidevānaṃ dūtattā devadūtāti vuccanti.

Kappakassa gāmvaram datvāti satasahassuṭṭhānakam jeṭṭhakagāmaṃ datvā. Kasmā adāsi? Saṃviggamānasattā. Tassa hi añjalismiṃ ṭhapitāni palitāni disvāva saṃvego uppajjati. Aññāni caturāsītivassasahassāni āyu atthi, evaṃ santepi maccurājassa santike ṭhitaṃ viya attānaṃ maññamāno saṃviggo pabbajjaṃ roceti. Tena vuttaṃ –

“Sire disvāna palitaṃ, maghadevo disampati;
Saṃvegaṃ alabhī dhīro, pabbajjaṃ samarocayī”ti.

Aparampi vuttaṃ –

“Uttamaṅgaruhā mayhaṃ, ime jātā vayoharā;
Pātubhūtā devadūtā, pabbajjāsamayo mamā”ti.

Purisayugeti vamsasambhave purise. **Kesamassuṃ ohāretvāti** tāpasapabbajjaṃ pabbajantāpi hi paṭhamaṃ kesamassuṃ ohāretvā pabbajanti, tato paṭṭhāya vaḍḍhite kese bandhitvā jaṭākalāpadharā hutvā vicaranti. Bodhisattopi tāpasapabbajjaṃ pabbaji. Pabbajito pana anesanaṃ ananuyūñjivā rājagehato āhaṭabhikkhāya yāpento brahmavihāraṃ bhāvesi. Tasmā so **mettāsahagatenā**tiādi vuttaṃ.

Kumārakīlitaṃ kīlīti ankena ankaṃ parihariyamāno kīlī. Mālākalāpaṃ viya hi naṃ ukkhipitvā vicariṃsu. **Raṅṅo maghadevassa putto...pe... pabbajīti** imassa pabbajitadivase pañca maṅgalāni ahesuṃ. Maghadevaraṅṅo matakabhattaṃ, tassa raṅṅo pabbajitamaṅgalaṃ, tassa puttassa chattussāpanamaṅgalaṃ, tassa puttassa uparajjamaṅgalaṃ, tassa puttassa nāmakaraṇamaṅgalanti ekasmiṃyeva samaye pañca maṅgalāni ahesuṃ, sakalajambudīpatale unnaṅgalamahosi.

311. Puttapaputtakāti puttā ca puttaputtā cāti evaṃ pavattā tassa paramparā. **Pacchimako ahoṣīti** pabbajjāpacchimako ahoṣī. Bodhisatto kira brahmaloke nibbato – “pavattati nu kho taṃ mayā manussaloke nihataṃ kalyāṇavatta”nti āvajjanto addasa – “ettakaṃ addhānaṃ pavattati, idāni na pavattissatī”ti. Na kho pañāhaṃ mayhaṃ paveniyā ucchijjitaṃ dassāmīti attano vaṃse jātaraññoyeva aggamaheṣiyā kucchismiṃ paṭisandhiṃ gahetvā attano vaṃsassa nemiṃ ghaṭento viya nibbato, tenevassa nimīti nāmaṃ ahoṣī. Iti so pabbajitarājūnaṃ sabbapacchimako hutvā pabbajitoti pabbajjāpacchimako ahoṣī. Guṇehi pana atirekataro. Tassa hi sabbarājūhi atirekatarā dve guṇā ahesuṃ. Catūsu dvāresu satasahassaṃ satasahassaṃ vissajjetvā devasikaṃ dānaṃ adāsi, anuposathikassa ca dassanaṃ nivāresi. Anuposathikesu hi rājānaṃ passissāmāti gatesu dovāriko pucchati “tumhe uposathikā no vā”ti. Ye anuposathikā honti, te nivāreti “anuposathikānaṃ rājā dassanaṃ na deti”ti.

“Mayaṃ janapadavāsino kāle bhojanaṃ kuhiṃ labhissāmā”’ti tattha vacanokāso natthi. Catūsu hi dvāresu rājanḅaṅe ca anekāni bhattachāṣahassāni paṭiyattāneva honti. Tasmā mahājano icchiticchitattḅhāne massuṃ kāretvā nhāyitvā vatthāni parivattetvā yathārucitaṃ bhojanaṃ bhuñjitvā uposathaṅgāni adhiṭṭhāya rañño gehadvāraṃ gacchati. Dovārikena “uposathikā tumhe”’ti pucchitapucchitā “āma āmā”’ti vadanti. Tena hi āgacchathāti pavesetvā rañño dasseti. Iti imehi dvīhi guṇehi atirekataro ahosi.

312. Devānaṃ tāvatimsānanti tāvatimsabhavane nibbattadevānaṃ. Te kira devā videharaṭṭhe mithilanagaravāsino rañño ovāde ṭhatvā pañca sīlāni rakkhitvā uposathakammaṃ katvā tattha nibbattā rañño guṇakathaṃ kathenti. Te sandhāya vuttaṃ “devānaṃ tāvatimsāna”’nti.

Nisino hotīti pāsādarassa uparigato dānañca sīlañca upaparikkhamāno nisino hoti. Evaṃ kirassa ahosi – “dānaṃ nu kho mahantaṃ udāhu sīlaṃ, yadi dānaṃ mahantaṃ, ajjhottharivā dānameva dassāmi. Atha sīlaṃ, sīlameva pūrissāmi”’ti. Tassa “idaṃ mahantaṃ idaṃ mahanta”’nti nicchitūṃ asakkontasseva sakko gantvā purato pāturahosi. Tena vuttaṃ **atha kho, ānanda,...pe... sammukhe pāturahosīti**. Evaṃ kirassa ahosi – “rañño kaṅkhā uppanā, tassa kaṅkhacchedanattaṃ pañhañca kathessāmi, idhāgamanatthāya paṭiññañca gaṇhissāmi”’ti. Tasmā gantvā sammukhe pāturahosi. Rājā adhiṭṭhapubbaṃ rūpaṃ disvā bhīto ahosi lomahaṭṭhajāto. Atha naṃ sakko – “mā bhāyi, mahārāja, vissattho pañhaṃ puccha, kaṅkhaṃ te paṭivinodessāmi”’ti āha.

Rājā –

“Pucchāmi taṃ mahārāja, sabbabhūtānamissara;
Dānaṃ vā brahmacariyaṃ vā, katamaṃ su mahapphala”’nti. –

Pañhaṃ pucchi. Sakko – “dānaṃ nāma kiṃ, sīlameva guṇavisitṭhatāya mahantaṃ. Ahañhi pubbe, mahārāja, dasavassasahassāni dasannaṃ jaṭilasahassānaṃ dānaṃ datvā pettivisayato na mutto, sīlavantā pana mayhaṃ dānaṃ bhuñjitvā brahmaloke nibbattā”’ti vatvā imā gāthā avoca –

“Hīnena brahmacariyena, khattiye upapajjati;
Majjhimena ca devattaṃ, uttamena visujjhati.

Na hete sulabhā kāyā, yācayogena kenaci;
Ye kāye upapajjanti, anāgarā tapassino”’ti. (jā. 2.22.429-430);

Evaṃ rañño kaṅkhaṃ vinodetvā devalokagamanāya paṭiññāgahaṇattaṃ **lābhā te mahārājāti**ādīmāha. Tattha **avikampamānoti** abhāyamāno. **Adhivāsesīti** ahaṃ mahājanaṃ kusalaṃ samādapemi, puññavantānaṃ pana vasanaṭṭhānaṃ disvā āgatena manussapathe sukhaṃ kathaṃ hotīti adhivāsesi.

313. Evaṃ bhaddantavāti evaṃ hotu bhaddakaṃ tava vacananti vatvā. **Yojetvāti** ekasmimyeva yuge sahassaassājāniye yojetvā. Tesāṃ pana pāṭiyekkaṃ yojanakiccaṃ natthi, manaṃ āgamma yuttāyeva honti. So pana dibbaratho diyaḅḅhayaojanasatiko hoti, naddhito paṭṭhāya rathasīsaṃ paññāsayojanāni, akkhabandho paññāsayojanāni, akkhabandhato paṭṭhāya pacchābhāgo paññāsayojanāni, sabbo sattavaṇṇaratanamayo. Devaloko nāma uddhaṃ, manussaloko adho, tasmā hetṭhāmukhaṃ rathaṃ pesesīti na sallakkhetabbaṃ. Yathā pana pakatimaggāṃ peseti, evameva manussānaṃ sāyamāsabhatte niṭṭhite candena saddhiṃ yuganaddhaṃ katvā pesesi, yamakacandā uṭṭhitā viya ahesuṃ. Mahājano disvā “yamakacandā uggatā”’ti āha. Āgacchante āgacchante na yamakacandā, ekaṃ vimānaṃ, na vimānaṃ, eko rathoti. Rathopi āgacchanto āgacchanto pakatirathappamāṇova, assāpi pakatiassappamāṇava ahesuṃ. Evaṃ rathaṃ āharitvā rañño pāsādaṃ padakkhiṇaṃ katvā pācīnasīhapañjaraṭṭhāne rathaṃ nivattetvā āgatamaggābhimukhaṃ katvā sīhapañjare ṭhatvāva

ārohanasajjam ṭhapesi.

Abhiruha mahārājāti rājā – “dibbayānaṃ me laddha”nti na tāvadeva abhiruhi, nāgarānaṃ pana ovādaṃ adāsi “passatha tātā, yaṃ me sakkena devaraññā dibbaratho pesito, so ca kho na jātigottaṃ vā kulappadesaṃ vā paṭicca pesito, mayhaṃ pana sīlacāraguṇe pasīditvā pesito. Sace tumhepi sīlaṃ rakkhissatha, tumhākampi pesessati, evaṃ rakkhituṃ yuttaṃ nāmetaṃ sīlaṃ. Nāhaṃ devalokaṃ gantvā cirāyissāmi, appamattā hothā”ti mahājanaṃ ovaditvā pañcasu sīlesu paṭiṭṭhāpetvā rathaṃ abhiruhi. Tato mātali saṅgāhako “ahampi mahārājassa mamānucchavikaṃ karissāmi”ti ākāsamhi dve magge dassetvā **apica mahārājāti**ādīmāha.

Tattha **katamenāti**, mahārāja, imesu maggesu eko nirayaṃ gacchati, eko devalokaṃ, tesu taṃ katamena nemi. **Yenāti** yena maggena gantvā yattha pāpakammantā pāpakānaṃ kammānaṃ vipākaṃ paṭisaṃvediyanti, taṃ ṭhānaṃ sakkā hoti passitunti attho. Dutiyapadepe eseva nayo. Jātakepi –

“Kena taṃ nemi maggena, rājasetṭha disampati;
Yena vā pāpakammantā, puññakammā ca ye narā”ti. (jā. 2.22.450) –

Gāthāya ayamevattho. Tenevāha –

“Niraye tāva passāmi, āvāse pāpakammaṃ;
Ṭhānāni luddakammānaṃ, dussīlānañca yā gatī”ti. (jā. 2.22.451);

Ubhayeneva maṃ mātali nehīti mātali dvīhi maggehi maṃ nehi, ahaṃ nirayaṃ passitukāmo devalokampīti. Paṭhamaṃ katamena nemīti. Paṭhamaṃ nirayamaggena nehīti. Tato mātali attano ānubhāvena rājānaṃ pañcadasa mahāniraye dassesi. Vitthārakathā panettha –

“Dassesi mātali rañño, duggaṃ vetaraṇiṃ nadiṃ;
Kuthitaṃ khārasaṃyuttaṃ, tattaṃ aggisikhūpama”nti. (jā. 2.22.452) –

Jātake vuttanayena veditabbā. Nirayaṃ dassetvā rathaṃ nivattetvā devalokābhimukhaṃ gantvā bīraṇīdevadhītāya soṇadinnadevaputtassa gaṇadevaputtānañca vimānāni dassento devalokaṃ nesi. Tatrāpi vitthārakathā –

“Yadi te sutā bīraṇī jīvaloke,
Āmāyadāsī ahu brāhmaṇassa;
Sā pattakāle atithiṃ viditvā,
Mātāva puttaṃ sakimābhinandī;
Saṃyamā saṃvibhāgā ca,
Sā vimānasmi modatī”ti. (jā. 2.22.507) –

Jātake vuttanayeneva veditabbā.

Evaṃ gacchato pana tassa rathanemi vaṭṭiyā cittakūṭadvārakoṭṭhakassa ummāre pahatamatteva devanagare kolāhalaṃ ahoṣi. Sakkaṃ devarājānaṃ ekakaṃyeva ohāya devasaṅgho mahāsattaṃ paccuggamanamakāsi, taṃ devatānaṃ ādaraṃ disvā sakko cittaṃ sandhāretuṃ asakkonto – “abhirama, mahārāja, devesu devānubhāvenā”ti āha. Evaṃ kirassa ahoṣi – “ayaṃ rājā ajja āgantvā ekadivaseneva devagaṇaṃ attano abhimukhamakāsi. Sace ekaṃ dve divase vasissati, na maṃ devā olokessanti”ti. So usūyamāno, “mahārāja, tuyhaṃ imasmiṃ devaloke vasituṃ puññaṃ natthi, aññesaṃ puññaṃ vasāhī”ti iminā adhippāyena evamāha. Bodhisatto – “nāsakki jarasakko manāṃ sandhāretuṃ, paraṃ nissāya laddhaṃ kho pana yācitvā laddhabhaṇḍakaṃ viya hoti”ti paṭikkhipanto **alaṃ mārisāti**ādīmāha. Jātakepi vuttaṃ –

“Yathā yācitakaṃ yānaṃ, yathā yācitakaṃ dhanam;
Evamsampadameve taṃ, yaṃ parato dānapaccayā;
Na cāhametamicchāmi, yaṃ parato dānapaccayā”ti. (jā. 2.22.585-586) –

Sabbaṃ vattabbaṃ. Bodhisatto pana manussattabhāvena kativāre devalokaṃ gatoti. Cattāro – mandhāturājakāle sādhanarājakāle guttilavīṇāvādakakāle nimimahārājakāleti. So mandhātukāle devaloke asaṅkhyeyaṃ kālaṃ vasi, tasmīhi vasamāneyeva chaṭṭiṃsa sakkā caviṃsu. Sādhanarājakāle sattāhaṃ vasi, manussagaṇāyā satta vassatāni honti. Guttilavīṇāvādakakāle ca nimirājakāle ca muhuttamattaṃ vasi, manussagaṇāyā satta divasāni honti.

314. Tattheva mithilaṃ paṭinesīti paṭinetvā pakatisirigabbheya patiṭṭhāpesi.

315. Kaḷārajanakoti tassa nāmaṃ. Kaḷāradantatāya pana kaḷārajanakoti vutto. **Na so agārasmā anagāriyaṃ pabbajīti** ettakamattameva na akāsi, sesaṃ sabbaṃ pākatikameva ahosi.

316. Samucchedo hotīti ettha kalyāṇavattaṃ ko samucchindati, kena samucchinnaṃ, ko pavatteti, kena pavattitaṃ nāma hotīti ayaṃ vibhāgo veditabbo. Tattha silavā bhikkhu “na sakkā mayā arahattaṃ laddhu”nti vīriyaṃ akaronto samucchindati. Dussīlena samucchinnaṃ nāma hoti. Satta sekhā pavattenti. Khīṇāsavena pavattitaṃ nāma hoti. Sesaṃ sabbattha uttānamevāti.

Papañcasūdaniyā majjhimanikāyaṭṭhakathāya

Maghadevasuttavaṇṇanā niṭṭhitā.

4. Madhurasuttavaṇṇanā

317. Evaṃ me sutanti madhurasuttaṃ. Tattha **mahākaccānoti** gihikāle ujjenikaraṇṇo purohitaputto abhirūpo dassanīyo pāsādiko suvaṇṇavaṇṇo ca. **Madhurāyanti** evaṃnāmake nagare. **Gundāvaneti** kaṇhakagundāvane. **Avantiputtoti** avantiraṭṭhe raṇṇo dhītāya putto. **Vuddho ceva arahā cāti** daharaṃ arahantampi na tathā sambhāventi yathā mahallakaṃ, thero pana vuddho ceva ahosi arahā ca. **Brāhmaṇā, bho kaccānāti** so kira rājā brāhmaṇaladdhiko, tasmā evamāha. **Brāhmaṇova seṭṭho vaṇṇoti**ādīsu jātigottādīnaṃ paññāpanaṭṭhāne brāhmaṇāva seṭṭhāti dasseti. **Hīno añño vaṇṇoti** itare tayo vaṇṇā hīnā lāmakāti vadati. **Sukkoti** paṇḍaro. **Kaṇhoti** kālako. **Sujjhantīti** jātigottādīpaññāpanaṭṭhānesu sujjhanti. **Brahmuno puttāti** mahābrahmuno puttā. **Orasā mukhato jātāti** ure vasitvā mukhato nikkhantā, ure katvā saṃvaddhitāti vā orasā. **Brahmajāti** brahmato nibbattā. **Brahmanimmitāti** brahmunā nimmitā. **Brahmadāyādāti** brahmuno dāyādā. **Ghosoyeva kho esoti** vohāramattamevetam.

318. Ijjheyāti samijjheyā, yattakāni dhanādīni pattheyya, tattakehissa manoratho pūreyyāti attho. **Khattiyopissāssāti** khattiyopi assa issariyasampattassa pubbuṭṭhāyī assa. **Nesaṃ ettha kiñcīti** na etesaṃ ettha kiñci.

322. Āsanena vā nimanteyyāmāti nisinnāsaṃ papphoṭetvā idha nisīdāti vadeyyāma. **Abhinimanteyyāmapi nanti** abhiharitvā taṃ nimanteyyāma. Tattha duvidho abhihāro vācāya ceva kāyena ca. “Tumhākaṃ icchiticchitakkhaṇe mamaṃ cīvarādīhi vadeyyātha yenattho”ti vadanto hi vācāya abhiharitvā nimanteti nāma. Cīvarādīvekallaṃ sallakkhetvā “idaṃ gaṇhathā”ti tāni dento pana kāyena abhiharitvā nimanteti nāma. Tadubhayampi sandhāya “abhinimanteyyāmapi na”nti āha. **Rakkhāvaraṇaguttinti** rakkhāsaṅkhātānceva āvaraṇasaṅkhātānceva guttiṃ. Yā panesā āvudhahatthe purise ṭhapentena rakkhā, sā dhammikā nāma saṃvihitā na hoti. Yathā pana avelāya kaṭṭhahārikāpaṇṇahārikādayo vihāraṃ na pavasanti, migaluddakādayo vihārasīmāya mige vā macche vā na gaṇhanti, evaṃ saṃvidahantena dhammikā nāma saṃvihitā hoti. Taṃ sandhāyāha “dhammika”nti.

Evam santeti evam catunnampi vaṇṇānaṃ pabbajitānaṃ pabbajitasakkārena same samāne. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Madhurasuttavaṇṇanā niṭṭhitā.

5. Bodhirājakumārasuttavaṇṇanā

324. Evam me sutanti bodhirājakumārasuttaṃ. Tattha **kokanadoti** kokanadaṃ vuccati padumaṃ. So ca maṅgalapāsādo olokanakapadumaṃ dassetvā kato, tasmā kokanadoti saṅkhaṃ labhi.

325. Yāva pacchimasopānakalevarāti ettha **pacchimasopānakalevaranti** paṭhamam sopānaphalakaṃ vuttaṃ. **Addasā khoti** olokanatthaṃyeva dvārakoṭṭhake ṭhito addasa. **Bhagavā tuṇhī ahoṣīti** “kissa nu kho atthāya rājakumārena ayaṃ mahāsakkāro kato”ti āvajjanto puttapatthanāya katabhāvaṃ aññāsi. So hi rājakumāro aputtako, sutañcānena ahoṣi – “buddhānaṃ kira adhikāraṃ katvā manasā icchitaṃ labhanti”ti. So – “sacāhaṃ puttaṃ labhissāmi, sammāsambuddho mama celappaṭikaṃ akkamissati. No ce labhissāmi, na akkamissati”ti patthanam katvā santharāpesi. Atha bhagavā “nibbattissati nu kho etassa putto”ti āvajjetvā “na nibbattissati”ti addasa.

Pubbe kira so ekasmiṃ dīpe vasamāno samacchandena sakuṇapotaḥ khādi. Sacassa mātugāmo aññoḥ bhavēyya, puttaṃ labheyya. Ubhoḥi pana samānacchandeḥi hutvā pāpakammaṃ kataṃ, tenassa putto na nibbattissati aññāsi. Dusse pana akkante – “buddhānaṃ adhikāraṃ katvā patthitapatthitaṃ labhanti loka anussavo, mayā ca mahāabhinīhāro kato, na ca puttaṃ labhāmi, tucchaṃ idaṃ vacana”nti micchāgahaṇaṃ gaṇheyya. Titthiyāpi – “natthi samaṇānaṃ akattabbaṃ nāma, celappaṭikaṃ maddantā āhiṇḍanti”ti ujjhāyeyyūṃ. Etarahi ca akkamantesu bahū bhikkhū paracittaviduno, te bhabbam jānitvā akkamissanti, abhabbam jānitvā na akkamissanti. Anāgate pana upanissayo mando bhavissati, anāgataṃ na jānissanti. Tesu akkamantesu sace patthitaṃ ijjhissati, iccetaṃ kusalaṃ. No ce ijjhissati, – “pubbe bhikkhusaṅghassa abhinīhāraṃ katvā icchiticchitaṃ labhanti, taṃ idāni na labhanti. Teyeva maññe bhikkhū paṭipattipūrakā ahesuṃ, ime paṭipattim pūretuṃ na sakkontī”ti manussā vippaṭisārino bhavissantīti imeḥi kāraṇeḥi bhagavā akkamituṃ anicchanto tuṇhī ahoṣi. Sikkhāpadaṃ paññāpesi “na, bhikkhave, celappaṭikā akkamitabbā”ti (cūḷava. 268). Maṅgalatthāya paññattaṃ anakkamantesu pana akkamanatthāya anupaññattim ṭhapesi – “gihī, bhikkhave, maṅgalikā, anujānāmi, bhikkhave, gihīnaṃ maṅgalatthāyā”ti (cūḷava. 268).

326. Pacchimaṃ janataṃ tathāgato anukampatīti idaṃ thero vuttesu kāraṇesu tatiyaṃ kāraṇam sandhāyāha. **Na kho sukhena sukhanti** kasmā āha? Kāmasukhallikānuyogasaññī hutvā sammāsambuddho na akkami, tasmā ahampi satthārā samānacchando bhavissāmīti maññamāno evamāha.

327. So kho ahantiādi “yāva rattiyā pacchime yāme”ti tāva mahāsaccake (ma. ni. 1.364 ādayo) vuttanayena veditabbaṃ. Tato paraṃ yāva pañcavaggiyānaṃ āsavakkhayā pāsārāsisutte (ma. ni. 1.272 ādayo) vuttanayena veditabbaṃ.

343. Ankusagayhe sippeti ankusagahaṇasippe. **Kusalo ahanti** cheko ahaṃ. Kassa panāyaṃ santike sippaṃ uggaṇhīti? Pitu santike, pitāpissa pitu santikeva uggaṇhi. Kosambiyaṃ kira parantaparājā nāma rajjaṃ kāresi. Rājamahesī garubhārā ākāsatale raññā saddhim bālātaṃ tappamānā rattakambalaṃ pārupitvā nisinnā hoti, eko hatthilingasakuṇo “maṃsapesī”ti maññamāno gahetvā ākāsaṃ pakkhandi. Sā “chaḍḍeyya ma”nti bhayena nissaddā ahoṣi, so taṃ pabbatapāde rukkhaviṭape ṭhapesi. Sā pañissaraṃ karontī mahāsaddamakāsi. Sakuṇo palāyi, tassā tattheva gabbhavuṭṭhānaṃ ahoṣi. Tiyāmarattim deve vassante kambalaṃ pārupitvā nisīdi. Tato ca avidūre tāpaso vasati. So tassā saddena

aruṇe uggate rukkhamūlaṃ āgato jātiṃ pucchitvā nisseṇiṃ bandhitvā otāretvā attano vasanaṭṭhānaṃ netvā yāguṃ pāyesi. Dārakassa meghautuṅca pabbatautuṅca gahetvā jātattā udenoti nāmaṃ akāsi. Tāpaso phalāphalāni āharitvā dvepi jane posesi.

Sā ekadivasam tāpasassa āgamanavelāya paccuggamaṃ katvā itthikuttaṃ dassetvā tāpasam sīlabhedam āpādesi. Tesam ekato vasantānaṃ kāle gacchante parantaparājā kālam akāsi. Tāpaso rattibhāge nakkhattam oloketvā rañño matabhāvaṃ ñatvā – “tuyham rājā mato, putto te kiṃ idha vasitum icchati, udāhu pettike rajje chattaṃ ussāpetu”’nti pucchi. Sā puttassa ādito paṭṭhāya sabbaṃ pavattiṃ ācikkhitvā chattaṃ ussāpetukāmatañcassa ñatvā tāpasassa ārocesi. Tāpaso ca hatthiganthasippam jānāti, kutonena laddham? Sakkassa santikā. Pubbe kirassa sakko upaṭṭhānaṃ āgantvā “kena kilamathā”’ti pucchi. So “hatthiparissayo atthi”’ti ārocesi. Tassa sakko hatthiganthañceva vīnakañca datvā “palāpetukāmatāya sati imaṃ tantim vādetvā imaṃ silokaṃ vadeyyātha, pakkositukāmatāya sati imaṃ silokaṃ vadeyyāthā”’ti āha. Tāpaso taṃ sippam kumārassa adāsi. So ekaṃ vaṭarukkham abhiruhitvā hatthiṣu āgatesu tantim vādetvā silokaṃ vadati, hatthi bhītā palāyimsu.

So sippassa ānubhāvaṃ ñatvā punadivase pakkosanasippam payojesi. Jeṭṭhakahatthi āgantvā khandham upanāmesi. So tassa khandhagato yuddhasamatthe taruṇahatthi uccinitvā kambalañca muddikañca gahetvā mātāpitaro vanditvā nikkhanto anupubbena taṃ taṃ gāmaṃ pavisitvā – “ahaṃ rañño putto, sampattiṃ atthikā āgacchantū”’ti janasaṅghaṃ katvā nagaraṃ parivāretvā – “ahaṃ rañño putto, mayham chattaṃ dethā”’ti asaddahantānaṃ kambalañca muddikañca dassetvā chattaṃ ussāpesi. So hatthivittako hutvā “asukaṭṭhāne sundaro hatthi atthi”’ti vutte gantvā gaṇhāti. Caṇḍapajjoto “tassa santike sippam gaṇhissāmi”’ti kaṭṭhahatthim payojetvā tassa anto yodhe nisīdāpetvā taṃ hatthim gahaṇatthāya āgataṃ gaṇhitvā tassa santike sippam gahaṇatthāya dhītaraṃ uyyojesi. So tāya saddhim saṃvāsaṃ kappetvā taṃ gahetvā attano nagaraṃyeva agamāsi. Tassā kucchiyaṃ uppanno ayaṃ bodhirājakumāro attano pitu santike sippam uggaṇhi.

344. Padhāniyaṅgānīti padhānaṃ vuccati padahanabhāvo, padhānamassa atthīti padhāniyo. Padhāniyassa bhikkhuno āṅgānīti padhāniyaṅgāni. **Saddhoti** saddhāya samannāgato. Sā panesā āgamanasaddhā adhigamasaddhā okappanasaddhā pasādasaddhāti catubbidhā. Tattha sabbaññubodhisattānaṃ saddhā abhinīhārato paṭṭhāya āgatattā **āgamanasaddhā** nāma. Ariyasāvakaṇaṃ paṭivedhena adhiगतattā **adhigamasaddhā** nāma. Buddha dhammo saṅgho vutte acalabhāvena okappanaṃ **okappanasaddhā** nāma. Pasāduppatti **pasādasaddhā** nāma, idha pana okappanasaddhā adhippetā. **Bodhinti** catumaggañānaṃ. Taṃ suppaṭividdham tathāgatenāti saddahati, desanāsīsameva cetam, iminā pana āgena tīsupi ratanesu saddhā adhippetā. Yassa hi buddhādīsu pasādo balavā, tassa padhānaṃ vīriyaṃ ijjhati.

Appābādhoti arogo. **Appātaṅkoti** niddukkho. **Samavepākinīyāti** samavipācaniyā. **Gahaṇiyāti** kammajatejodhātuyā. **Nātisītāya nācūṇhāyāti** atisītagahaṇiko hi sītabhīrū hoti, accūṇhagahaṇiko uṇhabhīrū, tesam padhānaṃ na ijjhati. Majjhimagahaṇikassa ijjhati. Tenāha “majjhimāya padhānakkhamāyā”’ti. **Yathābhūtaṃ attānaṃ āvikattāti** yathābhūtaṃ attano agūṇaṃ pakāsetā. **Udayatthagāminīyāti** udayaṅca atthañca gantum paricchinditum samatthāya, etena paññāsalakkhaṇapariggāhikaṃ udayabbayañānaṃ vuttam. **Ariyāyāti** parisuddhāya. **Nibbedhikāyāti** anibbidhāpubbe lobhakkhandhādayo nibbijhitum samatthāya. **Sammādukkhakkhayagāminīyāti** tadaṅgavasena kilesānaṃ pahīnattā yaṃ dukkham khīyati, tassa dukkhassa khayagāminiyā. Iti sabbehipi imehi padehi vipassanāpaññāva kathitā. Duppaññassa hi padhānaṃ na ijjhati. Imāni ca pañca padhāniyaṅgāni lokiyāneva veditabbāni.

345. Sāyamanusiṭṭho pāto visesaṃ adhigamissatīti atthaṅgate sūriye anusitṭho aruṇuggamane visesaṃ adhigamissati. **Pātamanusiṭṭho sāyanti** aruṇuggamane anusitṭho sūriyatthaṅgamanavelāyaṃ. Ayañca pana desanā neyyapuggalavasena vuttā. Dandhapañño hi neyyapuggalo sattahi divasehi arahattaṃ pāpuṇāti, tikkhapañño ekadivasena, sesadivase majjhimapaññāvasena veditabbaṃ. **Aho**

buddho aho dhammo aho dhammassa svākkhātātāti yasmā buddhadhammānaṃ uḷāratāya dhammassa ca svākkhātātāya pāto kammaṭṭhānaṃ kathāpetvā sāyaṃ arahattaṃ pāpuṇāti, tasmā pasamsanto evamāha. **Yatra hi nāmāti** vimhayatthe nipāto.

346. Kucchimatīti āpannasattā. **Yo me ayaṃ, bhante, kucchigatoti** kiṃ panevaṃ saraṇaṃ gahitaṃ hotīti. Na hoti. Acittakasaṇaṃgamaṇaṃ nāma natthi, ārakkho paṇassa paccupaṭṭhitova hoti. Atha naṃ yadā mahallakakāle mātāpitaro, – “tāta, kucchigatameva taṃ saraṇaṃ gaṇhāpayimhā”ti sārenti, so ca sallakkhetvā “ahaṃ saraṇaṃ gato upāsako”ti satimṃ uppādeti, tadā saraṇaṃ gahitaṃ nāma hoti. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Bodhirājakumārasuttavaṇṇanā niṭṭhitā.

6. Aṅgulimālasuttavaṇṇanā

347. Evaṃ me sutanti aṅgulimālasuttaṃ. Tattha **aṅgulīnaṃ mālaṃ dhāretīti** kasmā dhāretī? Ācariyavacanena. Tatrāyaṃ anupubbikathā –

Ayaṃ kira kosalarañño purohitassa mantāṇiyā nāma brāhmaṇiyā kucchismiṃ paṭisandhiṃ aggahesi. Brāhmaṇiyā rattibhāge gabbhavuṭṭhānaṃ ahosi. Tassa mātukucchito nikkhamaṇakāle sakalanagare āvudhāni pajjalimṃsu, rañño maṅgalasakuntopi sirisayane ṭhapitā asilaṭṭhipi pajjali. Brāhmaṇo nikkhamitvā nakkhattaṃ olokento coranakkhattena jātoti rañño santikaṃ gantvā sukhaseyyabhāvaṃ pucchi.

Rājā “kuto, me ācariya, sukhaseyyā? Mayhaṃ maṅgalāvudhaṃ pajjali, rajjassa vā jīvitassa vā antarāyo bhavissati maññe”ti. Mā bhāyi, mahārāja, mayhaṃ ghare kumāro jāto, tassānubhāvena na kevalaṃ tuyhaṃ nivesane, sakalanagarepi āvudhāni pajjalitānīti. Kiṃ bhavissati ācariyāti? Coro bhavissati mahārājāti. Kiṃ ekacorako, udāhu rajjadūsako coroti? Ekacorako devāti. Evaṃ vatvā ca pana rañño manaṃ gaṇhitukāmo āha – “māretha naṃ devā”ti. Ekacorako samāno kiṃ karissati? Karīsasahassakhette ekasālisīsaṃ viya hoti, paṭijaggatha nanti. Tassa nāmaggaṇaṃ gaṇhantā sayane ṭhapitamaṅgalaasilaṭṭhi, chadane ṭhapitā sarā, kappāsapicumhi ṭhapitaṃ tālavaṇṭakaraṇasatthakanti ete pajjalantā kiñci na hiṃsiṃsu, tasmā **ahiṃsakoti** nāmaṃ akaṃsu. Taṃ sippuggaṇaṇakāle takkasīlaṃ pesayimṃsu.

So dhammantevāsiko hutvā sippaṃ paṭṭhapesi. Vattasampanno kiṃkārapaṭissāvī manāpacārī piyavādī ahosi. Sesaantevāsikā bāhirakā ahesuṃ. Te – “ahiṃsakamaṇavakassa āgatakālato paṭṭhāya mayaṃ na paññāyāma, kathaṃ naṃ bhindeyyāmā”ti? Nisīditvā mantayantā – “sabbehi atirekapaññattā duppaññoti. Na sakkā vattuṃ, vattasampannattā dubbattoti. Na sakkā vattuṃ, jātisampannattā dujjātoti na sakkā vattuṃ, kinti karissāmā”ti? Tato ekaṃ kharamantaṃ mantayimṃsu “ācariyassa antaraṃ katvā naṃ bhindissāmā”ti tayo rāsī hutvā paṭhamaṃ ekacce ācariyaṃ upasaṅkamitvā vanditvā aṭṭhaṃsu. Kiṃ tātāti? Imasmiṃ gehe ekā kathā suyati. Kiṃ tātāti? Ahiṃsakamaṇavo tumhākaṃ antare dubbhatīti maññāmāti. Ācariyo santajjetvā – “gacchatha vasalā, mā me puttaṃ mayhaṃ antare paribhindathā”ti niṭṭhubhi. Tato itare, atha itarehi tayopi koṭṭhāsā āgantvā tatheva vatvā – “amhākaṃ asaddahantā upaparikkhitvā jānāthā”ti āhaṃsu.

Ācariyo sinehena vadante disvā “atthi maññe santhavo”ti paribhijjitvā cintesi “ghātemi na”nti. Tato cintesi – “sace ghātesāmi ‘disāpāmokkho ācariyo attano santikaṃ sippuggaṇaṇatthaṃ āgate māṇavake dosaṃ uppādetvā jīvitā voropeti”ti. Puna koci sippuggaṇaṇatthaṃ na āgamissati, evaṃ me lābho parihāyissati, atha naṃ sippassa pariyoṣānupacāroti vatvā jaṅghasahassaṃ ghātehīti vakkhāmi. Avassaṃ ettha eko uṭṭhāya taṃ ghātesati”ti.

Atha naṃ āha – “ehi tāta jaṅghasahassam ghātehi, evaṃ te sippassa upacāro kato bhavissatī”ti. Mayam ahiṃsakakule jātā, na sakkā ācariyāti. Aladdhupacāraṃ sippaṃ phalaṃ na deti tātāti. So pañcāvudham gahetvā ācariyaṃ vanditvā aṭaviṃ pavitṭho. Aṭaviṃ pavisanaṭṭhānepi aṭavimajjhepi aṭavito nikkhamanaṭṭhānepi ṭatvā manusse ghātehi. Vattham vā veṭhanaṃ vā na gaṇhāti. Eko dveti gaṇitamattameva karonto gacchati, gaṇanampi na uggaṇhāti. Pakatiyāpi paññavā esa, pāṇātipātino pana cittaṃ na patitṭhāti, tasmā anukkamena gaṇanampi na sallakkhesi, ekekaṃ aṅgulim chinditvā ṭapeti. Ṭapitaṭṭhāne aṅguliyo vinassanti, tato vijjhivā aṅgulīnaṃ mālaṃ katvā dhāresi, teneva cassa aṅgulimālota saṅkhā udapādi. So sabbam araṇṇaṃ nissañcāramakāsi, dāruādīnaṃ atthāya araṇṇaṃ gantum samattho nāma natthi.

Rattibhāge antogāmaṃpi āgantvā pādena paharivā dvāraṃ ugghātehi. Tato sayiteyeva māretvā eko ekoti gahetvā gacchati. Gāmo osarivā nigame aṭṭhāsi, nigamo nagare. Manussā tīyojanato paṭṭhāya gharāni pahāya dārake hatthesu gahetvā āgamma sāvattim parivāretvā khandhāvāraṃ bandhitvā rājaṅgaṇe sannipatitvā – “coro, te deva, vijite aṅgulimālo nāmā”tiādīni vadantā kandanti. Bhaggavo “mayham putto bhavissatī”ti ṇatvā brāhmaṇim āha – bhoti aṅgulimālo nāma coro uppanno, so na añño, tava putto ahiṃsakakumāro. Idāni rājā taṃ gaṇhitum nikkhamissati, kiṃ kattabbanti? Gaccha sāmi, puttam me gahetvā ehīti. Nāham bhaddhe ussahāmi, catūsu hi janesu vissāso nāma natthi, coro me purāṇasahāyoti avissāsanīyo, sākha me purāṇasanthatāti avissāsanīyā, rājā maṃ pūjetīti avissāsanīyo, itthī me vasam gatāti avissāsanīyāti. Mātu hadayaṃ pana mudukaṃ hoti. Tasmā aham pana gantvā mayham puttam ānessāmīti nikkhantā.

Taṃdivasaṅga bhagavā paccūsasamaye lokaṃ volokento aṅgulimālaṃ disvā – “mayi gate etassa sotthi bhavissati. Agāmake araṇṇe ṭhito catuppadikaṃ gātham sutvā mama santike pabbajitvā cha abhiññā sacchikarissati. Sace na gamissāmi, mātari aparajjhivā anuddharaṇīyo bhavissati, karissāmissa saṅgaha”nti pubbaṅhasamayaṃ nivāsetvā piṇḍāya pavisitvā katabhattakicco taṃ saṅgaṇhitukāmo vihāra nikkhami. Etamattham dassetuṃ “atha kho bhagavā”tiādī vuttam.

348. Saṅkaritvā saṅkaritvāti saṅketam katvā vaggavaggā hutvā. **Hatthatham gacchantīti** hatthe attham vināsam gacchanti. Kiṃ pana te bhagavantaṃ sañjānitvā evaṃ vadanti asaṅjānitvāti? Asañjānitvā. Aññātakavesena hi bhagavā ekakova agamāsi. Coropi tasmim samaye dīgharattam dubbhojanena ca dukkhaseyyāya ca ukkaṇṭhito hoti. Kittakā panānena manussā māritāti? Ekenūnasahassam. So pana idāni ekaṃ labhitvā saṅghassa pūressatīti saññī hutvā yameva paṭhamam passāmi, taṃ ghāteva gaṇanaṃ pūretvā sippassa upacāraṃ katvā kesamassam ohāretvā nhāyitvā vatthāni parivattetvā mātāpitaro passissāmīti aṭavimajjhato aṭavimukham āgantvā ekamantaṃ ṭhitova bhagavantaṃ addasa. Etamattham dassetuṃ “addasā kho”tiādī vuttam.

Iddhābhisāṅkhāraṃ abhisāṅkhāsīti mahāpathaviṃ ummiyo uṭṭhapento viya saṃharitvā aparabhāge akkamati, orabhāge valiyo nikkhamanti, aṅgulimālo sarakkhepamattaṃ muñcitvā gacchati. Bhagavā purato mahantaṃ aṅgaṇam dassetvā sayam majjhe hoti, coro ante. So “idāni naṃ pāpuṇitvā gaṇhissāmī”ti sabbathāmena dhāvati. Bhagavā aṅgaṇassa pārimante hoti, coro majjhe. So “ettha naṃ pāpuṇitvā gaṇhissāmī”ti vegena dhāvati. Bhagavā tassa purato mātikaṃ vā thalam vā dasseti, etenupāyena tīṇi yojanāni gahetvā agamāsi. Coro kilami, mukhe kheḷo sussi, kacchehi sedā muccimsu. Athassa “acchariyaṃ vata bho”ti etadahosi. **Migampīti** migam kasmā gaṇhāti? Chātasamaye āhārattham. So kira ekaṃ gumbaṃ ghaṭṭetvā mige uṭṭhāpeti. Tato cittaruciyaṃ migam anubandhanto gaṇhitvā pacitvā khādati. **Puccheyyanti** yena kāraṇenāyaṃ gacchantova ṭhito nāma, ahaṅga ṭhitova aṭṭhito nāma, yaṃnūnāham imam samaṇam taṃ kāraṇam puccheyyanti attho.

349. Nidhāyāti yo vihiṃsanattham bhūtesu daṇḍo pavattayitabbo siyā, taṃ nidhāya apanetvā mettāya khantiyā paṭisaṅkhāya avihimsāya sāraṇiyadhammesu ca ṭhito ahanti attho. **Tuvamaṭṭhitosīti** pānesu asaṅgātattā ettakāni pānasahassāni ghātentassa tava mettā vā khanti vā paṭisaṅkhā vā avihimsā vā sāraṇiyadhammo vā natthi, tasmā tuvaṃ aṭṭhitosi, idāni iriyāpathena ṭhitopi niraye dhāvissasi,

tiracchānayoniyam pettavisaye asurakāye vā dhāvissasīti vuttam hoti.

Tato coro – “mahā ayam sīhanādo, mahantaṃ gajjitaṃ, na idaṃ aññassa bhavissati, mahāmāyāya puttassa siddhatthassa samaṇarañño etaṃ gajjitaṃ, diṭṭho vatamhi maññe tikhiṇacakkhunā sammāsambuddhena, saṅgahakaraṇattham me bhagavā āgato”’ti cintevā **cirassaṃ vata meti**ādīmāha. Tattha **mahitoti** devamanussādīhi catupaccayapūjāya pūjito. **Paccupādīti** cirassaṃ kālassa accayena mayhaṃ saṅgahatthāya imaṃ mahāvanaṃ paṭipajji. **Pahāya pāpanti** pajahitvā pāpaṃ.

Itvevāti evaṃ vatvāyeva. **Āvudhanti** pañcāvudhaṃ. **Sobbheti** samantato chinne. **Papātetī** ekato chinne. **Narake**ti phalitaṭṭhāne. Idha pana tīhipi imehi padehi araṇṇameva vuttam. **Akirīti** khipi chaḍḍesi.

Tamehi bhikkhūti tadā avocāti bhagavato imaṃ pabbājento kuhiṃ satthakaṃ labhissāmi, kuhiṃ pattacīvaranti pariyesanakiccaṃ natthi, kammaṃ pana olokesi. Athassa pubbe sīlavantānaṃ aṭṭhaparikkhārabbhaṇḍakassa dinnabhāvaṃ ñatvā dakkhiṇattham pasāretvā – “ehi bhikkhu svākkhāto dhammo, cara brahmacariyaṃ sammā dukkhassa antakiriyaṃ”’ti āha. So saha vacaneneva iddhimayapattacīvaraṃ paṭilabhi. Tāvadevassa gihiliṅgaṃ antaradhāyi, samaṇaliṅgaṃ pāturaḥosi.

“Ticīvaraṇca patto ca, vāsi sūci ca bandhanaṃ;
Parissāvanena aṭṭhete, yuttayogassa bhikkhuno”’ti. –

Evaṃ vuttā aṭṭha parikkhārā sarīrapaṭibaddhāva hutvā nibbattiṃsu. **Eseva tassa ahu bhikkhubhāvoti** esa ehibhikkhubhāvo tassa upasampannabhikkhubhāvo aḥosi, na hi ehibhikkhūnaṃ visuṃ upasampadā nāma atthi.

350. Pacchāsamaṇenāti bhaṇḍaggāhakena pacchāsamaṇena, teneva attano pattacīvaraṃ gāhāpetvā taṃ pacchāsamaṇaṃ katvā gatoti attho. Mātāpissa aṭṭhausabhamattena ṭhānena antaritā, – “tāta, ahiṃsaka kattha ṭhitosi, kattha nisinnosi, kuhiṃ gatosi? Mayā saddhiṃ na kathesi tāta”’ti vadantī āhiṇḍitvā appasamānā ettova gatā.

Pañcamattehi assasatehīti sace corassa parājayo bhavissati, anubandhitvā naṃ gaṇhissāmi. Sace mayhaṃ parājayo bhavissati, vegena palāyissāmīti sallahukena balena nikkhami. **Yena ārāmoti** kasmā ārāmaṃ agamāsi? So kira corassa bhāyati, cittena gantukāmo na gacchati, garahābhayena nikkhami. Tenassa etadaḥosi – “sammāsambuddhaṃ vanditvā nisīdissāmi, so pucchissati ‘kasmā balaṃ gahetvā nikkhantosi’’ti. Athāhaṃ āroccāmi, bhagavā hi maṃ na kevalaṃ samparāyikeneva atthena saṅgaṇhāti, diṭṭhadhammikenapi saṅgaṇhātiyeva. So sace mayhaṃ jayo bhavissati, adhiyāsessati. Sace parājayo bhavissati ‘kiṃ te, mahārāja, ekaṃ coraṃ ārabha gamanena’’ti vakkhati. Tato maṃ jano evaṃ saṅjānissati – ‘rājā coraṃ gahetuṃ nikkhanto, sammāsambuddhena pana nivattito’’ti”’ti garahamokkhaṃ sampassamāno agamāsi.

Kuto paṇassāti kasmā āha? Api nāma bhagavā tassa upanissayaṃ oloketvā taṃ ānetvā pabbājeyyāti bhagavato parigaṇhanattham āha. **Raññoti** na kevalaṃ raññoyeva bhayaṃ aḥosi, avasesopi mahājano bhīto phalakāvudhāni chaḍḍetvā sammukhasammukhaṭṭhāneva palāyitvā nagaraṃ pavisitvā dvāraṃ pidhāya aṭṭālake āruya oloketto aṭṭhāsi. Evaṇca avoca – “aṅgulimālo ‘rājā mayhaṃ santikaṃ āgacchati’’ti ñatvā paṭhamataraṃ āgantvā jetavane nisinno, rājā tena gahito, mayhaṃ pana palāyitvā muttā”’ti. **Natthi te ito bhayanti** ayañhi idāni kunthakipillikaṃ jīvitā na voropeti, natthi te imassa santikā bhayanti attho.

Kathaṃ gottoti? Kasmā pucchati? Pabbajitaṃ dāruṇakammaṃ uppannānaṃ gahetvā voharitaṃ na yuttam, mātāpitūnaṃ gottavasena naṃ samudācarissāmīti maññamāno pucchi. **Parikkhārānanti** etesaṃ atthāya ahaṃ ussukkaṃ karissāmīti attho. Kathentoyeva ca udare baddhasāṭakaṃ muñcivā

therassa pādamūle ṭhapesi.

351. Āraññikotiādīni cattāri dhutaṅgāni pāliyaṃ āgatāni. Tharena pana terasapi samādinneva ahesuṃ, tasmā alanti āha. **Yañhi mayaṃ, bhanteti** kiṃ sandhāya vadati? “Hatthimpi dhāvantaṃ anubandhitvā gaṇhāmī”’ti āgataṭṭhāne raññā pesitahatthādayo so evaṃ aggahesi. Rājāpi – “hatthīhiyeva naṃ parikkhipitvā gaṇhatha, asseheva, rathehevā”’ti evaṃ anekavāraṃ bahū hatthādayo pesesi. Evaṃ gatesu pana tesu – “ahaṃ are aṅgulimālo”’ti tasmim uṭṭhāya saddaṃ karonte ekopi āvudhaṃ parivattetuṃ nāsakkhi, sabbeva koṭṭetvā māresi. Hatthī araññahatthī, assā araññaassā, rathāpi tattheva bhijjantīti idaṃ sandhāya rājā evaṃ vadati.

Piṇḍāya pāvisīti na idaṃ paṭhamaṃ pāvisi. Itthidassanadivasam sandhāya panetaṃ vuttaṃ. Devasikampi panesa pavisateva, manussā ca naṃ disvā uttasantipi palāyantipi dvāraṃpi thakenti, ekacce aṅgulimāloti sutvāva palāyitvā araññaṃ vā pavisanti, gharaṃ vā pavisitvā dvāraṃ thakenti. Palāyituṃ asakkontā piṭṭhiṃ datvā tiṭṭhanti. Thero uḷṅgayāgumpi kaṭacchubhikkhampi na labhati, piṇḍapātena kilamati. Bahi alabhanto nagaraṃ sabbasādhāraṇanti nagaraṃ pavisati. Yena dvārena pavisati, tattha aṅgulimālo āgatoti kūṭasahassānaṃ bhijjanakāraṇaṃ hoti. **Etadahosīti** kāruññappattiyā ahoṣi. Ekena ūnāmanussasahassaṃ ghātentassa ekadivasampi kāruññaṃ nāhoṣi, gabbhamūḷhāya itthiyā dassanamatteneva kathaṃ uppananti? Pabbajjābalena, pabbajjābalañhi etaṃ.

Tena hīti yasmā te kāruññaṃ uppannaṃ, tasmāti attho. **Ariyāya jātiyāti**, aṅgulimāla, etaṃ tvaṃ mā gaṇhi, nesā tava jāti. Gihikālo esa, gihī nāma pāṇampi hananti, adinnādānādīnīpi karonti. Idāni pana te ariyā nāma jāti. Tasmā tvaṃ “yato ahaṃ, bhagini, jāto”’ti sace evaṃ vattuṃ kukkucāyasi, tena hi “ariyāya jātiyā”’ti evaṃ visesetvā vadāhīti uyyojesi.

Taṃ itthiṃ etadavocāti itthīnaṃ gabbhavuṭṭhānaṭṭhānaṃ nāma na sakkā purisena upasaṅkamituṃ. Thero kiṃ karosīti? Aṅgulimālatthero saccakiriyaṃ katvā sotthikaraṇatthāya āgatoti ārocāpesi. Tato te sāṇiyā parikkhipitvā therassa bahisāṇiyaṃ pīṭhakaṃ paññāpesuṃ. Thero tattha nisīditvā – “yato ahaṃ bhagini sabbaññubuddhassa ariyāya jātiyā jāto”’ti saccakiriyaṃ akāsi, saha saccavacaneneva dhamakaraṇato muttaudakaṃ viya dārako nikkhami. Mātāputtānaṃ sotthi ahoṣi. Imañca pana parittaṃ na kiñci parissayaṃ na maddati, **mahāparittaṃ** nāmetanti vuttaṃ. Tharena nisīditvā saccakiriyaṃ katatṭhāne pīṭhakaṃ akāmsu. Gabbhamūḷhaṃ tīracchānagatitthimpi ānetvā tattha nisajjāpentī, tāvadeva sukhena gabbhavuṭṭhānaṃ hoti. Yā dubbalā hoti na sakkā ānetuṃ, tassā pīṭhakadhovanaudakaṃ netvā sīse siñcanti, taṅkhaṇaṃyeva gabbhavuṭṭhānaṃ hoti, aññaṃpi rogaṃ vūpasameti. Yāva kappā tiṭṭhanakapāṭihāriyaṃ kiretaṃ.

Kim pana bhagavā theram vejjakammaṃ kārapesīti? Na kārapesi. Therañhi disvā manussā bhītā palāyanti. Thero bhikkhāhārena kilamati, samaṇadhammaṃ kātuṃ na sakkoti. Tassa anuggahena saccakiriyaṃ kāresi. Evaṃ kirassa ahoṣi – “idāni kira aṅgulimālatthero mettacittaṃ paṭilabhitvā saccakiriyaṃ manussānaṃ sotthibhāvaṃ karotīti manussā theram upasaṅkamitabbam maññissanti, tato bhikkhāhārena akilamanto samaṇadhammaṃ kātuṃ sakkhissatī”’ti anuggahena saccakiriyaṃ kāresi. Na hi saccakiriyaṃ vejjakammaṃ hoti. Therassāpi ca “samaṇadhammaṃ karissāmī”’ti mūlakammaṭṭhānaṃ gahetvā rattitṭhānādivatṭhāne nisinnassa cittaṃ kammaṭṭhānābhimukhaṃ na gacchati, aṭaviyaṃ ṭhatvā manussānaṃ ghātitaṭṭhānameva pākaṃ hoti. “Duggatomhi, khuddakaputtomhi, jīvitaṃ me dehi sāmīti maraṇabhītānaṃ vacanākāro ca hatthapādavikāro ca āpāthaṃ āgacchati, so vippaṭṭisārī hutvā tatova uṭṭhāya gacchati, athassa bhagavā taṃ jātiṃ abbohārikaṃ katvāvāyaṃ vipassanaṃ vadḍhetvā arahattaṃ gaṇhissatīti ariyāya jātiyā saccakiriyaṃ kāresi. **Eko vūpakaṭṭhoti**ādī vatthasutte (ma. ni. 1.80) vitthāritaṃ.

352. Aññenapi leḍḍu khittoti kākasunakhasūkarādīnaṃ paṭikkamāpanatthāya samantā sarakkhepamatte ṭhāne yena kenaci disābhāgena khitto āgantvā therasseva kāye patati. Kittake ṭhāne evaṃ hoti? Gaṇṭhikaṃ paṭimuñcitvā piṇḍāya caritvā paṭinivattetvā yāva gaṇṭhikapaṭimukkaṭṭhānaṃ

āgacchati, tāva hoti. **Bhinnena sisenāti** mahācammaṃ chinditvā yāva aṭṭhimariyādā bhinnena.

Brāhmaṇāti khīṇāsavabhāvaṃ sandhāya āha. **Yassa kho tvam, brāhmaṇa, kamma** **vipākenāti** idaṃ sabhāgadiṭṭhadhammavedanīyakammaṃ sandhāya vuttaṃ. Kammañhi kariyamānameva tayo koṭṭhāse pūreti. Sattasu cittesu kusalā vā akusalā vā paṭhamajavanacetanā **diṭṭhadhammavedanīyakammaṃ** nāma hoti. Taṃ imasmiṃyeva attabhāve vipākaṃ deti. Tathā asakkontaṃ ahosikammaṃ, nāhosi kammavipāko, na bhavissati kammavipāko, natthi kammavipākoti imassa tikassa vasena **ahosikammaṃ** nāma hoti. Atthasādhikā sattamajavanacetanā **upapajjavedanīyakammaṃ** nāma. Taṃ anantare attabhāve vipākaṃ deti. Tathā asakkontaṃ vuttanayeneva taṃ ahosikammaṃ nāma hoti. Ubhinnamantare pañcajavanacetanā **aparāpariyavedanīyakammaṃ** nāma hoti. Taṃ anāgate yadā okāsaṃ labhati, tadā vipākaṃ deti. Sati saṃsārappavattiyā ahosikammaṃ nāma na hoti. Therassa pana upapajjavedanīyañca aparāpariyavedanīyañcāti imāni dve kammāni kammakkhayakarena arahattamaggena samugghāṭitāni, diṭṭhadhammavedanīyaṃ atthi. Taṃ arahattappattassāpi vipākaṃ detiyeva. Taṃ sandhāya bhagavā ‘‘yassa kho tva’’ntiādīmāha. Tasmā **yassa khoti** ettha yādisassa kho tvam, brāhmaṇa, kamma vipākenāti evaṃ attho veditabbo.

Abbhā muttoti desanāsīsamattametaṃ, abbhā mahikā dhūmo rajo rāhūti imehi pana upakkilesehi mutto candimā idha adhippeto. Yathā hi evaṃ nirupakkileso candimā lokaṃ pabhāseti, evaṃ pamādakilesavimutto appamatto bhikkhu imaṃ attano khandhāyatanadhātulokaṃ pabhāseti, vihatakilesandhakāraṃ karoti.

Kusalena pidhīyatīti maggakusalena pidhīyati appaṭṭisandhikaṃ karīyati. **Yuñjati buddhasāsaneti** buddhasāsane kāyena vācāya manasā ca yuttappayutto viharati. Imā tisso therassa udānagāthā nāma.

Disā hi meti idaṃ kira thero attano parittāṇākāraṃ karonto āha. Tattha **disā hi meti** mama sapattā. Ye maṃ evaṃ upavadanti – ‘‘yathā mayam aṅgulimālena mārītānaṃ ñātakānaṃ vasena dukkhaṃ vediyāma, evaṃ aṅgulimālopi vediyatū’’ti, te mayhaṃ disā catusaccadhammakathaṃ suṇantūti attho. **Yuñjantūti** kāyavācāmanehi yuttappayuttā viharantu. **Ye dhammamevādapayanti santoti** ye santo sappurisā dhammaṃyeva ādapenti samādapenti gaṇhāpenti, te manujā mayhaṃ sapattā bhajantu sevantu payirupāsantūti attho.

Avirodhappasamsīnanti avirodho vuccati mettā, mettāpasamsakānanti attho. **Suṇantu dhammaṃ kālenāti** khaṇe khaṇe khantimettāpaṭṭisankhāsāraṇīyadhammaṃ suṇantu. **Taṅca anuvidhīyantūti** taṅca dhammaṃ anukarontu pūrentu.

Na hi jātu so mamaṃ hiṃseti yo mayhaṃ diso, so maṃ ekaṃseneva na hiṃseyya. **Aññaṃ vā pana kiñci nanti** na kevalaṃ maṃ, aññaṃpi pana kañci puggalaṃ mā hiṃsantu mā viheṭhentu. **Pappuyya paramaṃ santinti** paramaṃ santibhūtaṃ nibbānaṃ pāpuṇitvā. **Rakkheyya tasathāvareti tasā** vuccanti sataṇhā, **thāvarā** nittaṇhā. Idaṃ vuttaṃ hoti – yo nibbānaṃ pāpuṇāti, so sabbaṃ tasathāvaraṃ rakkhituṃ samattho hoti. Tasmā mayhampi disā nibbānaṃ pāpuṇantu, evaṃ maṃ ekaṃseneva na hiṃsissantīti. Imā tisso gāthā attano parittaṃ kātuṃ āha.

Idāni attanova paṭipattiṃ dīpento **udakañhi nayanti nettikāti** āha. Tattha **nettikāti** ye mātikaṃ sodhetvā bandhitabbaṭṭhāne bandhitvā udakaṃ nayanti. **Usukārāti** usukārakā. **Namayantīti** telakañjikenā makkhetvā kukkuḷe tāpetvā unnatunnataṭṭhāne namentā ujum karonti. **Tejananti** kaṇḍam. Tañhi issāso tejaṃ karoti, parañca tajjeti, tasmā tejananti vuccati. **Attānaṃ damayantīti** yathā nettikā ujumaggena udakaṃ nayanti, usukārā tejanaṃ, tacchakā ca dāruṃ ujum karonti, evamevaṃ paṇḍitā attānaṃ damenti ujukaṃ karonti nibbisevanaṃ karonti.

Tādināti iṭṭhāniṭṭhādīsu nibbikārena – ‘‘pañcahākārehi bhagavā tādī, iṭṭhāniṭṭhe tādī, vantāvīti tādī,

cattāvīti tādī, tiṇṇāvīti tādī, tanniddesāti tādī’ ti (mahāni. 38; 192) evaṃ tādilakkhaṇappattena satthārā. **Bhavanettīti** bhavarajju, taṇhāyetam nāmaṃ. Tāya hi goṇā viya gīvāya rajjuyā, sattā hadaye baddhā taṃ taṃ bhavaṃ nīyanti, tasmā bhavanettīti vuccati. **Phuṭṭho kammavipākenāti** maggacetanāya phuṭṭho. Yasmā hi maggacetanāya kammaṃ paccati vipaccati ḍayhati, parikkhayaṃ gacchati, tasmā sā kammavipākoti vuttā. Tāya hi phuṭṭhattā esa **aṇaṇo** nikkilesa jāto, na dukkhavedanāya aṇaṇo. **Bhuñjāmīti** cettha theyyaparibhogo iṇaparibhogo dāyajjaparibhogo sāmiparibhogoti cattāro paribhogā veditabbā. Tattha dussīlassa paribhogo theyyaparibhogo nāma. So hi cattāro paccaye thenetvā bhuñjati. Vuttampi cetam “theyyāya vo, bhikkhave, raṭṭhapiṇḍo bhutto” ti (pārā. 195). Sīlavato pana apaccavekkhaṇaparibhogo iṇaparibhogo nāma. Sattannaṃ sekkhānaṃ paribhogo dāyajjaparibhogo nāma. Khīṇāsavassa paribhogo sāmiparibhogo nāma. Idha kilesaiṇānaṃ abhāvaṃ sandhāya “aṇaṇo” ti vuttam. “Aniṇo” tipi pāṭho. Sāmiparibhogaṃ sandhāya “bhuñjāmi bhojana” ti vuttam.

Kāmaratisanthavanti duvidhesupi kāmesu taṇhāratisanthavaṃ mā anuyuñjatha mā karittha. **Nayidaṃ dummantitaṃ mamāti** yaṃ mayā sammāsambuddhaṃ disvā pabbajissāmīti mantitaṃ, taṃ mama mantitaṃ na dummantitaṃ. **Samvibhattesu dhammesūti** ahaṃ satthāti evaṃ loke uppannehi ye dhammā samvibhattā, tesu dhammesu yaṃ seṭṭhaṃ nibbānaṃ, tadeva ahaṃ upagamaṃ upagato sampatto, tasmā mayhaṃ idaṃ āgamaṃ svāgataṃ nāma gatanti. **Tisso vijjāti** pubbenivāsadibbacakkhuāsavakkhayaapaññā. **Kataṃ buddhassa sāsanaṃ** yaṃ buddhassa sāsane kattabbakiccaṃ atthi, taṃ sabbam mayā kataṃ. Tīhi vijjāhi navahi ca lokuttaradhammehi desanaṃ matthakaṃ pāpesīti.

Papañcasūdaniyā majjhimanikāyaṭṭhakathāya

Āngulimālasuttavaṇṇanā niṭṭhitā.

7. Piyajātikasuttavaṇṇanā

353. Evaṃ me sutanti piyajātikasuttaṃ. Tattha **neva kammantā paṭibhantīti** na sabbena sabbam paṭibhanti, pakatiniyāmena pana na paṭibhanti. Dutiyapadepe eseva nayo. Ettha ca **na paṭibhantīti** na ruccati. **Ālāhananti** susānaṃ. **Aññathantanti** vivaṇṇatāya aññathābhāvo. **Indriyāni** nāma manoviññeyyā dhammā, paṭiṭṭhitokāsaṃ pana sandhāya idaṃ vuttam. **Piyajātikāti** piyato jāyanti. **Piyappabhāvikāti** piyato pabhavanti.

355. Sace taṃ, mahārājāti tassa atthaṃ asallakkhayaṃānāpi satthari saddhāya evaṃ vadati. **Cara pireti** apehi amhākaṃ pare, anajjhattikabhūtetī attho. Atha vā **cara pireti** parato gaccha, mā idha tiṭṭhātipi attho.

356. Dvidhā chetvāti asinā dve koṭṭhāse karonto chinditvā. **Attānaṃ upphālesīti** teneva asinā attano udaraṃ phālesi. Yadi hi tassa sā appiyā bhavēyya, idāni aññaṃ mātugāmaṃ gaṇhissāmīti attānaṃ na ghāteyya. Yasmā panassa sā piyā ahosi, tasmā paralokepi tāya saddhiṃ samāngibhāvaṃ patthayamāno evamakāsi.

357. Piyā te vajirīti evaṃ kirassā ahosi – “sacāhaṃ, ‘bhūtapubbaṃ, mahārāja, imissāyeva sāvattihyaṃ aññatarissā itthiyā’ tiādikathaṃ katheyyaṃ, ‘ko te evaṃ akāsi, apehi natthi eta’ nti maṃ paṭisedheyya, vattamānēna vaṃ saññāpessāmī’ ti cintetvā evamāha. **Vipariṇāmaññathābhāvāti** ettha maraṇavasena vipariṇāmo, kenaci saddhiṃ palāyitvā gamanavasena aññathābhāvo veditabbo.

Vāsabhāyāti vāsabhā nāma rañño ekā devī, taṃ sandhāyāha.

Piyā te ahanti kasmā sabbapacchā āha? Evaṃ kirassā ahosi – “ayaṃ rājā mayhaṃ kupito, sacāhaṃ

sabbapaṭhamam ‘piyā te aha’nti puccheyyam, ‘na me tvam piyā, cara pire’ti vadeyya, evam sante kathā patiṭṭhānam na labhissati’ ti kathāya patiṭṭhānattham sabbapacchā pucchi. **Kāsikosalesu** chaḍḍitabhāvena vipariṇāmo, paṭirājūnam hatthagamanavasena aññathābhāvo veditabbo.

Ācamehīti ācamanodakam dehi. Ācamitvā hatthapāde dhovitvā mukham vikkhāletvā satthāram namassitukāmo evamāha. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Piyajātikasuttavaṇṇanā niṭṭhitā.

8. Bāhitikasuttavaṇṇanā

358. Evaṃ me sutanti bāhitikasuttam. Tattha **ekapuṇḍarīkam nāganti** evaṃnāmakam hatthim. Tassa kira phāsukānam upari tālaphalamattam paṇḍaraṭṭhānam atthi, tenassa ekapuṇḍarīkoti nāmam akaṃsu. **Sirivaḍḍham mahāmattanti** paccekahatthim abhiruhitvā kathāphāsukattham saddhim gacchantam evaṃnāmakam mahāmattam. **Āyasmānoti** ettha **noti** pucchāya nipāto. Mahāmatto therassa saṅghātipattadhāraṇākāram sallakkhetvā “evaṃ, mahārājā’ ti āha.

359. Opārambhoti upārambham dosam āropanāraho. Kiṃ pucchāmīti rājā pucchati. Sundarivatthusmiṃ uppannamidaṃ suttam, tam pucchāmīti pucchati. **Yañhi mayam, bhanteti**, bhante, yam mayam viññūhīti idaṃ padaṃ gahetvā pañhena paripūretum nāsakkhimhā, tam kāraṇam āyasmatā evam vadantena paripūritam.

360. Akusaloti akosallasambhūto. **Sāvajjoti** sadoso. **Sabyābajjhoti** sadukkho. **Dukkhavipākoti** idha nissandavipāko kathito. **Tassāti** tassa evam attabyābādhādīnam atthāya pavattakāyasamācārassa.

Sabbākusaladhammapahīno kho, mahārāja, tathāgato kusaladhammasamannāgatoti ettha sabbesaṃyeva akusalānam dhammānam pahānam vaṇṇetīti. Āma vaṇṇetīti vutte yathā pucchā, tathā attho vutto bhavēyya. Evaṃ byākaraṇam pana na bhāriyam. Appahīnaakusalopi hi pahānam vaṇṇeyya, bhagavā pana pahīnākusalatāya yathākārī tathāvādīti dassetum evam byākāsi. Sukkapakkhepi eseva nayo.

362. Bāhitikāti bāhiraṭṭhe utṭhitavattassetam nāmam. **Soḷasasamā āyāmenāti** āyāmena samasoḷasahatthā. **Aṭṭhasamā vitthārenāti** vitthārena samaaṭṭhahatthā.

363. Bhagavato pādāsīti bhagavato niyyātesi. Datvā ca pana gandhakuṭiyam vitānam katvā bandhi. Tato paṭṭhāya gandhakuṭi bhīyosomattāya sobhi. Sesam sabbattha uttānameva. Neyyapuggalassa pana vasena ayam desanā niṭṭhitāti.

Papañcasūdaniyā majjhimanikāyaṭṭhakathāya

Bāhitikasuttavaṇṇanā niṭṭhitā.

9. Dhammacetiyasuttavaṇṇanā

364. Evaṃ me sutanti dhammacetiyasuttam. Tattha **medāḷupanti** nāmetam tassa, tassa hi nigamassa medavaṇṇā pāsāṇā kirettha ussannā ahesum, tasmā medāḷupanti saṅkham gatam. Senāsanam panettha aniyatam, tasmā na tam vuttam. **Nagarakanti** evaṃnāmakam sakyānam nigamam. **Kenacideva karaṇīyenāti** na aññena karaṇīyena, ayam pana bandhulasenāpatim saddhim dvattiṃsāya puttehi

ekadivaseneva gaṇhathāti āṇāpesi, taṃdivasañcassa bhariyāya mallikāya pañcahi bhikkhusatehi saddhiṃ bhagavā nimantito, buddhappamukhe bhikkhusaṅghe gharaṃ āgantvā nisinnamatte “senāpati kālaṅkato”ti sāsanaṃ āharitvā mallikāya adamsu. Sā paṇṇaṃ gahetvā mukhasāsanaṃ pucchi. “Raññā ayye senāpati saddhiṃ dvattiṃsāya puttehi ekappahārenea gahāpito”ti ārocesuṃ. Mahājanagataṃ mā karitthāti ovaṭṭikāya paṇṇaṃ katvā bhikkhusaṅghaṃ parivisi. Tasmīṃ samaye ekā sappicāṭi nīharitā, sā ummāre āhacca bhinnā, taṃ apanetvā aññāṃ āharāpetvā bhikkhusaṅghaṃ parivisi.

Satthā katabhattakicco kathāsamuṭṭhāpanatthaṃ – “sappicāṭiyā bhinnapaccayā na cintetabba”nti āha. Tasmīṃ samaye mallikā paṇṇaṃ nīharitvā bhagavato purato ṭhapetvā – “bhagavā imaṃ dvattiṃsāya puttehi saddhiṃ senāpatino matasāsanaṃ, ahaṃ etampi na cintayāmi, sappicāṭipaccayā kiṃ cinteyyāmī”ti āha. Bhagavā – “mallike, mā cintayi, anamatagge saṃsāre nāma vattamānānaṃ hoti eta”nti aniccatādipaṭisaṃyuttaṃ dhammakathaṃ katvā agamāsi. Mallikā dvattiṃsasunīsāyo pakkosāpetvā ovādaṃ adāsi. Rājā mallikaṃ pakkosāpetvā “senāpatino amhākaṃ antare bhinnadoso atthi natthī”ti pucchi. Natthi sāmīti. So tassā vacanena tassa niddosabhāvaṃ ñatvā vipaṭṭisārī balavadomanassaṃ uppādesi. So – “evarūpaṃ nāma adosakāraṃ maṃ sambhāvayitvā āgataṃ sahāyakaṃ vināsesi”nti tato paṭṭhāya pāsāde vā nāṭakesu vā rajjasukhesu vā cittassādaṃ alabhamāno tattha tattha vicarituṃ āraddho. Etadeva kiccaṃ ahosi. Idaṃ sandhāya vuttaṃ “kenacideva karaṇīyena”ti.

Dīghaṃ kārāyananti dīghakārāyano nāma bandhulāsenāpatissa bhāgineyyo “etassa me mātulo adosakāraṃ nikkāraṇena ghātito”ti raññā senāpatiṭṭhāne ṭhapito. Taṃ sandhāyetaṃ vuttaṃ. **Mahaccā rājānubhāvenā**ti mahatā rājānubhāvena, dharaṇitalaṃ bhindanto viya sāgaraṃ parivattento viya vicittavesasobhena mahatā balakāyenāti attho. **Pāsādikānī**ti dassaneneva saha rañjanakāni. **Pasādanīyānī**ti tasseva vevacanaṃ. Atha vā **pāsādikānī**ti pasādajanakāni. **Appasaddānī**ti nissaddāni. **Appanigghosānī**ti avibhāvitatthena nigghosena rahitāni. **Vijanavātānī**ti vigatajanavātāni. **Manussarāhasseyakānī**ti manussānaṃ rahassakammānucchavikāni, rahassamantaṃ mantentānaṃ anurūpānīti attho. **Paṭisallānasārūppānī**ti nilīyanabhāvassa ekībhāvassa anucchavikāni. **Yattha sudaṃ mayanti** na tena tattha bhagavā payirupāsitaṃpubbo, tādisesu pana payirupāsitaṃpubbo, tasmā yādisesu sudaṃ mayanti ayamettha attho.

Atthi, mahārājāti paṇḍito senāpati “rājā bhagavantaṃ mamāyatī”ti jānāti, so sace maṃ rājā “kahaṃ bhagavā”ti vadeyya, adandhāyantena ācikkhituṃ yuttanti carapurise payojetvā bhagavato nivāsanaṭṭhānaṃ ñatvāva viharati. Tasmā evamāha. **Ārāmaṃ pāvisī**ti bahinigame khandhāvāraṃ bandhāpetvā kārāyanena saddhiṃ pāvisi.

366. Vihāroti gandhakuṭiṃ sandhāyāhaṃsu. **Āḷindanti** pamukhaṃ. **Ukkāsivā**ti ukkāsitasaddaṃ katvā. **Aggaḷanti** kavāṭaṃ. **Ākoṭehī**ti agganakhena īsakaṃ kuñcicacchiddasamīpe koṭehīti vuttaṃ hoti. Dvāraṃ kira atīupari amanussā, atīheṭṭhā dīghajātikā koṭenti. Tathā akoṭetvā majje chiddasamīpe koṭetabbaṃ, idaṃ dvāraṃkoṭṭakavattanti dīpentā vadanti. **Tatthevā**ti bhikkhūhi vuttaṭṭhāneyeva. **Khaggañca uḥhisañcā**ti desanāmattametaṃ,

Vālabījanimuḥhisaṃ, khaggaṃ chattañcupāhanaṃ;
Oruyha rājā yānamhā, ṭhapayitvā paṭicchadanti. –

Āgatāni pana pañcapi rājakakudhabhaṇḍāni adāsi. Kasmā pana adāsīti. Atigaruno sammāsambuddhassa santikaṃ uddhatavesena gantuṃ na yuttanti ca, ekakova upasaṅkamitvā attano rucivasena sammodissāmi cāti. Pañcasu hi rājakakudhabhaṇḍesu nivattitesu tvaṃ nivattāti vattabbaṃ na hoti, sabbe sayameva nivattanti. Iti imehi dvīhi kāraṇehi adāsi. **Rahāyatī**ti rahassaṃ karoti nigūhati. Ayaṃ kirassa adhippāyo “pubbepi ayaṃ rājā samaṇena gotamena saddhiṃ catukkaṇṇamantaṃ mantetvā mayhaṃ mātulaṃ saddhiṃ dvattiṃsāya puttehi gaṇhāpesi, idānipi catukkaṇṇamantaṃ mantetukāmo, kacci nu kho maṃ gaṇhāpessatī”ti. Evaṃ kopavasenassa etadahosi.

Vivari bhagavā dvāranti na bhagavā uṭṭhāya dvāraṃ vivari, vivaratūti pana hattham pasāresi. Tato – “bhagavā tumhehi anekesu kappakoṭṭisu dānaṃ dadamānehi na sahatthā dvāravivaraṇakammaṃ kata”nti sayameva dvāraṃ vivaṭaṃ. Taṃ pana yasmā bhagavato manena vivaṭaṃ, tasmā “vivari bhagavā dvāra”nti vattuṃ vaṭṭati. **Vihāraṃ pavisitvāti** gandhakuṭṭiṃ pavisitvā. Tasmim̐ pana pavitṭhamatteyeva kārāyano pañca rājākakudhabhaṇḍāni gahetvā khandhāvāraṃ gantvā viṭaṭūbham āmantesi “chattaṃ samma ussāpehī”ti. Mayham pitā kiṃ gatoti? Pitaraṃ mā pucchā, sace tvaṃ na ussāpesi, taṃ gaṇhitvā aham ussāpemīti. “Ussāpemi sammā”ti sampaṭicchhi. Kārāyano rañño ekaṃ assaṇca asiṇca ekameva ca paricārikaṃ itthiṃ ṭhapetvā – “sace rājā jīvitena atthiko, mā āgacchatū”ti viṭaṭūbhassa chattaṃ ussāpetvā taṃ gahetvā sāvathimeva gato.

367. Dhammanvayoti paccakkhañāṇasaṅkhātassa dhammassa anunayo anumānaṃ, anubuddhīti attho. Idāni yenassa dhammanvayena “sammāsambuddho bhagavā”tiādi hoti, taṃ dassetuṃ **idha panāhaṃ, bhanteti**ādīmāha. Tattha **apāṇakoṭṭikanti** paṇoti jīviṭaṃ, taṃ mariyādaṃ anto karitvā, maraṇasamayepi carantiyeva, taṃ na vītikkamantīti vuttaṃ hoti. “Apāṇakoṭṭika”ntipi pāṭho, ājīvitapariyantanti attho. Yathā ekacce jīvitahetu atikkamantā paṇakoṭṭikaṃ katvā caranti, na evanti attho. **Ayampi kho me, bhanteti** buddhasubuddhatāya dhammasvākkhātātāya saṅghasuppaṭipannatāya ca etaṃ evaṃ hoti, evañhi me, bhante, ayaṃ bhagavati dhammanvayo hotīti dīpeti. Eseva nayo sabbattha.

369. Na viya maññe cakkhuṃ bandhanteti cakkhuṃ abandhante viya. Apāsādikañhi disvā puna olokanakiccaṃ na hoti, tasmā so cakkhuṃ na bandhati nāma. Pāsādikaṃ disvā punappunaṃ olokanakiccaṃ hoti, tasmā so cakkhuṃ bandhati nāma. Ime ca apāsādikā, tasmā evamāha. **Bandhukarogo noti** kularogo. Amhākaṃ kule jātā evarūpā hontīti vadanti. **Uḷāranti** mahesakkaṃ. **Pubbenāparanti** pubbato aparaṃ visesaṃ. Tattha kaṣiṇaparikkammaṃ katvā samāpattiṃ nibbattento uḷāraṃ pubbe visesaṃ sañjānāti nāma, samāpattiṃ padaṭṭhānaṃ katvā vipassanaṃ vaḍḍhetvā arahattaṃ gaṇhanto uḷāraṃ pubbato aparaṃ visesaṃ sañjānāti nāma.

370. Ghātetāyaṃ vā ghātetunti ghātetabbayuttakaṃ ghātetuṃ. **Jāpetāyaṃ vā jāpetunti** dhanena vā jāpetabbayuttakaṃ jāpetuṃ jānituṃ adhanaṃ kātuṃ. **Pabbājetāyaṃ vā pabbājetunti** raṭṭhato vā pabbājetabbayuttakaṃ pabbājetuṃ.

373. Isidattapurāṇāti isidatto ca purāṇo ca. Tesu eko brahmacārī, eko sadārasantuṭṭho. **Mamabhattāti** mama santakaṃ bhattaṃ etesanti mamabhattā. **Mamayānāti** mama santakaṃ yānaṃ etesanti mamayānā. **Jīvikāya dātāti** jīvitavuttiṃ dātā. **Vīmaṃsamānoti** upaparikkhamāno. Tadā kira rājā niddaṃ anokkantova okkanto viya hutvā nipajji. Atha te thapatayo “katarasmim̐ disābhāge bhagavā”ti pucchitvā “asukasmim̐ nāmā”ti sutvā mantayim̐su – “yena sammāsambuddho, tena sīse kate rājā pādato hoti. Yena rājā, tena sīse kate satthā pādato hoti, kiṃ karissāmā”ti? Tato nesam̐ etadahosi – “rājā kuppamāno yaṃ amhākaṃ deti, taṃ acchindeyya. Na kho pana mayaṃ sakkoma jānamānā satthāraṃ pādato kātu”nti rājānaṃ pādato katvā nipajjim̐su. Taṃ sandhāya ayaṃ rājā evamāha.

374. Pakkāmīti gandhakuṭṭito nikkhamitvā kārāyanassa ṭhitaṭṭhānaṃ gato, taṃ tattha adisvā khandhāvāraṭṭhānaṃ gato, tatthāpi aññaṃ adisvā taṃ itthiṃ pucchi. Sā sabbam̐ pavattiṃ ācikkhi. Rājā – “na idāni mayā ekakena tattha gantabbaṃ, rājagahaṃ gantvā bhāgineyyena saddhiṃ āgantvā mayham̐ rajjaṃ gaṇhissāmī”ti rājagahaṃ gacchanto antarāmagge kaṇṇajakabhattañceva bhuñji, bahalaudakañca pivī. Tassa sukhumālapakatikassa āhāro na sammā pariṇāmi. So rājagahaṃ pāpuṇantopi vikāle dvāresu pihitesu pāpuṇi. “Ajja sālāyaṃ sayitvā sve mayham̐ bhāgineyyaṃ passissāmī”ti bahinagare sālāya nipajji. Tassa rattibhāge uṭṭhānāni pavattim̐su, katipayavāre bahi nikkhami. Tato paṭṭhāya padasā gantuṃ asakkonto tassā itthiyā anke nipajjitvā balavapaccūse kālamakāsi. Sā tassa matabhāvaṃ ñatvā – “dvīsu rajjesu rajjaṃ kāretvā idāni parassa bahinagare anāthasālāya anāthakālakiriyaṃ katvā nipanno mayham̐ sāmī kosalarājā”tiādīni vadamānā uccāsaddena paridevituṃ ārabhi. Manussā sutvā rañño ārocesuṃ. Rājā āgantvā disvā sañjānitvā āgatakāraṇaṃ ñatvā mahāparihārena sarīrakiccaṃ karitvā “viṭaṭūbham̐

gaṇhissāmī”ti bherim carāpetvā balakāyaṃ sannipātesi. Amaccā pādesu patitvā – “sace, deva, tumhākaṃ mātulo arogo assa, tumhākaṃ gantum yuttaṃ bhavēyya, idāni pana viṭaṭṭhōpi tumhe nissāya chattaṃ ussāpetum arahatiyevā”ti saññāpetvā nivāresum.

Dhammacetiyanīti dhammassa cittikāravacanāni. Tīsu hi ratanesu yattha katthaci cittikāre kate sabbattha katoyeva hoti, tasmā bhagavati cittikāre kate dhammopi katova hotīti bhagavā “dhammacetiyanī”ti āha. **Ādibrahmacariyakānīti** maggabrahmacariyassa ādibhūtāni, pubbhāgapaṭṭibhūtānīti attho. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Dhammacetiyasuttavaṇṇanā niṭṭhitā.

10. Kaṇṇakatthalasuttavaṇṇanā

375. Evaṃ me sutanti kaṇṇakatthalasuttaṃ. Tattha **uruññāyanti uruññāti** tassa raṭṭhassapi nagarassapi etadeva nāmaṃ, bhagavā uruññānagaraṃ upanissāya viharati. **Kaṇṇakatthale migadāyēti** tassa nagarassa avidūre kaṇṇakatthalaṃ nāma eko ramaṇīyo bhūmibhāgo atthi, so migānaṃ abhayatthāya dinnatā migadāyoti vuccati, tasmim kaṇṇakatthale migadāyē. **Kenacideva karaṇīyēnāti** na aññena, anantarasutte vuttakaraṇīyēneva. **Somā ca bhaginī sakulā ca bhaginīti** imā dve bhaginiyo rañño pajāpatiyo. **Bhattābhīhāreti** bhattaṃ abhīharaṇaṭṭhāne. Rañño bhuñjanaṭṭhānañhi sabbāpi orodhā kaṭacchuādīni gahetvā rājānaṃ upaṭṭhātuṃ gacchanti, tāpi tatheva agamaṃsu.

376. Kiṃ pana, mahārājāti kasmā evamāha? Rañño garahaparimocanattaṃ. Evañhi parisā cintēyya – “ayaṃ rājā āgacchamānova mātugāmānaṃ sāsanaṃ āroceti, mayaṃ attano dhammatāya bhagavantaṃ daṭṭhum āgatoti maññāma, ayaṃ pana mātugāmānaṃ sāsanaṃ gahetvā āgato, mātugāmadāso maññe, esa pubbepi imināva kāraṇena āgacchatī”ti. Pucchito pana so attano āgamanakāraṇaṃ kathessati, evamassa ayaṃ garahā na uppajjissatīti garahamocanattaṃ evamāha.

378. Abhudāhāsīti kathesi. **Sakideva sabbam ussati sabbam dakkhīti** yo ekāvajjanena ekacittena atītānāgatapaccuppannaṃ sabbam ussati vā dakkhīti vā, so natthīti attho. Ekena hi cittena atītaṃ sabbam jānissāmīti āvajjitvāpi atītaṃ sabbam jānītuṃ na sakkā, ekadesameva jānāti. Anāgatapaccuppannaṃ pana tena cittena sabbeneva sabbam na jānātīti. Esa nayo itaresu. Evaṃ ekacittavasēnāyaṃ pañho kathito. **Heturūpanti** hetusabhāvaṃ kāraṇajātikaṃ. **Saheturūpanti** sakāraṇajātikaṃ. **Samparāyikāhaṃ, bhanteti** samparāyaguṇaṃ ahaṃ, bhante, pucchāmi.

379. Pañcimānīti imasmim sutte pañca padhāniyaṅgāni lokuttaramissakāni kathitāni. Kathinaṅgaṇavāsīcūlasamuddatthero pana “tumhākaṃ, bhante, kiṃ rucati”ti vutte “mayhaṃ lokuttarānevāti rucati”ti āha. **Padhānavemattatanti** padhānanānattaṃ. Aññādisameva hi puthujjanassa padhānaṃ, aññādisaṃ sotāpannassa, aññādisaṃ sakadāgāmīno, aññādisaṃ anāgāmīno, aññādisaṃ arahato, aññādisaṃ asītimahāsāvākānaṃ, aññādisaṃ dvinnaṃ aggasāvākānaṃ, aññādisaṃ paccekabuddhānaṃ, aññādisaṃ sabbaññubuddhānaṃ. Puthujjanassa padhānaṃ sotāpannassa padhānaṃ na pāpuṇāti...pe... paccekabuddhassa padhānaṃ sabbaññubuddhassa padhānaṃ na pāpuṇāti. Imamatthaṃ sandhāya “padhānavemattataṃ vadāmi”ti āha. **Dantakāraṇaṃ gaccheyyunti** yaṃ akūṭakaraṇaṃ, anavacchindanaṃ, dhurassa acchindananti dantesu kāraṇaṃ dissati, taṃ kāraṇaṃ upagaccheyyunti attho. **Dantabhūmīti** dantehi gantabbabhūmiṃ. **Assaddhotīdīsū** puthujjanasotāpannasakadāgāmīnāgāmīno cattāropi assaddhā nāma. Puthujjano hi sotāpannassa saddhaṃ appattoti assaddho, sotāpanno sakadāgāmiṃ, sakadāgāmī anāgāmiṃ, anāgāmī arahato saddhaṃ appattoti assaddho, ābādho arahatopi uppajjatīti pañcapi **bahvābādha nāma** honti. Ariyasāvākassa pana saṭho māyāvīti nāmaṃ natthi. Teneva therō – “pañca padhāniyaṅgāni lokuttarāni kathitānīti mayhaṃ rucati”ti āha. Assakhaḷūkasuttante pana – “tayo ca, bhikkhave, assakhaḷūke tayo

ca purisakhaḷunke desessāmī’ ti (a. ni. 3.141) ettha ariyasāvakkassāpi sambodhināmaṃ āgataṃ, tassa vasena lokuttaramissakā kathitāti vuttaṃ. Puthujjano pana sotāpattimaggavīriyaṃ asampatto...pe... anāgāmī arahattamaggavīriyaṃ asampattoti kusītopi assaddho viya cattārova honti, tathā duppañño.

Evamaṃ panettha opammasaṃsandanaṃ veditabbaṃ – adantahatthiādayo viya hi maggapadhānarahito puggalo. Dantahatthiādayo viya maggapadhānavā. Yathā adantā hatthiādayo kūṭākāraṃ akatvā avicchinditvā dhuraṃ apātetvā dantagamaṇaṃ vā gantaṃ dantabhūmiṃ vā pattuṃ na sakkonti, evamevaṃ maggapadhānarahito maggapadhānavatā pattabbaṃ pāpuṇituṃ nibbattetabbaṃ guṇaṃ nibbattetuṃ na sakkoti. Yathā pana dantahatthiādayo kūṭākāraṃ akatvā avicchinditvā dhuraṃ apātetvā dantagamaṇaṃ vā gantaṃ dantabhūmiṃ vā pattuṃ sakkonti, evamevaṃ maggapadhānavā maggapadhānavatā pattabbaṃ pāpuṇituṃ nibbattetabbaṃ guṇaṃ nibbattetuṃ sakkoti. Idaṃ vuttaṃ hoti – “sotāpattimaggapadhānavā sotāpattimaggapadhānavatā pattokāsaṃ pāpuṇituṃ nibbattetabbaṃ guṇaṃ nibbattetuṃ sakkoti...pe... arahattamaggapadhānavā arahattamaggapadhānavatā pattokāsaṃ pāpuṇituṃ nibbattetabbaṃ guṇaṃ nibbattetuṃ sakkoti’ ti.

380. Sammappadhānāti maggapadhānena sammappadhānā. **Na kiñci nānākaraṇaṃ vadāmi yadidaṃ vimuttiyā vimuttinti** yaṃ ekassa phalavimuttiyā itarassa phalavimuttiṃ ārabha nānākaraṇaṃ vattabbaṃ siyā, taṃ na kiñci vadāmīti attho. **Acciyā vā accinti** acciyā vā accimhi. Sesapadadvayepi eseva nayo, bhummatthe hi etaṃ upayogavacanaṃ. **Kim pana tvam, mahārājāti**, mahārāja, kim tvam? “Santi devā cātumahārājikā, santi devā tāvatimsā...pe... santi devā paranimmitavasavattino, santi devā tatuttari’ nti evaṃ devānaṃ atthibhāvaṃ na jānāsi, yena evaṃ vadesīti. Tato atthibhāvaṃ jānāmi, manussalokaṃ pana āgacchanti nāgacchantīti idaṃ pucchanto **yadi vā te, bhanteti**ādīmāha. **Sabyābajjhāti** sadukkhā, samucchadappahānena appahīnacetasikadukkhā. **Āgantāro**ti upapattivasena āgantāro. **Abyābajjhāti** samucchinnadukkhā. **Anāgantāro**ti upapattivasena anāgantāro.

381. Pahotīti sakkoti. Rājā hi puññavantampi lābhasakkārasampannaṃ yathā na koci upasaṅkamati, evaṃ karonto tamhā ṭhānā cāvetuṃ sakkoti. Taṃ apuññavantampi sakalagāmaṃ piṇḍāya caritvā yāpanamattaṃ alabhantaṃ yathā lābhasakkārasampanno hoti, evaṃ karonto tamhā ṭhānā cāvetuṃ sakkoti. Brahmacariyavantampi itthīhi saddhiṃ sampayojetvā sīlavināsaṃ pāpento balakkārena vā uppabbājento tamhā ṭhānā cāvetuṃ sakkoti. Abrahmacariyavantampi sampannakāmaguṇaṃ amaccaṃ bandhanāgāraṃ pavesetvā itthīnaṃ mukhampi passituṃ adento tamhā ṭhānā cāveti nāma. Raṭṭhato pana yaṃ icchati, taṃ pabbājeti nāma.

Dassanāyapi nappahontīti kāmāvacare tāva abyābajjhe deve sabyābajjhā devā cakkhuvīññānadassanāyapi nappahontī. Kasmā? Arahato tattha ṭhānābhāvato. Rūpāvacare pana ekavimānasmimyeva tiṭṭhanti ca nisīdanti cāti cakkhuvīññānadassanāya pahonti, etehi diṭṭhaṃ pana sallakkhitaṃ paṭividdhaṃ lakkhaṇaṃ daṭṭhuṃ sallakkhitaṃ paṭivijjhitaṃ na sakkontīti nānacakkhunā dassanāya nappahontī, uparideve ca cakkhuvīññānadassanānēpīti.

382. Ko nāmo ayaṃ, bhanteti rājā therāṃ jānantopi ajānanto viya pucchati. Kasmā? Pasasitukāmatāya. **Ānandarūpoti** ānandasabhāvo. Brahmapucchāpi vuttanayeneva veditabbā. **Atha kho aññataro purisoti** sā kira kathā viṭaṭūbheneva kathitā, te “tayā kathitā, tayā kathitā’ ti kupitā aññamaññaṃ imasmimyeva ṭhāne attano attano balakāyaṃ utṭhāpetvā kalahampi kareyyunti nivāraṇatthaṃ so rājapuriso etadavoca. Sesaṃ sabbattha uttānameva. Ayaṃ pana desanā neyyapuggalassa vasena niṭṭhitāti.

Papañcasūdaniyā majjhimanikāyaṭṭhakathāya

Kaṇṇakatthalasuttavaṇṇanā niṭṭhitā.

Catutthavaggavaṇṇanā niṭṭhitā.

5. Brāhmaṇavaggo

1. Brahmāyusuttavaṇṇanā

383. Evaṃ me sutanti brahmāyusuttam. Tattha mahatā bhikkhusaṅghena saddhinti mahatāti guṇamahattenapi mahatā, saṅkhyāmahattenapi. So hi bhikkhusaṅghe guṇehipi mahā ahosi appicchatādiguṇasamannāgatattā, saṅkhyāyapi mahā pañcasatasāṅkhyattā. Bhikkhūnaṃ saṅghena **bhikkhusaṅghena**, diṭṭhisīlasāmaññaṅghāsaṅghāsaṅkhātena samaṇaḅhaṇenāti attho. **Saddhinti** ekato. **Pañcamattehi bhikkhusatehīti** pañca mattā etesanti pañcamattāni. Mattāti pamāṇaṃ vuccati, tasmā yathā bhojane mattaññūti vutte bhojane mattaṃ jānāti pamāṇaṃ jānātīti attho hoti, evamidhāpi tesam bhikkhusatānaṃ pañcamattā pañcapamāṇanti evamattho daṭṭhabbo. Bhikkhūnaṃ satāni bhikkhusatāni. Tehi **pañcamattehi bhikkhusatehi**.

Vīsavassasatikoti vīsādhikavassasatiko. Tiṇṇaṃ vedānanti iruvedayajurvedasāmavedānaṃ. Oṭṭhapahatakaṇavasena pāraṃ gatoti **pāragū**. Saha nighaṇḍunā ca keṭubhena ca **sanighaṇḍukeṭubhānaṃ, nighaṇḍūti** nāmanighaṇṭurukkhādīnaṃ vevacanappakāsakaṃ satthaṃ. **Keṭubhanti** kiriyākappavikappo kavīnaṃ upakārāya satthaṃ. Saha akkharappabhedena **sakkharappabhedānaṃ. Akkharappabhedoti** sikkhā ca nirutti ca. **Itihāsapañcamānanti** āthabbaṇavedaṃ catutthaṃ katvā ‘‘itiha āsa itiha āsā’’ti īdisavacanappaṭisaṃyutto purāṇakathāsāṅkhāto itihāso pañcama etesanti itihāsapañcamā, tesam **itihāsapañcamānaṃ**. Padañca tadavasesaṅga byākaraṇaṃ adhīyati pavedeti cāti **padako veyyākaraṇo. Lokāyatam** vuccati vittaṇḍavādasatthaṃ. **Mahāpurisalakkhaṇanti** mahāpurisānaṃ buddhādīnaṃ lakkhaṇadīpaṇaṃ dvādasasahassaganthappamāṇaṃ satthaṃ, yattha soḷasasahassagāthāparimāṇāya **buddhamantā** nāma ahesuṃ, yesaṃ vasena ‘‘iminā lakkhaṇena samannāgatā buddhā nāma honti, iminā paccekabuddhā nāma honti, iminā dve aggasāvaka, asītimahāsāvaka, buddhamātā, buddhapitā, aggupaṭṭhāko, aggupaṭṭhāyikā, rājā cakkavattī’’ti ayaṃ vireso ñāyati. **Anavayoti** imesu lokāyatamahāpurisalakkhaṇesu anūno paripūrakārī, avayo na hotīti vuttaṃ hoti. Avayo nāma yo tāni atthato ca ganthato ca sandhāretuṃ na sakkoti. **Assosi khotiādīsu** yaṃ vattabbaṃ siyā, taṃ sāleyyakasutte (ma. ni. 1.439 ādayo) vuttameva.

384. Ayaṃ tātāti ayaṃ mahallakatāya gantuṃ asakkonto māṇavaṃ āmantetvā evamāha. Apica esa brāhmaṇo cintesi ‘‘imasmiṃ loke ‘ahaṃ buddho ahaṃ buddho’’ti uggatassa nāmaṃ gahetvā bahū janā vicaranti, tasmā na me anussavamatteneva upasaṅkamituṃ yuttaṃ. Ekaccañhi upasaṅkamantassa apakkamanampi garu hoti, anattthopi uppajjati. Yaṃnūṇahaṃ mama antevāsikaṃ pesetvā ‘buddho vā no vā’’ti jānitvā upasaṅkameyya’’nti tasmā māṇavaṃ āmantetvā ‘‘ayaṃ tātā’’tiādīmāha. **Taṃ bhavantanti** tassa bhavato. **Tathā santamyevāti** tathā satoyeva. Idañhi itthambhūtākhyānatthe upayogavacanaṃ. **Yathā kathaṃ panāhaṃ, bhoti** ettha kathaṃ panāhaṃ, bho, taṃ bhavantaṃ gotamaṃ jānissāmi, yathā sakkā so ñātuṃ, tathā me ācikkhāti attho. **Yathāti** vā nipātamattamevetam. **Kathanti** ayaṃ ākārapucchā, kenākārenāhaṃ bhavantaṃ gotamaṃ jānissāmīti attho.

Evaṃ vutte kira naṃ upajjhāyo – ‘‘kiṃ tvam, tāta, pathaviyaṃ ṭhito pathaviṃ na passāmīti viya candimasūriyānaṃ obhāse ṭhito candimasūriye na passāmīti viya vadasi’’tiādīni vatvā jānanākāraṃ dassento **āgatāni kho tātāti**ādīmāha. Tattha **mantesūti** vedesu. Tathāgato kira uppajjissatīti paṭikacceva suddhāvāsā devā vedesu lakkhaṇāni pakkhipitvā ‘‘buddhamantā nāma ete’’ti brāhmaṇavesena vede vācenti ‘‘tadanusārena mahesakkhā sattā tathāgataṃ jānissanti’’ti. Tena pubbe vedesu mahāpurisalakkhaṇāni āgacchanti. Parinibbute pana tathāgate anukkamena antaradhāyanti, tena etarahi natthi. **Mahāpurisassāti** paṇidhisamādānaññakarūṇadiguṇamahato purisassa. **Dveyeva gatiyoti** dve eva niṭṭhā. Kāmañcāyaṃ gatisaddo – ‘‘pañca kho imā, sārīputta, gatiyo’’tiādīsu (ma. ni. 1.153) bhavabhede vattati, ‘‘gati migānaṃ pavana’’ntiādīsu (pari. 339) nivāsaṭṭhāne, ‘‘evaṃ adhimattagatimanto’’tiādīsu (ma. ni. 1.161) paññāya, ‘‘gatigata’’ntiādīsu visaṭṭabhāve, idha pana niṭṭhāyaṃ vattatīti veditabbo. Tattha kiñcāpi yehi samannāgato rājā hoti, na teheva buddho hoti,

jātisāmaññato pana tāniyeva tñīti vuccanti. Tena vuttaṃ – “yehi samannāgatassā”ti. **Sace agāraṃ ajjhāvasatīti** yadi agāre vasati, rājā hoti cakkavattī. Catūhi acchariyadhammehi saṅgahavatthūhi ca lokaṃ rañjanato **rājā**. Cakkaratanam vatteti, catūhi sampatticakkehi vatteti, tehi ca param vatteti, parahitāya ca iriyāpathacakkānaṃ vatto etasmiṃ atthīti **cakkavattī**. Ettha ca rājāti sāmāññaṃ, cakkavattīti visesanaṃ. Dhammena caratīti **dhammiko**, ñāyena samena vattatīti attho. Dhammena rajjaṃ labhitvā rājā jātoti **dhammarājā**. Parahitadhammakaraṇena vā **dhammiko**, atthahitadhammakaraṇena **dhammarājā**. Caturantāya issaroti **cāturato**, catusamuddantāya catubbidhadīpabhūsitāya ca pathaviyā issaroti attho. Ajjhattaṃ kopādīpacatthike bahiddhā ca sabbarājāno vijesīti **vijitāvī**. **Janapadatthāvariyaṃ** janapade thāvarabhāvaṃ dhuvabhāvaṃ patto, na sakkā kenaci cāletuṃ, janapado vā tamhi thāvariyaṃ anussukko sakammanirato acalo asampavedhīti janapadatthāvariyaṃ. **Seyyathidanti** nipāto, tassa tāni katamānīti attho. **Cakkaratananti** adīsu cakkaṇca taṃ ratijananatthena ratanañcāti **cakkaratanam**. Eseva nayo sabbattha.

Imesu pana ratanesu ayaṃ cakkavattirājā cakkaratanena ajitaṃ jināti, hatthiassaratanehi vijite yathāsukhaṃ anuvicarati, pariñāyakaratanena vijitamanurakkhati, sesehi upabhogasukhamanubhavati. Paṭhamena cassa ussāhasattiyogo, hatthiassagahapatiratanehi pabhusattiyogo, pacchimena mantasattiyogo suparipuṇṇo hoti, itthimaṇiratanehi tividhasattiyogaphalaṃ. So itthimaṇiratanehi bhogasukhamanubhavati, sesehi issariyasukhaṃ. Visesto cassa purimāni tīṇi adosakusalamūlajanitakammānubhāvena sampajjanti, majjhimāni alobhakusalamūlajanitakammānubhāvena, pacchimamekaṃ amohakusalamūlajanitakammānubhāvenāti veditabbaṃ. Ayamettha saṅkhepo, vitthāro pana bojjaṅgasamyutte ratanasuttassa (saṃ. ni. 5.222-223) upadesato gahetabbo. Apica bālapaṇḍitasuttepi (ma. ni. 3.255) imesaṃ ratanānaṃ uppattikkamena saddhiṃ vaṇṇanā āgamissati.

Parosahassanti atirekasahassaṃ. **Sūrāti** abhīrukajātikā. **Vīraṅgarūpāti** devaputtasadisakāyā, evaṃ tāva eke vaṇṇayanti, ayaṃ panettha sabhāvo – **vīrāti** uttamasūrā vuccanti. Vīraṅgaṃ aṅgaṃ vīraṅgaṃ, vīrakāraṇaṃ vīriyanti vuttaṃ hoti. Vīraṅgaṃ rūpaṃ etesanti **vīraṅgarūpā**, vīriyamayasarīrā viyāti vuttaṃ hoti. **Parasenappamaddanāti** sace paṭimukhaṃ tiṭṭheyya parasenā, taṃ maddituṃ samatthāti adhippāyo. **Dhammenāti** “pāṇo na hantabbo”tiadinā pañcasīladhammena.

Arahaṃ hoti sammāsambuddho loka vivaṭṭacchadoti ettha rāgadosamohamānadiṭṭhiavijjāduccaritachadanehi sattahi paṭicchanne kilesandhakāraloke taṃ chadanaṃ vivaṭṭetvā samantato sañjātāloko hutvā tñitoti **vivaṭṭacchado**. Tattha paṭhamena padena pūjārahata, dutiyena tassā hetu yasmā sammāsambuddhoti, tatiyena buddhattahetubhūtā vivaṭṭacchadatā vuttāti veditabbā. Atha vā vivaṭṭo ca vicchado cāti **vivaṭṭacchado**, vaṭṭarahito chadanarahito cāti vuttaṃ hoti. Tena arahaṃ vaṭṭabhāvena, sammāsambuddho chadanābhāvenāti evaṃ purimapadadvayasseva hetudvayaṃ vuttaṃ hoti. Dutiyavesārājena cettha purimasiddhi, paṭhamena dutiyasiddhi, tatiyacatutthehi tatiyasiddhi hoti. Purimañca dhammacakkuṃ, dutiyaṃ buddhacakkuṃ, tatiyaṃ samantacakkuṃ sādhetīti veditabbaṃ. **Tvaṃ mantānaṃ paṭiggahetāti** imināssa sūrabhāvaṃ janeti.

385. Sopi tāya ācariyakathāya lakkhaṇesu vigatasammoho ekobhāsajāto viya buddhamante sampassamāno **evaṃ, bhoti** āha. Tassattho – yathā, bho, maṃ tvaṃ vadasi, evaṃ karissāmīti. **Samannesīti** gavesi, ekaṃ dveti vā gaṇayanto samānaya. **Addasā khoti** kathaṃ addasa? Buddhānañhi nisinnānaṃ vā nipannānaṃ vā koci lakkhaṇaṃ pariyesituṃ na sakkoti, tñitānaṃ pana caṅkamantānaṃ vā sakkoti. Tasmā lakkhaṇapariyesanattaṃ āgataṃ disvā buddhā utthāyāsanā tiṭṭhanti vā caṅkamaṃ vā adhiṭṭhanti. Iti lakkhaṇadassanānurūpe iriyāpathe vattamānassa addasa. **Yebhuyyenāti** pāyena, bahukāni addasa, appāni na addasāti attho. Tato yāni na addasa, tesam dīpanatthaṃ vuttaṃ **thapetvā dveti**. **Kaṅkhatīti** “aho vata passeyya”nti patthanaṃ uppādeti. **Vicikicchati** tato tato tāni vicinanto kicchati na sakkoti daṭṭhuṃ. **Nādhimuccati** tāya vicikicchāya sannitṭhānaṃ na gacchati. **Na sampasīdatīti** tato “paripuṇṇalakkhaṇo aya”nti bhagavati pasādaṃ nāpajjati. Kaṅkhāya vā dubbalā vimati vuttā, vicikicchāya majjhimā, anadhimuccanatāya balavatī, asampasādena tehi tīhi dhammehi

cittassa kālussiyabhāvo. **Kosohiteti** vatthikosena paṭicchanne. **Vatthaguyheti** aṅgajāte. Bhagavato hi vāraṇasseva kosohitavatthaguyhaṃ suvaṇṇavaṇṇaṃ padumagabbhasamānaṃ, taṃ so vatthapaṭicchannattā, antomukhagatāya ca jivhāya pahūtabhāvaṃ asallakkhento tesu dvīsu lakkhaṇesu kaṅkhī ahoṣi vicikicchī.

Atha kho bhagavāti atha bhagavā cintesi – “sacāhaṃ imassa etāni dve lakkhaṇāni na dassessāmi, nikkāṅkho na bhavissati. Etassa kaṅkhāya sati ācariyopissa nikkāṅkho na bhavissati, atha maṃ dassanāya na āgamissati, anāgato dhammaṃ na sossati, dhammaṃ asuṇanto tīṇi sāmāññaphalāni na sacchikarissati. Etasmim̐ pana nikkāṅkhe ācariyopissa nikkāṅkho maṃ upasaṅkamitvā dhammaṃ sutvā tīṇi sāmāññaphalāni sacchikarissati. Etadatthaṃyeva ca mayā pāramiyo pūritā. Dassessāmissa tāni lakkhaṇāni”’ti.

Tathārūpaṃ iddhābhisaṅkhāramakāsi. Kathaṃrūpaṃ? Kimettha añña vattabbaṃ? Vuttametam̐ nāgasenatthereneva milindarañña puṭṭhena –

Āha ca dukkaraṃ, bhante nāgasena, bhagavatā katanti. Kiṃ mahārājāti? Mahājanena hirikaraṇokāsaṃ brahmāyubrāhmaṇassa ca antevāsīuttarassa ca bāvariyaṃ antevāsīnaṃ soḷasaṃbrāhmaṇānaṃ selassa ca brāhmaṇassa antevāsīnaṃ tisatamaṇavaṇaṃ dassesi, bhanteti. Na, mahārāja, bhagavā guyhaṃ dasseti, chāyaṃ bhagavā dasseti, iddhiyā abhisāṅkharitvā nivāsananivatthaṃ kāyabandhanabaddhaṃ cīvarapārutaṃ chāyārūpakamattaṃ dassesi mahārājāti. Chāyaṃ diṭṭhe sati diṭṭhoyeva. Nanu, bhanteti? Tiṭṭhatetaṃ, mahārāja, hadayarūpaṃ disvā bujjanakasatto bhaveyya, hadayaṃsaṃ nīharitvā dasseyya sammāsambuddhoti. Kallosi, bhante nāgasenāti.

Ninnāmetvāti nīharitvā. **Anumasīti** kathinasūciṃ viya katvā anumajji. Tathā karaṇena cettha mudubhāvo, kaṇṇasotānumasanena dīghabhāvo, nāsikasotānumasanena tanubhāvo, nalāṭacchādanena puthulabhāvo pakāsītōti vedītabbo. **Ubhopi kaṇṇasotānīti** adīsu cettha buddhānaṃ kaṇṇasotesu malaṃ vā jallikā vā natthi, dhovitvā ṭhapitarajatapanālikā viya honti, tathā nāsikasotesu, tānipi hi suparikammakatakaṇṇapanālikā viya ca maṇipānālikā viya ca honti. Tasmā jivhaṃ nīharitvā kathinasūciṃ viya katvā mukhapariyante upasaṃharanto dakkhiṇakaṇṇasotaṃ pavesetvā tato nīharitvā vāmakāṇṇasotaṃ pavesesi, tato nīharitvā dakkhiṇanāsikasotaṃ pavesetvā tato nīharitvā vāmanāsikasotaṃ pavesesi, tato nīharitvā puthulabhāvaṃ dassento rattavalāhakena aḍḍhacandaṃ viya ca suvaṇṇapattaṃ viya ca rattakambalapaṭalena vijjujotasadisāya jivhāya kevalakappaṃ nalāṭamaṇḍalaṃ paṭicchādesi.

Yaṃnūnāhanti kasmā cintesi? Ahañhi mahāpurisalakkhaṇāni samannesitvā gato “diṭṭhāni te, tāta, mahāpurisalakkhaṇāni”’ti ācariyena pucchito “āma, ācariyā”’ti vattuṃ sakkhissāmi. Sace pana maṃ “kiriyaṅkaraṇamaṃsa kīdisa”’nti pucchissati, taṃ vattuṃ na sakkhissāmi, na jānāmīti vutte pana ācariyo kujjhissati “nanu tvam̐ mayā sabbampetaṃ jānanatthāya pesito, kasmā ajānitvā āgatosi”’ti, tasmā yannūnāhanti cintetvā anubandhi. Bhagavā nhānaṭṭhānaṃ mukhadhovanatṭhānaṃ sarīrapaṭijagganaṭṭhānaṃ rājarājamahāmattādīnaṃ orodhehi saddhiṃ parivāretvā nisinnaṭṭhānanti imāni cattāri ṭhānāni ṭhapetvā sesaṭṭhānesu antamaso ekagandhakuṭiyampi okāsamakāsi.

Gacchante gacchante kāle – “ayaṃ kira brahmāyubrāhmaṇassa māṇavo uttaro nāma ‘buddho vā no vā’’ti tathāgatassa buddhabhāvaṃ vīmaṃsanto carati, buddhavīmaṃsako nāmāya”’nti pākato jāto. Yamhi yamhi ṭhāne buddhā vasanti, pañca kiccāni katāneva honti, tāni heṭṭhā dassitāneva. Tattha pacchābhattaṃ alaṅkatadhammāsane nisīditvā dantakhacitaṃ cittabījaniṃ gahetvā mahājanassa dhammaṃ desente bhagavatī uttaropi avidūre nisīdati. Dhammassavanapariyosāne saddhā manussā svātānāya bhagavantaṃ nimantetvā māṇavampi upasaṅkamitvā evaṃ vadanti – “tāta, amhehi bhagavā nimantito, tvampi bhagavatā saddhiṃ āgantvā amhākaṃ gehe bhattaṃ gaṇheyyāsi”’ti. Punadivase tathāgato bhikkhusaṅghaparivuto gāmaṃ pavisati, uttaropi padavāre padavāre pariggaṇhanto padānupadiko anubandhati. Kulagehaṃ pavitṭhakāle dakkhiṇodakaggahaṇaṃ ādiṃ katvā sabbam̐

olokento nisīdati. Bhattakiccāvasāne tathāgatassa pattam bhūmiyaṃ ṭhapetvā nisinnakāle māṇavakassa pātarāsabhattam sajjenti. So ekamante nisinnō bhūñjitvā puna āgantvā satthu santike ṭhatvā bhattānumodanam sutvā bhagavatā saddhiṃyeva vihāram gacchati.

Tattha bhagavā bhikkhūnam bhattakiccapariyosānam āgamento gandhamaṇḍalamāle nisīdati. Bhikkhūhi bhattakiccam katvā pattacīvaram paṭisāmetvā āgama vanditvā kāle ārocite bhagavā gandhakuṭiṃ pavisati, māṇavopi bhagavatā saddhiṃyeva gacchati. Bhagavā parivāretvā āgataṃ bhikkhusaṅgham gandhakuṭippamukhe ṭhito ovaditvā uyyojetvā gandhakuṭiṃ pavisati, māṇavopi pavisati. Bhagavā khuddakamañce appamattakam kālam nisīdati, māṇavopi avidūre olokento nisīdati. Bhagavā muhuttaṃ nisīditvā sīsokkamanam dasseti, – “bhoto gotamassa vihārelā bhavissati”ti māṇavo gandhakuṭidvāram pidahanto nikkhamitvā ekamantaṃ nisīdati. Manussā purebhattam dānam datvā bhuttapātarāsā samādinnauposathaṅgā suddhuttarāsāṅgā mālāgandhādihathā dhammam suṇissāmāti vihāram āgacchanti, cakkavattino khandhāvāraṭṭhānam viya hoti.

Bhagavā muhuttaṃ sīhaseyyam kappetvā vuṭṭhāya pubbabhāgena paricchinditvā samāpattim samāpajjati. Samāpattito vuṭṭhāya mahājanassa āgatabhāvam ṇatvā gandhakuṭito nikkhamma mahājanaparivuto gandhamaṇḍalamālam gantvā paññattavarabuddhāsanagato parisāya dhammam deseti. Māṇavopi avidūre nisīditvā – “kiṃ nu kho samaṇo gotamo gehassitavasena parisam ussādentō vā apasādentō vā dhammam deseti, udāhu no”ti akkharakkharam padaṃ padaṃ pariggaṇhāti. Bhagavā tathāvidham katham akathetvāva kālam ṇatvā desanam niṭṭhāpesi. Māṇavo iminā niyāmena pariggaṇhanto satta māse ekato vicarivā bhagavato kāyadvārādīsū aṇumattampi avakkhalitam na addasa. Anacchariyañcetam, yaṃ buddhabhūtaṃ manussabhūto māṇavo na passeyya, yassa bodhisattabhūtaṃ chabbassāni padhānabhūmiyaṃ amanussabhūto māro devaputto gehassitavitakkamattampi adisvā buddhabhūtam ekasamvaccharam anubandhitvā kiñci apassanto –

“Satta vassāni bhagavantam, anubandhim padāpadaṃ;
Otāram nādhigacchissam, sambuddhassa satīmato”ti. (su. ni. 448) –

Ādigāthāyo vatvā pakkāmi. Tato māṇavo cintesi – “ahaṃ bhavantaṃ gotamaṃ satta māse anubandhamāno kiñci vajjam na passāmi. Sace panāham aññepi satta māse satta vā vassāni vassasataṃ vā vassasahassam vā anubandheyyam, nevassa vajjam passeyyam. Ācariyo kho panassa me mahallako, yogakkhemam nāma na sakkā jānitum. Samaṇassa gotamassa sabhāvaguṇeneva buddhabhāvam vatvā mayham ācariyassa āroccsāmī”ti bhagavantam āpucchitvā bhikkhusaṅgham vanditvā nikkhami.

Ācariyassa santikañca pana gantvā – “kacci, tāta uttara, taṃ bhavantaṃ gotamaṃ tathāsantaṃyeva saddo abbhuggato”ti pucchito, “ācariya, kiṃ vadesi? Cakkavālam atisambādham, bhavaggaṃ atinīcam, tassa hi, bhoto gotamassa ākāsam viya apariyanto guṇagaṇo. Tathāsantaṃyeva, bho, taṃ bhavantaṃ gotama”ntiādīni vatvā yathādiṭṭhāni dvattiṃsamahāpurisalakkhaṇāni paṭipāṭiyā ācikkhitvā kiriyasamācāram ācikkhi. Tena vuttaṃ – “atha kho uttaro māṇavo...pe... ediso ca ediso ca bhavam gotamo tato ca bhiyyo”ti.

386. Tattha **suppatiṭṭhitapādoti** yathā hi aññesaṃ bhūmiyaṃ pādam ṭhapentānam aggatalam vā pañhi vā passam vā paṭhamam phusati, vemajjham vā pana chiddam hoti, ukkhipantānampi aggatalādīsū ekakoṭṭhāsova paṭhamam uṭṭhahati, na evam tassa. Tassa pana suvaṇṇapādukatalam viya ekappahārenea sakalam pādatalam bhūmiṃ phusati, bhūmito uṭṭhahati. Tasmā “suppatiṭṭhitapādo kho pana so bhavam gotamo”ti vadati.

Tatridam bhagavato suppatiṭṭhitapādātāya – sacepi hi bhagavā anekasataporisaṃ narakam akkamissāmīti pādam nīharati, tāvadeva ninnatṭhānam vātapūritam viya kammārabhastam unnamitvā pathavīsamaṃ hoti, unnatāṭṭhānampi anto pavisati. Dūre akkamissāmīti abhinīharantassa sineruppamānopi pabbato seditavettankuro viya namitvā pādasamīpam āgacchati. Tathā hissa

yamakapāṭihāriyaṃ katvā yugandharapabbataṃ akkamissāmīti pāde abhinīharato pabbato namitvā pādasamīpaṃ āgato, so taṃ akkamitvā dutiyapādena tāvatimsabhavanaṃ akkami. Na hi cakkalakkhaṇena paṭiṭṭhātabbaṭṭhānaṃ visamaṃ bhavituṃ sakkoti. Khāṇu vā kaṇḍako vā sakkharakathalā vā uccārapassāvo vā kheḷasiṅghāṇikādīni vā purimatarāva apagacchanti, tattha tattheva ca pathaviṃ pavisanti. Tathāgatassa hi sīlatejena paññātejena dhammatejena dasannaṃ pāramīnaṃ ānubhāvena ayaṃ mahāpathavī samā mudu pupphābhikiṇṇā hoti. Tatra tathāgato samaṃ pādaṃ nikkhipati, samaṃ uddharati, sabbāvantehi pādālehi bhūmiṃ phusati.

Cakkānīti dvīsu pādesu dve cakkāni. Tesam arā ca nemi ca nābhi ca pāḷiyaṃ vuttāva. **Sabbākāraparipūrānīti** iminā pana ayaṃ viseso veditabbo – tesam kira cakkānaṃ pādātalassa majjhe nābhi dissati, nābhiparicchinnā vaṭṭalekhā dissati, nābhimukhaparikkhepapatto dissati, panāḷimukhaṃ dissati, arā dissanti, aresu vaṭṭalekhā dissanti, nemī dissanti, nemimaṇikā dissanti. Idaṃ tāva pāḷiāgatameva.

Sambahulavāro pana anāgato, so evaṃ daṭṭhabbo – satti siri vaccho nandi sovattiko vaṭṭasako vaḍḍhamānakaṃ macchayugalaṃ bhaddapīṭhaṃ aṅkusaṃ tomaro pāsādo toraṇaṃ setacchattaṃ khaggo tālavaṇṭaṃ morahatthako vāḷabījanī uṇhīsaṃ patto maṇi kusumadāmaṃ nīluppalaṃ rattuppalaṃ setuppalaṃ padumaṃ puṇḍarīkaṃ puṇṇaḡhaṭo puṇṇapāti samuddo cakkavālo himavā sineru candimasūriyā nakkhattāni cattāro mahādīpā dveparittadīpasahassāni, antamaso cakkavattirañño parisam upādāya sabbo cakkalakkhaṇasseva parivāro.

Āyatapaṇhīti dīghapaṇhi, paripuṇṇapaṇhīti attho. Yathā hi aññesaṃ aggapādo dīgho hoti, paṇhimatthake jaṅghā paṭiṭṭhāti, paṇhi tacchetvā ṭhapitā viya hoti, na evaṃ tathāgatassa. Tathāgatassa pana catūsu koṭṭhāsesu dve koṭṭhāsā aggapādo hoti, tatiye koṭṭhāse jaṅghā paṭiṭṭhāti, catutthe koṭṭhāse āraggena vaṭṭetvā ṭhapitā viya rattakambale geṇḍukasadisā paṇhi hoti.

Dīghaṅgulīti yathā aññesaṃ kāci aṅguli dīghā hoti, kāci rassā, na evaṃ tathāgatassa. Tathāgatassa pana makkaṭasseva dīghahatthapādaṅgulīyo mūle thūlā anupubbena gantvā agge tanukā niyyāsatelena madditvā vaṭṭitaharītālavattisadisā honti. Tena vuttaṃ “dīghaṅgulī”ti.

Mudutalunahatthapādōti sappimaṇḍe osādetvā ṭhapitaṃ satavāravihatakappāsapaṭalaṃ viya mudū, jātamattakumārassa viya ca niccakālaṃ talunā ca hatthapādā assāti mudutalunahatthapādō.

Jālahatthapādōti na cammena paṭibaddhaaṅgulantaro. Ediso hi phaṇahatthako purisadosena upahato pabbajjampi na labhati. Tathāgatassa pana catasso hatthaṅgulīyo pañcapi pādaṅgulīyo ekappamāṇā honti, tāsam ekappamāṇattāya yavalakkhaṇaṃ aññamaññaṃ paṭivijjhivā tiṭṭhati. Athassa hatthapādā kusalena vaḍḍhakinā yojitajālavātapānasadisā honti. Tena vuttaṃ “jālahatthapādō”ti.

Uddhaṃ paṭiṭṭhitagopphakattā ussāṅkhā pādā assāti **ussāṅkhapādō**. Aññesaṇhi piṭṭhipāde gopphakā honti. Tena tesam pādā āṇibaddhā viya thaddhā honti, na yathāsukhaṃ parivattanti, gacchantānaṃ pādātalāni na dissanti. Tathāgatassa pana abhiruhitvā upari gopphakā paṭiṭṭhahanti. Tenassa nābhito paṭṭhāya uparimakāyo nāvāya ṭhāpitasuvaṇṇapaṭimā viya niccalo hoti, adhokāyova iñjati. Sukhena pādā parivattanti. Puratopi pacchatopi ubhayapassesupi ṭhatvā passantānaṃ pādātalāni paññāyanti, na hatthīnaṃ viya pacchatoyeva.

Enijaṅghoti eṇimigasadisajaṅgho maṃsussadena paripuṇṇajaṅgho, na ekato baddhapiṇḍikamaṃso, samantato samasaṇṭhitena maṃsena parikkhittāhi suvaṭṭitāhi sāligabbhasadisāhi jaṅghāhi samannāgatoti attho.

Anonamantoti anamanto. Etenassa akhujjaavāmanabhāvo dīpito. Avasesajanā hi khujjā vā honti vāmanā vā, khujjānaṃ uparimakāyo aparipuṇṇo hoti, vāmanānaṃ heṭṭhimakāyo. Te aparipuṇṇakāyattā

na sakkonti anonamantā jaṇṇukāni parimajjitum. Tathāgato pana paripuṇṇaubhayakāyattā sakkoti.

Usabhavāraṇādīnaṃ viya suvaṇṇapadumakaṇṇikasadiṣe kose ohitaṃ paṭicchannaṃ vatthaguyhaṃ assāti **kosohitavatthaguyho. Vatthaguyhanti** vatthena gūhitabbaṃ aṅgajātaṃ vuccati.

Suvaṇṇavaṇṇoti jātihiṅgulakena majjivā dīpidāṭhāya ghaṃsitvā gerukaparikkammaṃ katvā ṭhapitaghanasuvaṇṇarūpakasadisoti attho. Etenassa ghanasiniddhasaṅghasarīrataṃ dassetvā chavivaṇṇadassanattaṃ **kañcanasannibhattacoti** vuttaṃ, purimassa vā vevacanameva etaṃ.

Rajojallanti rajo vā malaṃ vā. **Na upalimpatīti** na laggati, padumapalāsato udakabindu viya vivaṭṭati. Hatthadhovanapādadhovanādīni pana utuggahaṇatthāya ceva dāyakānaṃ puññaphalattāya ca buddhā karonti, vattasīsenāpi ca karontiyeva. Senāsanam pavisantena hi bhikkhunā pāde dhovivā pavisitabbanti vuttametaṃ.

Uddhaggalomoti āvaṭṭapariyosāne uddhaggāni hutvā mukhasobham ullokayamānāni viya ṭhitāni lomāni assāti uddhaggalomo.

Brahmujuggatoti brahmā viya ujugatto, ujumeva uggatadīghasarīro. Yebhuyyena hi sattā khandhe kaṭiyaṃ jāṇūsūti tīsu ṭhānesu namanti. Te kaṭiyaṃ namantā pacchato namanti, itaresu dvīsu ṭhānesu purato. Dīghasarīrā paneke passavaṅkā honti, eke mukhaṃ unnāmetvā nakkhattāni gaṇayantā viya caranti, eke appamaṃsalohitā sūlasadisā honti, pavedhamānā gacchanti. Tathāgato pana ujumeva uggantvā dīghappamaṇo devanagare ussitasuvaṇṇatoramaṃ viya hoti.

Sattussadoti dve hatthapiṭṭhiyo dve pādapiṭṭhiyo dve aṃsakūṭāni khandhoti imesu sattuṃ ṭhānesu paripuṇṇamaṃsussado assāti sattussado. Aññesaṃ pana hatthapādapiṭṭhīsu nhārujālā paññāyanti, aṃsakūṭakhandhesu aṭṭhikoṭṭhiyo, te manussapetā viya khāyanti, na tathāgato. Tathāgato pana sattuṃ ṭhānesu paripuṇṇamaṃsussadattā nigūḷhanhārujālehi hatthapiṭṭhādīhi vaṭṭetvā ṭhapitasuvaṇṇavaṇṇāliṅgasadisena khandhena silārūpakaṃ viya cittakammarūpakaṃ viya ca khāyati.

Sīhassa pubbaddhaṃ viya kāyo assāti **sīhapubbaddhakāyo**. Sīhassa hi puratthimakāyova paripuṇṇo hoti, pacchimakāyo aparipuṇṇo. Tathāgatassa pana sīhassa pubbaddhakāyova sabbo kāyo paripuṇṇo. Sopi sīhasseva na tattha tattha vinatunnatādivasena dussaṅghitavisāṅghito, dīghayuttatṭhāne pana dīgho, rassakisathūlaanuvaṭṭitayuttatṭhānesu tathāvidhova hoti. Vuttañhetam –

“Manāpiye ca kho, bhikkhave, kammavipāke paccupaṭṭhite yehi aṅgehi dīghehi sobhati, tāni aṅgāni dīghāni saṅghahanti. Yehi aṅgehi rassehi sobhati, tāni aṅgāni rassāni saṅghahanti. Yehi aṅgehi thūlehi sobhati, tāni aṅgāni thūlāni saṅghahanti. Yehi aṅgehi kisehi sobhati, tāni aṅgāni kisāni saṅghahanti. Yehi aṅgehi vaṭṭehi sobhati, tāni aṅgāni vaṭṭāni saṅghahantī”ti.

Iti nānācittena puññacittena cittito dasahi pāramīhi sajjito tathāgatassa attabhāvo, tassa loke sabbasippino vā iddhimanto vā paṭirūpakampi kātuṃ na sakkonti.

Citantaraṃsoti antaraṃsaṃ vuccati dvinnaṃ koṭṭānamantaraṃ, taṃ citaṃ paripuṇṇamassāti citantaraṃso. Aññesañhi taṃ ṭhānaṃ ninnaṃ hoti, dve piṭṭhikoṭṭā pāṭiyekkaṃ paññāyanti. Tathāgatassa pana kaṭito paṭṭhāya maṃsapaṭalaṃ yāva khandhā uggamma samussitasuvaṇṇaphalakaṃ viya piṭṭhiṃ chādetvā patiṭṭhitaṃ.

Nigrodhaparimaṇḍaloti nigrodho viya parimaṇḍalo. Yathā paṇṇāsahatthāyā vā satahatthāyā vā samakkhandhasākho nigrodho dīghatopi vitthāratopi ekappamaṇova hoti, evaṃ kāyatopi byāmatopi ekappamaṇo. Yathā aññesaṃ kāyo vā dīgho hoti byāmo vā, na evaṃ visamappamaṇoti attho. Teneva “yāvatakvassa kāyo”tiādi vuttaṃ. Tattha yāvatako assāti **yāvatakvassa**.

Samavaṭṭakkhandhoti samavaṭṭitakkhandho. Yathā eke koñcā viya bakā viya varāhā viya ca dīghagalā vaṅkagalā puthulagalā ca honti, kathanakāle sirājālaṃ paññāyati, mando saro nikkhamati, na evaṃ tassa. Tathāgatassa pana suvaṭṭitasuvaṇṇālingasadisō khandho hoti, kathanakāle sirājālaṃ na paññāyati, meghassa viya gajjato saro mahā hoti.

Rasaggasaggī ettha rasaṃ gasantīti rasaggasā, rasaharaṇīnametaṃ adhivacanaṃ, tā aggā assāti rasaggasaggī. Tathāgatassa hi satta rasaharaṇisahasāni uddhaggāni hutvā gīvāyameva paṭimukkāni. Tilaphalamattopi āhāro jivhagge ṭhapito sabbamaṃ kāyamaṃ anupharati, teneva mahāpadhānaṃ padahantassa ekataṇḍulādīhipi kālāyayūsapasatenāpi kāyassa yāpanamaṃ ahosi. Aññesaṃ pana tathā abhāvā na sakalakāyamaṃ oja pharati, tena te bahvābādhā honti. Idamaṃ lakkhaṇamaṃ appābādhatāsankhātassa nissandaphalassa vasena pākaṭamaṃ hoti.

Sīhasseva hanu assāti **sīhahanu**. Tattha sīhassa heṭṭhimahanumeva paripuṇṇamaṃ hoti, na uparimaṃ. Tathāgatassa pana sīhassa heṭṭhimaṃ viya dvepi paripuṇṇāni dvādasiyamaṃ pakkhassa candasadisāni honti.

Cattālīsadantotiādīsu uparimahanuke patiṭṭhitā vīsati, heṭṭhime vīsati cattālīsa dantā assāti cattālīsadanto. Aññesañhi paripuṇṇadantānampi dvattimsa dantā honti, tathāgatassa cattālīsaṃ.

Aññesañca keci dantā uccā keci nīcāti visamā honti, tathāgatassa pana ayapaṭṭachinnasankhapaṭalaṃ viya samā.

Aññesaṃ kumbhīlānaṃ viya dantā viralā honti, macchamaṃsādīni khādantānaṃ dantantaram pūrati. Tathāgatassa pana kanakalatāya samussāpitavajirapanti viya aviralā tulikāya dassitaparicchedā viya dantā honti.

Susukkadāṭhoti aññesañca pūtidantā uṭṭhahanti, tena kāci dāṭhā kālāpi vivaṇṇāpi honti. Tathāgato susukkadāṭho osadhitārakampi atikkamma virocamañāya pabhāya samannāgatadāṭho, tena vuttamaṃ ‘‘susukkadāṭho’’ti.

Pahūtajivhoti aññesaṃ jivhā thūlāpi hoti kisāpi rassāpi thaddhāpi visamāpi, tathāgatassa pana mudu dīghā puthulā vaṇṇasampannā hoti. So taṃ lakkhaṇamaṃ pariyesitumaṃ āgatānaṃ kaṅkhāvinodanattaṃ mudukattā taṃ jivhamaṃ kathinasūciṃ viya vaṭṭetvā ubho nāsikasotāni parāmasati, dīghattā ubho kaṅṇasotāni parāmasati, puthulattā kesantapariyosānaṃ kevalampi nalāṭamaṃ paṭicchādeti. Evaṃ tassā mududīghaputhulabhāvaṃ pakāsento kaṅkhaṃ vinodeti. Evaṃ tilakkhaṇasampannaṃ jivhamaṃ sandhāya ‘‘pahūtajivho’’ti vuttamaṃ.

Brahmassaroti aññe chinnassarāpi bhinnassarāpi kākassarāpi honti, tathāgato pana mahābrahmuno sarasadisena sarena samannāgato. Mahābrahmuno hi pittasemhehi apalibuddhattā saro visuddho hoti. Tathāgatenāpi katakammaṃ vatthumaṃ sodheti, vatthussa suddhattā nābhito paṭṭhāya samuṭṭhahanto saro visuddho aṭṭhaṅgasamannāgatova samuṭṭhāti. Karaviko viya bhaṇatīti **karavikabhāṇī**, mattakaravikarutamañjughosoti attho.

Tatridamaṃ karavikarutassa mañjutāya – karavikasakuṇe kira madhurarasaṃ ambapakkaṃ mukhatuṇḍakena paharivā paggharitaṃ rasaṃ sāyivā pakkhena tālaṃ datvā vikūjamāne catuppadādīni mattāni viya laḷitumaṃ ārabhanti. Gocarappasutāpi catuppadā mukhagatānīpi tiṇāni chaddetvā taṃ saddamaṃ suṇanti, vālamigā khuddakamige anubandhamānā ukkhittapādaṃ anukkhīpitvāva tiṭṭhanti, anubaddhamigāpi maraṇabhayaṃ hitvāpi tiṭṭhanti, ākāse pakkhandapakkhinopi pakkhe pasāretvā tiṭṭhanti, udake macchāpi kaṅṇapaṭalaṃ apphoṭentā taṃ saddamaṃ suṇamānāva tiṭṭhanti. Evaṃ mañjurutā karavikā.

Asandhimittāpi dhammāsokassa devī – “atthi nu kho, bhante, buddhasaddena sadiso kassaci saddo”’ti saṅghaṃ pucchi. Atthi karavikasakuṇassāti. Kuhiṃ, bhante, sakuṇāti? Himavanteti. Sā rājānaṃ āha, – “deva, karavikasakuṇaṃ datṭhukāmā”’ti. Rājā “imasmim pañjare nisīditvā karaviko āgacchatū”’ti suvaṇṇapañjaraṃ vissajjesi. Pañjaro gantvā ekassa karavikassa purato aṭṭhāsī. So “rājānāya āgato pañjaro, na sakkā agantu”’nti tattha nisīdi. Pañjaro āgantvā rañño puratova aṭṭhāsī. Karavikaṃ saddaṃ kārapetuṃ na sakkonti. Atha rājā “kathaṃ bhāṇe ime saddaṃ karontī”’ti āha? Nātake disvā devāti. Atha naṃ rājā ādāsehi parikkhipāpesi. So attanova chāyaṃ disvā “nātakā me āgatā”’ti maññamāno pakkhena tālaṃ datvā mañjussarena mañivaṃsaṃ dhamamāno viya viravi. Sakalanagare manussā mattā viya laḷimsu. Asandhimittā cintesi – “imassa tāva tiracchānassa evaṃ madhuro saddo, kīdiso nu kho sabbaññutaññānasirippattassa bhagavato ahoṣī”’ti pītiṃ uppādetvā taṃ pītiṃ avijahitvā sattaḥi jaṅghasatehi saddhiṃ sotāpattiphale patiṭṭhāsī. Evaṃ madhuro karavikasaddo. Tato satabhāgena sahasabhāgena ca madhurataro tathāgatassa saddo, loke pana karavikato aññassa madhurarassa abhāvato “karavikabhāṇī”’ti vuttaṃ.

Abhinīlanettoti na sakalanīlanettova, nīlayuttaṭṭhāne panassa umāpupphasadisena ativisuddhena nīlavaṇṇena samannāgatāni akkhīni honti. Pīyuttaṭṭhāne kaṇikārapupphasadisena pītavaṇṇena, lohityuttaṭṭhāne bandhujīvakaṇapupphasadisena lohityavaṇṇena, setayuttaṭṭhāne osadhitarakasadisena setavaṇṇena, kālayuttaṭṭhāne addāriṭṭhakasadisena kālayavaṇṇena samannāgatāni suvaṇṇavimāne ugghāṭitamaṇisīhapañjarasadisāni khāyanti.

Gopakhumoti ettha **pakhumanti** sakalaṃ cakkhubhaṇḍaṃ adhippetāṃ. Taṃ kālavacchakassa bahaladhātukaṃ hoti, rattavacchakassa vippasannaṃ, taṃmuhuttajātarattavacchadisacakkhubhaṇḍoti attho. Aññesañhi akkhibhaṇḍā aparipuṇṇā honti, hatthimūsikakākadīnaṃ akkhisadisēhi viniggethehi gambhīrehipi akkhīhi samannāgatā honti. Tathāgatassa pana dhovitvā majjitvā ṭhapitamaṇigulikā viya mudusiniddhanīlasukhumapakhumācitāni akkhīni.

Uṇṇāti uṇṇalomaṃ. **Bhamukantareti** dvinnāṃ bhamukānaṃ vemajjhe nāsikamatthakeyeva jātā. Uggantvā pana nalāṭamajjhajātā. **Odātāti** parisuddhā osadhitarakavaṇṇā. **Mudūti** sappimaṇḍe osādetvā ṭhapitasatavāravihataṃkappāsaṭṭhalasadisā. **Tūlasannibhāti** simbalitūlalātātūlasamānā, ayamassā odātātāya upamā. Sā panesā kotiyaṃ gahetvā ākaḍḍhiyamānā upaḍḍhabāhuppamaṇā hoti, vissatṭhā dakkhiṇāvattavasena āvattitvā uddhaggā hutvā santiṭṭhati, suvaṇṇaphalakamajjhe ṭhapitarajatapupphulakā viya suvaṇṇaghaṭato nikkhamamānā khīradhārā viya aruṇappabhārañjite gamanatale osadhitarakā viya ca atimanoharāya siriya virocati.

Uṇḥīsāsoti idam paripuṇṇanalātatañceva paripuṇṇasīsatañcāti dve atthavase paṭicca vuttaṃ. Tathāgatassa hi dakkhiṇakaṇṇacūlikato paṭṭhāya maṃsaṭṭhalam uṭṭahitvā sakalam nalāṭam chādayamānaṃ pūrayamānaṃ gantvā vāmakaṇṇacūlikāya patiṭṭhitam, rañño baddhaṇḥīsapaṭṭo viya virocati. Pacchimabhavikabodhisattānaṃ kira imaṃ lakkhaṇaṃ viditvā rājūnaṃ uṇḥīsapaṭṭam akāmsu, ayaṃ tāva eko attho. Aññe pana janā aparipuṇṇasīsā honti, keci kappasīsā, keci phalasīsā, keci aṭṭhisīsā, keci tumbasīsā, keci pabbhārasīsā. Tathāgatassa pana āraggena vaṭṭetvā ṭhapitam viya suparipuṇṇam udakapupphulasadisam sīsam hoti. Tattha purimanayena uṇḥīsaveṭṭhitasīso viyāti uṇḥīsāsīso. Dutīyanayena uṇḥīsam viya sabbattha parimaṇḍalasīsoti uṇḥīsāsīso.

Imāni pana mahāpurisalakkhaṇāni kammaṃ kammasarikkhakaṃ lakkhaṇaṃ lakkhaṇānisamsanti ime cattāro koṭṭhāse ekekasmim lakkhaṇe dassetvā kathitāni sukathitāni honti. Tasmā bhagavatā lakkhaṇasutte (dī. ni. 3.200-202) vuttāni imāni kammādīni dassetvā kathetabbāni. Suttavasena vinicchitum asakkontena **sumaṅgalavilāsiniyā dīghanikāyaṭṭhakathāya** tasseva suttassa vaṇṇanāya vuttanayena gahetabbāni.

Imehi kho, bho, so bhavaṃ gotamoti, bho ācariya, imehi dvattiṃsamahāpurisalakkhaṇehi so bhavaṃ gotamo samannāgato devanagare samussitaratanaviccittam suvaṇṇatoranaṃ viya

yojanasatubbedho sabbapāliphullo pārīcchattako viya selantaramhi supupphitasālarukkho viya tārāgaṇapaṭimaṇḍitagaganatalamiva ca attano sirivibhavana lokam ālokam kurumāno viya caratīti imatthampi dīpetvā kiriyācāram ācikkhitum **gacchanto kho panāti**ādīmāha.

387. Dakkhiṇenāti buddhānañhi thatvā vā nisīditvā vā nipajjitvā vā gamanam abhinīharantānam dakkhiṇapādova purato hoti. Satatapāṭihāriyam kiretam. **Nātidūre pādam uddharatīti** tam dakkhiṇapādam na atidūre ṭhapessāmīti uddharati. Atidūrañhi abhīhariyamāne dakkhiṇapādena vāmapādo ākaḍḍhiyamāno gaccheyya, dakkhiṇapādopi dūram gantum na sakkuṇeyya, āsanneyeva patiṭṭhaheyya, evam sati padavicchedo nāma hoti. Dakkhiṇapāde pana pamāṇeneva uddhate vāmapādopi pamāṇeneva uddhariyati, pamāṇena uddhato patiṭṭhahantopi pamāṇeyeva patiṭṭhāti. Evamanena tathāgatassa dakkhiṇapādakiccam vāmapādena niyamitam, vāmapādakiccam dakkhiṇapādena niyamitanti vedītabbam.

Nātisīghanti divā vihārabhattatthāya gacchanto bhikkhu viya na atisīgham gacchati. **Nātiṣaṇikanti** yathā pacchato āgacchanto okāsam na labhati, evam na atisaṇikam gacchati. **Adduvena adduanti** jaṇṇukena jaṇṇukam, **na satthim unnāmetīti** gambhīre udake gacchanto viya na ūrum unnāmeti. **Na onāmetīti** rukkhasākhāchedanaḍḍaṅkusapādo viya na pacchato osakkāpeti. **Na sannāmetīti** obaddhānābaddhatṭhānehi pādam koṭṭento viya na thaddham karoti. **Na vināmetīti** yantarūpakam kīlāpento viya na ito cito ca cāleti. **Adharakāyovāti** heṭṭhimakāyova iñjati, uparimakāyo nāvāya ṭhāpitasuvaṇṇapaṭimā viya niccalo hoti. Dūre thatvā olokeno hi buddhānam ṭhitabhāvam vā gamanabhāvam vā na jānāti. **Kāyabalenāti** bāhā khipanto sarīrato sedehi muccantehi na kāyabalena gacchati. **Sabbakāyenevāti** gīvam aparivattetvā rāhulovāde vuttanāgāpalokitavaseneva apaloketi.

Na uddhantiādīsu nakkhattāni gaṇento viya na uddham ulloketi, natṭham kākaṇikam vā māsakam vā pariyesanto viya na adho oloketi, na hatthiassādayo passanto viya ito cito ca vīpekkhamāno gacchati. **Yugamattanti** navavidatthimatte cakkhūni ṭhapetvā gacchanto yugamattam pekkhati nāma, bhagavāpi yuge yutto sudantaājānīyo viya ettakam passanto gacchati. **Tato cassa uttarīti** yugamattato param na passatīti na vattabbo. Na hi kuṭṭam vā kavāṭam vā gaccho vā latā vā āvaritum sakkoti, atha khvassa anāvaraṇañāṇassa anekāni cakkavālasahassāni ekaṅgaṇāneva honti. **Antaragharanti** heṭṭhā mahāsakuludāyisutte indakhīlato paṭṭhāya antaragharam, idha gharaummārato paṭṭhāya vedītabbam. **Na kāyanti**ādī pakatiiriyapatheneva pavisatīti dassanattham vuttam. Daliddamanussānam nīcagharakam pavisantepi hi tathāgate chadanam vā uggacchati, pathavī vā ogacchati, bhagavā pana pakatigamaneneva gacchati. **Nātidūreti** atidūre parivattantena hi ekam dve padavāre piṭṭhibhāgena gantvā nisīditabbam hoti. **Nāccāsanneti** accāsanne parivattantena ekam dve padavāre purato gantvā nisīditabbam hoti. Tasmā yasmiṃ padavāre ṭhitena purato vā pacchato vā agantvā nisīditabbam hoti, tattha parivattati.

Pāṇināti kaṭivātābādhiko viya na āsanam hatthehi gahetvā nisīdati. **Pakkhipatīti** yo kiñci kammaṃ katvā kīlanto ṭhitakova patati, yopi orimam āgam nissāya nisīno ghaṃsanto yāva pārīmaṅgā gacchati, pārīmaṅgam vā nissāya nisīno tatheva yāva orīmaṅgā āgacchati, sabbo so āsane kāyam pakkhipati nāma. Bhagavā pana evam akatvā āsanassa majjhe olambakam dhārento viya tūlapicum ṭhapento viya saṇikam nisīdati. **Hatthakukkuccanti** pattamukhavatṭiyam udakabinduṭhapanam makkhikabṭījanīyā paṇṇacchedanaphālanādi hatthena asaṃyatakaraṇam. **Pādakukkuccanti** pādena bhūmighaṃsanādi asaṃyatakaraṇam.

Na chambhatīti na bhāyati. **Na kampatīti** na osīdati. **Na vedhatīti** na calati. **Na paritassatīti** bhayaparitassanāyapi taṇhāparitassanāyapi na paritassati. Ekacco hi dhammakathādīnam atthāya āgantvā manussesu vanditvā ṭhitesu “sakkhissāmi nu kho tesam cittam gaṇhanto dhammam vā kathetum, pañham vā pucchito vissajjetum, bhattānumodanam vā kātu”nti bhayaparitassanāya paritassati. Ekacco “manāpā nu kho me yāgu āgacchissati, manāpam antarakhajjaka”nti vā taṇhāparitassanāya paritassati. Tadubhayampi tassa natthīti na paritassati. **Vivekāvatṭoti** viveke nibbāne āvatṭamānaso hutvā. Vivekavattotipi pāṭho, vivekavattayutto hutvāti attho. Vivekavattam nāma katabhattakiccasa bhikkhuno

divāvihāre samathavipassanāvasena mūlakammaṭṭhānaṃ gahevā pallankaṃ ābhujitvā nisīdanaṃ. Evaṃ nisinnassa hi iriyāpatho upasanto hoti.

Na pattam unnāmetitiādīsu ekacco pattamukhavatṭiyā udakadānaṃ āharanto viya pattam unnāmeti, eko pādapiṭṭhiyaṃ ṭhapento viya onāmeti, eko baddhaṃ katvā gaṇhāti, eko ito cito ca phandāpeti, evaṃ akatvā ubhohi hatthehi gahevā īsakaṃ nāmetvā udakaṃ paṭiggāṇhātīti attho. **Na samparivattakanti** parivattetvā paṭhamameva pattapiṭṭhiṃ na dhovati. **Nātidūreti** yathā nisinnāsanato dūre patati, na evaṃ chaḍḍeti. **Nāccāsanneti** pādamūleyeva na chaḍḍeti. **Vicchaḍḍayamānoti** vikiranto, yathā paṭiggāhako temati, na evaṃ chaḍḍeti.

Nātithokanti yathā ekacco pāpiccho appicchatam dassento muṭṭhimattameva gaṇhāti, na evaṃ. **Atibahunti** yāpanamattato atirekaṃ. **Byañjanamattāyāti** byañjanassa mattā nāma odanato catuttho bhāgo. Ekacco hi bhatte manāpe bhattam bahuṃ gaṇhāti, byañjane manāpe byañjanaṃ bahuṃ. Satthā pana tathā na gaṇhāti. **Na ca byañjanenāti** amanāpañhi byañjanaṃ ṭhapetvā bhattameva bhuñjanto, bhattam vā ṭhapetvā byañjanameva khādanto byañjanena ālopaṃ atināmeti nāma. Satthā ekantarikaṃ byañjanaṃ gaṇhāti, bhattampi byañjanampi ekatova niṭṭhanti. **Dvattikkhattunti** tathāgatassa hi puthujivhāya dantānaṃ upanītabhojanaṃ dvattikkhattuṃ dantehi phuṭṭhamattameva saṅhakarāṇīyapiṭṭhavilepanaṃ viya hoti, tasmā evanāha. **Na mukhe avasiṭṭhāti** pokkharapatte patitaudakabindu viya vinivattitvā paragalameva yāti, tasmā avasiṭṭhā na hoti. **Rasapaṭisaṃvedīti** madhuratittakadukādīrasaṃ jānāti. Buddhānañhi antamaso pānīyepi dibbojā pakkhittāva hoti, tena nesaṃ sabbattheva raso pākaṭo hoti, rasagedho pana natthi.

Aṭṭhaṅgasamannāgatanti “neva davāyā”ti vutthehi aṭṭhahi aṅgehi samannāgataṃ. **Visuddhimagge** panassa vinicchayo āgatoti sabbāsavasutte vuttametam. **Hatthesu dhotēsūti** satthā kiṃ karoti? Paṭhamam pattassa gahaṇaṭṭhānaṃ dhovati. Tattha pattam gahevā sukhumajālahattham pesetvā dve vāre sañcāreti. Ettāvata pokkharapatte patitaudakaṃ viya vinivattitvā gacchati. **Na ca anatthikoti** yathā ekacco pattam ādhārake ṭhapetvā patte udakaṃ na puñchati, raje patante ajjupekkhati, na evaṃ karoti. **Na ca ativelānurakkhīti** yathā ekacco pamānātikantaṃ ārakkhaṃ ṭhapeti, bhuñjitvā vā patte udakaṃ puñchitvā cīvarabhogantaram pavasetvā pattam udarena akkamitvā gaṇhāti, na evaṃ karoti.

Na ca anumodanassāti yo hi bhuttamattova dārakesu bhattatthāya rodantesu chātajjhatesu manussesu bhuñjitvā anāgatesveva anumodanaṃ ārabhati, tato sabbakammāni chaḍḍetvā ekacce āgacchanti, ekacce anāgatāva honti, ayaṃ kālam atināmeti. Yopi manussesu āgantvā anumodanatthāya vanditvā nisinnesu anumodanaṃ akatvāva “kathaṃ tissa, kathaṃ phussa, kathaṃ sumana, kathaṃ tisse, kathaṃ phusse, kathaṃ sumane, kaccittha arogā, sassaṃ sampanna”ntiādīṃ pāṭiyekkaṃ kathaṃ samuṭṭhāpeti, ayaṃ anumodanassa kālam atināmeti, manussānaṃ pana okāsaṃ ñatvā āyācitakāle karonto nātināmeti nāma, satthā tathā karoti.

Na tam bhattanti kiṃ bhattam nāmetam uttaṇḍulaṃ atikilinnantiādīni vatvā na garahati. **Na aññaṃ bhattanti** svātanāya vā punadivasāya vā bhattam uppādessāmīti hi anumodanaṃ karonto aññaṃ bhattam paṭīkaṅkhati. Yo vā – “yāva mātugāmānaṃ bhattam paccati, tāva anumodanaṃ karissāmi, atha me anumodanāvasāne attano pakkabhattatopi thokaṃ dassanti”ti anumodanaṃ vaḍḍheti, ayampi paṭīkaṅkhati nāma. Satthā na evaṃ karoti. **Na ca muccitukāmoti** ekacco hi paṭisaṃmuñcitvā gacchati, vegena anubandhitabbo hoti. Satthā pana na evaṃ gacchati, parisāya majjhe ṭhitova gacchati. **Accukkaṭṭhanti** yo hi yāva hanukaṭṭhito ukkhipitvā pārupati, tassa accukkaṭṭham nāma hoti. Yo yāva gopphakā otāretvāva pārupati, tassa accukkaṭṭham hoti. Yopi ubhato ukkhipitvā udaraṃ vivaritvā yāti, tassapi accukkaṭṭham hoti. Yo ekamsam katvā thanaṃ vivaritvā yāti, tassapi accukkaṭṭham. Satthā tam sabbaṃ na karoti.

Allinanti yathā aññesaṃ sedena tintaṃ allīyati, na evaṃ satthu. **Apakaṭṭhanti** khalisāṭako viya kāyato muccitvāpi na tiṭṭhati. **Vātoti** verambhavātopi utṭhahitvā cāletuṃ na sakkoti.

Pādamaṇḍanānuyoganti iṭṭhakāya ghaṃsanādīhi pādasobhānuyogaṃ. **Pakkhāletvāti** pādeneva pādaṃ dhovivā. **So neva attabyābādhāyāti**ādīni na pubbenivāsacetopariyañāṇaṃ atthitāya vadati, iriyāpathasantataṃ pana disvā anumānena vadati. **Dhammanti** pariyattidhammaṃ. **Na ussādetīti** kiṃ mahāraṭṭhika, kiṃ mahākuṭumbikātiādīni vatvā gehassitavasena na ussādeti. **Na apasādetīti** “kiṃ, upāsaka, kathaṃ te vihāramaggo ñāto? Kiṃ bhayena nāgacchasi? Na hi bhikkhū kiñci acchinditvā gaṇhanti, mā bhāyī”ti vā “kiṃ tuyhaṃ evaṃ macchariyajīvitāṃ nāmā”ti vā ādīni vatvā gehassitapemena na apasādeti.

Vissatṭhoti siniddho apalibuddho. **Viññeyyoti** viññāpanīyo pākaṭo, vissatṭhattāyeva cesa viññeyyo hoti. **Mañjūti** madhuro. **Savanīyoti** sotasukho, madhurattāyeva cesa savanīyo hoti. **Bindūti** sampiṇḍito. **Avisārīti** avisāṭo, binduttāyeva cesa avisārī hoti. **Gambhīroti** gambhīrasamuṭṭhito. **Ninnādīti** ninnādavā, gambhīrattāyeva cesa ninnādī hoti. **Yathāparisanti** cakkavāḷapariyantampi ekābaddhāparisaṃ viññāpeti. **Bahiddhāti** aṅgulimattampi parisato bahiddhā na gacchati. Tasmā? So evarūpo madhurassaro akāraṇā mā nassīti. Iti bhagavato ghoso parisāya matthakeneva carati.

Avalokayamānāti sirasmiṃ añjalim ṭhapetvā bhagavantaṃ oloketvā paccosakkivā dassanavijahanaṭṭhāne vanditvā gacchanti. **Avijahitattāti** yo hi kathaṃ sutvā vuṭṭhito aññaṃ diṭṭhasutādikaṃ kathaṃ kathento gacchati, esa sabhāvena vijahati nāma. Yo pana sutadhammakathāya vaṇṇaṃ kathentova gacchati, ayaṃ na vijahati nāma, evaṃ avijahantabhāvena pakkamanti. **Gacchantanti** rajjuyantavasena ratanasattubbedhaṃ suvaṇṇagghikaṃ viya gacchantāṃ. **Addasāma ṭhitanti** samussitakañcanapabbataṃ viya ṭhitaṃ **addasāma**. **Tato ca bhiyyoti** vitthāretvā guṇe kathetuṃ asakkonto avasese guṇe saṃkhipitvā kalāpaṃ viya suttakabaddhaṃ viya ca katvā vissajjento evamāha. Ayamettha adhippāyo – mayā kathitagūṇehi akathitāva bahutarā. Mahāpathavimāhāsamuddādayo viya hi tassa bhoto anantā appameyyā guṇā ākāsamiva vitthāritāti.

390. Appaṭisaṃviditoti aviññātaāgamano. Pabbajite upasaṅkamantena hi cīvaraparikkammādisamaye vā ekaṃ nivāsetvā sarīrabhañjanasamaye vā upasaṅkamitvā tatova paṭinivattitabbaṃ hoti, paṭisanthāramattampi na jāyati. Puretaraṃ pana okāse kārite divāṭṭhānaṃ sammajjitvā cīvaraṃ pārupitvā bhikkhu vivitte ṭhāne nisīdati, taṃ āgantvā passantā dassanenāpi pasīdanti, paṭisanthāro jāyati, pañhabyākaraṇaṃ vā dhammakathā vā labbhati. Tasmā paṇḍitā okāsaṃ kārenti. So ca nesāṃ aññataro, tenassa etadahosi. **Jiṇṇo vuddhoti** attano uggaṭabhāvaṃ akathetvā kasmā evamāha? Buddhā nāma anuddayasampannā honti, mahallakabhāvaṃ ñatvā sīghaṃ okāsaṃ karissatīti evamāha.

391. Oramiya okāsamakāsīti vegena utṭhāya dvidhā bhijjitvā okāsamakāsi.

Ye meti ye mayā. **Nārīsamānasavhayāti** nārīsamānanāmaṃ itthilingaṃ, tena avhātabbāti nārīsamānasavhayā, itthilingena vattabbāti vohārakusalatāya evaṃ vadati. **Pahūtajivhoti** puthulajivho. **Ninnāmayetanti** nīhara etaṃ.

393. Kevalīti sakalaguṇasampanno.

394. Paccabhāsīti ekappahārena pucchite aṭṭha pañhe byākaronto patiabhāsi. **Yo vedīti** yo vidati jānāti, yassa pubbenivāso pākaṭo. **Saggāpāyaṇca passatīti** dibbacakkhuññaṃ kathitaṃ. **Jātikkhayaṃ pattoti** arahattaṃ patto. **Abhiññā vositoti** taṃ arahattaṃ abhijānitvā vosito vosānappatto. **Munīti** arahattaññaṃoneyena samannāgato.

Visuddhanti paṇḍaraṃ. **Muttaṃ rāgehīti** kilesarāgehi muttaṃ. **Pahīnajātīmaraṇoti** jātikkhayaṃpattatā pahīnajātiko, jātipahāneneva pahīnamaraṇo. **Brahmacariyassa kevalīti** yaṃ brahmacariyassa kevalī sakalabhāvo, tena samannāgato, sakalacatumaggabrahmacariyavāsoti attho. **Pāragū sabbadhammānanti** sabbesaṃ lokiyalokuttaradhammānaṃ abhiññāya pāraṃ gato,

sabbadhamme abhijānitvā t̥hitoti attho. **Pāragūti** vā ettāvātā pariññāpāragū pañcannaṃ khandhānaṃ, pahānapāragū sabbakilesānaṃ, bhāvanāpāragū catunnaṃ maggānaṃ, sacchikiriyāpāragū nirodhassa, samāpattipāragū sabbasamāpattinanti ayamattho vutto. Puna **sabbadhammānanti** iminā abhiññāpāragū vuttoti. **Buddho tādī pavuccatīti** tādiso chahi ākārehi pāraṃ gato sabbākārena catunnaṃ saccānaṃ buddhattā buddhoti pavuccatīti.

Kiṃ pana ettāvātā sabbe pañhā vissajjitā hontīti? Āma vissajjitā, cittaṃ visuddhaṃ jānāti, muttaṃ rāgehīti iminā tāva bāhitapāpattā brāhmaṇoti paṭhamapañho vissajjito hoti. Pāragūti iminā vedehi gatattā vedagūti dutiyapañho vissajjito hoti. Pubbenivāsantiādīhi imāsaṃ tissannaṃ vijjānaṃ atthitāya tevijjoti tatiyapañho vissajjito hoti. Muttaṃ rāgehi sabbasoti imināva nissaṭattā pāpadhammānaṃ sottiyoti catutthapañho vissajjito hoti. Jātikkhayaṃ pattoti iminā pana arahattasseva vuttattā pañcamapañho vissajjito hoti. Vositoti ca brahmacariyassa kevalīti ca imehi chaṭṭhapañho vissajjito hoti. Abhiññā vosito munīti iminā sattamapañho vissajjito hoti. Pāragū sabbadhammānaṃ, buddho tādī pavuccatīti iminā aṭṭhamapañho vissajjito hoti.

395. Dānakathantiādīni heṭṭhā sutte vitthāritāneva. **Paccapādīti** paṭipajji.

Dhammassānudhammanti imasmīṃ sutte dhammo nāma arahattamaggo, anudhammo nāma heṭṭhimā tayo maggā tīṇi ca sāmāññaphalāni, tāni paṭipāṭiyā paṭilabhīti attho. **Na ca maṃ dhammādhikaraṇaṃ vihesesīti** mañca dhammakāraṇā na kilamesi, na punappunaṃ kathāpesīti vuttaṃ hoti. Sesam sabbattha uttānameva. **Tattha parinibbāyīti** pana padena desanāya arahatteneva kūṭaṃ gahitanti.

Papañcasūdaniyā majjhimanikāyaṭṭhakathāya

Brahmāyusuttavaṇṇanā niṭṭhitā.

2. Selasuttavaṇṇanā

396. Evaṃ me sutanti selasuttaṃ. Tattha **āṅguttarāpesūti**ādī potaliyasutte vitthāritameva.

Aḍḍhateḷasehīti aḍḍhena teḷasehi, dvādasahi satehi paññāsāya ca bhikkhūhi saddhinti vuttaṃ hoti. Te pana sāvakasannipāte sannipatitā bhikkhūyeva sabbe ehibhikkhupabbajjāya pabbajitā khīṇāsavā.

Keṇiyoti tassa nāmaṃ, **jaṭiloti** tāpaso. So kira brāhmaṇamahāsālo, dhanarakkhaṇatthāya pana tāpasapabbajjaṃ samādāya rañño paṇṇākāraṃ datvā bhūmibhāgaṃ gahetvā tattha assamaṃ kāretvā vasati pañcahi sakaṭasatehi vaṇijjaṃ payojetvā kulasahassassa nissayo hutvā, assamepi cassa eko tālarukkho divase divase ekaṃ sovaṇṇamayam tālaphalaṃ muñcatīti vadanti. So divā kāsāyāni dhāreti, jaṭā ca bandhati, rattiṃ kāmasampattiṃ anubhavati. **Dhammiyā kathāyāti**

pānakānisamaṃsapaṭisaṃyuttāya dhammiyā kathāya. Ayañhi keṇiyo tucchahattho bhagavato dassanāya gantum lajjāyamāno – “vikālabhojanā viratānampi pānakaṃ kappatī”ti cintetvā susaṅkhatabadarapānaṃ pañcahi kājasatehi gāhāpetvā agamāsi. Evaṃ gatabhāvo cassa – “atha kho keṇiyassa jaṭilassa etadahosi kiṃ nu kho ahaṃ samaṇassa gotamassa harāpeyya”nti bhesajjakkhandhake (mahāva. 300) pāliaruḷhoyeva.

Dutiyampi kho bhagavāti kasmā punappunaṃ paṭikkhipi? Titthiyānaṃ paṭikkhepapasannatāya, akāraṇametam, natthi buddhānaṃ paccayahetu evarūpaṃ kohaññaṃ. Ayaṃ pana aḍḍhateḷasāni bhikkhusatāni disvā ettakānaṃyeva bhikkhaṃ paṭiyādessati, sveva selo tīhi purisasatehi saddhiṃ pabbajissati. Ayuttaṃ kho pana navake aññato pesetvā imeheva saddhiṃ gantum, ime vā aññato pesetvā navakehi saddhiṃ gantum. Athāpi sabbe gahetvā gamissāmi, bhikkhāhāro nappahossati. Tato bhikkhūsu piṇḍāya carantesu manussā ujjhāyissanti – “cīrassāpi keṇiyo samaṇaṃ gotamaṃ nimantetvā yāpanamattaṃ dātum nāsakkhī”ti, sayampi vipptaṭisārī bhavissati. Paṭikkhepe pana kate “samaṇo gotamo punappunaṃ ‘tvañca brāhmaṇesu abhippasanno’ti brāhmaṇānaṃ nāmaṃ gaṇhātī”ti cintetvā brāhmaṇepi nimantetukāmo bhavissati, tato brāhmaṇe paṭiyekkaṃ nimantessati, te tena nimantitā bhikkhū hutvā bhujjissanti. Evamassa saddhā anurakkhitā bhavissatīti punappunaṃ paṭikkhipi. **Kiñcāpi**

kho, bhoti iminā idam dīpeti, – “bho gotama, kiṃ jātaṃ yadi ahaṃ brāhmaṇesu abhippasanno, adhivāsetu bhavaṃ gotamo, ahaṃ brāhmaṇānampi dātum sakkomi tumhākampī”’ti.

Kāyaveyyāvaṭikanti kāyaveyyāvaccam. **Maṇḍalamāḷanti** dussamaṇḍapam.

397. Āvāhoti kaññāgahaṇam. **Vivāhoti** kaññādānam. **So me nimantitoti** so mayā nimantito. Atha brāhmaṇo paripakkopanissayattā buddhasaddam sutvāva amatenevābhisitto pasādam āvikaronto **buddhoti, bho keṇiya, vadesīti** āha. Keṇiyo yathābhūtaṃ ācikkhanto **buddhoti, bho sela, vadāmīti** āha. Tato naṃ punapi dalhīkaraṇattham pucchi, itaropi tatheva ārocesi.

398. Athassa kappasatasahashepi buddhasaddasseva dullabhabhāvaṃ sampassato. **Etadahosīti.** Etaṃ “ghosopi kho”’tiādi ahosi. **Nilavanarājīti** nilavaṇṇarukkhapanti. **Pade padanti** padappamāṇe padaṃ. Accāsanne hi atidūre vā pāde nikkhipamāne saddo utthāti, taṃ paṭisedhento evamāha. **Sihāva ekacarāti** gaṇavāsī sīho sīhapotakādīhi saddhim pamādam āpajjati, ekacaro appamatto hoti. Iti appamādavihāraṃ dassento ekacarasīhena opammaṃ karoti. **Mā me bhontoti** ācāraṃ sikkhāpento āha. Ayañhettha adhippāyo – sace tumhe kathāvāraṃ alabhitvā mama kathāya antare kathaṃ pavesessatha, “antevāsike sikkhāpetum nāsakkhī”’ti mayhaṃ garahā uppajjissati, tasmā okāsam passivā manteyyāthāti. **No ca kho naṃ jānāmīti** vipassīpi bodhisatto caturāsītisahassattherapabbajitaparivāro satta māsāni bodhisattacārikam cari, buddhuppādakālo viya ahosi. Amhākampi bodhisatto chabbassāni bodhisattacārikam cari. Evaṃ paripuṇṇasarīralakkhaṇehi samannāgatāpi buddhā na honti. Tasmā brāhmaṇo “no ca kho naṃ jānāmī”’ti āha.

399. Paripuṇṇakāyoti lakkhaṇehi paripuṇṇatāya ahīnaṅgatāya ca paripuṇṇasarīro. **Surucīti** sundarasarīrappabho. **Sujātoti** ārohapariṇāhasampattiyā saṅghānasampattiyā ca sunibbato. **Cārudassanoti** sucirampi passantānaṃ atittijanako manoharadassano. **Suvaṇṇavaṇṇoti** suvaṇṇasadisavaṇṇo. **Susukkadāthoti** sutthū sukkadātho. **Mahāpurisalakkhaṇāti** paṭhamam vuttabyañjanāneva vacanantarena nigamento āha.

Idāni tesu lakkhaṇesu attano cittarucitāni gahetvā thomento **pasannanettoti**ādīmāha. Bhagavā hi pañcavaṇṇapasādasampattiyā **pasannanetto**, puṇṇacandasadisamukhatāya **sumukho**, ārohapariṇāhasampattiyā **brahā**, brahmujugattatāya **uju**, jutimantatāya **patāpavā**. Yampi cettha pubbe vuttaṃ, taṃ “majjhe samaṇasaṅghassā”’ti iminā pariyāyena thomayatā puna vuttaṃ. Ediso hi evaṃ virocati. Uttaragāthāyapi eseva nayo. **Uttamavaṇṇīnoti** uttamavaṇṇasampannassa. **Rathesabhoti** uttamasārathi. **Jambusaṇḍassāti** jambudīpassa. Pākaṭena issariyaṃ issaro hoti.

Khattiyāti jātikhattiyā. **Bhogīti** bhogiyā. **Rājānoti** ye keci rajjaṃ kārentā. **Rājābhirājāti** rājūnaṃ pūjanīyo, adhirājā hutvā, cakkavattīti adhippāyo. **Manujindoti** manussādhipati paramissaro hutvā.

Evaṃ vutte bhagavā – “ye te bhavanti arahanto sammāsambuddhā, te sakavaṇṇe bhaññamāne attānaṃ pātukarontī”’ti imaṃ selassa manorathaṃ pūrento **rājāhamasmīti**ādīmāha. Tatrāyamadhippāyo – yaṃ maṃ tvaṃ sela “rājā arahasi bhavitu”’nti yācasi, ettha apposukko hoti **rājāhamasmi**. Satī ca rājatte yathā añño rājā yojanasataṃ vā anusāsati yojanasahassaṃ vā, cakkavattī hutvāpi catudīpapariyantamattaṃ vā, nāhamevaṃ paricchinnavisayo, ahañhi **dhammarājā anuttaro** bhavaggato avīcipariyantam katvā tiriyaṃ appamāṇalokadhātuyo anusāsāmi. Yāvatā hi apadadvipadābhedā sattā, ahaṃ tesam aggo. Na hi me koci sīlena vā...pe... vimuttiñānadassanena vā paṭibhāgo atthi, svāhaṃ evaṃ dhammarājā anuttaro anuttareneva catusatipaṭṭhānādibhedena **dhammena cakkam vattemi**. Idam pajahatha, idam upasampajja viharathāti āṇācakkam, idam kho pana, bhikkhave, dukkham ariyasaccantiādinā pariyattidhammena dhammacakkameva vā. **Cakkam appaṭivattiyanti** yaṃ cakkam appaṭivattiyam hoti samaṇena vā...pe... kenaci vā lokasminti.

Evaṃ attānaṃ āvikarontaṃ bhagavantaṃ dīsvā pītisomanassajāto selo puna dalhīkaraṇattham

sambuddho paṭijānāsīti gāthādvayamāha. Tattha **ko nu senāpatīti** rañño bhoto dhammena pavattitassa cakkassa anupavattako senāpati ko nūti pucchi.

Tena ca samayena bhagavato dakkhiṇapasse āyasmā sārīputto nisinno hoti suvaṇṇapuñño viya siriyā sobhamāno, taṃ dassento bhagavā **mayā pavattitanti** gāthamāha. Tattha **anujāto tathāgatanti** tathāgatam hetum anujāto, tathāgatena hetunā jātoti attho. Apica avajāto anujāto atijātoti tayo vuttā. Tesu avajāto dussīlo, so tathāgatassa putto nāma na hoti. Atijāto nāma pitarā uttaritaro, tādīsopi tathāgatassa putto natthi. Tathāgatassa pana eko anujātova putto hoti, taṃ dassento evamāha.

Evam “ko nu senāpatī”ti pañham byākaritvā yaṃ selo āha “sambuddho paṭijānāsī”ti, tatra naṃ nikkāṅkham kātukāmo “nāham paṭiññāmatteva paṭijānāmi, apicāham iminā kāraṇena buddho”ti ñāpetum **abhiññeyyanti** gāthamāha. Tatra **abhiññeyyanti** vijjā ca vimutti ca. **Bhāvetabbaṃ** maggasaccaṃ. **Pahātabbaṃ** samudayasaccaṃ. Hetuvacanena pana phalasiddhito tesam phalāni nirodhasaccadukkhasaccānīpi vuttāneva honti. Evam sacchikātabbaṃ sacchikatam pariññātabbaṃ pariññātanti idampettha saṅgahitanti catusaccabhāvanāphalañca vimuttiñca dassento “bujjhitaṃ bujjhitvā buddho jātosmī”ti yuttahetunā buddhabhāvaṃ sādheti.

Evam nippariyāyena attānaṃ āvikatvā attani kaṅkhāvitaraṇattham brāhmaṇam aticāriyamāno **vinayassūti** gāthattayamāha. Tattha **sallakattoti** rāgādisallakantano. **Anuttaroti** yathā bāhiravejjena vūpasamitarogo imasmiñnevattabhāve kuppāti, na evam. Mayā vūpasamitassa pana rogassa bhavantarepi uppatti natthi, tasmā aham anuttaroti attho. **Brahmabhūtoti** seṭṭhabhūto. **Atituloti** tulaṃ atīto, nirupamoti attho. **Mārasenappamaddanoti** kāmā te paṭhamā senāti evam āgatāya mārasenāya pamaddano. **Sabbāmitteti** khandhakilesābhisaṅkhāramaccudevaputtamārasaṅkhāte sabbapaccatthike. **Vasīkatvāti** attano vase vattetvā. **Akutobhayoti** kutoci abhayo.

Evam vutte selo brāhmaṇo tāvadeva bhagavati sañjātapasādo pabbajjāpekkho hutvā **imaṃ bhontoti** gāthattayamāha. Tattha **kaṇhābhijātikoti** caṇḍālādīnīcakule jāto. Tato tepi māṇavakā pabbajjāpekkhā hutvā **evañce ruccati, bhototi** gāthamāhamsu. Atha selo tesu māṇavakesu tuṭṭhacitto te ca dassento pabbajjam yācanto “**brāhmaṇā**”ti gāthamāha.

Tato bhagavā yasmā selo atīte padumuttarassa bhagavato sāsane tesameva tiṇṇam purisasatānaṃ gaṇasetṭho hutvā tehi saddhiṃ pariveṇam kāretvā dānādīni puññāni katvā tena kamma devamanussasampattiṃ anubhavamāno pacchime bhava tesameva ācariyo hutvā nibbato, tañca tesam kammaṃ vimuttiparipākāya paripakkaṃ ehibhikkhubhāvassa ca upanissayabhūtam, tasmā te sabbeva ehibhikkhupabbajjam pabbājento **svākkhātanti** gāthamāha. Tattha **sandiṭṭhikanti** sayameva daṭṭhabbaṃ paccakkham. **Akālīkanti** maggānantaraphaluppattiyā na kālantarāṃ pattabbaphalaṃ. **Yattha amoghāti** yasmim maggabrahmacariye appamattassa sikkhattayapūraṇena sikkhato pabbajjā amoghā hoti, saphalāti attho. Evañca vatvā “etha bhikkhavo”ti bhagavā avoca. Te sabbe pattacīvaradharā hutvā ākāsenāgantvā vassasatikattherā viya suvinītā bhagavantam abhivādayimsu. Evamimaṃ tesam ehibhikkhubhāvaṃ sandhāya “alatta kho selo”tiādi vuttam.

400. Imāhīti imāhi keṇiyassa cittānukūlāhi gāthāhi. Tattha aggiparicariyaṃ vinā brāhmaṇānaṃ yaññābhāvato “aggihuttamukhā yaññā”ti vuttam. Aggihuttasetṭhā aggijuhanappadhānāti attho. Vede sajjhāyantehi paṭhamam sajjhāyitabbato, sāvittī, “chandaso mukha”nti vutto. Manussānaṃ seṭṭhato rājā “mukha”nti vutto. Nadīnaṃ ādhārato paṭisaraṇato ca sāgaro “mukha”nti vutto. Candayogavasena “ajja kattikā ajja rohiṇī”ti saññāṇato ālokakaraṇato sommabhāvato ca “nakkhattānaṃ mukham cando”ti vuttam. Tapantānaṃ aggattā ādicco “tapatam mukha”nti vutto. Dakkhiṇeyyānaṃ pana aggattā visesena tasmim samaye buddhappamukham saṅgham sandhāya “puññam ākāṅkhamānānaṃ, saṅgho eva yajataṃ mukha”nti vuttam. Tena saṅgho puññassa āyamukhanti dasseti.

Yaṃ taṃ **saraṇanti** aññaṃ byākaraṇagāthamāha. Tassattho – pañcahi cakkhūhi cakkhumā bhagavā

yasmā mayam ito aṭṭhame divase tam saraṇam āgatamhā, tasmā attanā tava sāsane anuttarena damathena dantāmhā, aho te saraṇassa ānubhāvoti.

Tato param bhagavantam dvīhi gāthāhi thometvā tatiyāya vandanaṃ yācanto **bhikkhavo tisatā imetiādimāhāti.**

Papañcasūdaniyā majjhimanikāyaṭṭhakathāya

Selasuttavaṇṇanā niṭṭhitā.

3. Assalāyanasuttavaṇṇanā

401. Evaṃ me sutanti assalāyanasuttam. Tattha nānāverajjakānanti āngamagadhādīhi nānappakārehi verajjehi āgatānaṃ, tesu vā raṭṭhesu jātasamvaddhānantipi attho. **Kenacidevāti** yaññupāsanaḍḍinā aniyamitakiccena. **Cātuvaṇṇinti** catuvaṇṇasādhāraṇam. Mayam pana nhānasuddhiyā bhāvanāsuddhiyāpi brāhmaṇāva sujñantīti vadāma, ayuttampi samaṇo gotamo karotīti maññamānā evaṃ cintayimsu. **Vuttasiroti** vāpitasiro.

Dhammavādīti sabhāvavādī. **Duppaṭimantiyāti** amhādisehi adhammavādīhi dukkhena paṭimantitabbā honti. Dhammavādino nāma parājayo na sakkā kātunti dasseti. **Paribbājakanti** pabbajjāvidhānaṃ, tayo vede uggahetvā sabbapacchā pabbajantā yehi mantehi pabbajanti, pabbajitā ca ye mante pariharanti, yaṃ vā ācāraṃ ācaranti, tam sabbaṃ bhotā caritaṃ sikkhitam. Tasmā tuyham parājayo natthi, jayova bhavissatīti maññantā evamāhaṃsu.

402. Dissanti kho panātiādi tesam laddhibhindanattham vuttam. Tattha **brāhmaṇiyoti** brāhmaṇānaṃ puttapaṭilābhatthāya āvāhavivāhavasena kulā ānītā brāhmaṇiyoti dissanti. Tā kho panetā aparena samayena **utuniyopi** honti, sañjātapupphāti attho. **Gabbhiniyoti** sañjātagabbhā. **Vijāyamānāti** puttadhītarō janayamānā. **Pāyamānāti** dārake thaññaṃ pāyantiyo. **Yonijāva samānāti** brāhmaṇīnaṃ passāvamaggena jātā samānā. **Evamāhaṃsūti** evaṃ vadanti. Katham? **Brāhmaṇova seṭṭho vaṇṇo... pe... brahmadāyādāti.** Yadi pana nesam saccavacanaṃ siyā, brāhmaṇīnaṃ kucchi mahābrahmuno uro bhaveyya, brāhmaṇīnaṃ passāvamagga mahābrahmuno mukham bhaveyya, ettāvata “mayam mahābrahmuno ure vasitvā mukhato nikkhantā”ti vattum mā labhantūti ayaṃ mukhato jātacchedakavādo vutto.

403. Ayyo hutvā dāso hoti, dāso hutvā ayyo hotīti brāhmaṇo sabhariyo vaṇijjam payojento yonakaraṭṭham vā kambojaraṭṭham vā gantvā kālam karoti, tassa gehe vayappatte putte asati brāhmaṇī dāsena vā kammakarena vā saddhiṃ samvāsam kappeti. Ekasmiṃ dārake jāte so puriso dāsova hoti, tassa jātadārako pana dāyajjasāmiko hoti. Mātito suddho pitito asuddho so vaṇijjam payojento majjhimapadesam gantvā brāhmaṇadārikaṃ gahetvā tassā kucchismiṃ puttam paṭilabhati, sopi mātitova suddho hoti pitito asuddho. Evaṃ brāhmaṇasamayasmīññeva jātisambhedo hotīti dassanatthametam vuttam. **Kim balaṃ, ko assāsoti** yattha tumhe dāsā hontā sabbeva dāsā hotha, ayyā hontā sabbeva ayyā hotha, ettha vo ko thāmo, ko avassayo, yaṃ brāhmaṇova seṭṭho vaṇṇoti vadathāti dīpeti.

404. Khattiyova nu khotiādayo suttacchedakavādā nāma honti.

408. Idāni cātuvaṇṇisuddhiṃ dassento **idha rājātiādimāha. Sāpānadoṇiyāti** sunakhānaṃ pivanadoṇiyā. **Aggikaraṇiyanti** sītavinodanaandhakāraḍḍihamanabhattapacānādi aggikiccaṃ. **Ettha assalāyanāti** ettha sabbasmiṃ aggikiccaṃ karonte.

409. Idāni yadetaṃ brāhmaṇā cātuvaṇṇisuddhīti vadanti, ettha cātuvaṇṇāti niyamo natthi. Pañcamo

hi pādasikavaṇṇopi atthīti saṃkhittena tesam vāde dosadassanattam **idha khattiyakumāro**tiādīmāha. Tatra **amutra ca panesānanti** amusmiṅca pana purimanaye etesam māṇavakānaṃ kiñci nānākaraṇaṃ na passāmīti vadati. Nānākaraṇaṃ pana tesampi atthiyeva. Khattiyakumārassa hi brāhmaṇakaññāya uppanno khattiyapādasiko nāma, itaro brāhmaṇapādasiko nāma, ete hīnajātīmāṇavakā.

Evam pañcamassa vaṇṇassa atthitāya cātuvāṇṇisuddhīti etesam vāde dosaṃ dassetvā idāni puna cātuvāṇṇisuddhiyaṃ ovadanto **taṃ kiṃ maññasīti**ādīmāha. Tattha **saddheti** matakabhatte. **Thālipāketi** paṇṇākārabhatte. **Yaññeti** yaññabhatte. **Pāhuneti** āgantukānaṃ katabhatte. **Kiṃ hīti** kiṃ mahapphalaṃ bhavissati, no bhavissatīti dīpeti.

410. Bhūtapubbanti assalāyana pubbe mayi jātiyā hīnatare tumhe seṭṭhatarā samānāpi mayā jātivāde pañhaṃ puṭṭhā sampādetuṃ na sakkhittha, idāni tumhe hīnatarā hutvā mayā seṭṭhatarena buddhānaṃ sake jātivādapañhaṃ puṭṭhā kiṃ sampādessatha? Na ettha cintā kātābbāti māṇavaṃ upatthambhento imaṃ desanaṃ ārabhi. Tattha **asitoti** kāḷako. **Devaloti** tassa nāmaṃ, ayameva bhagavā tena samayena. **Paṭaliyoti** gaṇaṅgaṇupāhanā. **Patthaṇḍileti** paṇṇasālapariveṇe. **Ko nu khoti** kahaṃ nu kho. **Gāmaṇḍalarūpo viyāti** gāmadārakarūpo viya. **So khvāhaṃ, bho, homīti** so ahaṃ, bho, asitadevalo homīti vadati. Tadā kira mahāsatto koṇḍadamako hutvā vicarati. **Abhivādetuṃ upakkamimsūti** vandituṃ upakkamaṃ akaṃsu. Tato paṭṭhāya ca vassasatikatāpasopi tadahujātaṃ brāhmaṇakumāraṃ avandanto koṇḍito hoti.

411. Janikā mātāti yāya tumhe janitā, sā vo janikā mātā. **Janikāmātūti** janikāya mātu. **Yo janakoti** yo janako pitā. “Yo janiko pitāteva” vā pāṭho.

Asitenāti pañcābhiññena asitena devalena isinā imaṃ gandhabbapañhaṃ puṭṭhā na sampāyissanti. **Yesanti** yesaṃ sattannaṃ isīnaṃ. **Na puṇṇo dabbigāhoti** tesam sattannaṃ isīnaṃ dabbim gahetvā paṇṇaṃ pacitvā dāyako puṇṇo nāma eko ahosi, so dabbigahaṇasippaṃ jānāti. Tvaṃ sācariyako tesam puṇṇopi na hoti, tena nītaṃ dabbigahaṇasippamattampi na jānāsīti. Sesam sabbattha uttānamevāti.

Ayaṃ pana assalāyano saddho ahosi pasanno, attano antonivesaneyeva cetiyaṃ kāresi. Yāvajjadivasā assalāyanavaṃse jātā nivesanaṃ kāretvā antonivesane cetiyaṃ karontevāti.

Papañcasūdaniyā majjhimanikāyaṭṭhakathāya

Assalāyanasuttavaṇṇanā niṭṭhitā.

4. Ghoṭamukhasuttavaṇṇanā

412. Evaṃ me sutanti ghoṭamukhasuttaṃ. Tattha **khemiyambavaneti** evaṃnāmake ambavane. **Dhammiko paribbajoti** dhammikā pabbajjā. **Adassanāti** tumhādisānaṃ vā paṇḍitānaṃ adassanena. **Yo vā panettha dhammoti** yo vā pana ettha dhammo sabhāvo, tasseva vā adassanena. Iminā “amhākaṃ kathā appamānaṃ, dhammova pamāṇa”nti dasseti. Tato thero “navauposathāgāre viya bahunā kammena idha bhavitabba”nti cintetvā caṅkamā oruyha paṇṇasālaṃ pavisitvā nisīdi. Taṃ dassetuṃ **evaṃ vutteti**ādi vuttaṃ.

413. Cattārome brāhmaṇāti therassa kira etadahosi – “ayaṃ brāhmaṇo ‘dhammikaṃ pabbajjaṃ upagato samaṇo vā brāhmaṇo vā natthī’ti vadati. Imassa cattāro puggale dve ca parisā dassetvā ‘catutthaṃ puggalaṃ katarāya parisāya bahulaṃ passasī’ti pucchissāmi, jānamāno ‘anāgāriyaparisāya’nti vakkhati. Evametam sakamukheneva ‘dhammiko paribbajo atthī’ti vadāpessāmi’ti imaṃ desanaṃ ārabhi.

414. Tattha **sārattarattā** suṭṭhu rattarattā. **Sānuggahā vācā bhāsītā** sakāraṇā vācā bhāsītā. Vuttañhetam mayā “amhākaṃ kathā appamaṇaṃ, dhammova pamāṇa”nti.

421. Kiṃ pana teti gihi nāma kappiyampi akappiyampi vadeyyāti vivecanattham pucchi. **Kārāpesīti** māpesi. Kārāpetvā ca pana kālaṃ katvā sagge nibbatto. Etassa kira jānanasippe mātarampi pitarampi ghātetvā attāva ghātetabboti āgacchati. Etaṃ sippam jānanto ṭhapetvā etaṃ añño sagge nibbatto nāma natthi, esa pana theram upanissāya puññaṃ katvā tattha nibbattitvā ca pana “kenāham kamma idha nibbatto”ti āvajjetvā yathābhūtaṃ ñatvā ekadivasam jīṇṇāya bhojanasālāya paṭisaṅkharattham saṅghe sannipatite manussavesena āgantvā pucchi – “kimattham, bhante, saṅgho sannipatito”ti? Bhojanasālāya paṭisaṅkharatthanti. Kenesā kāritāti? Ghoṭamukhenāti. Idāni so kuhinti? Kālaṅkatoti. Atthi panassa koci ñātakoti? Atthi ekā bhaginīti. Pakkosāpetha nanti. Bhikkhū pakkosāpesuṃ. So taṃ upasaṅkamitvā – “ahaṃ, tava bhātā, ghoṭamukho nāma imaṃ sālaṃ kāretvā sagge nibbatto, asuke ca asuke ca ṭhāne mayā ṭhapitaṃ dhanam atthi, taṃ gahetvā imaṅca bhojanasālaṃ kārehi, dārake ca posehī”ti vatvā bhikkhusaṅgham vanditvā vehāsam uppatitvā devalokameva agamāsi. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Ghoṭamukhasuttavaṇṇanā niṭṭhitā.

5. Caṅkīsuttavaṇṇanā

422. Evaṃ me sutanti caṅkīsuttaṃ. Tattha **devavane sālavaneti** tasmim kira devatānaṃ balikammaṃ karīyati, tena taṃ devavanantipi sālavanantipi vuccati. **Opāsādam ajjhāvasatīti** opāsādanāmake brāhmaṇagāme vasati, abhibhavitvā vā āvasati, tassa sāmī hutvā yāya mariyādāya tattha vasitabbaṃ, tāya mariyādāya vasati. Upasaggavasena panettha bhummatthe upayogavacanam veditabbaṃ, tathassa anuppayogattāva sesapadesu. Tattha lakkhaṇaṃ saddasatthato pariyesitabbaṃ. **Sattussadanti** sattehi ussadaṃ ussannaṃ, bahujaṇaṃ ākiṇṇamanussaṃ posāvaniyahatthiassamoramigādianekasattasamākiṇṇañcāti attho. Yasmā pana so gāmo bahi āvijjhivā jātena hatthiassādīnaṃ ghāsatiṇena ceva gehacchadanatiṇena ca sampanno, tathā dārukaṭṭhehi ceva gehasambhārakaṭṭhehi ca, yasmā cassa abbhantare vaṭṭacaturassādīsaṅṭhānā bahū pokkharāṇiyo, jalajakusumavicittāni ca bahi anekāni taḷākāni vā udakassa niccabharitāneva honti, tasmā **satiṇakaṭṭhodakanti** vuttaṃ.

Saha dhañña **sadhaññaṃ**, pubbaṇṇāparaṇṇādibhedam bahudhaññasannicayanti attho. Ettāvataṃ yasmim gāme brāhmaṇo setacchattaṃ ussāpetvā rājalīlāya vasati. Tassa samiddhisampatti dīpitā hoti. Rājato laddham bhoggaṃ **rājabhoggaṃ**. Kena dinnanti ce, **raññā pasenadinā kosalena dinnam**. **Rājadāyanti** rañño dāyabhūtaṃ, dāyajjanti attho. **Brahmadeyyanti** seṭṭhadeyyam, chattaṃ ussāpetvā rājasāṅkhepena bhuñjitabbanti attho. Atha vā **rājabhoggaṃ** sabbam chejjabhejjaṃ anusāsantena tīṭhapabbatādīsu suṅkaṃ gaṇhantena setacchattaṃ ussāpetvā raññā hutvā bhuñjitabbaṃ. Tattha **raññā pasenadinā kosalena dinnam rājadāyanti**. Ettha raññā dinnattā rājadāyam, dāyakarājadīpanattham panassa “raññā pasenadinā kosalena dinna”nti idaṃ vuttaṃ. **Brahmadeyyanti** seṭṭhadeyyam, yathā dinnam na puna gahetabbaṃ hoti nissatṭhapariccattaṃ, evam dinnanti attho.

423. Bahū bahū hutvā saṃhatāti saṅghā. Ekekissā disāya saṅgho tesam atthīti **saṅghī**. Pubbe gāmassa anto agaṇā bahi nikkhamitvā gaṇā sampannāti **gaṇibhūtā**. **Uttarenamukhāti** uttaradisābhimukhā. **Khattam āmantesi**ti khattā vuccati pucchitapañhabyākaraṇasamattho mahāmatto, taṃ āmantesi. **Āgamentūti** muhuttaṃ paṭimānentu, acchantūti vuttaṃ hoti.

424. Nānāverajjakānanti nānāvidhesu rajjesu aññesu kāsikosalādīsu jātā vā nivasanti vā, tato vā āgatāti nānāverajjakā, tesam nānāverajjakānaṃ. **Kenacidevāti** aniyamitena yaññupāsānadinā kenaci

kiccena. Te tassa gamanaṃ sutvā cintesuṃ – “ayaṃ, caṅkī, uggatabrāhmaṇo, yebhuyyena ca aññe brāhmaṇā samaṇaṃ gotamaṃ saraṇaṃ gatā, ayameva na gato. Svāyaṃ sace tattha gamissati, addhā samaṇassa gotamassa āvaṭṭaniyā māyāya āvaṭṭito saraṇaṃ gamissati. Tato etassāpi gehadvāre brāhmaṇānaṃ asannipāto bhavissati. Handassa gamanantarāyaṃ karomā”ti sammantayitvā tattha agamaṃsu. Taṃ sandhāya “atha kho te brāhmaṇā”tiādi vuttaṃ.

Tattha **ubhatoti** dvīhi pakkhehi. **Mātito ca pitito cāti**, bhoto mātā brāhmaṇī, mātumātā brāhmaṇī, tassāpi mātā brāhmaṇī. Pitā brāhmaṇo, pitupitā brāhmaṇo, tassāpi pitā brāhmaṇoti. Evaṃ bhavaṃ ubhato sujāto, mātito ca pitito ca. **Samsuddhagahaṇikoti** saṃsuddhā te mātu gahaṇī, saṃsuddhā te mātu kucchīti attho. **Yāva sattamā pitāmahayugāti** ettha pitu pitā pitāmaho, pitāmahassa yugaṃ pitāmahayugaṃ. **Yuganti** āyuppamāṇaṃ vuccati. Abhilāpamattameva cetam, atthato pana pitāmahova pitāmahayugaṃ. Tato uddhaṃ sabbepi pubbapurisā pitāmahaggahaṇeneva gahitā. Evaṃ yāva sattamo puriso, tāva saṃsuddhagahaṇiko. Atha vā akkhitto anupakuṭṭho jātivādenāti dasseti. **Akkhittoti** apanetha etaṃ, kiṃ imināti evaṃ akkhitto anavakkhitto. **Anupakuṭṭhoti** na upakuṭṭho, na akkosam vā nindaṃ vā pattapubbo. Kena kāraṇenāti. Jātivādena, itipi hīnajātiko esoti evarūpena vacanenāti attho. **Imināpaṅgenāti** imināpi kāraṇena.

Adḍhoti issaro. **Mahaddhanoti** mahatā dhanena samannāgato. Bhoto hi gehe pathaviyaṃ paṃsuvālikā viya bahu dhanam, samaṇo pana gotamo adhana bhikkhāya udaraṃ pūretvā yāpetīti dassenti. **Mahābhogoti** pañcakāmaguṇavasena mahāupabhogo. Evaṃ yaṃ yaṃ guṇaṃ vadanti, tassa tassa paṭipakkhavasena bhagavato agūṇaṃyeva dassemāti maññamānā vadanti.

Abhirūpoti aññehi manussehi adhikarūpo. **Dassanīyoti** divasampi passantānaṃ atittikaraṇato dassanayoggo, dassaneneva cittapasādajananato **pāsādiko**. Pokkharatā vuccati sundarabhāvo, vaṇṇassa pokkharatā vaṇṇapokkharatā, tāya **vaṇṇapokkharatāya**, vaṇṇasampattiyāti attho. Porāṇā pana **pokkharanti** sarīraṃ vadanti, vaṇṇaṃ vaṇṇameva. Tesam matena vaṇṇo ca pokkharāñca vaṇṇapokkharāni, tesam bhāvo vaṇṇapokkharatā. Iti **paramāya vaṇṇapokkharatāyāti** uttamaparisuddhena vaṇṇena ceva sarīrasaṅghānasampattiyā cāti attho. **Brahmavaṇṇīti** seṭṭhavaṇṇī, parisuddhavaṇṇesupi seṭṭhena suvaṇṇavaṇṇeneva samannāgatoti attho. **Brahmavacchasīti** mahābrahmuno sarīrasadisena sarīrena samannāgato. **Akhuddāvākāso dassanāyāti** bhoto sarīre dassanassa okāso na khuddako mahā. Sabbāneva te aṅgapaccaṅgāni dassanīyāneva, tāni cāpi mahantānevāti dīpeti.

Sīlamassa atthīti **sīlavā**. Vuddhaṃ vaḍḍhitaṃ sīlamassāti **vuddhasīlī**. **Vuddhasīlenāti** vuddhena vaḍḍhitena sīlena. **Samannāgatoti** yutto, idaṃ vuddhasīlipadasseva vevacanaṃ. Sabbametaṃ pañcasīlamattameva sandhāya vadanti.

Kālyāṇavācotiādīsu kalyāṇā sundarā parimaṇḍalapadabyañjanā vācā assāti kalyāṇavāco. Kalyāṇaṃ madhuraṃ vākkaraṇaṃ assāti **kalyāṇavākkaraṇo**. Vākkaraṇanti udāharaṇaghoso. Guṇaparipuṇṇabhāvena pure bhavāti **porī**. Pure vā bhavattā porī. Nāgarikitthiyā sukhumālattanena sadisātipi porī. Tāya **poriyā**. **Vissatṭhāyāti** apalibuddhāya, sandiṭṭhivilambitādidosarahitāya. **Anelagalāyāti** elagalena virahitāya. Ekaccassa hi kathentassa elam galati, lālā vā paggharati, kheḷaphusitāni vā nikkhamanti, tassa vācā elagalā nāma hoti. Tabbiparitāyāti attho. **Atthassa viññāpaniyāti**ādīmajjhāpariyosānaṃ pākaṭaṃ katvā bhāsitatthassa viññāpanasamatthāya. Sesamettha brāhmaṇavaṇṇe uttānameva.

425. Evaṃ vutteti evaṃ tehi brāhmaṇehi vutte, caṅkī, “ime brāhmaṇā attano vaṇṇe vuccamāne atussanakasatto nāma natthi, vaṇṇamassa bhaṇitvā nivāressāmāti jātiādīhi mama vaṇṇaṃ vadanti, na kho pana me yuttaṃ attano vaṇṇe rajjituṃ. Handāhaṃ etesaṃ vādaṃ bhinditvā samaṇassa gotamassa mahantabhāvaṃ nīpetvā etesaṃ tattha gamanaṃ karomī”ti cintetvā **tena hi, bho, mamāpi suṇāthā**tiādīmāha. Tattha yepi “ubhato sujāto”tiādayo attano guṇehi sadisā guṇā, tepi “ko cāhaṃ, ke

ca samaṇassa gotamassa jātisampattiādayo guṇā’’ti attano guṇehi uttaritareyeva maññamāno, itare pana ekanteneva bhagavato mahantabhāvadīpanatthaṃ pakāseti. **Mayameva arahāmāti** evaṃ niyamento cettha idaṃ dīpeti – yadi guṇamahantatāya upasaṅkamitabbo nāma hoti, yathā sineruṃ upanidhāya sāsapo, mahāsamuddaṃ upanidhāya gopadakaṃ, sattu mahāsaesu udakaṃ upanidhāya ussāvabindu paritto lāmakō, evamevaṃ samaṇassa gotamassa jātisampattiādayo guṇe upanidhāya amhākaṃ guṇā parittā lāmakā, tasmā mayameva arahāma taṃ bhavantaṃ gotamaṃ dassanāya upasaṅkamitunti.

Bhūmigatañca vehāsaṭṭhañcāti ettha rājaṅgaṇe ceva uyyāne ca sudhāmaṭṭhā pokkharāṇiyo sattaratanapūriṃ katvā bhūmiyaṃ ṭhapitaṃ dhanam bhūmigataṃ nāma, pāsādaniyūhādayo pana pūretvā ṭhapitaṃ vehāsaṭṭhaṃ nāma. Evaṃ tāva kulapariyāyena āgataṃ. Tathāgatassa pana jātadivaseyeva saṅkho elo uppalo puṇḍarikoti cattāro nidhayo upagatā. Tesu saṅkho gāvutiko, elo aḍḍhajojaniko, uppalo tigāvutiko puṇḍarīko yojanikoti. Tesupi gahitagahitaṭṭhānaṃ pūratiyeva. Iti bhagavā pahūtaṃ hiraññasuvaṇṇaṃ ohāya pabbajitoti veditabbo. **Daharo vāti**ādīni heṭṭhā vitthāritāneva.

Akhuddāvakaṣoti ettha bhagavati aparimāṇoyeva dassanāvakaṣoti veditabbo. Tatridaṃ vatthum – rājagahe kira aññataro brāhmaṇo “samaṇassa kira gotamassa pamāṇaṃ gahetuṃ na sakkā’’ti sutvā bhagavato piṇḍāya pavisanakāle saṭṭhihatthaṃ veḷum gahetvā nagaradvārassa bahi ṭhatvā sampatte bhagavati veḷum gahetvā samīpe aṭṭhāsi, veḷu bhagavato jāṇumattaṃ pāpuṇi. Punadivase dve veḷū ghaṭetvā samīpe aṭṭhāsi, bhagavā dvinnaṃ veḷūnaṃ upari dviveṇumattameva paññāyamāno, “brāhmaṇa, kiṃ karosī’’ti āha? Tumhākaṃ pamāṇaṃ gaṇhāmīti. “Brāhmaṇa, sacepi tvaṃ sakalacakkavālagabbhaṃ pūretvā ṭhitaveḷum ghaṭetvā āgamissasi, neva me pamāṇaṃ gahetuṃ sakkhissasi. Na hi mayā cattāri asaṅkhyeyyāni kappasatasahassañca tathā pāramiyo pūritā, yathā me paro pamāṇaṃ gaṇheyya, atulo brāhmaṇa, tathāgato appameyyo’’ti vatvā dhammapade gāthamāha. Gāthāpariyosāne caturāsītipāṇasahassāni amataṃ pivimsu.

Aparampi vatthu – rāhu kira asurindo cattāri yojanasahassāni aṭṭha ca yojanasatāni ucco, bāhantaramassa dvādasayojanasatāni, hatthatalapādatalānaṃ puthulatā tīṇi yojanasatāni, aṅgulipabbāni paṇṇāsayojanāni, bhamukantaraṃ paṇṇāsayojanaṃ, nalātaṃ tiyojanasataṃ, sīsaṃ navayojanasataṃ. So – “ahaṃ uccosmi, satthāraṃ onamitvā oloketuṃ na sakkhissāmī’’ti na gacchati. So ekadivasaṃ bhagavato vaṇṇaṃ sutvā “yathā kathaṇca olokessāmī’’ti āgato. Bhagavā tassa ajjhāsayam viditvā “catūsu iriyāpathesu katarena dassamī’’ti cintevā “ṭhitako nāma nicopi ucco viya paññāyati, nipannovassa attānaṃ dassessāmī’’ti, “ānanda, gandhakuṭipariveṇe mañcakaṃ paññāpehī’’ti vatvā tattha sīhaseyyaṃ kappesi. Rāhu āgantvā nipannaṃ bhagavantaṃ gīvaṃ unnāmetvā nabhamajje puṇṇacandaṃ viya ulloketi. Kimidaṃ asurindāti ca vutte, bhagavā onamitvā oloketuṃ na sakkhissāmīti na gacchinti. Na mayā asurinda adhomukhena pāramiyo pūritā, uddhaggaṃ me katvā dānaṃ dinnanti. Taṃdivasaṃ rāhu saraṇaṃ agamāsi. Evaṃ bhagavā akhuddāvakaṣo dassanāya.

Catupārisuddhisīlena **sīlavā**. Taṃ pana sīlaṃ ariyaṃ uttamaṃ parisuddhaṃ, tenāha **ariyasīlīti**. Tadeva anavajjattṭhena kusalaṃ, tenāha **kusalasīlīti**. **Kusalena sīlenāti** idamassa vevacanaṃ. **Bahūnaṃ ācariyapācariyoti** bhagavato ekekāya dhammadesanāya caturāsītipāṇasahassāni aparimāṇāpi devamanussā maggaphalāmetaṃ pivanti. Tasmā bahūnaṃ ācariyo, sāvakaṃveyyānaṃ pācariyoti.

Khīṇakāmarāgoti ettha kāmaṃ bhagavato sabbepi kilesā khīṇā, brāhmaṇo pana te na jānāti, attano jānanaṭṭhāneyeva guṇaṃ katheti. **Vigatacāpalloti** “pattamaṇḍanā cīvaramaṇḍanā senāsanamaṇḍanā imassa vā pūtikāyassa...pe... kelanā paṭikelanā’’ti evaṃ vuttacāpalyavirahito.

Apāpapurekkhāroti apāpe navalokuttaradhamme purato katvā vicarati. **Brahmaññāya pajāyāti** sārīputtamoggallānamahākassapādibhedāya brāhmaṇapajāya. (Aviruddho hi so) etissāya pajāya purekkhāro. Ayañhi pajā samaṇaṃ gotamaṃ purato katvā caratīti attho. Apica **apāpapurekkhāroti** na pāpupurekkhāro, na pāpaṃ purato katvā caratī, pāpaṃ na icchatīti attho. Kassa? **Brahmaññāya pajāya**

attanā saddhiṃ paṭiviruddhāyapi brāhmaṇapajāya aviruddho hitasukhatthikoyevāti vuttaṃ hoti.

Tiroraṭṭhāti pararaṭṭhato. **Tirojanapadā**ti parajanapadato. **Saṃpucchitaṃ āgacchantī**ti khattiyapaṇḍitādayo ceva brāhmaṇagandhabbādayo ca pañhe abhisankharitvā pucchissāmāti āgacchanti. Tattha keci pucchāya vā dosaṃ vissajjanasampaticchane vā asamattataṃ sallakkhetvā apucchitvāva tuṅhī nisīdanti, keci pucchanti, kesañci bhagavā pucchāya ussāhaṃ janetvā vissajjeti. Evaṃ sabbesampi tesam vimatiyo tīraṃ patvā mahāsamuddassa ūmiyo viya bhagavantaṃ patvāva bhijjanti. Sesamettha tathāgatassa vaṇṇe uttānameva.

Atithī no te hontīti te amhākaṃ āgantukā navakā pāhunakā hontīti attho. **Pariyāpuṇāmī**ti jānāmi. **Aparimāṇavaṇṇoti** tathārūpeneva sabbaññunāpi appameyyavaṇṇo, pageva mādisenāti dasseti. Vuttampi cetam –

“Buddhopi buddhassa bhaṇeyya vaṇṇaṃ,
Kappampi ce aññaṃabhāsamāno;
Khīyetha kappo ciradīghamantare,
Vaṇṇo na khīyetha tathāgatassā”ti.

Imaṃ pana guṇakathaṃ sutvā te brāhmaṇā cintayimṣu “yathā, caṅkī, samaṇassa gotamassa vaṇṇaṃ bhāsati, anomaguṇo so bhavaṃ gotamo, evaṃ tassa guṇe jānamānena kho pana iminā aticiraṃ adhivāsitaṃ, handa naṃ anuvattāmā”ti anuvattamānā “tena hi, bho”tiādīmāṃsu.

426. Opātetīti paveseti. **Saṃpurekkharontī**ti puttamattanattamattampi samānaṃ purato katvā vicaranti.

427. Mantapadanti mantāyeva mantapadaṃ, vedoti attho. **Itihitiha paramparāyāti** evaṃ kira evaṃ kirāti paramparabhāvena āgatanti dīpeti. **Piṭakasampadāyāti** pāvacaṇasaṅkhātasampattiya. Sāvittiādīhi chandabandhehi ca vaggabandhehi ca sampādetvā āgatanti dasseti. **Tattha cāti** tasmim mantapade. **Pavattāroti** pavattayitāro. **Yesanti** yesaṃ santakaṃ. **Mantapadanti** vedasaṅkhātaṃ mantameva. **Gītaṃ** aṭṭhakādīhi dasahi porāṇakabrāhmaṇehi padasampattivaseṇa sajjhāyitaṃ. **Pavuttanti** aññesaṃ vuttaṃ, vācitantī attho. **Samihitanti** samupabyūḷhaṃ rāsikataṃ, piṇḍaṃ katvā ṭhapitanti attho. **Tadanugāyantī**ti etarahi brāhmaṇā taṃ tehi pubbe gītaṃ anugāyanti anusajjhāyanti vādentī. **Tadanubhāsantī**ti taṃ anubhāsanti, idaṃ purimasseva vevacaṇaṃ. **Bhāsītanubhāsantī**ti tehi bhāsitaṃ sajjhāyitaṃ anusajjhāyanti. **Vācītanuvācentī**ti tehi aññesaṃ vācītaṃ anuvācentī. **Seyyathidanti** te katameti attho. **Aṭṭhakoti**ādīni tesam nāmāni, te kira dibbena cakkhunā oloketvā parūpaghātaṃ akatvā kassapasammāsambuddhassa bhagavato pāvacaṇena saha saṃsandetvā mante ganthesuṃ, aparāpare pana brāhmaṇā paṇātipātādīni pakkhipitvā tayo vede bhinditvā buddhavacaṇena saddhiṃ viruddhe akāṃsu.

428. Andhavenīti andhapaveṇī. Ekena hi cakkhumatā gahitayaṭṭhiyā koṭiṃ eko andho gaṇhāti, taṃ andhaṃ añño, taṃ aññoti evaṃ paṇṇāsa satṭhi andhā paṭipāṭiyā ghaṭitā andhavenīti vuccati.

Paramparāsaṃsattāti aññaṃaññaṃ laggā, yaṭṭhiggāhakenapi cakkhumatā virahitāti attho. Eko kira dhutto andhagaṇaṃ disvā “asukasmim nāma gāme khajjabhojjaṃ sulabha”nti ussāhetvā tehi “tattha no sāmī nehi, idaṃ nāma te demā”ti vutte lañjaṃ gahetvā antarāmagge maggā okkamma mahantaṃ gacchaṃ anuparigantvā purimassa hatthena pacchimassa kacchaṃ gaṇhāpetvā “kiñci kammaṃ atthi, gacchatha tāva tumhe”ti vatvā palāyi. Te divasampi gantvā maggaṃ avindamānā “kahaṃ, bho, cakkhumā kahaṃ maggo”ti paridevitvā maggaṃ avindamānā tattheva mariṃsu. Te sandhāya vuttaṃ “paramparāsaṃsattā”ti. **Purimopī**ti purimesu dasasu brāhmaṇesu ekopi. **Majjhimopī**ti majjhe ācariyapācariyesu ekopi. **Pacchimopī**ti idāni brāhmaṇesu ekopi.

Pañca khoti pāḷiāgatesu dvīsu aññepi evarūpe tayo pakkhipitvā vadati. **Dvedhāvīpākāti**

bhūtavipākā vā abhūtavipākā vā. **Nālametthāti**, bhāradvāja, saccam anurakkhissāmīti paṭipannena viññunā “yam mayā gahitaṃ, idameva saccam moghamañña”nti ettha ekamseneva niṭṭham gantum nālam na yuttanti upari pucchāya maggaṃ vivarivā ṭhapesi.

430. Idha, bhāradvāja, bhikkhūti jīvakasutte (ma. ni. 2.51 ādayo) viya mahāvaccasutte (ma. ni. 2.193 ādayo) viya ca attānaññeva sandhāya vadati. **Lobhanīyesu dhammesūti** lobhadhammesu. Sesapadadvayepi eseva nayo.

432. Saddham nivesetīti okappaniyasaddham niveseti. **Upasaṅkamatīti** upagacchati. **Payirupāsati**ti santike nisīdati. **Sotanti** pasādasotaṃ odahati. **Dhammanti** desanāddhammaṃ suṇāti. **Dhāretīti** paguṇaṃ katvā dhāreti. **Upaparikkhatīti** atthato ca kāraṇato ca vīmaṃsati. **Nijjhānaṃ khamantīti** olokaṇaṃ khamanti, idha sīlaṃ kathitaṃ, idha samādhīti evaṃ upaṭṭhahantīti attho. **Chandoti** kattukamyatā chando. **Ussahatīti** vāyamaṭi. **Tuletīti** aniccādivasena tīreti. **Padahatīti** maggapadhānaṃ padahati. **Kāyena ceva paramasaccanti** sahaajātanāmakāyena ca nibbānaṃ sacchikaroti, paññāya ca kilese nibbijjhivā tadeva vibhūtaṃ pākaṭaṃ karonto passati.

433. Saccānubodhoti maggānubodho. **Saccānuppattīti** phalāsacchikiriyā. **Tesaṃyevāti** heṭṭhā vuttānaṃ dvādasannaṃ, evaṃ dīghaṃ maggavādaṃ anulometi, tasmā nāyamattho. Ayaṃ panettha attho – **tesaṃyevāti** tesaṃ maggasampayuttadhammānaṃ. **Padhānanti** maggapadhānaṃ. Tañhi phalāsacchikiriyasaṅkhātāya saccānuppattiyā bahukāraṃ, magge asati phalābhāvototi. Iminā nayena sabbapadesu attho vedītabbo. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Caṅkīsuttavaṇṇanā niṭṭhitā.

6. Esukārīsuttavaṇṇanā

437. Evaṃ me sutanti esukārīsuttaṃ. Tattha **bilam olaggeyyunti** koṭṭhāsaṃ laggāpeyyuṃ, iminā satthadhammaṃ nāma dasseti. Satthavāho kira mahākantārapaṭipanno antarāmagge goṇe mate maṃsaṃ gahetvā sabbesaṃ satthikānaṃ “idaṃ khādītvā ettakaṃ mūlaṃ dātabba”nti koṭṭhāsaṃ olaggeti, goṇamaṃsaṃ nāma khādantāpi atthi akhādantāpi, mūlaṃ dātuṃ sakkontāpi asakkontāpi. Satthavāho yena mūlena goṇo gahito, tassa nikkhamanattaṃ sabbesaṃ balakkārena koṭṭhāsaṃ datvā mūlaṃ gaṇhāti, ayaṃ satthadhammo. Evamevaṃ brāhmaṇāpi lokassa paṭiññaṃ aggahetvā attanova dhammatāya catasso pāricariyā paññapentīti dassetuṃ **evameva khoti**ādīmāha. **Pāpiyo assāti** pāpaṃ assa. **Seyyo assāti** hitaṃ assa. Atha vā **pāpiyoti** pāpako lāmako attabhāvo assa. **Seyyoti** seṭṭho uttamo. **Seyyaṃsoti** seyyo. **Uccākulīnatāti** uccākulīnattena seyyo. **Pāpiyaṃsoti** pāpiyo. Uccākulīnatā ca dvīsu kulesu vaḍḍheti khattiyakule brāhmaṇakule ca, ulāravaṇṇatā tīsu. Vessopi hi ulāravaṇṇo hoti. Ulārabhogatā catūsopi. Suddopi hi antamaso caṇḍālopi ulārabhogo hotiyeva.

440. Bhikkhācariyanti koṭṭidhanenapi hi brāhmaṇena bhikkhā caritabbāva, porāṇakabrāhmaṇā asītikōṭṭidhanāpi ekavelaṃ bhikkhaṃ caranti. Kasmā? Duggatakāle carantānaṃ idāni bhikkhaṃ carituṃ āradhāti garahā na bhavissatīti. **Atimaññaṃānoti** yo bhikkhācariyavaṃsaṃ haritvā sattajīvakaṃsikkammavaṇṇijjādīhi jīvikaṃ kappeti, ayaṃ atimaññaṭi nāma. **Gopo vāti** yathā gopako attanā rakkhitabbaṃ bhaṇḍaṃ thenento akiccakārī hoti, evanti attho. Iminā nayena sabbavāresu attho vedītabbo. **Asitabyābhānginti** tiṇalāyanaasitañceva kājañca. **Anussaratoti** yattha jāto, tasmim porāṇe mātāpettike kulavaṃse anussariyamaṇeti attho. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Esukārīsuttavaṇṇanā niṭṭhitā.

7. Dhanañjānisuttavaṇṇanā

445. Evaṃ me sutanti dhanañjānisuttaṃ. Tattha **dakkhiṇāgirisminti girīti** pabbato, rājagahaṃ parikkhipitvā ʘhitapabbatassa dakkhiṇadisābhāge janapadassetam nāmaṃ. **Taṇḍulapālidvārāyāti** rājagahassa kira dvattiṃsamahādvārāni catusaṭṭhikhuddakadvārāni, tesu ekaṃ taṇḍulapālidvāraṃ nāma, taṃ sandhāyevamāha. **Rājānaṃ nissāyāti** “gaccha manusse apīletvā sassabhāgaṃ gaṇhāhi”ti raññā pesito gantvā sabbameva sassaṃ gaṇhāti, “mā no, bhante, nāsehi”ti ca vutte – “rājakule vuttaṃ mandaṃ, ahaṃ raññā āgamanakāleyeva evaṃ āṇatto, mā kanditthā”ti evaṃ rājānaṃ nissāya brāhmaṇagahapatike vilumpati. Dhaññaṃ yebhuyyena attano gharaṃ pavesetvā appakaṃ rājakule paveseti. Kiṃ brāhmaṇagahapatikānaṃ na pīlaṃ akāsīti ca vutto – “āma, mahārāja, imasmim vāre khettāni mandasassāni ahesuṃ, tasmā apīlentassa me gaṇhato na bahuṃ jāta”nti evaṃ brāhmaṇagahapatike nissāya rājānaṃ vilumpati.

446. Payo pīyatanti taruṇakhīraṃ pivatu. **Tāva bhattassāti** yāva khīraṃ pivitvā nisīdissatha, tāvadeva bhattassa kālo bhavissati. Idheva hi no pātarāsabhataṃ āharissantīti dasseti. **Mātāpitarotiādīsu** mahallakā mātāpitaro mudukāni attharaṇapāvuraṇāni sukhumāni vatthāni madhurabhojanaṃ sugandhagandhamālādīni ca pariyesitvā posetabbā. Puttadhītaṃ nāmakaraṇamaṅgalādīni sabbakiccāni karontena puttadāro posetabbo. Evañhi akariyamāne garahā uppajjati iminā nayena attho veditabbo.

447. Adhammacārīti pañca dussīlyakammāni vā dasa dussīlyakammāni vā idha adhammo nāma. **Upakaḍḍheyunti** pañcavidhabandhanādīkammakaraṇatthaṃ taṃ taṃ nirayaṃ kaḍḍheyuṃ.

448. Dhammacārīti dhammikasivavijjādīkammakārī. **Paṭikkamantīti** osaranti parihāyanti. **Abhikkamantīti** abhisaranti vaḍḍhanti. **Seyyoti** varataraṃ. **Hīneti** nihīne lāmake. **Kālaṅkato ca sārīputtāti** idaṃ bhagavā “tatrassa gantvā desehi”ti adhippāyena theramāha. Theropi taṃkhaṇaṃyeva gantvā mahābrahmuno dhammaṃ desesi, tato paṭṭhāya cātuppadikaṃ gāthaṃ kathentopi catusaccavimuttaṃ nāma na kathesīti.

Papañcasūdaniyā majjhimanikāyaṭṭhakathāya

Dhanañjānisuttavaṇṇanā niṭṭhitā.

8. Vāseṭṭhasuttavaṇṇanā

454. Evaṃ me sutanti vāseṭṭhasuttaṃ. Tattha **icchānaṅgalavanasaṇḍeti** icchānaṅgalagāmassa avidūre vanasaṇḍe. **Caṅkīti** ādayo pañcapi janā rañño pasenadissa kosalassa purohitā eva. **Aññe ca abhiññātāti** aññe ca bahū abhiññātā brāhmaṇā. Te kira chaṭṭhe chaṭṭhe māse dvīsu ʘhānesu sannipatanti. Yadā jātiṃ sodhetukāmā honti, tadā pokkharasātissa santike jātisodhanatthaṃ ukkaṭṭhāya sannipatanti. Yadā mante sodhetukāmā honti, tadā icchānaṅgale sannipatanti. Imasmim kāle mantasodhanatthaṃ sannipatiṃsu. **Ayamantarā kathāti** yaṃ attano sahāyakabhāvānurūpaṃ kathaṃ kathentā anuvicariṃsu, tassā kathāya antarā ayamaññā kathā udapādi. **Sīlavāti** guṇavā. **Vattasampannoti** ācārasampanno.

455. Anuññātaṇḍapāṇiññātāti sikkhitā tumheti evaṃ ācariyehi anuññātā, āma ācariya sikkhitamhāti evaṃ sayañca paṇiññātā. **Asmāti** bhavāma. **Ahaṃ pokkharasātissa, tārukkhassāyaṃ māṇavoti** ahaṃ pokkharasātissa jeṭṭhantevāsī aggasisso, ayaṃ tārukkhassāti dīpeti.

Tevijjānanti tivedānaṃ brāhmaṇānaṃ. **Yadakkhātanti** yaṃ atthato ca byañjanato ca ekaṃ padampi akkhātaṃ. **Tatra kevalinosmaseti** taṃ sakalaṃ jānanato tattha niṭṭhāgatamhāti attho. Idāni taṃ kevalibhāvaṃ āvikaronto **padakasmāti**ādīmāha. Tattha **jappe ācariyasādisāti** kathanaṭṭhāne mayam ācariyasādisāyeva.

Kammunāti dasakusalakammaphakammunā. Ayañhi pubbe sattavidhaṃ kāyavacīkammaṃ sandhāya “yato kho, bho, sīlavā hoti”ti āha, tividdhaṃ manokammaṃ sandhāya “vattasampanno”ti. Tena samannāgato hi ācārasampanno hoti. **Cakkhumā**ti pañcahi cakkhūhi cakkhumantabhāvena bhagavantam ālapati.

Khayātītanti ūnabhāvaṃ atītam, paripuññanti attho. **Peccā**ti upagantvā. **Namassantī**ti namo karonti.

Cakkhum loke samuppānanti avijjandhakāre loke tam andhakāraṃ vidhamitvā lokassa diṭṭhadhammikādiatthadassanena cakkhu hutvā samuppānaṃ.

456. Evaṃ vāseṭṭhena thometvā yācito bhagavā dvepi jane saṅgaṇhanto **tesaṃ vo ahaṃ byakkhissanti**ādīmāha. Tattha **byakkhissanti** byākarissāmi. **Anupubbanti** tiṭṭhatu tāva brāhmaṇacintā, tiṇarukkhakīṭapaṅgato paṭṭhāya anupaṭipāṭiyā ācikkhissāmīti attho. **Jātivibhaṅganti** jātivitthāraṃ. **Aññamaññā hi jātiyoti** tesaṃ tesañhi pāṇānaṃ jātiyo aññamaññā nānappakārāti attho.

Tiṇarukkheti anupādinnaḥajātiṃ katvā pacchā upādinnaḥajātiṃ kathessāmi, evaṃ tassa jātibhedo pākaṭo bhavissatīti imaṃ desanaṃ ārabhi. Mahāsīvatthero pana “kiṃ, bhante, anupādinnaḥajātiṃ biṅjanānatāya nānaṃ, upādinnaṃ kammanānatāyāti? Evaṃ vattum na vaṭṭatī”ti pucchito āma na vaṭṭatī. Kammañhi yoniyam khipati. Yonisiddhā ime sattā nānāvāṇṇā hontīti. **Tiṇarukkheti** ettha antopheggū bahisārā antamaso tālanāḷikerādayopi tiṇāneva, antosārā pana bahipheggū sabbe rukkhā nāma. **Na cāpi paṭijānareti** mayam tiṇā mayam rukkhāti vā, aham tiṇam, aham rukkhoti vā evaṃ na jānanti. **Liṅgam jātimayanti** ajānantānampi ca tesaṃ jātimayameva saṅṭhānaṃ attano mūlabhūtatīṇādisadisameva hoti. Kiṃ kārāṇā? **Aññamaññā hi jātiyo.** Yasmā aññā tiṇajāti, aññā rukkhajāti. Tiṇesupi aññā tālajāti, aññā nāḷikerajāti, evaṃ vitthāretabbaṃ. Iminā idaṃ dasseti – yaṃ jātivāsena nānā hoti, tam attano paṭiññaṃ paresam vā upadesam vināpi aññajātīti visesena gayhati. Yadi ca jātiyā brāhmaṇo bhaveyya, sopi attano paṭiññaṃ paresam vā upadesam vinā khattiyato vessato suddato vā visesena gayheyya, na ca gayhati. Tasmā na jātiyā brāhmaṇoti. Parato pana “yathā etāsu jātisū”ti gāthāya etamattham vacībhedeneva āvīkarissati.

Evaṃ anupādinnaḥajātiṃ dassetvā upādinnaḥajātiṃ dassento **tato kīṭeti**ādīmāha. **Yāva kunthakipilliketi** kunthakipillikaṃ pariyantaṃ katvāti attho. Ettha ca ye uppatitvā gacchanti, te paṅgā nāma. **Aññamaññā hi jātiyoti** tesampi nīlarattādivaṇṇavasena jātiyo nānappakārāva honti.

Khuddaketi kāḷakādayo. **Mahallaketi** sasabīḷārādayo.

Pādūdareti udarapāde, udaraṃyeva nesam pādāti vuttaṃ hoti. **Dīghapiṭṭhiketi** sappānañhi sīsato yāva naṅguṭṭhā piṭṭhiyeva hoti, tena te “dīghapiṭṭhikā”ti vuccanti.

Udaketi oḍake, udakamhi jāte.

Pakkhīti sakuṇe. Te hi pattehi yantīti **pattayānā**, vehāsam gacchantīti **vihāṅgamā**.

Evaṃ thalajalākāsagocarānaṃ pāṇānaṃ jātibhedam dassetvā idāni yenādhippāyena tam dasseti, tam āvīkaronto yathā etāsūti gāthamāha. Tassattho saṅkhepena vuttova. Vitthārato panettha yaṃ vattabbaṃ, tam sayameva dassento **na kesehī**tiādīmāha. Tatrāyaṃ yojanā – yaṃ vuttaṃ “natthi manussesu liṅgajātimayaṃ puthū”ti, tam evaṃ natthīti veditabbaṃ. Seyyathidaṃ? **Na kesehī**ti. Na hi – “brāhmaṇānaṃ edisā kesā honti, khattiyānaṃ edisā”ti niyamo atthi yathā hatthiassamigādīnanti iminā nayena sabbaṃ yojetabbaṃ.

Liṅgaṃ jātimayaṃ neva, yathā aññāsu jātisūti idaṃ pana vuttassevatthassa nigamananti veditabbaṃ. Tassāyaṃ yojanā – evaṃ yasmā imehi kesādīhi natthi manussesu liṅgaṃ jātimayaṃ puthu, tasmā veditabbametam “brāhmaṇādibhedesu manussesu liṅgaṃ jātimayaṃ neva, yathā aññāsu jātisū”ti.

457. Idāni evaṃ jātibhede asatipi “brāhmaṇo khattiyō”ti idaṃ nānattaṃ yathā jātaṃ, taṃ dassetaṃ **paccattanti** gāthamāha. Tattha **vokāraṇti** nānattaṃ. Ayaṃ panettha saṅkhepattho – yathā hi tiracchānānaṃ yonisiddhameva kesādisaṅṭhānena nānattaṃ, tathā brāhmaṇādīnaṃ attano attano sarīre taṃ natthi. Evaṃ santepi yadetaṃ “brāhmaṇo khattiyō”ti vokāraṃ, taṃ vokāraṇca manussesu samaññāya pavuccati, vohāramatteneva pavuccatīti.

Ettāvatā bhagavā bhāradvājassa vādaṃ niggaṇhitvā idāni yadi jātiyā brāhmaṇo bhaveyya, ājīvasīlācāravipannopi brāhmaṇo bhaveyya. Yasmā pana porāṇā brāhmaṇā tassa brāhmaṇabhāvaṃ na icchanti, loke ca aññēpi paṇḍitamanussā, tasmā vāsetṭhassa vādaṃ paggaṇhanto **yo hi koci manussesūti** aṭṭha gāthā āha. Tattha **gorakkhanti** khettarakkhaṃ, kasikammanti vuttaṃ hoti. **Goti** hi pathaviyā nāmaṃ, tasmā evamāha. **Puthusippenāti** tantavāyakammādinānāsippena. **Vohāraṇti** vaṇijjaṃ. **Parapessenāti** paresaṃ veyyāvaccakammena. **Issatthanti** āvudhajīvikaṃ, usuṅca satṭiṃ cāti vuttaṃ hoti. **Porohiccenāti** purohitakammena.

Evaṃ brāhmaṇasamayena ca lokavohārena ca ājīvasīlācāravipannassa abrāhmaṇabhāvaṃ sādhetvā evaṃ sante na jātiyā brāhmaṇo, guṇehi pana brāhmaṇo hoti. Tasmā yattha katthaci kule jāto yo guṇavā, so brāhmaṇo, ayamettha ñāyoti evametam ñāyaṃ atthato āpādetvā idāni naṃ vacībhedena pakāsento **na cāhaṃ brāhmaṇanti**ādīmāha. Tassattho – ahañhi yvāyaṃ catunnaṃ yonīnaṃ yattha katthaci jāto, tatrāpi visesena yo brāhmaṇassa saṃvaṇṇitāya mātari sambhūto, taṃ **yonijaṃ mattisambhavaṃ**, yā cāyaṃ ubhato sujātotiādīnā nayena brāhmaṇehi brāhmaṇassa parisuddhauppattimaggasaṅkhātā yoni vuttā, saṃsuddhagaṇṇikoti iminā ca mātisampatti, tatopi jātasambhūtattā yonijo mattisambhavoti vuccati, taṃ **yonijaṃ mattisambhavaṃ** iminā ca yonijamattisambhavamattena na brāhmaṇaṃ brūmi. Kasmā? Yasmā, bho bhoti, vacanamattena aññehi sakiñcanehi viṣiṭṭhattā **bhovādi nāma so hoti, sace hoti sakiñcano** sapalibodho. Yo panāyaṃ yattha katthaci jātopi rāgādikiñcanābhāvena akiñcano, sabbagaṇṇapaṭinissaggena anādāno, **akiñcanaṃ anādānaṃ, tamaṃ brūmi brāhmaṇaṃ**. Kasmā? Yasmā bāhitapāpoti.

458. Kiñcabhiyyo sabbasaṃyojanaṃ chetvātiādi sattavīsati gāthā. Tattha **sabbasaṃyojananti** dasavidhasaṃyojanaṃ. **Na paritassatīti** taṇhāparitassanāya na paritassati. **Saṅgātiganti** rāgasāṅgādayo atikkantaṃ. **Visaṃyuttanti** catūhi yonīhi sabbakilesehi vā visaṃyuttaṃ.

Naddhinti upanāhaṃ. **Varattanti** taṇhaṃ. **Sandānanti** yuttapāsaṃ, diṭṭhipariyutṭhānassetam adhivacanaṃ. **Sahanukkamanti** anukkamo vuccati pāse pavesanagaṇṭhi, diṭṭhānusaṃyassetam nāmaṃ. **Ukkhattapalighanti** ettha palighoti avijjā. **Buddhanti** catusaccabuddhaṃ. **Titikkhattīti** khamati.

Khantibalanti adhivāsanaṃ khantibalaṃ. Sā pana sakiṃ uppannā balānīkaṃ nāma na hoti, punappunaṃ uppannā pana hoti. Tassā atthitāya **balānīkaṃ**.

Vatavantanti dhutaṅgavantaṃ. **Silavantanti** guṇavantaṃ. **Anussadanti** rāgādiussadaviraṇṇitaṃ. “Anussuta”ntipi pāṭho, anavassutanti attho. **Dantanti** nibbisevanaṃ.

Na limpatīti na allīyati. **Kāmesūti** kilesakāmaṃ vatthukāmesu.

Dukkhasa pajānāti, idheva khayanti ettha arahattaphalaṃ dukkhakkhayoti adhippetam. **Pajānātīti** adhigamavasena jānāti. **Pannabhāraṇti** ohitabhāraṃ, khandhakilesaabhisaṅkhārakāmaguṇabhāre otāretvā ṭhitaṃ. Visaṃyuttapadaṃ vuttatthameva.

Gambhīrapaññanti gambhīresu ārammaṇesu pavattapaññaṃ. **Medhāvinti** pakatipaññāya paññavantam.

Anāgārehi cūbhayanti anāgārehi ca viṣaṃsaṭṭhaṃ ubhayañca, dvīhipi cetehi viṣaṃsaṭṭhamevāti attho. **Anokasārinti** okaṃ vuccati pañcakāmaguṇālayo, taṃ anallīyamānanti attho. **Appicchanti** aniccham.

Tasesūti sataṇhesu. **Thāvaresūti** nittaṇhesu.

Attadaṇḍesūti gahitadaṇḍesu. **Nibbutanti** kilesanibbānena nibbutam. **Sādānesūti** saupādānesu.

Ohitoti patito.

459. Akakkasanti niddosaṃ. Sadoso hi rukkhopi sakakkasoti vuccati. **Viññāpaninti** atthaviññāpanikaṃ. **Saccanti** avisaṃvādikaṃ. **Udīrayeti** bhaṇati. **Yāya nābhisajjeti** yāya girāya parassa sajjanam vā lagganam vā na karoti, tādisaṃ aphaṇusaṃ giram bhāsātīti attho.

Dīghanti suttāruḷhabhaṇḍam. **Rassanti** vippakiṇṇabhaṇḍam. **Aṇunti** khuddakaṃ. **Thūlanti** mahantaṃ. **Subhāsubhanti** sundarāsundaram. Dīghabhaṇḍañhi appagghampi hoti mahagghampi. Rassādīsipi eseva nayo. Iti ettāvata na sabbam pariyādiṇṇam, “subhāsubha”nti iminā pana pariyādiṇṇam hoti.

Nirāsayanti nittaṇham.

Ālayāti taṇhālayā. **Aññāyāti** jānitvā. **Amatogadhanti** amatabbhantaram. **Anuppattanti** anupaviṭṭham.

Ubho saṅganti ubhayampetaṃ saṅgam. Puññañhi sagge laggāpeti, apuññaṃ apāye, tasmā ubhayampetaṃ saṅgati āha. **Upaccagāti** atīto.

Anāvilanti āvilakaraṇakilesavirahitaṃ. **Nandībhavaparikkhīṇanti** parikkhīṇanandiṃ parikkhīṇabhavaṃ.

“Yo ima”nti gāthāya avijjāyeva viṣaṃvādakaṭṭhena **palipatho**, mahāviduggatāya **duggaṃ**, saṃsaraṇaṭṭhena **saṃsāro**, mohanaṭṭhena **mohoti** vutto. **Tiṇṇoti** caturghaṭṭiṇṇo. **Pāraṅgatoti** nibbānam gato. **Jhāyīti** ārammaṇalakkhaṇūpanijjhānavasena jhāyī. **Anejoti** nittaṇho. **Anupādāya nibbutoti** kiñci gahaṇam aggahetvā sabbakilesanibbānena nibbuto.

Kāmeti duvidhepi kāme. **Anāgāroti** anāgāro hutvā. **Paribbajeti** paribbajati. **Kāmabhavaparikkhīṇanti** khīṇakāmaṃ khīṇabhavaṃ.

Mānusakaṃ yoganti mānusakaṃ pañcakāmaguṇayogaṃ. **Dibbaṃ yoganti** dibbaṃ pañcakāmaguṇayogaṃ. **Sabbayogavisamyuttanti** sabbakilesayogavisamyuttaṃ.

Ratinti pañcakāmaguṇaratim. **Aratinti** kusalabhāvanāya ukkaṇṭhitaṃ. **Vīranti** vīriyavantam.

Sugatanti sundaram ṭhānam gataṃ, sundarāya vā paṭipattiyā gataṃ.

Gatinti nibbattim. **Pureti** atīte. **Pacchāti** anāgate. **Majjheti** paccuppanne. **Kiñcananti** kiñcanakārako kilesa.

Mahesinti mahante guṇe pariyesanatthēna mahesiṃ. Vijiṭāvinanti vijitavijayaṃ.

460. Evaṃ bhagavā guṇato khīṇāsavaṃyeva brāhmaṇaṃ dassetvā ye jātito brāhmaṇoti abhinivesaṃ karonti, te idaṃ ajānantā, sāva nesam diṭṭhi duddiṭṭhīti dassento **samaññā hesāti** gāthādvayamāha. Tassattho – yadidaṃ brāhmaṇo khattiyo bhāradvājo vāsetṭhoti nāmagottaṃ pakappitaṃ kataṃ abhisankhataṃ, samaññā hesā lokasmiṃ, vohāramattanti attho. Kasmā? Yasmā **samuccā samudāgataṃ** samaññāya āgataṃ. Etañhi tattha tattha jātakāleyevassa ñāṭisālohitehi pakappitaṃ kataṃ. No ce naṃ evaṃ pakappeyyuṃ, na koci kiñci disvā ayaṃ brāhmaṇoti vā bhāradvājoti vā jāneyya. Evaṃ pakappitaṃ petam **dīgharattānusayitaṃ, diṭṭhigatamajānataṃ,** taṃ pakappitaṃ nāmagottaṃ “nāmagottamattametaṃ, vohāratthaṃ pakappita”nti, ajānantānaṃ sattānaṃ hadaye dīgharattaṃ diṭṭhigatamanusayitaṃ. Tassa anusayitattā taṃ nāmagottaṃ **ajānantā no pabrunti,** “jātiyā hoti brāhmaṇo”ti ajānantāva evaṃ vadantīti vuttaṃ hoti.

Evaṃ “ye ‘jātito brāhmaṇo’ti abhinivesaṃ karonti, te idaṃ vohāramattaṃ ajānantā, sāva nesam diṭṭhi duddiṭṭhī”ti dassetvā idāni nippariyāyameva jātivādaṃ paṭikkhipanto kammavādañca patiṭṭhapento **na jaccāti**ādimaṃha. Tattha “kammunā”ti upaḍḍhagāthāya vitthāraṇatthaṃ **kassako kammunā**tiādi vuttaṃ. Tattha **kammunā**ti paccuppannaena kasikammādinibbattakacetanākammunā.

Paṭiccasamuppādadassāti iminā paccayena evaṃ hotīti evaṃ paṭiccasamuppādadassāvino. **Kammavipākakovidāti** sammānāvamaṇārakule kammavasena uppatti hoti, aññāpi hīnapaṇītātā hīnapaṇīte kamme vipaccamāne hotīti. Evaṃ kammavipākakusalā.

Kammunā vattatīti gāthāya pana lokoti vā pajāti vā sattoti vā ekoyevattho, vacanamattabhedo. Purimapadena cettha “atthi brahmā mahābrahmā seṭṭho sajitā”ti diṭṭhiyā paṭisedho veditabbo. Kammunā hi tāsu tāsu gatīsu vattati loko, tassa ko sajitāti. Dutiyapadena “evaṃ kammunā nibbattopi ca pavattepi atītapaccuppannabhedenā kammunā vattati, sukhadukkhāni paccanubhonto hīnapaṇītādībhedañca āpajjanto pavattatī”ti dasseti. Tatiyena tamevatthaṃ nigameti “evaṃ sabbathāpi kammanibandhanā sattā kammeneva baddhā hutvā pavattanti, na aññathā”ti. Catutthena tametthaṃ upamāya vibhāveti. Yathā hi rathassa yāyato āṇi nibandhanaṃ hoti, na tāya anibaddho yāti, evaṃ lokassa nibbattato ca pavattato ca kammaṃ nibandhanaṃ, na tena anibaddho nibbattati na pavattati.

Idāni yasmā evaṃ kammanibandhano loko, tasmā seṭṭhena kammunā seṭṭhabhāvaṃ dassento **tapenāti** gāthādvayamāha. Tattha **tapenāti** dhutaṅgatapena. **Brahmacariyenāti** methunaviratiyā. **Samyamenāti** sīlena. **Damenāti** indriyadamenā. **Etenāti** etena seṭṭhena parisuddhena brahmabhūtena kammunā brāhmaṇo hoti. Kasmā? Yasmā **etaṃ brāhmaṇamuttamaṃ,** yasmā etaṃ kammaṃ uttamo brāhmaṇaguṇoti vuttaṃ hoti. “Brahmāna”ntipi pāṭho. Ayaṃ panettha vacanattho – brahmaṃ ānetīti brahmānaṃ, brāhmaṇabhāvaṃ āvhatīti vuttaṃ hoti.

Dutiyagāthāya **santoti** santakilesa. **Brahmā sakkoti** brahmā ca sakko ca, yo evarūpo, so na kevalaṃ brāhmaṇo, atha kho brahmā ca sakko ca so vijānataṃ paṇḍitānaṃ, evaṃ vāsetṭha, jānāhīti vuttaṃ hoti. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Vāsetṭhasuttavaṇṇanā niṭṭhitā.

9. Subhasuttavaṇṇanā

462. Evaṃ me sutanti subhasuttaṃ. Tattha **todeyyaputtoti** tudigāmaṃvāsino todeyyabrāhmaṇassa putto. **Ārādhako hotīti** sampādako hoti paripūrako. **Ñāyaṃ dhammanti** kāraṇadhammaṃ. **Kusalanti** anavajjaṃ.

463. Micchāpaṭipattinti niyyānikam akusalapaṭipadam. **Sammāpaṭipattinti** niyyānikam kusalaṭipadam.

Mahaṭṭhantiādīsu mahantehi veyyāvaccakarehi vā upakaraṇehi vā bahūhi attho etthāhi **mahaṭṭham**. Mahantāni nāmaggaḥamaṅgalādīni kiccāni etthāhi **mahākiccaṃ**. Idaṃ ajja kattabbaṃ, idaṃ sveti evaṃ mahantāni adhikārasaṅkhātāni adhikaraṇāni etthāhi **mahādhikaraṇaṃ**. Bahūnaṃ kamme yuttappayuttatāvasena pīlāsāṅkhāto mahāsamārambho etthāhi **mahāsamārambhaṃ**. **Gharāvāsakammaṭṭhānanti** gharāvāsakammaṃ. Evaṃ sabbavāresu attho veditabbo. Kasikamme cettha naṅgalakoṭiṃ ādiṃ katvā upakaraṇānaṃ pariyesanavasena mahaṭṭhatā, vaṇijjāya yathāṭṭhitāmyeva bhaṇḍaṃ gahetvā parivattanavasena appaṭṭhatā veditabbā. **Vipajjamānanti** avuṭṭhiativuṭṭhiādīhi kasikammaṃ, maṇisuvanṇādīsu acchekatādīhi ca vaṇijjakammaṃ appaphalaṃ hoti, mūlacchedampi pāpuṇāti. Vipariyāyena sampajjamānaṃ mahapphalaṃ cūlantevāsikassa viya.

464. Evameva khoti yathā kasikammaṭṭhānaṃ vipajjamānaṃ appaphalaṃ hoti, evaṃ gharāvāsakammaṭṭhānampi. Akatakalyāṇo hi kālaṃ katvā niraye nibbattati. Mahādattasenāpati nāma kireko brāhmaṇabhatto ahoṣi, tassa maraṇasamaye nirayo upaṭṭhāsi. So brāhmaṇehi “kiṃ passasi”ti vutto? Lohitagharanti āha. Brahmalo ko bho esoti. Brahmalo ko nāma bho kahanti? Uparīti. Mayhaṃ heṭṭhā upaṭṭhātīti. Kiñcāpi heṭṭhā upaṭṭhātī, tathāpi uparīti kālaṃ katvā niraye nibbatto. “Iminā ambhākaṃ yaññe doso dinno”ti sahasaṃ gahetvā nīharituṃ adamsu. Sampajjamānaṃ pana mahapphalaṃ hoti. Katakalyāṇo hi kālaṃ katvā sagge nibbattati. Sakalāya guttilavimānakathāya dīpetabbaṃ. Yathā pana taṃ vaṇijjakammaṭṭhānaṃ vipajjamānaṃ appaphalaṃ hoti, evaṃ sīlesu aparipūrākārino anesanāya yuttassa pabbajjakammaṭṭhānampi. Evarūpā hi neva jhānādisukhaṃ na saggamokkhaṃ labhati. Sampajjamānaṃ pana mahapphalaṃ hoti. Sīlāni hi pūretvā vipassanaṃ vaḍḍhento arahattampi pāpuṇāti.

Brāhmaṇā, bho gotamoti idha kiṃ pucchāmīti pucchati? Brāhmaṇā vadanti – “pabbajito ime pañca dhamme pūretuṃ samattho nāma natthi, gahaṭṭhova pūreti”ti. Samaṇo pana gotamo – “gihissa vā ahaṃ māṇava pabbajitassa vā”ti punappunaṃ vadati, neva pabbajitaṃ muñcati, mayhameva pucchaṃ maññe na sallakkhetīti cāgasīsenā pañca dhamme pucchāmīti pucchati. **Sace te agarūti** sace tuyhaṃ yathā brāhmaṇā paññapenti, tathā idha bhāsituṃ bhāriyaṃ na hoti, yadi na koci aphāsukabhāvo hoti, bhāsassūti attho. **Na kho me, bhoti** kiṃ sandhāyāha? Paṇḍitapaṭirūpakānañhi santike kathetuṃ dukkhaṃ hoti, te pade pade akkhare akkhare dosameva vadanti. Ekantapaṇḍitā pana kathaṃ sutvā sukathitaṃ pasaṃsanti, dukkathite pālīpadaatthabyañjanesu yaṃ yaṃ virujjhati, taṃ taṃ ujum katvā denti. Bhagavatā ca sadiso ekantapaṇḍito nāma natthi, tenāha “na kho me, bho gotama, garu, yatthassu bhavanto vā nisinno bhavantarūpo vā”ti. **Saccanti** vacīsaccaṃ. **Tapanti** tapacariyaṃ. **Brahmacariyanti** methunaviraṭiṃ. **Ajjenanti** mantagahaṇaṃ. **Cāganti** āmisapariccāgaṃ.

466. Pāpito bhavissatīti. Ajānanabhāvaṃ pāpito bhavissati. **Etadvocāti** bhagavatā andhaveṇūpamāya niggahito taṃ paccāharituṃ asakkonto yathā nāma dubbalasunakho migam uṭṭhapetvā sāmikassa abhimukhaṃ katvā sayam apasakkati, evamevaṃ ācariyaṃ apadisanto evaṃ “brāhmaṇo”tiādivacanaṃ avoca. Tattha **pokkharasātīti** idaṃ tassa nāmaṃ, “pokkharasāyī”tipi vuccati. Tassa kira kāyo setapokkharasadiso devanagare ussāpitarajatatoranaṃ viya sobhati, sīsam panassa kālavāṇṇaindanīlamayaṃ viya, massupī candamaṇḍale kālamegharāji viya khāyati, akkhīni nīluppalasadisāni, nāsā rajatapanālikā viya suvaṭṭitā suparisuddhā, hatthapādatalāni ceva mukhañca katalākhārasaparikammaṃ viya sobhati. Ativiya sobhaggappatto brāhmaṇassa attabhāvo. Arājake ṭhāne rājānaṃ kātuṃ yuttamimaṃ brāhmaṇaṃ, evamesa sassiriko, iti naṃ pokkharasadisattā “pokkharasātī”ti sañjānanti, pokkhare pana so nibbatto, na mātukucchiyanti iti naṃ pokkhare sayitattā “pokkharasāyī”tipi sañjānanti. **Opamaññoti** upamaññagotto. **Subhagavanikoti** ukkaṭṭhāya subhagavanassa issaro. **Hassakamyevāti** hasitabbakaññeva. **Nāmakamyevāti** lāmakamyeva. Tadeva taṃ atthābhāvena **rittakaṃ**. Rittakattā ca **tucchakaṃ**. Idāni naṃ bhagavā sācariyakaṃ niggaṇḥituṃ **kiṃ pana māṇavāti**ādīmāha.

467. Tattha **katamā nesam seyyoti** katamā vācā tesam seyyo, pāsamsataroti attho. **Sammuccāti** sammutiya lokavohārena. **Mantāti** tulayitvā pariggaṇhitvā. **Paṭisaṅkhāyāti** jānitvā. **Atthasamhitanti** kāraṇanissitaṃ. **Evaṃ santeti** lokavohāraṃ amuñcivā tulayitvā jānitvā kāraṇanissitaṃ katvā kathitāya seyyabhāve sati. **Āvutoti** āvarito. **Nivutoti** nivārito. **Ophuṭoti** onaddho. **Pariyonaddhoti** paliveṭṭhito.

468. **Gadhitoti**ādīni vuttatthāneva. **Sace taṃ, bho gotama, ṭhānanti** sace etaṃ kāraṇamatthi. **Svāssāti** dhūmachārikādīnaṃ abhāvena so assa aggi accimā ca vaṇṇimā ca pabhassaro cāti. **Tathūpamāhaṃ māṇavāti** tappaṭibhāgaṃ ahaṃ. Idaṃ vuttaṃ hoti – yatheva hi tiṇakaṭṭhupādānaṃ paṭicca jalamāno aggi dhūmachārikaṅgārānaṃ atthitāya sadoso hoti, evamevaṃ pañca kāmagaṇe paṭicca uppanā pīti jātijarābyādhimaraṇasokādīnaṃ atthitāya sadosā. Yathā pana pariccattatiṇakaṭṭhupādāno dhūmādīnaṃ abhāvena parisuddho, evamevaṃ lokuttarajjhānadvayasampayuttā pīti jātiādīnaṃ abhāvena parisuddhāti attho.

469. Idāni ye te brāhmaṇehi cāgasīsena pañca dhammā paññattā, tepi yasmā pañceva hutvā na niccalā tiṭṭhanti, anukampājātikena saddhiṃ cha āpajjanti. Tasmā taṃ dosaṃ dassetuṃ **ye te māṇavāti**ādīmāha. Tattha **anukampājātikanti** anukampāsabhāvaṃ.

Kattha bahulaṃ samanupassasīti idaṃ bhagavā yasmā – “esa ime pañca dhamme pabbajito paripūretuṃ samattho nāma natthi, gahaṭṭho paripūreti”ti āha, tasmā – “pabbajitova ime pūreti, gahaṭṭho pūretuṃ samattho nāma natthi”ti teneva mukhena bhaṇāpetuṃ pucchati.

Na satataṃ samitaṃ saccavādītiādīsū gahaṭṭho aññasmiṃ asati vaḷaṇṇjanakamusāvādampi karotiyeva, pabbajitā asinā sīse chijjantepi dve kathā na kathenti. Gahaṭṭho ca antotemāsamattampi sikkhāpadaṃ rakkhituṃ na sakkoti, pabbajito niccomeva tapassī sīlavā tapanissitako hoti. Gahaṭṭho māssassa aṭṭhadivasamattampi uposathakammaṃ kātuṃ na sakkoti, pabbajitā yāvajīvaṃ brahmacārino honti. Gahaṭṭho ratanasuttamaṅgalasuttamattampi potthake likhitvā ṭhapeti, pabbajitā niccaṃ sajjhāyanti. Gahaṭṭho salākabhattampi akhaṇḍaṃ katvā dātuṃ na sakkoti, pabbajitā aññasmiṃ asati kākasunakhādīnampi piṇḍaṃ denti, bhaṇḍaggaḥakadaharassapi patte pakkhipantevāti evamattho daṭṭhabbo. **Cittassāhametenti** ahaṃ ete pañca dhamme mettacittassa parivāre vadāmīti attho.

470. **Jātavaddhoti** jāto ca vaḍḍhito ca. Yo hi kevalaṃ tattha jātova hoti, aññattha vaḍḍhito, tassa samantā gāmamaggā na sabbaso paccakkhā honti, tasmā jātavaddhoti āha. Jātavaddhopi hi yo ciraṃ nikkhanto, tassa na sabbaso paccakkhā honti, tasmā **tāvadeva avasaṭanti** āha, taṃkhaṇameva nikkhantanti attho. **Dandhāyitattanti** “ayaṃ nu kho maggo ayaṃ na nu kho”ti kaṅkhāvasena cirāyitattaṃ. **Vitthāyitattanti** yathā sukhumaṃ atthajātaṃ sahasā pucchitassa kassaci sarīraṃ thaddhabhāvaṃ gaṇhāti, evaṃ thaddhabhāvagahaṇaṃ. **Natvevāti** iminā sabbaññutaññāssa appaṭihatabhāvaṃ dasseti. Tassa hi purisassa mārāvaṭṭanādīnaṃ vasena siyā ñāssa paṭighāto, tena so dandhāyeyya vā vitthāyeyya vā, sabbaññutaññānaṃ pana appaṭihataṃ, na sakkā tassa kenaci antarāyo kātunti dīpeti.

Seyyathāpi māṇava balavā saṅkhadhamoti ettha **balavāti** balasampanno. **Saṅkhadhamoti** saṅkhadhamako. **Appakasirenāti** akicchena adukkheṇa. Dubbalo hi saṅkhadhamako saṅkhaṃ dhamantopi na sakkoti catasso disā sareṇa viññāpetuṃ, nāssa saṅkhasaddo sabbaso phari. Balavato pana vipphāriko hoti, tasmā balavāti āha. **Mettāya cetovimuttiyāti** ettha **mettāyāti** vutte upacāropi appanāpi vaṭṭati, **cetovimuttiyāti** vutte pana appanāva vaṭṭati. **Yaṃ pamāṇakataṃ kammanti** pamāṇakataṃ kammaṃ nāma kāmāvacaraṃ vuccati, appamāṇakataṃ kammaṃ nāma rūpārūpāvacaraṃ. Tesupi idha brahmavihāraḥkammañneva adhippettaṃ. Tañhi pamāṇaṃ atikkamitvā odhisakaanodhisaka disāpharaṇavasena vaḍḍhetvā katattā appamāṇakataṃ vuccati. **Na taṃ tatrāvasissati, na taṃ tatrāvatiṭṭhatīti** taṃ kāmāvacarakammaṃ tasmīṃ rūpārūpāvacarakamme na ohīyati na tiṭṭhati. Kiṃ vuttaṃ hoti? Kāmāvacarakammaṃ tassa rūpārūpāvacarakammaṃ antarā laggituṃ vā ṭhātuṃ vā rūpārūpāvacarakammaṃ pharivā pariyādiyitvā attano okāsaṃ gahetvā patiṭṭhātuṃ vā na sakkoti, aha

kho rūpārūpāvacarakammameva kāmāvacaraṃ mahogho viya parittaudakaṃ pharivā pariyādiyivā attano okāsaṃ gahetvā tiṭṭhati, tassa vipākaṃ paṭibāhitvā sayameva brahmasahabyataṃ upaneti. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Subhasuttavaṇṇanā niṭṭhitā.

10. Saṅgāravasuttavaṇṇanā

473. Evaṃ me sutanti saṅgāravasuttaṃ. Tattha cañcalikappeti evaṃnāmake gāme.

Abhippasannāti aveccappasādavasena pasannā. Sā kira sotāpannā ariyasāvikā bhāradvājagottassa brāhmaṇassa bhariyā. So brāhmaṇo pubbe kālena kālaṃ brāhmaṇe nimantevā tesam sakkāraṃ karoti. Imaṃ pana brāhmaṇiṃ gharaṃ ānetvā abhirūpāya mahākulāya brāhmaṇiyā cittaṃ kopetuṃ asakkonto brāhmaṇānaṃ sakkāraṃ kātuṃ nāsakkhi. Atha naṃ brāhmaṇā diṭṭhadiṭṭhaṭṭhāne – “nayidāni tvam brāhmaṇaladdhiko, ekāhampi brāhmaṇānaṃ sakkāraṃ na karosī”ti nippīlenti. So gharaṃ āgantvā brāhmaṇiyā tamatthaṃ ārocetvā – “sace, bhoti ekadivasam mukhaṃ rakkhituṃ sakkuṇeyyāsi, brāhmaṇānaṃ ekadivasam bhikkhaṃ dadeyya”nti āha. Tuyhaṃ deyyadhammaṃ rucanakaṭṭhāne dehi, kiṃ mayhaṃ etthāti. So brāhmaṇe nimantevā appodakaṃ pāyasaṃ pacāpetvā gharañca sujjhāpetvā āsanāni paññāpetvā brāhmaṇe nisīdāpesi. Brāhmaṇī mahāsātakam nivāsetvā kaṭacchuṃ gahetvā parivisanti dussakaṇṇake pakkhalitvā “brāhmaṇe parivisāmi”ti saññampi akatvā āsevanavasena sahasā sathhārameva anussarivā udānaṃ udānesi.

Brāhmaṇā udānaṃ sutvā “ubhatopakkhiko esa samaṇassa gotamassa sahāyo, nāssa deyyadhammaṃ gaṇhissāmā”ti kupitā bhojanāni chaḍḍetvā nikkhamiṃsu. Brāhmaṇo – “nanu paṭhamāyeva taṃ avacaṃ ‘ajjekadivasam mukhaṃ rakkheyyāsi’ti, ettakam te khīrañca taṇḍulādāni ca nāsītāni”ti ativiya kopavasam upagato – “evameva panāyam vasalī yasmim vā tasmim vā tassa muṇḍakassa samaṇassa vaṇṇam bhāsati, idāni tyāham vasalī tassa sathhuno vādam āropessāmi”ti āha. Atha naṃ brāhmaṇī “gaccha tvam, brāhmaṇa, gantvā vijānissasi”ti vatvā “na khvāham taṃ, brāhmaṇa, passāmi sadevake loke...pe... vādam āropeyyā”tiādimāha. So sathhāram upasaṅkamitvā –

“Kimsu chetvā sukhaṃ seti, kimsu chetvā na socati;
Kissassu ekadhammassa, vadhaṃ rocesi gotamā”ti. (saṃ. ni. 1.187) –

Pañham pucchi. Sathhā āha –

“Kodhaṃ chetvā sukhaṃ seti, kodhaṃ chetvā na socati;
Kodhassa visamūlassa, madhuraggassa brāhmaṇa;
Vadhaṃ ariyā pasamsanti, tañhi chetvā na socati”ti. (saṃ. ni. 1.187) –

Pañham kathesi. So pabbajivā arahattaṃ patto. Tasseva kaniṭṭhabhātā akkosakabhāradvājo nāma “bhātā me pabbajito”ti sutvā bhagavantaṃ upasaṅkamitvā akkositvā bhagavatā vinīto pabbajivā arahattaṃ patto. Aparo tassa kaniṭṭho sundarikabhāradvājo nāma. Sopi bhagavantaṃ upasaṅkamitvā pañham pucchitvā vissajjanaṃ sutvā pabbajivā arahattaṃ patto. Aparo tassa kaniṭṭho piṅgalabhāradvājo nāma. So pañham pucchitvā pañhabyākaraṇapariyosāne pabbajivā arahattaṃ patto. **Saṅgāravo māṇavoti** ayam tesam sabbakaniṭṭho tasmim divase brāhmaṇehi saddhiṃ ekabhattagge nisinnō. **Avabhūtāvāti** avaḍḍhibhūtā avamaṅgalabhūtāyeva. **Parabhūtāvāti** vināsam pattāyeva. **Vijjamānānti** vijjamānesu. **Sīlapaññānti** sīlañca ñāṇaṃ na jānāsi.

474. Diṭṭhadhammābhiññāvosānapāramippattāti diṭṭhadhamme abhiññāte imasmiññeva attabhāve abhijānitvā vositavosānā hutvā pāramisaṅkhātaṃ sabbadhammānaṃ pārabhūtaṃ nibbānaṃ

pattā mayanti vatvā ādibrahmacariyaṃ paṭijānantīti attho. **Ādibrahmacariyanti** brahmacariyassa ādibhūtā uppādakā janakāti evaṃ paṭijānantīti vuttaṃ hoti. **Takkīti** takkagāhī. **Vīmaṃsīti** vīmaṃsako, paññācāraṃ carāpetvā evaṃvādī. **Tesāhamasmīti** tesāṃ sammāsambuddhānaṃ ahamasmi aññataro.

485. Aṭṭhitavatanti aṭṭhitatapaṃ, assa padhānapadena saddhiṃ sambandho, tathā sappurisapadassa. Idañhi vuttaṃ hoti – bhoto gotamassa aṭṭhitapadhānavataṃ ahosi, sappurisapadhānavataṃ ahosīti. **Atthi devāti puṭṭho samānoti** idaṃ māṇavo “sammāsambuddho ajānantova pakāsesī”’ti saññāya āha. **Evaṃ santeti** tumhākaṃ ajānanabhāve sante. **Tucchaṃ musā hotīti** tumhākaṃ kathā aphaḷā nipphalā hoti. Evaṃ māṇavo bhagavantaṃ musāvādena niggaṇhāti nāma. **Viññunā purisenāti** paṇḍitena manussena. Tvaṃ pana aviññutāya mayā byākatampi na jānāsīti dīpeti. **Uccena sammatanti** uccena saddena sammatatāṃ pākaṭaṃ lokasmiṃ. **Adhidevāti** susudārakāpi hi devā nāma honti, deviyo nāma honti devā pana adhidevā nāma, loke devo devīti laddhanāmehi manussehi adhikāti attho. Sesāṃ sabbattha uttānamevāti.

Papañcasūdaniyā majjhimanikāyaṭṭhakathāya

Saṅgārasuttavaṇṇanā niṭṭhitā.

Pañcamavaggavaṇṇanā niṭṭhitā.

Majjhimapāṇṇāsa-aṭṭhakathā niṭṭhitā.